



¿KUNSA BIBLIAX
chiqpachapuni
YATICHI?

¿KUNSA BIBLIA *chiqpachapuni* YATICHI?

SUTIM QILLQT'ASMA

Kawkit apsutasa dibujonakaxa: ■ 7 jananza: American Bible Society jupanakankiwa
■ 19 jananza: Uraqixa: NASA ukan fotopawa ■ 24, 25 jananakanza: OMS de Edouard Boubat
ukan fotopawa ■ 88, 89 jananakanza: bomba jach'a phalläwixa: USAF fotot apst'atawa;
wawasti: OMS de W. Cutting fotot apst'atarakiwa

© 2006

Watch Tower Bible and Tract Society of Pennsylvania

Qillqirinaka

Watchtower Bible and Tract Society of New York, Inc.
Brooklyn, New York, U.S.A.

Associação Torre de Vigia de Bíblias e Tratados,
Rodovia SP-141, km 43, Cesário Lange, SP, 18285-901, Brasil

Noviembre 2013 maran lurata

Aka librox Uraqpachan Bibliat yatichañataki wakichatawa,
yanapt'añ munirinakan churäwinakapampiw uka
yatichäwix apasi. Janiw aljasiñapäkiti.

Jisk'a t'aqanakaxa *Qullan Arunaka*, 1992, Bibliata apst'atawa,
jan ukhamäkanixa qhanañchasiniwa. Kawkxanti MT lettranakampi
qhanañchaskixa *Machaka Testamento* Bibliata apst'atawa (uka Biblianakatxa
aka libron kunjam qillqatäkiti ukham qillqaqatawa). Ukat kawkxanti NM
lettranakampi qhanañchaskixa *Traducción del Nuevo Mundo de las Santas*
Escrituras (con referencias) español aruta apst'atarakiwa.

What Does the Bible Really Teach?
Aymara (bh-AP)

ISBN 978-85-7392-496-1

Made in Brazil
Brasilan lurata

AKANAKANIWA

JALJA

JANA

¿Diosax akhamañapti munpachäna?	3
1. ¿Kawkirisa Diosat chiqä yatichäwixa?	8
2. Bibliax Diosan apayanitawa	18
3. ¿Kunas Diosan amtapaxa aka Uraqitakixa?	27
4. ¿Khitis Jesucristoxa?	37
5. Qhispiyäwixa Diosan jiliri jach'a churäwipawa	47
6. ¿Kawkinkapxisa jiwatanakaxa?	57
7. ¡Jiwirinakasataki chiqpach suyt'äwi!	66
8. ¿Kunas Diosan Apnaqäwipaxa?	76
9. ¿'Qhipa urunakankxtanti'?	86
10. ¿Angelanakasa saxranakasa kunjamt'ayapxistusa?	96
11. ¿Kunatsa Diosax t'aqhisiñanaka utjayaskakpacha?	106
12. Diosatakjam sarnaqañäni	115
13. Jakäwxa Diosjama uñjapxañäni	125
14. Kunjamatsa familiasampi kususit jakassna	134
15. Diosan iyawsata yupaychäwi	144
16. Chiqä yupaychäwi tuqit sayt'asiñamawa	154
17. Diosar mayisisaw Jupar jak'achastanxa	164
18. Bautisasiña ukat Diosampi sarnaqaña	174
19. Diosan munasiñapan jakasiñäni	184
Juk'ampi yatxatañataki	194

¿Diosax akhamañapti munpachäna?

PERIÓDICO liyisasa, televisión uñch'ukisasa jan ukax radio isch'ukisasa, ¿kuna yatiyäwinakakis utjaski? ¡Ñanqha luräwinakakiw utjaski ukhamaraki ch'axwäwinakasa jaqi jiwthapiyirinakasa anchapuniwa! Llakinakamat jichhax amuyt'arakma. Mä familiaramasa jan ukax munat masimasa usutächi jan ukax chhaqtawayxchi, inas ukanakat wal llakisisksta. Inas Job chachjama jikxatasta, uka suma jaqisti akham sänwa: "Q'alpunwa llakimp" aynacht'ta sasa (Job 10:15).

Inas akham jiskt'asta:

- ¿Nätakis jan ukax taqi jaqinakatakisa Diosax akhamañapti munpachäna?
- ¿Jan walt'äwinakat mistsuñataki kawkinsa yanapt'a jikxatirista?
- ¿Sumankañax Uraqin utjaspati?

Ukanakxa Bibliaw sum qhanañchi.





**URAXINXA AKANAKWA DIOSAX
SUMAPTAYANI SASAW
BIBLIAX YATICHÍ.**

*"Diosax taqi jachanakapwa nayranakapatxa
picharani, janirakiw jiwañas, jachañas
utjxaniti, warariñas ni usuyasiñas"
(Apocalipsis 21:4).*

*"Suchunakasti taruja
qallunakjamaw
sink'usipxani"
(Isaías 35:6).*

*"Juykhunakax
uñjapxani[wa]"
(Isaías 35:5).*





*"Taqi jiwatanakasti [...]
jaktapxaniwa"
(Juan 5:28, 29).*


*"Janiw khitis
sis[xani]ti:
'Usutätwa' sasaxa"
(Isaías 33:24).*

*Jutirinakan "trigox [jan ukax
manq'añax] yapunakan jilarkir
utjpan" siwa (Salmo 72:16).*

BIBLIAN YATICHÄWINAKAPA SUM YATIQTÄTA

Pusimpi phisqampi uka jananaka uñxatasaxa samkakïpachaw sas janiw mäki amuyätati. Diosax ukhamäniw siwa, ukat Bibliax qhanañ-charakiwa kunjamsa ukanakxa phuqani.

Janiw ukakikiti. Bibliax yaticharakistuwa kunjamsa jichhasa k'uchiki sum jakassna. Jan walt'äwinakamatsa llakinakamatsa amuykipt'arakma. Inas qullqitächi, familia tuqitächisa jan ukax mä familiaramas usuntchi jan ukax jiwchi. Ukhamaxa, Bibliax uka jan walt'äwinakaru saykatañwa yanapistu, chuymacharakistuwa aka jiskt'anakaru sum qhanañchasa:




- *¿Kunatsa t'aqhistanxa?*
- *¿Kunjamsa llakinakaru saykatsna?*
- *¿Kunsa kamachsna familiasampi k'uchiki sum jakasiñasatakixa?*
- *Jiwatatxa, ¿jakañax utjaskakpachati?*
- *¿Jiwat familiaranakasampix wasitat uñjasiñäniti?*
- *¿Kunatsa Diosax arsutanakapxa phuqapuniniw sasax sisna?*

Aka qillqatanak liyisinxa, uñacht'aytawa Biblian yati-chāwinakapa yatxatañ munatama. Aka librowa yatxatañ yanapt'ātamxa. Sapa janan tukuyaparuxa sapa t'aqatakiw jiskt'anakax utji. Millón millón jaqinakawa Jehová Diosan Qhanañchirinakapan akhama jiskt'anakampi jaysanaka-pampi Biblia uñakipañaruxa khusapuniw sapxixa, jumata-kix ukhamarakispa ukwa munapxta. Kunsu *chiqpachapuni* Bibliax yatichi uka suma yatiqāwimanxa Diosaw yanapt'ātamxa.

BIBLIA UÑT'AÑÄNI

Bibliaxa 66 libronakani cartanakaniwa, jank'aki jikxataña-takixa jaljanakampiru (capítulos) jisk'a t'aqanakampiru (versículos) jalanuqt'atawa. Kunapachatì aka libron Bibliat thaqtañataki utjkani ukhaxa, sutxaru uñstiri nayrir jakhuxa, sañ muniwa libron jaljapa jan ukax cartan jaljapa, ukxarüki uka jakhuxa sañ munarakiwa jisk'a t'aqapa. Amuyañataki, "2 Timoteo 3:16" sañ muniwa: Timoteor payir qillqat carta, 3 jalja, 16 jisk'a t'aqa.

Aka libronkiri Bibliat apst'atanak thaqhätaxa, jank'akiw Biblia sum uñt'äta. ¿Janit sapüru Biblia liyiñaru uchaskas-ma? Sapüruti kimsa jan ukax phisqa jaljanaka liyitaxa, mä maranwa Biblia liyiñxa tukuyäta.



¿Kawkirisa Diosat chiqa yatichäwixa?

¿Diosax chiqpachapuniti munaspachistu?

¿Kunjamas Diosaxa? ¿Sutinipachati?

¿Jupar jak'achassnati?

UÑJIRÏPACHÄTAWA, wawanakax parlañ yatiqapxi ukhaxa, ¿walpunxay jiskt'asipxixa? Ari nayranakapampi kun uñja-sasa maynir uñkatasaxa jiskt'asipxapuniwa akham sasa: "¿Arumanakaxa kawkinkis intixa?", "¿Kunatsa warawaranakax k'ajani?" jan ukax "¿Khitis jamach'inakaru chhi-wiqiñ yatichi?". Uka jiskt'anakaru jaysañataki wal amuyt'asasa, awispax janiw kun sañjamäkisa. Ukatxa, suma jaysäwisa aka yaqha jiskt'ä-wiruwa uñtayaspa: "¿Kunatsa?".

² Janiw wawanakaki ukham jiskt'a-sipxirikiti. Jilsutäxtan ukhasa jiskt'asis-kakipuntanwa, inas kawkir puriñatakisa, chijinakar jan jalt'añatakisa jan ukax aliq yatiñatakikisa. Ukampisa walja jaqinakawa yaqhip jiskt'äwinakxa jan jiskt'asxapxiti, wakiskir jiskt'äwinak-sa armasxapxarakiwa. Janikiw jaysäwinakapsa thaqxapxiti.

³ Aka libron p'iqiñchäwipata, nayriri qallta jiskt'anakampita ukat

1, 2. ¿Kunatsa jiskt'asiñax wakispuni?

3. Walja jaqinakaxa, ¿kunatsa wali wakiskiri jiskt'anakan jaysäwinakapxa jan thaqhapki?



aka jaljan qallta jiskt'anakapampita amuyt'ma. Uka wakiskir jiskt'anakwa maynix jiskt'asispa. Ukampisa, walja jaqinakawa uka jiskt'anakan jaysäwinakapxa jan thaqhapkiti. ¿Kunatsa? ¿Uka jaysäwinakaxa Biblianpachati? Yaqhipanakatakixa Biblian jaysäwinakapaxa wali ch'amäkaspa ukhamawa. Yaqhanakasti jan phinq'achayasiñ laykuwa jan jiskt'asipkiti. Uka jiskt'äwinakaxa yupaychäwi irpirinakatakikaspa jan ukax yupaychäwin yatichirinakatakikaspa ukhamwa yaqhipanakax amuyapxaraki. ¿Kamsasmas jumaxa?

⁴ Jakañxat jiskt'anakaru jaysäwinakapxa yatiñ munpa-chätawa. Inas akham jiskt'asirista: "¿Kunatakis aka Uraqiru jutpachätanxa? ¿Akakipachati jakañaxa? ¿Kunjamas Diosaxa?". Ukanaxata amuyt'añamaxa wakispuniwa, atiniskaña ukat qhana jaysäwinakxa jikxatañkamawa thaqhäta. Jach'a yatichirit uñt'at Jesucristoxa akham sänwa: "Mayipxam, Diosax churapxätamwa; thaqapxam, jikxatapxarakitawa; punksa liqt'apxam, jist'aratäpaxarakitawa" sasa (Mateo 7:7).

⁵ Wakiskir jiskt'anakan jaysäwinakapa jikiñkam 'thaqasakäta ukhaxa', wali askitapwa yatita (Proverbios 2:1-5). Inas yaqha jaqinakax kuns sapxiristma, ukampisa uka jiskt'anakan jaysäwinakapaxa *utjiwa ukat jikxatarakismawa*. Bibliankiwa, ukat janirakiw ch'amäkiti. Ukati sipansa, kusi-siñampi suyt'äwimpi churistu, jichhürunakansa k'uchiki suma jakasiñwa yaticharakistu. Aka mä jiskt'ampi qalltañäni, waljaniw akham jiskt'asipxi.

¿JAN SINTT'ASIRI DIOSÄPACHATI?

⁶ Walja jaqinakawa ukhamaw sapxixa. Jupatix jiwasanakata llakisispaxa, janiw akhamxa jakasksnati sasaw sapxi.

4, 5. ¿Kawkiri wali wakiskiri jiskt'asiwinaksa jiskt'asiñasa, ukat kunatsa jaysäwinakap thaqhañasaxa?

6. ¿Kunatsa walja jaqinakaxa Diosax t'aqhisiñanakasat janis yatiñ munkaspa ukham amuyapxi?

Ch'axwäwinakampi, uñisiñanakampi ukat t'aqhisiñanakampi phuqantat pachanwa jakastanxa. Taqiniwa usunttan-sa, t'aqhistansa, taqininwa familiaranakasasa jiwarak. Ukat-wa yaqhipanakax akham sapxi: "Diosati munasistaspaxa, ¿janit qhispiykistaspa taqi aka jan walt'äwinakatxa?" sasa.

⁷ Ukampisa, yupaychäwinakan walja yatichirinakapaxa, Diosax janis sintt'asirikaspa ukhamwa jaqinakar amuyayapxi. Amuyt'añäni, kunapachati chijir puriñax utj-ki ukhaxa Diosan munañapawa sasaw sapxi. Mä arun-xa, Diosasa uka chijinakar puriykistaspa ukham sapxiwa. Ukampisa, ¿ukax chiqäpachati? ¿Kunsa Bibliax chiqpa-chapuni yatichi? Uka tuqitxa Santiago 1:13 akham siwa: "Kunapachatix maynix kuna jan wal lurañatakis yant'a-ta uñjaschi ukaxa, janiw amuyañapäkiti Diosas yant'kas-pa ukhamxa. Diosasti janiw kuna jan walimpis yant'kiti, ni khitirus yant'ar puriykarakiti". Ukhamaxa, taqi jan wal-t'äwinakatxa Diosax *janipuniw* juchanikiti (Job 34:10-12). Jan walinak utjayaskakchisa, jan walinak *aliqaki utjaya-ñampi*, jan walinakaru *puriyañampixa* janiw kikapkiti.

⁸ Amuyt'añäni, mä yatiñani munasir awkix yuqapampi utapan jakasipxaspa. Ukat yuqax awkir kutkatasisaxa utat sarxañ amtaspa, awkixa janirak jarkt'kaspati. Ukatxa uka yuqaxa jan wali sarnaqasaxa jan walinakaru purt'asispa, ¿awkiw ukhamar *puriyix* sasmati? Janiwa (Lucas 15:11-13). Ukhamarakiwa, jan wali sarnaqañ amtir jaqinakaruxa Diosax janirakiw jarkt'kiti, ukampisa ukaxa janiw sañ munkiti Diosas jupanakaru uka chijinakar *puriyikaspa* ukhama, jan ukasti jupanakpachaw purt'asisipki. Ukhamaxa uka jan

7. 1) ¿Kunatsa yupaychäwinakana yatichirinakapaxa Diosax janis sintt'asirikaspa ukham jaqinakaru amuyayapxi sasax sisna? 2) ¿T'a-qhisiwinakasatxa kunsa Bibliax chiqpachapuni yatichi?

8, 9. 1) ¿Jan walinak utjayañampi ukat jan walinakaru puriyañam-pi jan kikapätapxa kuna amuyt'äwimpisa jumax qhanañcht'asma? 2) ¿Jaqinakan jan wali sarnaqasipkakitapatxa kunatsa Diosar tum-pantañax jan walikaspa?

walt'äwinakampi t'aqhisiñata Diosar juchañchañaxa jani-puniw walikaspäti.

⁹ Diosaw yati kunatsa jaqinakaxa jichhakam ukhamaki jan wali sarnaqasipki. Niyakixay wali yatiñani ch'amani Luririsächixa, jupax janiw jiwasar kunsä qhanañchañapäkapunistuti. Ukampis munasiñap laykuwa qhanañchistu. 11 jaljanwa uka tuqitxa juk'ampi yatxatañäni. Ukampisa jupaxa janipuniw jan walt'äwinakarux puriykistaspati. Jan ukasti, Jupaw jan walt'äwinak chhaqtayani, uka suyt'äwi churistu (Isaías 33:2).

¹⁰ Ukhamaraki, Diosax qullanawa (Isaías 6:3). Ukax sañ muniwa q'umätapa jan q'añuchätätapa, jan ñanqha amtanitapa. Ukatwa Juparuxa taqi chuyma atinisiñasaxa, jaqinakaruxa janiw atinisiñjamäkiti, kunattixa awispax jan walinakwa lurapxi. Chiqä chuymani apnaqirinakasa janiw askichapkaspati ñanqha jaqinakan jan wali luräwinakapxa. Ukat sipansa Diosax taqi ch'amaniwa. T'aqhisiyir taqi jan walt'äwinakxa chhaqtayaspawa, ukxa phuqaniwa. Kunapachatix askichkani ukhaxa jan mayampitakiwa uka jan walinakxa chhaqtayxani (Salmo 37:9-11).

¿DIOSAX KUNJAMSA JIKXATASPACHA INA CH'USAT T'AQHISTAN UKHAXA?

¹¹ Akapachana ukat jakäwisana jan walt'äwinak uñjasaxa, ¿Diosax kunjams jikxataspacha? Jupax "aski kankañar muniriwa" sasaw Bibliax yatichi (Salmo 37:28). Kunatix waliki ukat jan waliki ukxa amuyaskapuniwa, taqi kasta ina ch'usat t'aqhisiñanakarusa uñisirakiwa. Bibliax siwa, nayrapachaxa jan walinakampi aka Uraqix phuqantatakän ukhaxa, "walirak chuymapxa usuyasina" (Génesis 6:5, 6). Diosaxa pachpakiskiwa (Malaquías 3:6). Jan walinakxa

10. ¿Kunatsa Diosax t'aqhisiyir taqi ñanqha luräwinakwa tukjani sas atinisiñasaxa?

11. 1) ¿Kunjamsa Diosax uñjpacha ina ch'usat t'aqhisiñanakaruxa?
2) ¿Kunjamsa Diosax jikxataspacha t'aqhistan ukhaxa?

uñisiskakiwa, t'aqhisitanakarusa khuyapayaskakiwa. Bibliax akham sistuwa: "Jupasti jumanakatxa llakisirakiwa" sasa (1 Pedro 5:7).


¹² ¿T'aqhistan ukhaxa Diosax chuymap ust'ayaspachaw sasax kunatsa sisna? Ukatakixa, yaqha uñacht'äwi uñjañäni. Jupar uñtasitwa jaqirux luratayna sasaw Bibliax yatichi (Génesis 1:26). Ukhamaxa, suma Diosätpatwa suma jaqirakitanxa. Sañäni, ¿jaqinakaxa ina ch'usat t'aqhisipxi ukhax sintt'asiritati? Jumarutix ukanakaxa chuym usuys-tamxa, Diosarux juk'ampwa chuymapxa usuyi.

¹³ Jaqinxaxa munasiñapapuniwa jilankixa. Ukansti Inuqirishjamarakitanwa, "Diosax munasiñawa" sasaw Bibliax yatichi (1 Juan 4:8). Diosax munasiriwa ukatwa jiwaxaxa munasirirakitanxa. Ina ch'usat t'aqhisiñanakampi jan walt'äwinakampi tukjañataki ch'amanisma ukhaxa, ¿janit tukjkasma? ¿Janit munasiñamasti uka lurañaru wiytkiristamxa? ¿Jisa! Ukhamarakiwa, Diosax akapachan jan walt'äwinakxa niyaw chhaqtayani sasax atinisismawa. Aka libron nayrër janjanakapan Diosan arsutanakapaxa janiw samkanakakikiti ni inamaya suyt'äwinakakikisa: Diosax ukham arsuwayi ukat phuqapuniniwa. Ukampisa, uka arsutanakaparu iyawsañatakixa wakisiwa juparu sum uñt'aña.

***Yaqhanakampi
uñt'asiñatakixa,
¿sutimpunxay
nayraqat yatiytaxa?
Ukhamarakiwa
Diosax sutipa
Biblian yatiyistu***



12, 13. 1) ¿Kunatsa munasiñanitanxa, ukat kunjamsa akapachan t'aqhisíwinakana uka munasiñax khuyapt'ayasiñaru wiytistu? 2) ¿Kunatsa Diosaxa niyawa akapachan jan walt'äwinakxa chhaqtayani sas atinisiñasaxa?



*Jehová Diosaw
munasiñani taqi kun Lurir Diosaxa
sasaw Bibliax yatichi*

JUPARU UÑT'ASMA UKWA DIOSAX MUNI

¹⁴ ¿Kunsa jumax nayraqat lurtaxa maynimpí uñt'ayasiñatakixa? ¿Sutimxay yatiytaxa? Ukhamaxa, ¿Diosax sutiñipachati? Walja yupaychäwinakax “Dios” jan ukax “Tatitu” sasaw yatichapxi, ukampisa ukanakax janiw sutipäkiti. Sutincháwinakawa, “rey” jan ukax “presidente” ukanakjama. Diosax walja sutincháwinakaniwa siw Bibliaxa, ukanakatsti “Dios” jan ukax “Tatitu” satawa. Ukampisa Diosan sutipxa Bibliaw yatichi: Jehová satawa. Salmo 83:18 akham siwa: “Juma sapak [“Jehová sutini”, NM] Diosätam

14. ¿Kunas Diosan sutipaxa, ukat kunatsa sutipatpuni aytasiñasaxa?

yatipxpan, aka uraqxar juma sapak Alaxpachankirítam yatipxarakpan”. Bibliamantí uka sutix jan uñstkchi ukhaxa, aka librona 195 janat 197 janakamwa uñxatäta ukawjanwa qhanañchasiski. Amparampi nayra qillqatanakanxa waranq waranqa kutiw Diosan sutipax uñsti. Ukatwa, Jehová Diosaxa sutipa yatiñama ukat sutipat aytasiñama munixa. Saraksnawa, Jupax khitisa ukwa Diosax Bibliampí yatichä-tamxa.

¹⁵ Dios pachpaw *Jehová* sutxa uchasi, uka sutisti wali jach’apuniwa. Taqi arsutanakapsa amtanakapsa phuqapuni-niwa, uk sañ muni.* Diosan sutipax jan kikpaniwa, uka sutix jupankakipuniwa. Chiqasa, kunayman tuqita jan kikpani Diosawa. Uka tuqit mä qhawqha uñjañäni.

* Diosan sutipax kun sañs muni ukat kunjams arsuña uka tuqitxa aka libron qhipa qhanañcht’äwipan uñxatäta, 195 janat 197 janakama.

15. ¿Kun sañs muni *Jehová* sutixa?

***Mä suma awkin
munasiñapaxa,
alaxpachankir
Awkisan jach’a
munasiñapwa
uñacht’ayistu***



¹⁶ Uñjtanwa kamsisa Jehová Diosatxa Salmo 83:18: ‘Aka uraqxar juma *sapakiw* Alaxpachankirıtaxa’ siwa. Ukhamaraki, jupa sapakiwa “Taqi ch’amani” sataxa. Job 37:23 siwa: “Taqi ch’amani Diosaxa janiw amuyt’añjamäkiti, jupax jach’awa, ch’amani chiqaparakiwa; jupax chiqapawa, janiw khitirus t’aqhisiykarakiti” sasa. “Taqi ch’amani” sutincha-xa, sañ muniwa Jehová Diosax taqi jakirinakat sipansa juk’ampi ch’amanıtapa. Jupjam ch’amanixa janiw khitis utj-kiti. 1 Timoteo 1:17 qillqatanxa Jehová Diosaxa “wiñay jach’a Rey” satawa. Ukasti amtayarakistuwa jupa sapaki wiñay wiñay jakirıtapa, ukxa tuqitxa jan kikpanirakiwa. Salmo 90:2 akham siwa: “Wiñayatpacha, wiñayatakiw jumax Diosätaxa” sasa. Uxat amuyañax muspharkañapuniwa.

¹⁷ Jupa sapakiwa Luririsaxa, uka tuqitwa jan kikpaniraki-xa. Apocalipsis 4:11 siwa: “Tata, nanakan Diosaxa, jumax askıtawa jach’añchäwi, gloria, ukhamarak munañaniña katuqañatakixa. Jumaw taqi kuns ina ch’usat lurtaxa, munañamatarakwa taqi kunas jakaskaraki, juman uskutaraki-wa”. Kunanakatix utjki ukanakaxa Jehová Luririsan lura-tawa: angelanakasa, alaxpachat k’ajaniri warawaranakasa, muxsa achunakasa, lamar qutankiri jawiranakankiri chall-wanakasa, taqi kunasa jupan luratawa.

¿JEHOVÁ DIOSARUX JAK’ACHASISMATI?

¹⁸ Wali muspharkañ ukham Diosätap yatisinxä, yaqhi-panakaxa axsarapxiwa. Diosax sinti jach’äkaspas jan ukax janis jiwasanakat kuns yatiñ munkaspa, ukham yaqhipa-nakaxa amuyapxi. ¿Ukham amuyañax waliti? Bibliax ja-niw ukham yatichkiti, jan ukasti Jehová Diosax “janiw ja-yankkiti sapaqat jiwasanakatxa” siwa (Hechos 17:27).

16, 17. ¿Jehová Diosatxa kunsä aka sutinchanakax yatichistu: 1) “Taqi ch’amani”? 2) “Wiñay jach’a Rey”? 3) “Luriri”?

18. ¿Kunatsa yaqhipanakax janiw Diosarux jak’achasksnati sasax sapxi, ukampisa kunsä Bibliax yatichi?

Ukampisa akham sistuwa: “Diosar jak’achasipxam, jupasti jumanakarux jak’achasirakiniwa” sasa (Santiago 4:8).

¹⁹ ¿Kunjamsa Inuqiriru jak’achasisma? Nayraqatxa, jan jaytjamti kunti jichhax yatiqaskta ukxa: Diosatxa taqi kun yatiqaskakma. Jesusax akham sänwa: “Aka wiñay jakañax juma sapa chiqpach Diosar uñt’añanwa utji, ukhamarak Jesucristoru kawkirirutix jumax khitankta ukaru” sasa (Juan 17:3). Chiqpachansa, kunjamti Bibliax yatichki, Jehová Diosaru ukat Jesusampiru uñt’añaxa ‘wiñay jakañaru’ apiriwa. “Diosax munasiñawa” ukxa yatiqawayx-tanwa (1 Juan 4:16). Jehová Diosaxa suma ukat mun-kaña walja Dioskankañanakaniwa. Amuyt’añäni, Bibliax siwa, jupaxa “khuyapayasiriraki[wa]. Janiw jank’aki cole-rasirikiti, jan ukasti jach’a munasiriwa, ukhamarak chiqa-raki” (Éxodo 34:6). ‘Munasiñani, juch pampachiri’ Dio-sawa (Salmo 86:5). Suma chuymampi suyt’asiriwa (2 Pe-dro 3:9). Diosax janirakiw jupankirinakarus jaytanukkiti (Salmo 94:14). Biblia liyiskakitàxa, yatiqätawa kunjamsa Jehová Diosax uka Dioskankañanakapxa uñachayi ukat juk’ampinakwa yatiqarakita.

²⁰ Chiqpachansa Diosaruxa janiw uñjksnati, kunattix ajayuwa (Juan 1:18; 4:24; 1 Timoteo 1:17). Ukampisa, Bi-bliaxa qhanañchiwa kunjamas Jupaxa. Salmo qillqirixa Jehová Diosan ‘qhapaq kankañap uñjasmawa’ sasaw säna (Salmo 27:4; Romanos 1:20). Jupat juk’ampi yatiqaskakità-xa, juk’ampwa uñt’äta, ukatxa juk’ampirakiw juparux mu-nasita ukat jak’achasirakita.

²¹ Juk’at juk’atwa yatiqäta kunatsa Bibliax ch’amañchis-tu Awkisarjam Diosarux uñjaña (Mateo 6:9). Janiw jakaña-ki churkistuti, jan ukasti sum jakasiñaswa munaraki, kun-

19. 1) ¿Kunjamsa Diosar jak’achasipxsna, ukatxa kunsa katuqañäni?

2) ¿Dioskankañanakatxa kawkiris jumarux wal muspharaytamxa?

20-22. 1) Diosarux janiw uñjktanti, ¿ukampisa Jupar jak’achassnati?, uk qhanañcht’ma. 2) ¿Yaqhipanakaxa yanapt’añ munasaxa kamsas sapxiristam, ukampisa kuna lurañamasa wakisipxa?

jamti mä suma awkixa wawanakapatakix munki ukhama (Salmo 36:9). Jehová Diosan munasitapäsnawa jan ukax amigopäsnawa sasaw Bibliax yaticharaki (Santiago 2:23). ¡Amuyt'ma, jumaxa taqi kun Inuqiri jach'a Diosan munasitapäsmawa!

²² Bibliat juk'ampi yatiqaskakita ukhaxa, inasa yaqhipanakaxa yanapt'añ munasaxa jan yatiqxämti sapxiristam askimatakikaspas ukhama. Mayjt'xaniw sasaw llakisipxaspa, ukatwa ukham sapxiristamxa. Jan khitimpis jarkt'aya-simti, Diosan munasitapäñaxa wali khusapuniwa.

²³ Chiqasa, qalltanxa inasa taqpach yatichäwinakxa jan amuyt'kchitati, yanap mayiñxa janiw axsarätati. Jesusax wawanakjama alt'at chuymaniñaw sasaw säna (Mateo 18:2-4). Wawanakaxa jiskt'asipxapuniwa. Jiskt'anakamaru jaysäwinakapa jikxatañamwa Diosax muni. Diosat wal yatxatañ muniri nayra jaqinakatarakwa Biblianxa parli. Qillqatanakxa wali sum uñakipapxäna ukhamatwa kunatix chiqäki ukxa sumpuni yatiqapxatayna (Hechos 17:11).

²⁴ Biblia uñakipasakipuniwa Jehová Diosarux uñt'sna, Bibliax janiw yaqha libronakjamäkiti. ¿Kunatsa? Payir jaljanwa uk yatiquañäni.

23, 24. 1) Kuntä yatiqaskta ukatxa, ¿kunatsa jiskt'asiñ jan axsarañä-maki? 2) ¿Kunsa payir jaljanxa yatiquañäni?

KUNSA BIBLIA X YATICH

- Diosaxa jumat llakisipuniwa (1 Pedro 5:7).
- Diosaxa Jehová satawa (Salmo 83:18, NM).
- Jehová Diosaxa jak'achasipxita siwa (Santiago 4:8).
- Jehová Diosaxa munasiri, khuyapayasiri, suma Diosawa (Éxodo 34:6; 1 Juan 4:8, 16).

Bibliax Diosan apayanitawa

¿Kunatsa Bibliax jan yaqha libronakjamäki?

**¿Jan walt'äwinakaru saykatañatakixa
Bibliax kunjamsa yanapistu?**

**¿Kunatsa Biblian profecianakaparux
phuqasipuniniw sasax sisna?**

¿MUNAT masimata mä suma churäwi katuqirritati? Uk katuqasaxa wal kusist'pachätaxa. Uka churäwimpixa, jumar wal munasitapwa uñacht'ayi, ukat jumax wal yuspärt'arak-pachätaxa.

² Ukhamarakiwa, Bibliaxa Diosan apayanita suma churäwipawa, wal yuspärañasarakiwa. Uka jan kikpani libroxa kunaymaninakatwa yatiyistu, jan uka librokaspaxa janiw kunjamatsa ukanakxa yatksnati. Alaxpachasa, warawarankasa, aka Uraqisa ukat nayriri chacha warmisa kunjam luratäpxataynasa ukanakxatwa yatiyistu. Ukatxa, llakinakaru, jan walt'äwinakaru saykatañsa yaticharakistuwa. Ukat kunjamsa Diosax amtanakapxa phuqani aka Uraqi sumaptayañatakixa ukanakatsa Bibliax qhanañcharakistuwa. ¡Bibliax chuymar purt'kir suma churäwipuniwa!

³ Biblia apayaniri Jehová Diosxatwa yatiyarakistu, ukatwa Bibliaxa chuymar purt'kir suma churäwixa. Uka libro churasaxa, Diosax sum uñt'ayasiñ munatapwa yatiyistu. Chiqasa, Diosar jak'achasiñwa Bibliax yanapistu.

⁴ ¿Jumax Biblianitati? Waljaniw Biblianipxixa. Phuqat-

1, 2. ¿Kunatsa Bibliaxa chuymar purt'kir Diosan suma churäwipaw sisnaxa?

3. ¿Kunsa Jehová Diosax Biblia churasax yatiyistu ukat kunatsa uka churäwix chuymar purt'kirixa?

4. Biblia lakinuqäwitxa, ¿kunas wal muspharañjamaxa?



**Jehová Diosan Qhanañchirinakapaxa
walja arunakaruwa Biblia jaqukipapxi**

pachasa jan ukax chikatakisa Bibliax niya pä waranqa kim-sa patak arunakan lakinuqatawa, ukhamasti uraqpachanxa sapa tunkanitxa llätunkaniw Biblianïpxi. *Sapa semanana* niya mä millón jilaw Bibliaxa lakinuqasi, jichhakamaxa millón millón Biblianakaw phuqatpacha jan ukax chikatakisa luraswayi. Ukham yaqha libroxa janipuniw utjkaspati.

⁵ Ukatxa, Bibliaxa “Diosan amuyt’ayatawa” (2 Timoteo 3:16). ¿Kamsañs uka arunakax munpacha? Biblia pachpaw akham qhanañchistu: “Diosan qullan jaqinakapawa Qullan Ajayumpi amuyt’ayatäsina parlapxi” sasa (2 Pedro 1:21, *MT*). Mä awkisa yuqaparu carta qillqarapita siskaspa ukhamawa. Niyakixay awkin arunakapanïchixa ukat amuyunakapanïchixa, uka cartax *awkinkiwa*, janiw yuqapankiti. Ukhamarakiwa, Bibliaxa janiw qillqiri jaqinakana arunakapanïkiti, jan ukasti Diosan arunakapaniwa. Ukhamasti chiqpachansa Bibliax “Diosan arunakapawa” (1 Tesalonicenses 2:13).

5. ¿Kamsañs munpacha, Bibliaxa “Diosan amuyt’ayatawa” siski uka arunakaxa?

JAN MAY MAY PARLIR CHIQAP LIBROWA

⁶ Bibliaxa 1.600 ukha maranakanwa qillqasina, qillqirinakapaxa janiw mä tiemponaki jakapkänti, kunayman sar-naqasirïpxänwa, challwa katurinaka, yapuchirinaka, uwij awatirinaka, profetanaka, reyinaka, ukat jucha t'aqirinaka, ukham sar-naqasirïpxanwa. Ukata, Lucas libro qillqirixa qu-llirïnwa. Ukhamasti kunayman jakasirïpxänwa. Ukampisa Bibliaxa qalltatpacha tukuykamaxa mä amuyukiwa, janiw may may parlkiti.*

⁷ Génesis librox yatiyistuwa kunjamsa jan walt'añanaka-xa qalltäna, ukat Apocalipsis qhipir librosti yatiyarakistuwa kunjamsa aka Uraqix mä huertaru jan ukax kusipacharu tukuyatäni. Waranq waranqa maranakatwa Bibliax parli, ukat taqi arunakapaxa Diosan amtanakapa phuqasiñxat-pun parli. Ukham mä amuyuki parlatapaxa muspharkaña-puniwa. ¡Diosan apayanita libroxa ukhamañapapuniwa!

⁸ Bibliaxa ciencia (jaqinakan yatxatäwipa) tuqitsa chiqaparakïwa. Janïra jaqinakax ciencia tuqitxa yatkäna ukhaw Bibliaxa uka tuqinakat yatichxäna. Uk amuyt'añäni, nay-ra israelitanakatakixa Levítico libroxa, katuyiri usuninaka-ru yaqhachañxata, q'uma sar-naqañxata kamachinakanin-wa; ukanakxatxa yaqha markankirinakaxa janiw kunsa yatipkänti. Ukata, kunapachatix aka Uraqxata pantjat amu-yunakax utjkäna ukhaxa Bibliax chiqpachapuniwa sänxa: Uraqixa 'jan kunxaruki warkt'atawa' sasa (Job 26:7). Chi-qasa, Bibliaxa janiw ciencia tuqit librükiti, ukampisa kuna-pachatix uka yatxatäwinakat parlki ukhaxa chiqäskapuni-wa. ¡Diosan apayanit libroxa ukhamañapapuniwa!

* Bibliax may may parli sasaw yaqhipanakax sapxi, jan suma yatisaw ukham parlapxi. Juk'ampi yatxatäñatakixa Jehová Diosan Qhanañchi-rinakapan español aruta qillqt'at akir libro uñxatäta: *La Biblia... ¿la Palabra de Dios, o palabra del hombre?*, 7 jaljapana.

-
- 6, 7. Bibliax mä amuyuki qillqatawa, ¿kunatsa ukax muspharkañaxa?
8. ¿Kunatsa Bibliax ciencia tuqitxa chiqapapuniw sisnaxa?

⁹ Bibliaxa nayra sarnaqäwinakxat parlki ukhasa chiqaparakiwa, atiniskañarakiwa. Ukanakatxa qhanpun parli, janiw jaqinakan sutinakapxataki parlkiti, jan ukasti nayra awkinakapatsa parlarakiwa.* Sarnaqäwinakxata yaqha qillqirinakaxa, markapan atipjayasitanakapxa janiw qillqapkiti, ukampisa Biblia qillqirinakaxa janiw k'arisipkänti, janirakiw kunsä imt'apkänti, pantjasäwinakapsa ukat markapan pantjäwinakapsa qillqt'awayapxiwa. Amuyt'añäni, Moisesax jach'a pantjasäwipat iwxayasäna uksa Números libroruw qillqatayna (Números 20:2-12). Ukham jan k'arisisa jan kun imt'asa qillqirinakaxa mä qhawqhanikiwa, ukampisa Bibliaxa qhana qillqt'atawa kunattixa Diosan apayanita librowa.

SUMA IWXANAKAN LIBROWA

¹⁰ Niyakixay Diosan amuyt'ayatächixa, Bibliaxa “askirakiw yatichañataki, chiqachañataki, ukhamarak q'uma jakañan sarnaqañ yatichañatakisa” (2 Timoteo 3:16). Suma iwxanakan libropuniwa. Biblia Qillqayirixa, jucharara jaqinakätasxa sum yati. Jisa, Jehová Dios Awkisawa, jupaw Luririsaxa. Kunsä lup'isktan ukat kunjams jikxatastan ukanaksa Jupaw juk'amp sum yati jiwasat sipansa. Ukatxa, kunnanakas wakisispa kusisita jakasiñasatakixa, ukat kuna jan wali luräwinaksa apanukuñasa ukanaksa yatirakiwa.

¹¹ Mateo 5-7 jaljanakankiri Jesusan arst'äwipat amuyt'añäni. Uka suma yatichäwinxa, Jesusax kunaymaninakatwa parläna, kunjamsa kusisiñ jikxatsna, ukat kunjamsa jan


* Amuyañatakix Lucas 3:23-38 uñxatma, Jesusan nayra awkinakapan sutinakapaxa qhan qillqatawa.

9. 1) Bibliaxa nayra sarnaqäwinakxat parlki ukhaxa chiqapawa ukat atiniskañarakiwa, ¿kunatsa ukhamaw sisna? 2) ¿Kunatsa Biblia qillqirinakaxa jan k'arisipkänxa?

10. ¿Kunatsa Bibliaxa suma iwxanakan libropuniw sisnaxa?

11, 12. 1) Mateo 5-7 jaljanakanxa, ¿kunanaksa Jesusax yatichänxa? 2) ¿Kunanakampitsa Bibliax parlistu, ukat kunatsa arunakapax nayras jichhas wakisiripunixa?

*Isaiás profetaxa
Babilonia markana
t'unjäwipatwa
qillqatayna*



walt'ayasiñaksa askichaña, kunjamsa Diosar mayisiña ukat kuna kasta chuymaniñasa qullqi tuqitsa, ukanaxxatwa parläna. Jesusan arunakapaxa kunjamti khä urunakan wakisi-rikänxa jichhürunakansa ukham wakisirikiskiwa.

¹² Bibliana yaqhip yatichäwinakapaxa familia tuqita, ir-naqäw tuqita ukat mayninakampi sum apasiñxatwa parlis-tu. Iwxanakapaxa taqinitakiwa, wali askipuniwa. Biblian-kiri yatiñan arunakapaxa, aka mä qhawqha arunakaru

apthapt'atawa: "Nayätwa Tatitu [Jehová] Diosamaxa, nayasti kunatix jumatakix askiki ukwa yatichsma, kawki thakinjamtix sarañamäki ukanjam irparaksma" (Isaías 48:17).

PROFECIANAKAN LIBROWA

¹³ Bibliaxa walja profecianakaniwa, yaqhipax phuqasxiwa. Aka mä profecía uñjañäni. Isaías nayra profetnamwa Jehová Diosax Babilonia markan t'unjäwipata arsuwayatayna (Isaías 13:19; 14:22, 23). Ukat *kunjamsa* uka markax t'unjasiñapäna uksa profetax qhanañcharakänwa. Soldadonakaxa, Babilonia tayp pasir jawir wañt'ayapxani ukat jan nuwasisawa uknam uka markar t'unjañataki chhukhuntutpxani sasaw säna. Janiw ukakikiti. Uka profeciaxa Babilonia t'unjir apnaqirin sutipsa qhanañchawayarakiwa: *Ciro satänwa* (Isaías 44:27–45:2).

¹⁴ Uka profecía arsutatxa pä pataka maranakaw pasxatayna, 539 nayrír pacha maranxa octubre phaxsit phisqüru saraqat arumasti, walja soldadonakaw Babilonia jak'aru purintapxäna. ¿Khitis p'iqiñchpachänxa? Persia marka apnaqir *Ciro* chachawa p'iqiñchäna. Ukhamaxa, uka muspharkañ profeciax uka arumpachawa phuqasiñapänxa. Ukampisa, ¿kunjamti arsuskäna ukhamti *Ciro* chachan soldadonakapax jan nuwasisa uka markar tukjapxpachäna?

¹⁵ Babiloniantirnakaxa uka arumax wal manq'asipkäna umasipkäna, jach'a pirqanakampi muyuntat markapanxa janiw kuns axsarapkänti. Ukäñkamaxa, *Ciro* chachax wali ch'ikt'asisaw Babilonia taypi pasir jawirxa irpanukutayna, ukhamasti umax juk'akixänwa soldadonakan makatañjamäxänwa uka jach'a pirqaru jak'achasiñatakixa. Ukampisa, ¿kunjamsa uka jach'a pirqanakampi muyuntat markarux mantapxpachäna? ¡Punk jist'katañwa armasipxatayna!

13. ¿Kunanaksa Babilonia markatxa Jehová Diosax Isaías profetampix qillqayatayna?

14, 15. Isaías profetan arunakapaxa, ¿kunjamsa phuqasitayna?

¹⁶ Jehová Diosaxa Babiloniatxa akham sänwa: “Janipuniw jaqix ukanxa juk’ampi utjkaniti, janipuniw khitis ukan juk’ampi jakkxaniti. Arabe jaqinakax janiw mayampsa ukar purisax carpanakap sayt’ayaskxapxaniti, janirakiw awatirinakas uywanakapxa ukan samart’aykxapxaniti” sasa (Isaías 13:20). Profeciaxa janiwa uka marka t’unjäwitali parlkänti jan ukasti *janipuniw mayampi* khitisax ukan jakkxaniti sasaw säna. Uka arunakaxa phuqasiwayapuniwa. Irak anqa markan Bagdad capitalap jak’anwa (80 kilómetros) t’unthapita nayra Babilonix jikxatasi. Ukawjanxa janiw khitisax jakxiti. “Pichañampjamarakiw tukjasin pichanukü” siski Jehová Diosan uka arunakapax phuqasitaynawa (Isaías 14:22, 23).*

¹⁷ Bibliax phuqasir profecianakani librowa, ¿ukaxa iyaw-

* Juk’ampi yatxatañatakixa Jehová Diosan Qhanañchirinakapan español arut qillqat folleto uñxatäta: *Un libro para todo el mundo*, 27 janat 29 janakama.

16. 1) Isaiasan arunakaparjamaxa, ¿kunas kamachasiñapäna Babiloniampixa? 2) Babilonianxa janiw khitis jakkxaniti siski uka arunakaxa, ¿kunjamsa phuqasiwayi?

17. Bibliankir profecianakan phuqasiwipaxa, ¿kunatsa iyawsäwisar ch’amañchi?



säwisarux janit ch'amañchkaspa? Chiqasa, kunjamtí Jehová Diosax nayrapachax arunakapa phuqawayki, ukhamarakiwa aka Uraqi kusipachaptayäw siski uka arunakapsa phuqani (Números 23:19). Ukhamaxa, wiñay jakañ suyt'äwinitanwa, "uka jakañ churañatakix Diosax janir aka uraqi qalltaskipanwa phuqhañataki arsuwayi, Diosasti uk arsusax janiw k'ariskiti" (Tito 1:2).*

"DIOSAN ARUPAXA JAKKIRIWA"

¹⁸ Kunti aka yatichäwin yatiqktan ukax amuyt'ayarakistuwa Bibliaxa jan kikanitapa. Mä amuyuki qillqatawa, nayra sarnaqäwinakxatsa, ciencia tuqitsa chiqwa parli,

* Babilonia markan t'unjäwipaxa mä uñacht'äwikiwa, kunjamtí walja profecianakaxa phuqasiwayki uka tuqinakata. Yaqha phuqasita profecianakax akanakarakiwa, Tiro ukat Nínive markanakan t'unjäwinakapa (Ezequiel 26:1-5; Sofonías 2:13-15). Ukampisa, Daniel profetaxa akham sasaw satayna, Babilonia qhipat uñstaniri jach'a markanakaxa, Medopersia ukat Grecia markanakaw Uraqpachaxa apnaqapxani (Daniel 8:5-7, 20-22). Juk'ampi yatxatañatakixa, 199 janat 201 janakamwa aka libron uñxatäta, ukanxa Mesías tuqita walja profecianakaxa kunjamsa Jesucriston phuqasitayna ukwa jikxatäta.

18. "Diosan arupaxa", ¿kunjamaw sänsa apóstol Pabloxa?

T'unthapit Babilonia



ukatxa iwxxanakapasa wakisiripuniwa, profecianakapasa phuqasiripuniwa, janiw uka tuqitaki ukham jan kikipan suma librükiti, jan ukasti juk'ampinakatwa yatiyistu. Após-tol Pablox akham sasaw qillqäna: 'Diosan arupaxa jakki-riwa ch'amanirakiwa, purapäxa arini taqi espadatsa ju-k'ampi manqharu mantkirirakiwa; almampi ajayumpsa jaljtayañkam mantiri, ukhamaraki ch'akha muqunakampi parpanakampsa, lup'iwinaksa chuyman amtäwinakapsa uñantkiriraki' sasa (Hebreos 4:12, MT).

¹⁹ Biblian kiri Diosan "arupaxa" liyiñapuniwa ukaxa ja-käwisxa sumarupuniw tukuyaspa. Jiwaspacha suma uñaki-pasiñasatakisa yanaparakistuwa. Diosaru nayax munastwa saksnawa, ukampisa janiw ukakikiti, Diosan amuyt'aya-ta Biblian yatichäwinakapa ist'asawa uñacht'ayañäni kuna kasta amuyunitänsa ukat kuna kasta lup'iwinakanitänsa.

²⁰ Chiqpachansa Bibliaxa Diosan apayanitawa. Biblia li-yiñasapuniwa, yatxatañasawa ukat wal munañasarakiwa. Bibliatxa yatiqaskakiñamawa, ukhamatwa Diosan churä-wipa wal munatamxa uñacht'ayäta. Ukatxa, kunatsa Dio-san amtapaxa jaqinakatakixa wali wakiskiri ukxa juk'ampi-rakiw yatiqäta. Kimsiri jaljanwa yatiqañäni kawkirisa Diosan amtapaxa ukat kunjamsa phuqasirakini.

19, 20. 1) ¿Kunjamsa Bibliaxa jiwaspacha uñakipasiñasaru yanapis-tu? 2) Biblia katuqasaxa, ¿kunjamsa Diosar yuspärsna?

KUNSA BIBLIAX YATICHI

- Bibliaxa Diosan amuyt'ayatawa, ukatwa chiqapaxa, atiniskañarakixa (2 Timoteo 3:16).
- Sapüru sarnaqäwisansa Biblian iwxxanakapaxa wakisiripuniwa (Isaías 48:17).
- Biblian kiri Diosan arsutanakapaxa phuqasipuniniwa (Números 23:19).

¿Kunas Diosan amtapaxa aka Uraqitakixa?

¿Kunas Diosan amtapaxa jaqinakatakixa?

¿Kuna k'arinakasa Diosxat parlasiwayi?

**Aka Uraqin jakasiñax jutir urunakanxa,
¿kunjamäpachanisa?**

DIOSAXA mä suma amtäwiniwa, k'umara ukat wali kusi-sita jaqinakampi aka Uraq phuqantayañwa munäna. Bibliax akham siwa: Diosax “mä huerto wakichäna” ukat “taqi casta suma frutanak achuri quqanak jilayarakina, ukanakasti manq'añatakinwa” sasa. Ukxarusti Adanampi Evampiruw luratayna, uka suma huertoru uchasasti nay-rir awkinakasarux Diosax sataynawa: “Jichhax wali miran-tapxam, aka uraqirusti phuqhantapxarakim, apnaqapxa-rakim” sasa (Génesis 1:28; 2:8, 9, 15). Ukhamasti, jaqina-kaxa wawanakanipxañapänwa, ukat huertxa Uraqpacharu jithitatayapxañapänwa, animalanakarusa sum uñjapxaña-pänwa, uk Diosax munäna.

² ¿Jaqinakaxa kusipach Uraqina jakasipxani siski, Jeho-vá Diosan uka amtapaxa phuqasipuniniw sasmati? Diosaxa, “arstwa, ukham lurarakixa” siwa (Isaías 46:9-11; 55:11). Ukhamaxa, Inuqirisax kunti amtawayki ukanakxa phuqa-puniniwa. Jupaxa, aka Uraqxa janiw “ch'usañapataki” lur-känti, “jan ukasti jaqiniñapataki[w]” lurtxa, sasaw säna (Isaías 45:18). ¿Kunjam jaqinakas Uraqin jakasipxañapäna

1. ¿Kunas Diosan amtapaxa aka Uraqitakixa?

2. 1) ¿Kunatsa Diosan amtapax aka Uraqitakix phuqasipuniniw sisna?

2) ¿Kunjam jaqinakas wiñayataki jakasipxani, kamsis Bibliaxa?

ukat qhawqha tiemposa utjasipxañapänxa? Bibliaxa akham siwa: “*Aski jaqinakax* uraq katuqapxani, *wiñayatakiw ukan jakapxarakini*” sasa (Salmo 37:29; Apocalipsis 21: 3, 4).

³ Chiqasa, uka arunakaxa janiraw phuqaskiti. Jaqinakaxa usuntapxi, jiwapxi, ukat nuwasipxi, jupanakpuras kawkhans jiwayasisipki ukhamawa. Jan walinakakiw uñjasiski. Jehová Diosax janipuniwa ukhamañapxa munkänti. ¿Kunatsa Diosan amtapaxa jan phuqasiwaykpachäna? ¿Kunas kamachpachäna? Aka jiskt’äwinakan jaysäwinakapaxa janiw jaqinakan sarnaqäwipxata libronakankkiti, kunattix alaxpachanwa jan wali luräwinakax qalltatayna.

MÄ UÑISIRIN UÑSTÄWIPA

⁴ Génesis libronxa, Diosan mä uñisiripaw Edén huertan uñstän siwa. ‘Katari’ satächisa janiw aliq animalakikiti. Jupax “Supaya, Satanás satarakiwa, juparakiw aka uraqin jaqinakarux wali sallqjañanak [jan ukax engañonak] luri” sasaw Apocalipsis libroxa qhanañchi. “*Nayrapacha* jach’a katari [jan ukax asiru]” satarakiwa (Génesis 3:1; Apocalipsis 12:9). Ukhamasti, wali ch’amani angelawa, uka ajayuxa mä asirumpiw Evaru arxayäna, asirus parlkaspa ukhamwa amuyayäna. Kunapachatix Diosax jaqinakataki Uraqi wakhikähäna ukhaxa uka angelaxa uñch’ukiskpachänwa (Job 38:4, 7).

⁵ Jehová Diosan taqi inuqatanakapasti chiqapar lurt’atawa, ukxa yattanwa. Ukhamasti, ¿khitirak “Supaya” “Satanás” sutini angelarusti lurpachänsti? *Diosan wali ch’aman mä angelapawa Supayaru munañapat tukutayna*. ¿Kunjamatsa ukhamar purt’aspachäna? Kunjamtix mä chiqa chuyman jaqix jan lunthatasirikasina lunthataru tukuspa

3. ¿Kuna jan walinakakisa aka Uraqin uñjasiski, ukat kunanak jiskt’a-siñasas wakisipa?

4, 5. 1) ¿Khitisa Evaruxa mä asirumpi arxayäna? 2) ¿Kunjamsa mä chiqa chuyman jaqix lunthatar tukuspa?

ukhamawa. ¿Kunjamsa ukhamar tukuspa? Inasa chuymapan jan walinak amtchispa. *Ukat ukaki lup'iskani ukhaxa*, ukakwa lurañ munaskanixa. Ukatxa, uka jan walix lurañjamäni ukhaxa, jank'akiwa lup'itaparjama ukxa lurani (Santiago 1:13-15).

⁶ Ukhamatwa uka angelaxa Satanasarukuküna. Kunapachatix Jehová Diosax Adanampiru Evampiruwawanipxätaw ukat wawanakamampiw aka Uraqiruw phuantapxäta siskäna ukhaxa, Supayax isch'ukiskpachänwa (Génesis 1:27, 28). Ukat akham sasaw amuyt'aspachäna: "¡Taqi aka jaqinakaxa Diosar sipansa nayaran yupaychapxitaspasti!" sasa. Uka jan wali amtapaxa chuymaparuw mantatayna, ukatsti, Diosat k'arisisawa Eva warmirux sallqjatayna (Génesis 3:1-5). Ukhamatwa "K'arintiriru" tukutayna, griego arunxa "Diablo" satawa. Ukhamatarakwa, Diosan "Uñisiparu" tukutayna, ukwa "Satanás" sutixa hebreo arunxa sañ munaraki.

⁷ Adanarus Evarusa Satanasax k'arinakampiwa sallqjäna Diosar jan ist'apxañapataki (Génesis 2:17; 3:6). Ukatsti jiwañaruw purt'asipxäna, kunjamtí Diosax siskäna ukhama (Génesis 3:17-19). Adanax juchachasisawa jucharar jaqiruwukuwayi, ukatxa taqi wawanakaparuw uka juchxa katuyawayi (Romanos 5:12). Ukaxa, mä wixrjat aruwiramp sasiwa. ¿Uka wixrjat aruwirampi lurat aruwinakax kunjamäni-sa? Wixrukamakiniwa. Ukhamarakiwa, taqiniwa Adanan juchapxa katuqawaytanxa uka wixrjat aruwirampi lura-täksnas ukhamawa. Ukatwa chuymankiptasinxa jiwaraktanxa (Romanos 3:23).

⁸ Satanasax Adanampiru Evampiruw juchar puriyañataki


6. ¿Kunjamsa Diosan mä ch'aman angelapax Supay Satanasarukukutayna?

7. 1) ¿Kunatsa Adanampi Evampiruxa jiwapxäna? 2) ¿Kunatsa Adanan taqi wawanakapijamaxa chuymankiptasin jiwatanxa?

8, 9. 1) ¿Kunjamsa Satanasax Diosar k'arintawayi? 2) ¿Kunatsa Diosax ukjpacha jan tukjawayki uka kutkatasirinakaruxa?

ch'amachasawa jan ist'asirinakan p'iqiñchiriparu tukutay-na. Jehová Diosaruwa qallasiwayi, apnaqäwip jisk'achasa. Akham siskaspänsa ukhamawa: "Diosax jan wali apnaqiriwa, k'ariwa, kusisiñatsa jark'asiriwa. Jaqinakaxa jan niw munapkiti Diosampi apnaqatäñxa, jupanakaxa kunatï waliki jan waliki uka amtanakaparjam sarnaqasipkaspawa. Ukampisa nayar ist'apxitaspaxa wali sum sarnaqasipxaspaxa" sasa. Ukham k'arintataxa, ¿kunsa Diosax lurañapän-

*¿Kunjamaraki Satanasasti taqi
markanak Jesusaru churaspänsti
jan jupankkasapän ukhasti?*



xa? Uka jan ist'asirinakaruxa jwayxañapänwa sasaw yaqhipanakax sapxi. Jiwarayasapanxa, ¿Satanasan k'arisitapxa qhanañchasapänti? ¿Diosaxa suma Apnaqiritapxa uñacht'ayasapänti?

⁹ Jehová Diosax chiqaparupuniw taqi kunsa uñji. Ukatwa, ukjpacha uka kutkatasirinakaruxa jan tukjawaykiti. Jan ukasti, Satanasan k'arinakap qhanstayañatakix tiempow munasina, ukatwa Diosax jan tukjawaykiti. Ukhamasti, jaqinakax Satanasampi chika jupanakpacha mä qhawqha tiemp apnaqasipxpan sasaw Diosax satayna. ¿Kunatsa Diosax ukham satayna? ¿Kunatsa walja tiempox munasina uka k'arinaka qhanstayañatakixa? Aka libron 11 jaljapanwa juk'ampi ukanakxata yatichasini. Jichhax jiskt'asinañamawa: Satanasax janiw kunsa lurkanti Adanampi Evampitakixa, ukhamasti, ¿kunatsa jupanakaxa Satanasaruiyawsapxpachäna? Taqi kunwa Jehová Diosatxa katuqapxatayna, ukampisa, ¿k'arintasiri jan wali Diosataynasä sañax walikiskanti? ¿Kunsa jumax lurasmana?

¹⁰ Aka jiskt'anakxat lup'iñasawa, taqiniw ukham yant'anakan uñjastanxa. Ukhamaxa, Jehová Dios tuqit sayt'asita ukhaxa Satanasan k'arinakaparux janiw sasmawa. Diosaru Apnaqirimarjama iyawsasasti, Supayana wali k'aritätapwa uñacht'ayäta (Salmo 73:28; Proverbios 27:11). Aka Uraqinxa millón millón jaqinakawa utji, ukampisa mä qhawqhanikiwa Jehová Diosampi apnaqayasiñ amtapxi. Ukaxa mä wakiskir jiskt'awiruw apistu: ¿Supayaw akapach apnaqi satsati Bibliax chiqpachapuni yatichi?

¿KHITIS AKAPACH APNAQI?

¹¹ Akapachaxa Satanasan apnaqatätapxa Jesusax sum

10. ¿Kunjamsa Dios tuqit sayt'asisma ukat kunjamsa Satanasan k'arinakapar janiw sasma?

11, 12. 1) Supayax Jesusar taqi markanaka uñachaykäna, uka yant'axa, ¿kunjamsa Supayax akapach apnaqiritap uñacht'ayi? 2) ¿Kuna yaqha uñacht'äwinakasa, Satanasax akapach apnaqiritapatxa uñachayi?

yatina. Mä uruxa, Supayaw Jesusarux uñacht'ayäna "taqi markanaka, kunja sumäkäntix ukanaka, kunja jach'äkara-kintix ukanaksa. Ukatsti sänwa: 'Taqi akanak nayax churäma, jumatix killt'asisin nayar yupaychitäta ukaxa' sasa." (Mateo 4:8, 9; Lucas 4:5, 6.) Uka tuqit amuyt'añäni. Aka markanakati jan Supayankasapänxa, ¿Jesusatakix *munañ-jamäsapänti*? Akapachaxa jan Satanasampi apnaqatäkaspän ukhaxa, Jesusax janiw jumankkiti saspänwa, ukampi-sa janiw ukham siskänti.

¹² Chiqasa, Jehová Diosaxa taqi ch'amaniwa, jupaw taqi kun Luririxa (Apocalipsis 4:11). Ukampisa Jesusaxa, "akapacha apnaqirix" Supayaw sataynawa (Juan 12:31; 14:30; 16:11). Ukatxa, "akapach diosax" Supayawa sasarakiw Bibliax yatichi (2 Corintios 4:3, 4). Juan sutini apostolaxa Supayxatwa akham qillqawayi: 'Taqi aka uraqpachaxa Supayan munañapankiwa' sasa (1 Juan 5:19).

SUPAYAN APNAQAT ÑANQHAPACHAX TUKJATÄNIWA

¹³ Marat maratjamaw akapachaxa juk'ampi jan walir saraski. Ch'axwäwinakakiw utjaski, jan wali amtan politiconakasa, yupaychäwinakan k'ari yatichirinakapasa ukat jan sintt'asis jaqi jiwayirinakasa añchapunixiwa. Aka ñanqhachax janipuniw waliptkaspati. Machaq jutirpacha utjañapatakixa Diosax niyaw aka ñanqhachaxa tukjani Armagedón sata ch'axwäwina sasaw Bibliax qhanañchistu (Apocalipsis 16:14-16).

¹⁴ Jehová Diosaxa Jesucristoruwa alaxpachankir apnaqäwipan Apnaqiripat utt'ayi, Diosan Reinopa satarakiwa. Nayrapachawa Bibliaxa akham säna: "Mä wawaw jiwasa-taki nacini, Diosaw mä yuqall wawa churistani, uka wawaw jichhax apnaqarakini. Akham sasaw sutichapxara-

13. ¿Kunatsa mä machaq jutirpachax munasi?

14. ¿Jehová Diosaxa khitirusa alaxpachankir Apnaqäwipana Apnaqirit utt'ayäna, ukat kunjamsa uka tuqit arsusiwayi?

kini: [...] Sumankañan Jiliripa sasa [...] jupan reyĩn ch'a-mapasti taqi chiqankarakiniwa, suman sarnaqasiñasti janipuniw tukuskaniti" sasa (Isaías 9:6, 7). Jesusax arkirinapakaru Diosat mayisiñ yatichasaxa uka apnaqäwīt mayiñ-wa yaticharakitayna akham sasa: "Apnaqäwimax jutpan. Munañamax luraspan, alaxpachansa ukhamaraki aka Uraqinsa" sasa (Mateo 6:10, NM). Jutir yatichäwinakan-wa yatiqaskañäni kunjamsa Diosan Apnaqäwipax taqi akapach apnaqäwinakarux t'unjani, ukatsti uka apnaqäwinak lantiw utt'ayatäni (Daniel 2:44). Uraqxa kusipachaptayarakiniwa.

¡KUSIPACHAX JAK'ANKXIWA!

¹⁵ Bibliax akham siwa: "Jiwasax arsutaparjamaw suy-t'asktan mä machaq uraqi, mä machaq alaxpachampi, kuntix Diosax: 'Churapxämaw' siskistu uka. Ukansti taqi kunasa chiqapapuniniwa" (2 Pedro 3:13; Isaías 65:17). Kunapachatĩ Bibliax 'uraqit' parlki ukhaxa, awisax jaqinakxat parli. Ukhamaxa, uka chiqap suma 'machaq uraqixa' Diosan iyawsata jaqinakawa.

¹⁶ Kunapachatĩ kusipachankxañäni ukhaxa, Diosan chuymapar purt'ir jaqinakaxa "wiñay jakañ" katuqapxani sasaw Jesusax säna (Marcos 10:30). Mirä amp suma Bibliaman Juan 3:16 ukat 17:3 thaqt'ma, wiñay jakañ katuqañatakixa kun lurapxañamaw sis Jesusax uk liyt'añäni. Diosan suma churäwipa, kusipacha katuqirinakaxa kuna bendicionanaksa katuqapxani, uk jichhax Biblian uñxatañäni.

¹⁷ *Ñanqha luräwinakasa, ch'axwäwinakasa, lunthata-siñasa ukat nuwasiñasa janiw utjxaniti.* "Ñanqha lurir

15. ¿Kunas 'machaq uraqixa'?

16. ¿Diosan chuymapar purt'ir jaqinakaxa kuna suma churäwinaksa katuqapxani ukat kun lurañasasa uk katuqañasatakixa?

17, 18. ¿Kunatsa ch'axwañanakasa ukat axsarañasa janiw utjxaniti sasax sisna?

jaqinakax chhaqtxaniwa; [...] llamp'u chuymaninakasti uraq katuqapxani" (Salmo 37:10, 11). Sumankañas utjxaniwa, Diosaxa 'aka uraq tukuskamaw nuwasiñ t'akurayani' (Salmo 46:9; Isaías 2:4). Kunapachat'i uka urux purinini ukhaxa, 'aski kankañax panqaraniwa', ukat 'sumankañasti phaxsin tukusiñapkamaw utjani', mä arunxa wiñayatakiniwa (Salmo 72:7).

¹⁸ *Jehová Diosan luqtirinakapaxa janiw kunsa axsarxapxaniti.* Bibliax qillqaskäna uka urunakanxa, kunapachat'i Diosar ist'apkäna ukhaxa janiw kunsa israelitanakaxa axsarapxirikänti (Levítico 25:18, 19). ¡Wali sumapuniniwa ukhama jan kun axsarasa Kusipachan jakasiñaxa! (Isaías 32:18; Miqueas 4:4.)

¹⁹ *Janiw manq'at pisinkañax utjxaniti.* "Trigox yapunakan jilarkir utjpan, qullu patanakansti jilantarakpan", sasaw salmonak qillqirixa q'uchüna (Salmo 72:16). Jehová Diosax taqi chuyma luqtirinakaparux walja bendicionakwa churani, ukatxa "uraqix achunakap chur[ani]" (Salmo 67:6).

²⁰ *Uraqpachawa mä suma kusipacharu tukuyatäxani.* Jan wali jaqinakampi tukjata q'ara lugarawjanakanxa suma utjäwinaka ukat suma huertanakaw utjxani (Isaías 65:21-24; Apocalipsis 11:18). Sapürutjamawa aka Uraqixa kusipachaptayatäxani, ukat Uraqpachaxa kunjämäkänti Edén huertax ukhama mä suma huertaru tukuyatäxaniwa. Wiñayan wiñayapatakiwa Diosax 'amparapa luqatatani', "taqi jakirinakarusti askinak jilarkir" churani (Salmo 145:16).

²¹ *Jaqinakaxa animalanakampixa sumankxapxaniwa.*

19. ¿Kunatsa Diosax kusipachan manq'anakxa utjayapuniniw sasax sisna?

20. ¿Kunatsa Uraqix mä kusipacharu tukuyatäniw sasax sisna?

21. ¿Kunatsa jaqinakaxa animalanakampix sumankxapxaniwa sasax sisna?



Jach'a axsarkañ animalanakasa uywanakampi mayakiwa manq'asipxani. Mä jisk'a wawasa janiw uka animalanakarux axsarxaniti (Isaías 11:6-9; 65:25).

²² *Usuntañanakasa janiw utjxaniti.* Diosan alaxpacha Apnaqäwipan Apnaqiripat utt'ayat Jesusaxa, usutanakarus qullarakiniwa aka Uraqinkkäna ukat sipansa juk'ampi (Mateo 9:35; Marcos 1:40-42; Juan 5:5-9). Uka urunakanxa, "Janiw khitis siskaspati: 'Usutatwa' sasaxa." (Isaías 33:24; 35:5, 6.)

²³ *Familiaranakasata jiwirinakasa jaktanipxaniwa ukat Diosar ist'asisa sarnaqapxani ukhaxa janiw mayampisa jiwxapxaniti.* Diosan taqi amxäsita jiwatanakawa jaktanipxani. Ukhamasti, 'jiwatanakatxa ñanqha jaqinakasa, aski jaqinakasa jaktanipxaniwa' (Hechos 24:15; Juan 5:28, 29).

²⁴ Jehová Dios Luririxata juk'ampi yatxatañ munirinakatakixa mä suma suyt'äwiwa utji, ukhamaraki Juparu luqtañ munirinakatakisa. Ukhamasti, Jesucristota juk'ampi yatiqañaxa wali wakiskiripuniwa, jupnamwa taqi bendicionanak katuqañäni.

22. ¿Usuntañanakax utjaskakiniti?

23. ¿Kunatsa jaktaniñaxa wali kusiskañänixa?

24. ¿Kamsakismasa Kusipach Uraqin jakasiñxatxa?

KUNSA BIBLIA X YATICHI

- Diosax aka Uraqi kusipachaptayä siski uka amtapaxa phuqasiniwa (Isaías 45:18; 55:11).
- Jichhürunakanxa akapachax Satanasan apnaqatawa (Juan 12:31; 1 Juan 5:19).
- Kusipachankxañäni ukhaxa, Diosaxa walja bendicionanakwa churistani (Salmo 37:10, 11, 29).

¿Khitis Jesucristoxa?

¿Jesusax kuna wakiskir lurañanisa?

¿Kawkits jutäna?

¿Kunjam jaqinsa?

AKAPACHANXA mintat jaqinakax walipuniwa. Yaqhipanakax comunidadapansa markapansa wali uñt'atäpxiwa, yaqhanakasti uraqpachansa uñt'atäpxarakiwa. Ukampisa, uka jaqinakan sutip yatiñaxa janiw jupanakar *sum uñt'añ* sañ munkiti, mä arunxa, janiw sarnaqäwipxa yatktanti, kunjam jaqinakätapsa yatkaraktanti.

² Jesucriston aka Uraqiru jutatapatxa niya pä waranq maranakäxaniwa, ukat jaqinakaxa jupxat taqi chiqansa parlasipkakiwa. Ukampisa, jupax khitiipachänsa uka tuqitxa kunayman parlapxi. Yaqhipanakasti, mä suma jaqikînwa sasaw sapxi. Yaqhanakasti mä profetakînwa sapxiwa. Mayninakasti, Jesusax Diosaw ukat yupaychañasawa sasaw sapxaraki. ¿Ukax chiqäpachati?

³ Jumatakix Jesusxat chiqa yatiñax wali wakisiriwa. ¿Kunatsa? Bibliax akham siwa: “Aka wiñay jakañax juma sapa chiqpach Diosar uñt'añanwa utji, ukhamarak *Jesucristoru kawkirirutix jumax khitankta ukaru*” sasa (Juan 17:3). Ukhamasti, Jehová Diosampita Jesucristompita chiqa yatiñaxa, kusipachaptayat uraqin wiñay jakañaruw apiristamxa (Juan 14:6). Ukatsti, Jesusax uñachayistuwa kunjamsa sum jakassna ukat kunjamsa jaqi masisampis sum apassna

1, 2. 1) Mä mintat jaqita ist'añaxa, janiw uka jaqiru *sum uñt'añ* sañ munkiti, ¿kunatsa ukham sisna? 2) ¿Jesusax khitiw sapxisa?

3. Jesusat chiqa yatiñaxa, ¿kunatsa jumatakix wali wakisirixa?



¿Kunsa Bibliax chiqpachapuni yatichi?

ukanakxata (Juan 13:34, 35). Kaw-
kirisä Diosat chiqa yatichäwixa,
ukwa nayriri jaljanxa uñjawaytanxa.

Ukat kunsa Bibliax Jesucristot yatichi, ukwa ji-
chhax yatiqañäni.

JUTANIW SAT MESÍAS

⁴ Janira Jesusax yurkipanwa, Mesiasan jan ukax Criston
jutañapat Bibliax qhanañchatayna. *Mesías* (hebreo aru)
ukhamaraki *Cristo* (griego aru) sutinchanakaxa “Jaw-
t’ata” sañ muni. Ukhamaxa uka jutaniw sat khitani-

4. *¿Mesías ukat Cristo sutinchanakax kamsañsa munpacha?*

*Jesusax
bautisaskäna ukhawa
Mesiasar jan ukax Cristoru tuküna*



taxa jawt'atänwa, mä arunxa, Diosan utt'ayatänwa mä am-täwitaki. Aka libronwa juk'ampi yatxataskakiñäni, kunat-sa jutaniw sata Mesiasax wali wakisirinxa Diosan arsuta-nakap phuqasiñapatakixa. Yatiqarakiñäniwa, kunjamsa Je-susax jichhürunakansa bendicionanak churistaspa. Janir Jesusax yurkäna ukhaxa waljaniw akham jiskt'asipxpachä-na: "¿Khitipachänisa Mesiasaxa?" sasa.

⁵ Nayra patak maranakanxa, Jesusan arkirinakapaxa, ju-päskapuniw Mesiasax sasaw sapxäna (Juan 1:41). Simón Pedro sata arkiripaxa jan payachasisaw akham satayna: 'Ju-max Cristütawa' sasa (Mateo 16:16). Ukhamasti, ¿kuna-taraki uka arkirinakapasti, Jesusapuniwa Mesiasax sapxpa-chänsti? ¿Kunatsa jiwasanakax ukhamaw saraksnaxa?

⁶ Janira Jesusax aka Uraqiru jutkäna ukhawa Diosan pro-fetanakapax Mesiasaru uñt'añataki profecianak qillqapxa-tayna. Amuyt'añäni: jumati qhatur sarasma mä jan uñt'at jaqi thaqhiri, ¿janit wakiskaspa kunjamas uka jaqixa uk ya-tiñaxa? Niya ukhamjamarakiwa, kunsä Mesiasax luraña-päna ukat kunanakasa jupar pasañapäna ukanakwa Jeho-vá Diosaxa profetanakapampi sum qillqayatayna. Kunapa-chati profecianakax phuqasxäna ukhaxa, chiqa chuymani jaqinakax jan payachasisaw Mesiasarux uñt'apxasapäna.

⁷ Uka tuqit pä profecianak uñjañäni. Maynirix akawa: paqallq patak maranak nayrawa, Miqueas profetaxa, Belén markanwa Mesiasax yurini sas satayna, ukasti Judá mar-kankiri mä jisk'a markakänwa (Miqueas 5:2). Ukhamasti, ¿kawkinsa Jesusax yuritayna? Uka Belén markanwa (Ma-teo 2:1, 3-9). Payir profeciasti Daniel 9:25 jisk'a t'aqanki-wa, 29 jichha pacha maranwa Mesiasaxa uñstaniña-päna, janiräkipan uka mar tantiyañatakiwa aka profeciax

5. ¿Jesusarux khitiw sapxänsa arkirinakapaxa?

6. ¿Kunjamsa Diosax yanapt'atayna suma chuyman jaqinakaru Me-sías uñt'añaxa? Uk qhanañicht'ma.

7. Jesusar phuqasiri pä profecianak arst'ma.

qillqasitayna.* Aka pä profecianakana ukat yaqha profecianakana phuqasitapaxa uñacht'ayistuwa Jesusax Mesiasätapa.

⁸ Jesusan Mesiasätapax 29 maranwa sum qhanstxäna. Ukhaw Jesusaxa Bautisir Juanaru Jordán jawiran bautisit satayna. Mesiasaru uñt'añmatakixa mä uñtäwi churäma sasaw Jehová Diosax Bautisir Juanaruxa satayna, Jesusax bautisaskän ukhaw uka uñtäw churatayna. Bibliax akham siwa: “Kunapachatix Jesusax bautisatäxän ukkhaxa, umatwa mistunxäna, ukatsti mayakwa alaxpachax jist'artäna, Jesusasti uñjarakänwa Qullan Ajayurux palomar uñtat jupxar saraqasinkiri. Alaxpachatsti ist'asirakänwa mä aru akham siri: 'Akawa munat Wawaxaxa, kawkürirutix nayax ajllista ukaxa' sasa” (Mateo 3:16, 17). Kunapachatí Juanax ukanak uñjäna ukat ist'arakäna ukhaxa, janiw payachaskänti Jesusax Diosan khitanitätapxa (Juan 1:32-34). Kuna pachatí qullan ajayux —mä arunxa, Diosan ch'amapaxa— Jesusxaru jutkatayna, ukhawa Jesusax Mesías, jan ukax Cristoru tukutayna, Jupawa Jilir p'iq't'irñapataki ukat Apnaqiriñapataki ajllitätayna (Isaías 55:4).

⁹ Jesusan phuqasir profecianakasa, Jehová Diosan aru nakapasa qhanañchistuwa Jesusax Mesiasätapa. Ukatxa, Jesucristot wakiskir aka pä jiskt'äwinakaruwa Bibliax qhanañchistu: ¿Kawkits Jesusax jutäna? ¿Kunjam jaqinsa Jesusaxa?

¿KAWKITS JESUSAX JUTÄNA?

¹⁰ Jesusaxa janıra aka Uraqiru jutkasaxa alaxpachanwa

* Juk'ampi yatxatañatakixa, 197 janat 199 janakamwa aka libron uñxatäta, ukanwa qhanañchasisi kunjamsa Danielan profeciapax Jesusan phuqasitayna.

8, 9. Jesusax bautisaskäna ukhaxa, ¿kunjamsa qhanpach Mesiasätapxa uñacht'ayasäna?

10. Jesusax janır aka Uraqiru jutkasaxa, ¿kawkinsa jakasınxa, kamsis Bibliaxa?

jakasina sasaw Bibliax yatichi. Bibliaxa janiw Mesiasax Belenan yurin sasaki siskataynati jan ukasti, “janira aka uraqi lurkana” ukhawa Jesusax alaxpachan utjxana siwa (Proverbios 8:22, 23). Ukatxa, janira jaqjam yurisasti alaxpachankayäwa sasaw Jesusax walja kuti satayna (Juan 3:13; 6:38, 62; 17:4, 5). Ukanxa mä ajayjamawa jakasina, Jehová Diosampix wali sum apasipxana.

¹¹ Jesusaxa, Jehová Diosan wali munata yuqapawa. Bibliax akham siwa: “Taqi kunatix utjki ukatxa nayririwa” sasa, ukhamasti juparuwa Diosax nayraqat luratayna (Colosenses 1:15).^{*} Ukatsti, jupaxa Diosan ‘sapa Yuqapa’ satarakiwa, ukatwa wali munatarakixa (Juan 3:16). Ukax sañ muniwa, Dios pachpawa jupar luratayna jan khitimpi yanapayasisa. Ukat jupakirakiw Jehová Diosarux taqi lurañanakan yanapt’atayna (Colosenses 1:16). Ukhamarusa, ‘Aru’ satarakiwa (Juan 1:14). Awkipan sutipxaruwa jupax arsuritayna ukwa uka sutinchasti sañ muni. Angelanakarusarusa jaqinakarusa Jupawa Diosan yatiyäwinakap churpachänxa.

¹² Yaqhipanakatakix Diosan jilir Yuqapax Diosäkasapasa ukhamawa, ¿ukhamäpachati? Janiw Bibliax ukham yatichiki. Kunjamti 11 t’aqan yatiqtanxa, Yuqax luratawa. Ukhamax jupan jakäwipax qalltäwiniwa, ukat Jehová Diosax janiw qalltäwinikisa ni tukuyanikisa (Salmo 90:2). Uka sapa Yuqaxa janipuniw Awkiparu igualasiñ munkänti. Yuqat sipansa Awkix juk’amp jiliriw sasaw Bibliax qhan yatichi (Juan 14:28; 1 Corintios 11:3). Jehová sapakiw “taqi

^{*} Jehová Diosax Awki satawa kunattix Luririsawa (Isafas 64:8). Jesusasti Diosan luratawa, ukatwa Diosan Yuqapa sataxa. Ukatsti alaxpachankir yaqha ajayunakasa Adanasa Diosan wawanakapa satäpxarakiwa (Lucas 3:38).

11. ¿Kunjamsa Bibliaxa uñacht’ayi, Jesusax Jehová Diosan wali munat yuqapätapxa?

12. ¿Kunatsa jilir Yuqaxa janiw Diosjamäkiti sisna?

ch'amani Diosaxa" (Génesis 17:1). Ukhamaxa, janipuniw khitisa Diosjamäkiti.*

¹³ Millón millón maranakawa, janira warawaranakasa Uraqisa utjkäna ukhatpachaw Jehová Diosax jilir sapa Yuqapampi wali munasiñampi sum jakasipxäna. ¡Jupanak puraxa wal munasipxpachäna! (Juan 3:35; 14:31.) Uka munat Yuqaxa Awkipjamänwa. Ukatwa, Bibliax 'jan uñj-kañ Diosan uñnaqapawa' sistuxa (Colosenses 1:15, MT). Kunjamti mä wawax awkipjamäki, ukhamarakiwa Diosan Yuqapaxa Awkipan kankañanakapa ukat kunjam Diosasa ukanakxa uñacht'ayi.

¹⁴ Jehová Diosan sapa Yuqapaxa iyaw sasawa alaxpachat aka Uraqiru jutatayna mä jaqir tukusa. Ukat inas jumax akham jiskt'asiraksta: "¿Kunjamataraki mä ajayusti jaqjam yurispasti?" sasa. Ukasti Jehová Diosan milagropawa. Alaxpachankiri jiliri Yuqapan jakäwipwa, Judá markankiri María sata mä virgen tawaqun purakaparu uchatayna. Awkipasti janiw mä jaqikänti, ukhamasti uka warmixa jan juchani wawaninwa, Jesús sasaw sutiypaxtatayna (Lucas 1:30-35).

¿KUNJAM JAQ'INSA JESUSAXA?

¹⁵ Kunanakti Jesusax lurkatayna kunanakti parlkatayna uraqinkasaxa, ukanakaw juparu sum uñt'aña yanapistu. Ukatsti, jupat yatiqasawa Jehová Diosarux juk'amp sum uñt'sna. ¿Kunjamatsa? Amtañäni, uka Yuqasti, jan uñjkañ Diosan uñnaqapawa. Ukatpi mä arkiriparux akham satay-

* Juk'ampi yatxatañatakixa, 201 janat 204 janakamwa aka libron uñxatäta, jiliri Yuqaxa janiw Diosjamäkiti uka tuqita.

13. ¿Bibliax kamsaña muni kunapachatä Yuqax 'jan uñjkañ Diosan uñnaqapawa' siski ukhaxa?

14. Jehová Diosan sapa Yuqapaxa, ¿kunjamatsa mä jaqjam yuritayna?

15. Jesusat yatxatasaxa, ¿kunjamatsa Jehová Diosarux juk'amp sum uñt'sna?


naxa: “Khititix nayar uñjkitu ukax Awkirux uñjarakiwa” sasa (Juan 14:9). Mateo, Marcos, Lucas ukat Juan sata Bibliankiri pusi libronakanxa, Jesucristoxa kunjam sarnaqasirinsa, kunsu luririna ukat kunjam jaqinsa ukanakatwa yatxattanxa.

¹⁶ “Yatichiri” sasaw Jesusaruxa sapxirina (Juan 1:38; 13:13). ¿Kunsa jupax yatichirinxá? “Diosan reinopat” suma yatiyäwinakwa yatichirina. Uka Apnaqäwiwa alaxpachat aka Uraqiru apnaqani, ukatsti walja bendicionanakwa chiqá chuymani jaqinakaru churanini (Lucas 9:11). ¿Khitinkänsa uka yatiyäwixa? Jesús pachpaw akham säna: “Yatichäwixax janiw nayankkiti, jan ukasti khitankitu ukankiwa” sasa, ukhamasti Jehová Diosankiwa (Juan 7:16). Jehová Diosaxa Apnaqäwipat jaqinakax yatipxañapwa munäna, uksti Yuqapax sum yatina. Kunjamasa uka apnaqäwixa ukat kunsa lurani, ukanaxata 8 jaljanwa juk’ampi yatxatañäni.

¹⁷ ¿Kawkhanakansa Jesusax yatichäna? Kawkhanti jaqix utjkäna: markanakansa, pampansa, qhatunakansa, utanakansa yatichapunirînwa. Jesusax janiw mäwjanaki jaqinakaru suyrirkänti, jan ukasti jupaw jaqinak thaqhir sarirînxa (Marcos 6:56; Lucas 19:5, 6). ¿Kunatsa Jesusax yatiyir sarañatakisa, yatichañatakisa wal ch'amachasîna, ukat tiempasa apst'asirakînxa? Ukwa Awkipax munäna ukatwa Jesusax phuqañkama ukxa luräna (Juan 8:28, 29). Ukatsti wali khuyapt'ayasirînwa, ukatwa jaqinakar yaticharakîna (Mateo 9:35, 36). Kunati Diosat chiqäki ukat Diosan amtanakapäki ukanakwa judionakan p'iqiñchirinakapaxa yatichapxañapäna, janiw uk phuqapkänti. Ukampisa, Jesusax yatînwa kunja wakisirînsa jupanakatakixa Diosan Apnaqäwipxat ist'añaxa.

16. ¿Kunsa Jesusax yatiyāna, ukat khitinkānsa uka yatichāwixa?

17. ¿Kawkhanakansa Jesusax yatichäna, ukat kunatsa wal ch'ama-chasina uk lurañatakixa?



*Jesusax kawkhans
jaqinakarux yatichaskakinwa*

¹⁸ Jesusax wali suma jaqinwa, jach'a chuymaninwa ukat wali munasirirakinwa. Munasiñampiw jaqinakarux uñjirina, wawanakas jupampiñ wal munapxirina (Marcos 10: 13-16). Jan yaqhachasawa taqinirus sum uñjana. Taqi jan wali luräwinakarus uñisirinwa (Mateo 21:12, 13). Jaqinakaxa uka urunakanxa janiw warminakarux respetapxirikanti, ukampisa Jesusax wali respetompiw warminakarux uñjirina (Juan 4:9, 27). Jesusaxa wali alt'at chuymaninwa. Mä uruxa apostolanakaparusa kayunakap jariqatayna, ukxa uywatanakakiw lurapxirina.

¹⁹ Jesusax t'aqhisit jaqinakarux wal khuyapayäna, usutanakarus Diosan ajayupampi qullasaw khuyapayasiñapxa uñacht'ayäna (Mateo 14:14). Mä urusti, lepra usuni mä jaqiw jupar akham satayna: "Munsta ukax, aka usuxat k'u-

18. ¿Jesusat kun yatiqasiñsa munasma?

19. ¿Kuna uñacht'äwisa Jesusax jaqinakat wali khuyapt'ayasiritap uñacht'ayistu?



maraptayitasmawa” sasa. Jesusaxa, jupas ukham t’aqhis-kaspa ukhamwa uka jaqitxa wal sintt’asina. Wali khu-yapt’ayasawa luqxtäna, ukatsti sänwa: “Muntwa, k’uma-räxaraktawa” sasa. ¡Uka usutasti waliptxänwa! (Marcos 1: 40-42.) ¿Kunjamakisa uka jaqix jikxataspachäna?

JIWAÑKAMAW AWKIPARUX IYAWSÄNA

²⁰ Jesusatwa yatiqasiñasaxa Diosaru taqi chuyma luqtañansa, Diosaru jaysañansa. Kunayman t’aqhisasisa, wali uñisitasa Awkiparux jaysaskakipuninwa. Satanasan yan-t’anakaparusa janiw jalantkänti (Mateo 4:1-11). Mä tiempoxa, familiaranakapasa janiw juparu iyawsañ munapkä-nati. “Luqhiptxataynawa” sasaw sapxäna (Marcos 3:21). Ukham satpachasa Jesusax Diosan munañapxa luraska-kinwa. Kunapachatí uñisirinakapax sutichjapxäna ukat

20, 21. Diosar taqi chuyma luqtañansa, Diosar jaysañansa, ¿kunat-sa Jesusat yatiqasiñasaw sisna?

nuwapxäna ukhaxa janiw kutkatasirikänti janirakiw nuwasirikänsa (1 Pedro 2:21-23).

²¹ Jan sintt'asiri uñisirinakampi khuyañ jawayataw uñjasina, ukampisa Jesusax jiwañapkamaw Awkiparux iyaw-saskakina (Filipenses 2:8). Amuyt'añäni, wal t'aqhispa-chänxa jiwxän uka uruxa. Autoridadanakansa katuntata, qhanañchirinakampisa k'arintata, jan wali chuymani jue-sanakampisa juchañchata, jaqinakansa larch'ukita, solda-donakansa wali nuwjata, ukhamaw t'aqhisiwayi. Mä lawaru ch'akkatatäxasinxä, akham sasaw jiwañataki satayna: "Taqi kunaw phuqhasxi" sasa (Juan 19:30; Hechos 5:30, MT). Kimsürutxa, Awkipax mä ajayjamwa jaktayäna (1 Pedro 3:18). Pusi tunk urunakatxa alaxpacharuwa kutt'xäna, ukansti "Diosan kupixapan qunt'asiraki" apnaqäwi katuqañataki suyt'asa (Hebreos 10:12, 13).

²² ¿Kunsa Jesusax jiwañkam iyawsasaxa jaytawarapistu? Jiwäwipaxa kusipach uraqina wiñay jakasiñatakiwa mä thakjama jist'ararapistu, kunjamtä Jehová Diosax qalltat-pacha munkäna ukhama. Jutir jaljanxa kunjamsa uka aru-nakaxa phuqasini ukanakxatwa yatxataskañäni.

22. ¿Kunsa Jesusax jiwañkam Diosar iyawsasaxa jaytawarapistu?

KUNSA BIBLIAX YATICHI

- Jesusar phuqasir profecianakasa Jehová Diosan alaxpachat arsüwinakapasa, Jesusax Mesías jan ukax Cristütapa uñacht'ayistu (Mateo 16:16).
- Jesusax janir aka Uraqiru jutkasaxa alaxpachanwa mä ajayjam jakasina (Juan 3:13).
- Jesusax suma yatichiri, wali munasiri ukham suma jaqinwa, Diosar jaysañsa jupaw sum yatichawayistu (Mateo 9:35, 36).

Qhispiyawixa Diosan jiliri jach'a churawipawa

¿Kunas qhispiyawixa?

¿Kunjamsa Diosax qhispiyistu?

**¿Kunjamsa qhispiyawix
jumar yanapt'iristamxa?**

**¿Kunjamatsa Diosar
uka qhispiyawit yuspärasma?**

¿KUNA suma churäwsa jumax katuqirita? Mä churäwixa janiw jila alaniñapäkapuniti chuymar purt'añapatakixa. Qhawqha alaniskpasa, jumarutix uka churäwix kusisiys-tam ukat jakäwimatakisa wakisirichi ukhaxa, suma churäwiwa.

² Taqi churäwinakat sipansa, mä jach'a aski suma churäwiw utji. Jaqinakataki Diosan jach'a churawipawa. Chiqasa, Jehová Diosaxa taqikunwa churistu, ukampisa jiliri jach'a churawipaxa qhispiyawwiwa, mä arunxa, Jesucristo, Yuqapan luqtasiwipawa (Mateo 20:28). Kunjamti aka jaljan uñjkañänixa, uka qhispiyawisti jiwasanakata-kix wali suma jach'a churäwiwa, chiqasa wal kusisiyistu, ukat kunati jiwasataki wakiski ukwa churarakistu. Ukhamasti, uka qhispiyawimpiwa Jehová Diosax sapa mayni-ru munasitapxa uñacht'ayistu.

1, 2. 1) Jumatakixa, ¿kuna kasta churäwisa chuymar purt'kirixa?
2) ¿Kunatsa qhispiyawix taqi churäwinakat sipansa jiliri jach'a churä-wixa?

¿KUNAS QHISPIYÄWIXA?

³ Uka qhispiyäw aruxa, juchampita jiwañampita Jehová Diosax jaqinakaru kutsuyi, ukwa sañ muni (Efesios 1:7). Uka yatichäwi sum amuyañatakixa kunatí Edenan paskatayna uk yatiñasawa. Kunsa Adanax juchachasisax apt'atayna, uk sum yatisawa uka qhispiyäwin wali wiskiritapxa amuyañäni.

⁴ Kunapachatí Jehová Diosax Adanar lurkatayna ukhaxa, jan juchani suma jakäwi churatayna. Amuyarakma, kunja sumakikäna jupatakixa uka jakäwixa. Janipuniwa usuntañapäkänsa, chuymankiptañapäkänsa, jiwañapäkänsa niyakixay amuyupasa jañchipasa jan juchanichinxa. Ukatsti, Jehová Diosampi Adanampixa wali sumwa apasipxäna. "Adanasti Diosan wawapänwa" siw Bibliaxa (Lucas 3:38). Ukhamasti, Adanampi Diosampixa wal munasipxäna, kunjamtix mä munasir awkix wawapampi sum apasipki ukhama. Ukatsti, Diosax uraqxankiri wawapampix sum parlasina, ukat wali kuisita jakasiñapatakisa suma lurañanakwa churatayna, ukhamaraki, Adanax kunjam sarnaqañapänsa ukxa Diosax sum qhanañcharakitayna (Génesis 1:28-30; 2:16, 17).

⁵ Diosaxa "jupar uñtasitwa" Adanarux luratayna (Génesis 1:27). ¿Uka arunakax kamsaños mupacha? Jehová Diosax janiw jiwasjam jañchini ch'akhanikiti, jan ukasti, jan uñjkaña mä ajayuwa, kunjamtí mayiri jaljan yatiqaniwayktan ukhama (Juan 4:24). Adanaxa Diosjama munasiñani, yatiñani, ch'amani ukat chiqqa kankañani luratänwa, uka tuqitwa Adanax Diosar uñtasitänxa. Ukhamaraki, taqi kunsa chuymapat lurañapänwa, mä

3. ¿Kunasa qhispiyäwixa, ukat wali wakisirw sañatakix kun yatiñasas wakisispa?

4. ¿Kunjamäpachänsa Adanatakixa jan juchani suma jakasiñaxa?

5. Diosax "jupar uñtasitwa" Adanarux luratayna siski uka arunakaxa, ¿kamsaños mupacha?

arunxa, amtaparuw kuns lurañapāna, uka tuqitarakwa Awkipar uñtasitānxa. Ukhamasti janiw mā makinjamä-kānti, jan ukasti, jupawa kunatix waliki ukat jan waliki ukxa ajllisapānxa. Ukat Diosar ist'añti amtasapānxa, wiñayatakiw kusipach Uraqin jakasispānxa.

⁶ Adanaxa Diosar jan ist'asaxa, jan walirupuniw purt'asāna, jiwañaru apxaruyataw uñjasiwayi. Juchachasi-sawa uka jan juchani suma jakāwipša, taqi aski churāwinakapsa apt'awayi (Génesis 3:17-19). Adanaxa janiw suma jakāwipaki apt'awaykiti jan ukasti wawanaka-pamppacharuwa apt'awayi. Diosan Arupax akham siwa: "Mā sapa jaqi [Adán] tuqi juchax aka uraqir mantanki-xa, ukat jiwax uka jucha laykurak utjixa, ukhamarakiw jiwax taqi jaqirux katuntawayi juchachasitap layku" sasa (Romanos 5:12). Ukhamasti, taqiniwa Adanan juchapxa katuqawaytanxa. Adanamp chika juchampiru jiwañam-piru taqinis 'aljantatātanwa', ukham siw Bibliaxa (Romanos 7:14). Adanatakisa Evatakisa janiw suyt'āwix utjixiti, jupanakasti yatkasawa Diosar jan ist'apkānti. Ukam-pisa, ¿kunas wawanakapampixa pasañapāna?

⁷ Jehová Diosaxa jaqinakaru qhispiyañwa amti. ¿Kunas mā qhispiyāwixa? Pā tuqitāspawa. Maynirixa akās-pawa, kun chhaqayasasa, yaqhan amparapata kutsuyas-xañatakixa jallasku churañawa wakisipa, jan ukax mā katuntata jaqir kutsuyañatakisa qullqi churañarakiwa wakisipa, ukamp sasiw qhispiyāwixa. Payirix akarakis-pawa, yaqhanakaru jan walir puriyasaxa t'aqhisiwinaka-patxa pagañaw wakisipa, ukaw Biblianxa qhispiyāwi sataxa. Amuyt'añataki, maynix yaqhanakar chijir apt'a-saxa, ukhat ukhwa kutt'ayañapāna jan ukax pagaña-pāna.

6. ¿Adanax Diosar jan ist'asaxa kunarus purt'asiwayi, ukat wawanakaparuw kunarus apt'awayi?

7, 8. ¿Kunas mā qhispiyāwixa?

⁸ Kunjamti yatiqawayktanxa, Adanaxa juchachasisinxa taqiniruw jan walir puriyistu. ¿Ukxa kunjamsa pagsna? Ukatxa, ¿kunjamatsa juchampita jiwañampita mistsna? Kunjamsa Jehová Diosax qhispiyistu ukat kunjamsa jumar yanapiristamxa uk uñañani.

¿KUNJAMSA JEHOVÁ DIOSAX QHISPIYISTU?

⁹ Jan juchani suma jakäwiwa apt'asiwayi. Uka lantisti janiw khitisa jucharara jakäwipxa luqtasapänti (Salmo 49:7, 8). Kunatix apt'asiwayki uk kutsuyañatakixa mä ukham jan juchani jakäwirakiwa munasina. Ukham sarakiwa Diosan Arupanxa. Ukatwa, 'jakañata jakañarakix' churasinañapana (Éxodo 21:23). Ukhamasti, ¿uka jan juchani suma jakäwi Adanax apt'awayki uksti, khitin jakäwipampiraki phuqsnasti? Yaqha jan juchani jakäwiw munasina "taqinin qhispiyasiñap alañataki" (1 Timoteo 2:6).

¹⁰ ¿Kunjamsa Jehová Diosaxa qhispiyäwi churistu? Alaxpachankiri jan juchani mä wawapwa aka Ukaqiru khitaniina. Janiw kawkiriksa khitankänti jan ukasti wali munat sapa Yuqaparuwa khitanina (1 Juan 4:9, 10). Jupasti iyaw sasaw taqi chuyma alaxpachat saraqanitayna (Filipenses 2:7). Jehová Diosaxa María tawaqun purakaparuwa Wawapxa uchatayna, kunjamti pusi jaljan yatiqaniwayktanxa ukhama. Diosaxa qullan ajayupampiwa Jesusarux jan juchan jaqjama yuriyatayna (Lucas 1:35).

¹¹ ¿Kunjamarakiki mä sapa jaqikisti millón millón jaqinakaru qhispiyaspasti? ¿Kunjamatsa taqinis juchanitanxa? Amttati, Adanax juchachasitaynaxa, ukhamatwa jan

9. ¿Kuna kasta qhispiyäwisa munasina?

10. ¿Kunjamsa Jehová Diosax qhispiyäwi churistu?

11. ¿Kunjamsa mä sapa jaqikixa millón millón jaqinakaru qhispiyaspa?

juchani suma jakañxa apt'atayna. Jan juchani suma jakañxa janiwa wawanakaparu jaytawaykiti. Juchampi jiwañampikwa katuqawaytanxa. Jesusasti jan juchani chiqqa jaqñwa, janipuniw juchachaskänti, Biblianxa "qhipa Adana" satarakiwa (1 Corintios 15:45). Mä arunxa, jiwasaru qhispiyañatakixa, Jesusaw Adán lanti sayt'äna. Taqi kunanwa Awkiparux ist'äna, ukatsti jan juchani suma jakāwipwa Awkipar luqtäna. Jesusaxa ukhamwa Adanan juchapat phuqawayi, ukhamaraki jiwasanakarusä mä suyt'äwi churawayistu (Romanos 5:19; 1 Corintios 15:21, 22).

¹² Jesusax janira jiwkasaxa kunjamsa t'aqhisina, ukwa Bibliax sum qhanañchistu. Jan sintt'asisaw wal jawq'japxatayna ukat mä lawaruw ch'akkatapxatayna, ukat khu-yäñwa jiwayapxatayna (Juan 19:1, 16-18, 30; juk'ampi yatxatañatakixa, 204 janat 206 janakama uñxatarakita). ¿Kunatsa ukham wal t'aqhispatchänxa? Kunjamti jutiri mä jaljan uñjkañänixa, yant'anakansti taqi jaqinakawa Jehová Diosata saraqxapxani, sasaw Satanasaxa satayna. Jesusax ukham wali t'aqhisinän aguantasaxa, Satanasan k'aritätawa uñacht'ayäna. Ukhamasti, Supayan kunaymanita yant'katasa; jan juchani, chuymaparjam taqi kuns lurir mä jaqixa janipuniw Jehová Diosatxa saraqkaspiti, ukwa Jesusax uñacht'ayäna. ¡Wawaparu ukham aguantatap uñjasaxa Diosax wal kusispachäna! (Proverbios 27:11.)

¹³ ¿Kunjamsa qhispiyāwixa phuqasina? 33 jichha pacha marana, nisán phaxsita 14 urunak saraqatarusti, Diosan Yuqaparuw jiwayapxatayna, jupasti jan juchani jaqñwa. Ukhamatwa Jesusaxa "mä kuti wiñayatak jupa pachpa" jan juchani jakāwipa luqtasiwayi (Hebreos 10:10). Kimsüru jiwatatwa Jehová Diosaxa mä ajayjama

12. ¿Kunsa Jesusax wal t'aqhisisaxa uñacht'ayäna?

13. ¿Kunjamsa qhispiyāwixa phuqasina?

ΙΗΟΥ ΧΟΝΑΖΩΡΑΙΟΥ
ΟΒΑΔΙΟΥ ΤΩΝ ΝΙΟΥΔΑΙΩΝ

*Jehová Diosaxa
wali munat sapa
Yuqapampiwa
qhispiyistu*



juparu jaktayāna. Alaxpachansti, Awkiparuwa Jesusaxa uka suma jakāwipxa churatayna, uksti mā waxt'jamwa luqtatayna, Adanan wawanakaparu qhispiyañataki (Hebreos 9:24). Jehová Diosax Jesusan luqtāwipxa iyaw sasaw katuqāna, ukhamasti khā luqtāwixa jaqinakaru juchampita jiwañampita qhispiyañatakinwa (Romanos 3:23, 24).

¿KUNJAMSA QHISPIYÄWIX JUMAR YANAPT'IRISTAMXA?

¹⁴ Juchararākasinsa, uka qhispiyāwi utjipanwa bendicionanaksa katuqsna. Jichhūrunakansa jutir urunakan-sa kuna bendicionanaksa katuqañāni Diosan qhispiyā-wipatxa, ukanaxat mā qhawqha uñxatañāni.

¹⁵ *Juchanak pampachāwi*. Jiwasanakatakixa kunati as-kiki uka lurañaxa wali ch'amawa. Kunattix taqiniwa ju-chachastanxa, arumpisa, lurāwinakampisa pantjasipun-tanwa. Ukampisa "juchanakasat pampacha[tāsna]w", Jesusawa jiwās layku luqtasiwayi (Colosenses 1:13, 14). Ukatakisti chuymatpachwa juchanakasata arrepentisi-ñasaxa. Ukat wali alt'at chuymampiwa Yuqapan luqtā-wipxaru juchanak pampachayasiñataki Diosat mayisi-ñasa (1 Juan 1:8, 9).

¹⁶ *Diosampi iyawsatāña*. Jucharar chuymaññax janiw walikiti, jan suyt'āwin jaytistu, janis kunatakis waliksna ukham uñjasiyistu. Ukampisa qhispiyāwi utjatapatwa Jehová Diosax juchanakasxa pampachistu, ukhamaraki uka qhispiyāwi utjatapatwa juchararākasinsa Jehová Diosarux q'uma chuymampi yupaycharaksna (Hebreos 9:13, 14). Ukhamatwa jan axsarasa Diosatxa mayissna (Hebreos 4:14-16). Ukampisa q'uma chuymaññasxa jan

14, 15. ¿Kun lurañasasa "juchanakasat" pampachayasiñatakixa?

16. ¿Kunjamatsa Diosaru q'uma chuymampi yupaychsna, ukat kunanakansa q'uma chuymaññasxa yanapistu?



*Jehová Diosar
juk'ampi
sum uñt'añataki
ch'amachasisawa
qhispiyáwita wal
yuspäratamxa
uñacht'ayäta*

llakitakiw sarnaqastanxa ukat jiwaspachasa walikiw jik-xatastanxa, ukat juk'ampi kuisitarakitanwa.

¹⁷ *Kusipach Uraqina wiñayatakiwa jakassna.* Romanos 6:23 akham siwa: “Juchan waxt'asiñapasti jiwañawa” sasa. Ukxarusti akham sarakiwa: “Ukampis Diosan waxt'äwipax wiñay jakañawa Cristo Jesus[ana]” sasa. Aka li-bron 3 jaljapanxa kuna bendicionanakasa jak'achasisin-ki ukwa uñxatawaytanxa (Apocalipsis 21:3, 4). Taqi uka bendicionanaksa ukhamaraki wiñayataki suma jakasiñ-sa, Jesusan jiwatapatwa katuqañäni. Ukatakixa qhispiyä-wit yuspärataswa uñacht'ayañasa.

¿KUNJAMSA UKA QHISPIYÄWIT YUSPÄRATAMXA UÑACHT'AYASMA?

¹⁸ ¿Kunatsa uka qhispiyäwitxa Jehová Diosaru taqi chuyma yuspärañasa? Mä churäwixa wali valoraniwa kunapachatí waxt'asirix jiwasanak layku qullqsa, tiemp-sa, ch'amapsa apt'aski ukhaxa. Chuymar purt'kiri uka churäwimpisti munasiñapwa uñacht'ayistu. Ukhamasti, qhispiyäwixa taqi kunat sipansa, Diosan wali suma ja-

17. Jesusan jiwäwipatxa, ¿kuna bendicionanaksa katuqañäni?

18. ¿Kunatsa qhispiyäwitxa Jehová Diosaru yuspärañasaxa?

ch'a churāwipawa. "Diosax akapachar wal muna[si]tap laykuw mä sapa Yuqapar khitanu" siwa Juan 3:16 jisk'a t'aqaxa. Diosax qhispiyāwimpiwa jach'a munasiñapxa uñacht'ayistu. Jesusasti iyaw sasa jiwasanak layku jakañap apt'asawa munasiñapxa uñacht'ayarakistu (Juan 15:13). Ukhamasti, Jehová Diosampi Jesusampisti sapa mayniruwawa munasipxistu, ukwa qhispiyasiñ churāwimpix uñachayapxistu (Gálatas 2:20).

¹⁹ Ukhamaxa, ¿kunanaka lurasasa Diosan churāwipat yuspäratamxa uñacht'ayäta? Ukatakixa, *qhispiyāwi churiri Jehová Diosar juk'ampi nayraqat uñt'añamawa* (Juan 17:3). Aka librompi Bibliat yatiqasawa Jehová Diosaruxa sum uñt'äta. Ukatxa juk'ampwa juparux munasita. Ukham jupar munasita ukhasti juk'ampirakiwa chuy-mapar purt'añxa munarakita (1 Juan 5:3).

²⁰ *Qhispiyāwir iyawsäwiniñäni*. "Khititix Yuqar iyawski ukaxa wiñay jakañaniwa" sasaw Jesusat qillqasina (Juan 3:36). ¿Kunjamsa Jesusar iyawsatasxa uñacht'ayna? Kunjamti Santiago 2:26 siski ukhamäñapawa, ukanxa akham siwa: "Kunapachatix jan suma lurāwinakampi uñacht'ayaski ukkhaxa" "iyawsañax jiwata[wa]" sasa. Ukhamasti iyawsäwisaxa janiw arukiñapäkiti. Chiqpach iyawsäwinitasxa suma lurāwinakampiwa uñacht'ayañasa. Parlañansa lurañansa Jesusat yatiqasisawa jupar iyawsatasxa uñacht'ayañäni (Juan 13:15).

²¹ *Jesusan Cenapata sapa mara amtaski uka tantachäwiru sarañäni*. 33 marana, nisán phaxsita 14 urunak sarraqat arumawa, Jesusax mä cena utt'ayäna, ukasti Biblianxa "Santa Cena" satawa (1 Corintios 11:20; Mateo 26:26-28). Jesucriston jiwätapata amtaña satarakiwa.

19, 20. ¿Kunjamanakatsa Diosan qhispiyasiñ churāwipat yuspäratamxa uñacht'ayasma?

21, 22. 1) ¿Kunatsa Jesusan Cenapat sapa mara amtaski uka tantachäwiru sarañasa? 2) ¿Kuna tuqitsa jutir jaljanakanxa yatxatañäni?

Uksti, Jesusaxa utt'ayataynawa apostolanakaparu ukhamaraki taqi chiqa cristianonakaru ak amtayañataki: jiwasiñti, jan juchani suma jakañapwa jiwasanakaru qhispiyañataki luqtasiwayi, ukax wali wakiskiriwa. Jesusax akhamwa arsüna: "Akxa nayat amtasisin lurapxam" sasa (Lucas 22:19). Jehová Diosampi Jesusampixa wali munasiñapatwa qhispiyapxistu, ukwa amtayistu Jesucriston jiwatapat sapa mar amtañaxa. Uka tantachäwiru sarasaxa, uka qhispiyäwita yuspärataswa uñachaytanxa.*

²² Qhispiyäwixa Jehová Diosan wali valoran churäwipawa (2 Corintios 9:14, 15). Jiwat jaqinakarusa yanapt'arakiniwa, uka tuqitxa 6 ukat 7 jaljanakanwa juk'ampi yatxatañäni.

* Juk'ampi yatxatañatakixa, 206 janat 208 janakama uñxatäta, Santa Cenaxa kun saña mupacha uka tuqita.

KUNSA BIBLIAX YATICHI

- Jehová Diosax qhispiyäwimpiwa juchampita jiwañampita kutsuyistu (Efesios 1:7).
- Aka Uraqiru wali munat sapa Yuqaparu khitanisawa Jehová Diosax qhispiyistu (1 Juan 4:9, 10).
- Qhispiyäwi utjatapatwa: juchanakasasa pampachata, Diosatakisa q'uma chuymanñitanxa, ukatarakwa wiñayataki jakasiñäni (1 Juan 1:8, 9).
- Jehová Diosar juk'ampi uñt'asa, Jesusan luqtäsiwipar iyawsasa, Jesusan Cenapar sarasawa qhispiyäwita wal yuspäratasxa uñacht'aysna (Juan 3:16).

¿Kawkinkapxisa jiwatanakaxa?

¿Jiwatatxa jakañax utjaskakpachati?

¿Kunatsa jiwtanxa?

¿Jiwañxata chiqa yatiñaxa chuymachistaspati?

WARANQ waranqa maranakawa ukham jiskt'asipxi, ukats-ti uka yatiñaxa wali wakisiriwa. Khitiskañänisa, kawkhans jakasiskañäni, taqiniwa uka jiskt'äwinakat yatiñ muntanxa.

² Jesucristox jiwasanak layku luqtasiwayki uka qhispiyä-wixa mä thakjamwa wiñay jakañ katuqañasataki jist'arara-pistu uka tuqitwa 5 jaljan yatiqtanxa. Bibliaxa, "janirakiw ji-wañas [...] utjixaniti" siski uksa yatxaraktanwa (Apocalipsis 21:4). Uka uru puriniñapkamaxa jiwaraskakiñäniwa. "Khi-tinakatix jakasipki ukanakaxa yatisipxiwa jiwxañanakapa" sasaw Salomonax satayna (Eclesiastés 9:5). Qhawqhaxay jakañjamächi ukhakamakwa jaktanxa, ukampisa jiskt'asis-kaktanwa, ¿jiwatatxa jakañax utjaskakpachati?, sasa.

³ Kunapachati familiaranakasax jiwxi ukhax inas akham jiskt'asirista: "¿Kunjamakisipkpachasa? ¿T'aqhisisipkpacha-ti? ¿Uñjasipkpachistuti? ¿Jupanakarux yanapsnati? ¿Jupa-nakampix wasitat uñjasiskañäniti?" sasa. Uka tuqitxa, yu-paychäwinakax kunaymaninak yatichapxi. Suma jaqina-kaxa alaxpacharuw sarapxi ukat ñanqha jaqinakasti aqkir infiernoruw sarapxaraki sasaw yaqhip yupaychäwinakan-xa yatichapxaraki. Jiwatanakaxa ajayjamaw sarxapxi nay-ra achachilanakampiññataki sasaw yaqhanakax sapxaraki. Ukatsti jiwatanakan markaparuwa taripataññataki jan ukax

1-3. ¿Kunanaksa jiwañxata jaqinakax jiskt'asipxixa, uka tuqit kamsap-xisa walja yupaychäwinakaxa?

juzgatãñataki sarapxi ukat yaqha cuerpona yuriñataki, sasaw yaqhipa yupaychãwinakanxa yatichapxaraki.

⁴ Jiwxtan ukhaxa ajayux jakaskakispa ukhamwa taqi uka yupaychãwinakanxa yatichapxi. Nayraxa jichhasa yupaychãwinakaxa jiwatatxa wiñayatakis jakasksna ukat uñjasknasa, ist'asknasa, amuyaskaraksnasa ukham sasaw sapxi. ¿Ukhamãspati? Lixwimpipuniwa (laxwi) amuytansa, uñjtansa, ist'tansa, ukat jiwxtan ukhaxa lixwix sayt'xiwa. Ukhamax janiw kuns amtasksnati, ni usuyaskaraksnasa, ni ist'ksnasa, ni uñjkaraksnasa. Kunattix lixwix sayt'xiwa.

JIWATATXA, ¿JAKAÑAX UTJASKAKPACHATI?

⁵ Jiwxtan ukhax kunjamakisktansa ukxa Jehová Diosax sum yati, kunattix jupawa lixwi Luririxa. Jupaw chiq yati, ukat kunjamãsipkisa jiwatanakaxa ukxa sumwa Arupanxa qhanañchaski. Ukanwa qhan yatichasi uka tuqitxa: *kunapachati maynix jiwxi ukhaxa janiw utjixiti*. Jiwañaxa janiw jakãwjamãkiti, jiwatanakaxa janiw ist'apkisa, ni uñjapkisa ni kuns amuyapkiti. Jiwxtan ukhaxa q'al tukusxtanxa janiw kunas jiwatatxa jakxiti. Ukhamasti janiw almaniktanti, mã arunxa, janiw wiñayatak jakir mã ajayuniktanti.*

⁶ Khitinakatix jakasipki ukanakaxa yatisipxiw jiwxañanakapa, ukham sasinxa, Salomonax akham qillqarakitayna, “jiwatanakax janiw kunsa yatipkiti” sasa. Uka yatichãwxaxa akham sasaw qhanañchaskakina: janiw khitirusa munasipkaspiti ni uñisipkaspasa, uka ‘sepulcronxa’ “janiw kuna lurañas utjkiti, kuna lup'iñasa, uñt'añasa, janirakiw yatiñañiñasa utjkiti” sasa (Eclesiastés 9:5, 6, 10). Ukatxa, Salmo 146:4 akham sarakiwa, kunapachatix maynix jiwxi ukhaxa, “amtatanakapax tukusxi[wa]” sasa; ukhamasti, q'al tu-

* Juk'ampi yatxatañatakixa 208 janat 211 janakamwa uñxatãta, ukanwa *almampita ajayumpita* sum qhanañchasiski.

4. ¿Kamsasas walja yupaychãwinakax jiwañxat yatichapxi?
5, 6. Biblian yatichãwinakaparjamaxa, ¿kunjamãsipkisa jiwatanakaxa?

¿Kawkinapxisa jiwatanakaxa?

kusxi. Chiqasa, taqinisa jiwirikitanwa janiw cuerpon jiwatapxaruxa jakxtanti. Jakäwisa-xa mä velan ninapjamawa. Kunapachati nin jiwayktan ukhaxa janiw kawkirus sarkiti, jan ukasti ina ch'usarukiw tukusxi.

JESUSAX JIWAÑXAT KAMSATAYNASAX

⁷ Mä amigopawa jiwxatayna, ukat parlasaw Jesucristox jiwatanakxat sum qhanañchäna. Nayraqatxa arkirinakaparux akham sänwa: "Lázaro amigosax ikiskiw" sasa. Usutat waliptasas Lazarox ikiskaspa ukhamwa arkirinakapax amuyapxatayna. Ukampis janiw ukhamäkanti, Jesusaw jupanakarux sum qhanañchäna: "Lazarox jiwataw" sasa (Juan 11:11-14). Jiwañax ikimpi, samarañampi sasikaspas ukham sasaw Jesusax säna. Amigopax janiw alaxpachankkänsa ni aqkir infiernonkkänsa. Janiw angelanakampiñataki sarkataynati ni nayra achachilanakapampiñatakisa, ni yaqha cuerponsa yurkataynati. Jiwañanwa samaraskäna, jan samkaniw jiw ikt'askäna. Biblianxa yaqha chiqanakanxa, jiwañax ikimpi sasikaspas ukham sarakiwa. Sañäni, Jesusax mä imill wawaru jaktayir sarasinxa "ikiskiw" sataynawa (Lucas 8:52, 53). Isaiasaxa "uraqin ikinakasti ikinakapatxa sartapxaniwa" sarakitaynawa (Isaías 26:19).

⁸ ¿Jehová Diosax jaqinakan jiwañapxa munpachati? Janiwa. Uraqin wiñay jakasipxañapatakiwa jaqinakarux luratayna. Kunjamti aka libron yatiqktanxa, Diosaxa mä suma huertoruw nayrír awk taykasarux uchäna, ukatsti janipuniw usuntapxañapäkanti. Ukhamasti askinakwa Diosax jaqinakatakix munäna. ¿Khiti awkiraki wawanakapana chuy-mankiptasin jiwañap munaspasti? ¡Janiw khiti awkisa



¿Nin jiwaytan ukhax kawkirus ninax sari?

7. ¿Kunsa Jesusan arunakapaxa jiwañxat yatichistu?

8. ¿Kunatsa Diosax janipuniwa jiwañasxa munkanti sasax sisna?

ukham munkaspati! Ukhamasti Jehová Diosaxa wawanakaparuxa wal munasina ukatxa wiñayataki aka Uraqina kususita jakasipxañapwa munäna. Bibliaxa “kunati wiñayäki” ukwa “jaqin chuymaparu” Diosax uchatayna siwa (Eclesias-tés 3:11). Ukhamaxa, wiñayataki jakañ muniri luratätanwa, ukat wiñay jakasiñasatakixa mä thakwa jist’ararapistu.

¿KUNATSA JIWTANXA?

⁹ Ukhamasti ¿kunatsa jiwtanxa? Uk sum amuyañatakixa,

9. ¿Kamsataynasa Diosax Adanaruxa, ukat kunatsa uka kamach phuqañax jan ch’amäkäna?

*Uraqin wiñay jakasipxañapatakiw
Jehová Diosax jaqinakar
luratayna*



kunapachatí aka Uraqin mä chacha warmiki utjkäna ukhaxa, kunas pasatayna uk yatxatañasawa. Bibliaxa akham siwa: “Diosax taqi casta suma frutanak achuri quqanak jilayarakina, ukanakasti manq’añatakínwa” sasa (Génesis 2:9). Ukampisa, Diosaxa, Adanaruxa akham sataynawa: “Aka huerton taqi quqanakat manq’asita, ukampisa aski ukhamarak ñanqha yatiñ churir quqatxa janiw manq’ätati. Uka quqan achunakapxa jan manq’amti, manq’äta ukapachasti chiqpachan jiwäta” sasa (Génesis 2:16, 17). Janiw jan phuqañjam kamachikänti, Adanampi Evampi manq’asiñapatakixa kunaymani walja quqanakawa utjäna. Ukampisa, uka quqaxa Diosar yuspäratapa uñacht’ayañatakínwa, Jupaw taqi kunsä, jan juchani suma jakäwsa churatayna. Uka kamachiru ist’asaxa uñacht’ayapxaspänwa alaxpachankiri Awkiparu respetapxatapa ukhamaraki arunakaparü ist’añ munapxatapa.


¹⁰ Nayriri awk taykasaxa Jehová Diosar jan ist’añwa ajlli wäpxatayna. Mä asirumpiwa Satanasaxa Evaru arxayatayna, ukat akham sasawa jiskt’atayna: “¿Ukhamax Diosax sapxtamti: ‘Janiw kawkiri quqan achunakapsa manq’apxätati’ sasa?”. Ukxarusti Evax sataynawa: “Kawkiri quqan achupatsa manq’asipkakiristwa, chika taypinkki uka quqan achunakapakwa janix manq’apkiristtixa. Diosasti sapxarakituwa: ‘Janiw uka quqan achupxa manq’apxätati ni llamkt’apxätasa. Manq’apxäta ukhasti jiwapxataw’ sasa” (Génesis 3:1-3).

¹¹ Supayax akham sataynawa: “Janiw jiwapkätati. Diosax yatiwa, kunapachatix jumanakax uka quqan achunakapata manq’apxasma ukkhax yatipxasmawa kunatix askiki, ukhamarak ñanqhäki ukanakxa, ukatsti Diosjamäpxasma-wa” sasa (Génesis 3:4, 5). Jark’asit quqan achupa manq’añaxa walispaw sayañwa Supayax munäna. Ukhamatwa,

10, 11. 1) ¿Kunanakasa nayra awk taykasaruxa kamach p’akintañaru puriyatayna? 2) ¿Kunatsa Adanampi Evampixa jan ist’asisa wali jach’a jucharu purt’asipxatayna?

amtapxäta kunatix askiki, ñanqhäki ukanakxa; mä arunxa, munañanakamaruwa taqi kunsa lurapxäta sasaw satayna. Jehová Diosax uka quqan achupxa janiw manq'apxätati sänwa, uk sasinxa Diosax k'ariskaspas ukhamwa Supayax säna. Evaxa Supayaruwa ist'atayna, ukhamasti janiw manq'apxätati sat quqan achupwa manq'antatayna. Ukxarus-ti chachaparuwa churarakitayna manq'antañapataki. Janiw jan yatipkänti. Kuntí Diosax janiw manq'apxätati siskäna ukxa sum yatipxäna. Uka achu manq'antasasti, yatkasawa Diosan suma kamachipxa p'akintapxatayna. Ukhamatwa alaxpacha Awkiparuxa jisk'achapxäna janiw awkiparjama-sa uñjapkänti. ¡Wali jach'a jucharupuniwa purt'asipxatay-na, ukham Inuqiriparu jan respetasaxa!

*Adanaxa laq'at luratänwa,
laq'arurakiw kutt'xäna*



¹² Amuyt'añäni, mä wawa sum uywassna ukat jan ist'xistaspati, janiraki respetxistaspasa, uñisxistaspa ukhaxa, wali chuyma usuyäspawa. Ukhamarakiwa, kunjaki Jehová Diosan chuymapax ust'käna kunapachatix Adanampi Evampix juparu kutkatasipkatayna ukhaxa.

¹³ Uka panipaxa Jehová Diosaruwa jan ist'apkataynati, ukatxa janiw wiñayataki jakxapxañapäkänti. Ukatwa, jiw-xapxäna, kunjamtí Diosax siskäna ukhama. Tukusxapxänwa. Ukhamasti, janiw yaqha chiqaru ajayjam jakir sarap-känti. Akham sasawa Jehová Diosax säna kunapachatix Adanaru juchañchkäna ukhaxa: "Sapüru manq'añamsti jump'imampirakiw jikxatäta, kuna laq'ata luratäktatix ukar kuttañamkama, laq'ätawa, laq'arurakiw kuttäta" sasa (Génesis 3:19). Diosax laq'atwa Adanarux luratayna (Génesis 2:7). Janir luratäkasinxä Adanax janiw utjkänti. Ukhamasti, "laq'arurakiw kuttäta" siskäna uka arunakampisti, Jehová Diosaxa, kunjamäkantix janir luratäkasinxä ukaruw kutt'äta sañ munäna, laq'aruwa tukuñapäna, mä arunxa jan jakäwini.

¹⁴ Adanas Evasa jichhürkama jakasipkasapänwa, ukampisa Diosar jan ist'asa juchachasipxatapatwa jiwapxi. Taqinisa jupan wawanakapätanwa, juchampi jiwañampi jaytawa-yistu ukatwa taqinisa jiwaraktanxa (Romanos 5:12). Uka juchaxa jan wali usump sasiwa, awkisa wawanakaparu uka usu pasaykaspä jan ukax tutiwaykaspä ukhamawa, janiw khitisa uka usut qhispkaspati. Ukat jiwañaxa janiw muna-siríkisa ni bendicionäkisa, jan ukasti mä uñisirimpi sasiwa (1 Corintios 15:26). Uka jan sintt'asir uñisirita kutsuyañatakixa Jehová Diosawa mä qhispiyäwi churistu, ¡uka qhispiyäwitxa wal yuspärañasawa!

12. Adanas Evas Diosar chuyma wal usuyapxatayna ukxa, ¿kuna amuyäwis sum amuyañ yanapistaspä?

13. ¿Jiwatatxa Adanaruxa kunaw pasañapän sis Jehová Diosaxa, ukat ukax kun sañs muni?

14. ¿Kunatsa jiwtanxa?

¿KUNJAMSA JIWAÑAT CHIQA YATIÑAXA YANAPISTU?

¹⁵ Jiwatanakaxa kunjamäsipkisa uka tuqitwa Bibliaxa yatichistu, uka yatichäwisti wal chuymachistu. Kunjamti yatiqktanxa, janiw t'aqhisipkiti, ni usuyasipkisa. Janiw jiwatanakaru axsarañasäkiti, janiw kuns kamachapkistaspati. Janiw jupanakax yanapkistaspati, jiwasanakasa yanapkaraksnati. Janirakiw jupanakampixa parlt'askaraksnasa. Qullq apsuñatakixa, k'ari yupaychäwin walja yatichirinakapawa, jiwatanakaruxa yanapsnawa sapxi, ukar iyawsir jaqinakaxa, qullq churapxi. Ukampisa uka tuqita sum yatisaxa janiw uka k'arinak ist'xtanti.

¹⁶ Sarktan uka yupaychäwixa, ¿jiwatanakxata Biblian chiqqa yatichäwipar iyawsiti? Niya taqpach yupaychäwinakaxa janiw iyawsapkiti. ¿Kunatsa? Kunattix Supayampi mayjt'ayatawa yatichäwinakapaxa. Jiwatat yaqha chiqan jakaskaksnasa ajayur uñtata, uk iyawsayañatakiwa k'ari yupaychäwinak Supayax apnaqi. Ukatsti, yaqha k'ari yatichäwinakampiw Jehová Diosat jaqinakar jithiqtai. ¿Kunjamanakatsa?

¹⁷ Kunjamti yatiqktanxa, yaqhipa yupaychäwinakanxa, ñanqha jaqinakaxa aqkir infiernon t'aqhisipki sasaw yatichapxi. Uka yatichäwixa Jehová Diosarux k'arintiwa, jupasti wali munasiñan Diosawa ukat janipuniw khitirus t'aqhisisykaspati (1 Juan 4:8). Mä jaqixa jan ist'asir wawaparu amparap ninar luqxatayasin t'aqhisiyaspa ukhaxa ¿kamsasmasa? ¿Uka jaqir uñt'añ munasmati? ¿Jupar respetasmati? Janiwa. Jan sintt'asir qhuru jaqiw sasmawa. Ukhamarakiwa, Jehová Diosax aqkir infiernonsa jaqinakaru wiñay wiñayataki t'aqhisisykaspa ukham iyawsañaswa Supayax muni.

¹⁸ Satanasax yaqhip yupaychäwinakampixa akham sasaw

15. ¿Kunatsa jiwañat chiqqa yatiñaxa chuymachistu?

16. ¿Niya taqi yupaychäwinakan yatichäwinakaparux khitis mayjt'ayi, kunjamatsa?

17. ¿Kunatsa Jehová Diosar k'arinti infiernon t'aqhisiñ yatichäwixa?

18. ¿Kuna k'ari yatichäwinak yatiqasasa jiwatanakarux yupaychapxi?

yatichayi, jiwatanakaxa ajayuruwa tukupxi ukat yupaychañasawa respetañasarakiwa sasa. Jiwatanakan ajayupaxa wali ch'amani munasirispawa jan ukax wali ch'amani uñisirispawa sasaw uka yatichäwimpix sañ munapxi. Ukaru iyaw-sasasti walja jaqinakawa jiwatanakaruxa axsarapxi, yupaychapxaraki. Bibliaxa janiw ukham yatichkiti, jan ukasti jiwatanakax ikisipkiw siwa, ukat Jehová chiqpach Diosarukiw yupaychañasa sarakiwa, jupan luratātanwa, jupawa taqi kuns churistu (Apocalipsis 4:11).

¹⁹ Jiwatanakxata chiq yatisaxa janiwa yupaychäwinakan k'ari yatichäwinakapxa juk'ampi ist'xtanti. Ukatsti, Biblian yaqha yatichäwinakapsa sum amuyxtanxa, sañäni, Kuspachan wiñayataki jakasiñ tuqitsa sum amuyxaraktanxa. Jiwatanakaxa janiwa ajayjama kawkirusa jakir sarapkiti uk yatiqktan ukhaxa, wiñay jakañ suyt'äwixa, jiwasanakatakixa qhanäxiwa.

²⁰ Jaya nayra maranakanwa Job chachaxa akham jisk-t'asina: "¿Mä jaqisti jiwxasinxa wasitat jaktanxaspati?" sasa (Job 14:14). Mä arunxa, ¿jiwañan samaraskirinakaruxa jakañax wasitat kutt'ayasispati? Uka tuqit Biblian yatichäwipaxa wal chuymacht'asiriwa, ukxa jutir jaljan uñjañäni.

19. Jiwatanakxata chiq yatisaxa, ¿Biblian kuna yaqha yatichäwinakapsa sum amuyxtanxa?

20. ¿Kuna jiskt'äwitsa jutir jaljan yatxatañäni?

KUNSA BIBLIAX YATICHI

- Jiwatanakaxa janiw kuns yatipkiti, janiw uñjapkiti, ni ist'apkarakisa (Eclesiastés 9:5).
- Jiwatanakaxa ikisipkiwa, janiw t'aqhisipkiti, ni usuyasipkisa (Juan 11:11).
- Adanatwa juchxa katuqtanxa ukatwa jiwaraktanxa (Romanos 5:12).

¡Jiwirinakasataki chiqpach suyt'äwi!

**¿Kunatsa jiwatanakaxa
jaktanipxapuniniw sasax sisna?**

**¿Jehová Diosax jiwatanakaru
jaktayañ qhawqsa munpacha?**

¿Khitinakasa jaktanipxani?

MÄ JIWAYIRIS familiaranakamar jiwarayasinxa jiwayañataki arkjaskiristam ukham sañäni, ukatxa jumat sipansa wali ch'amanispa wali t'ijurirakispa. Katjiristamxa, jan sintt'asisaw jiwayiristamxa. Inaw imantasä sas t'ijuskasma, jak'achasiniskakispawa. Ukatsti, akatjamata uka jiwayirit sipansa wali ch'amani mä qhispiyirix uñstanispa, ukat nayaw yannapt'äma siristam ukhaxa, ¿kunjamakis jikxatasisma?

² Niya ukhamjamarakiwa mä uñisirix jumar arkjasktamxa, chiqasa taqiniruw arkjaskistu. Kunjamtix 6 jaljan yatiqtanxa jiwañax mä uñisirisäkaspasa ukhamawa siw Bibliaxa. Jiwañatxa janiw khitis qhispsknati janirakiw jiwañarux atipkaraksnasa, niya taqiniruwa, familiaranaksa munasitanaksa jiwax apaqistu. Ukampisa, Jehová Diosaxa jiwañat sipansa wali ch'amaniwa. Jupawa jach'a Qhispiyirisaxa. Yaxaraktanwa jiwañar Juan atipjatapxa, ukatsti jan mayampitakiw jiwañarux chhaqtayani. Bibliax siwa: "Qhipiri uñisiristi jiwañawa, ukas q'ala t'unjatarakiniwa" sasa (1 Corintios 15:26). ¡Wali suma yatiyäwiwa!

³ Kuntä Jehová Diosax jiwatanak layku lurkani uk sum

1-3. ¿Kuna uñisiris taqinirus arkjistu, ukat kunjamsa Biblian yatichäwinakapaxa chuymachistu?

amuyt'añatakixa, kuna llakinakti jiwañax apanki uka tuqit amuyt'añäni (Isaías 26:19). Jehová Diosaw wasitat jiwatanakaru jaktayanini, ukwa jaktaniñ suyt'äwix sañ muni.

MÄ MUNATAX JIWXI UKHAXA KUNAS KAMACHI

⁴ Inas familiaramas jan ukax munat masimas chhaqta-wayxchi. Ukhax wal llakistanxa, janiw kunas kamacht'añ-jamäkiti. Ukhaw Diosan Arupana chuymachäwipxa wal muntanxa (2 Corintios 1:3, 4). Jehová Diosampi Jesucristompixa, jiwañxat kamsapxpachasa ukwa Bibliax yatichistu. Kunapachatì Jesusan mä munat masipax jiwxatayna ukhaxa jupaxa wal llakt'asina, ukat yatiraktanwa jupax Awkipjam sintt'asirıtapa (Juan 14:9). Jesusaxa Jerusalén markar sarasaxa, Lazarompi Mariampi Martampiru tumpt'irix Betania markarux sarapuniritaynawa. Jupanakaxa wal uñt'asipxäna siwa, ukatwa Bibliax akham sixa: 'Jesusax Martarusa kullakaparusa, ukhamarak Lazarorusa, wal munasina' sasa (Juan 11:5). Kunjamtix 6 jaljan uñjaniwayktanxa, Lazarow jiwatayna.

⁵ ¿Kunjamsa Jesusaxa jikxataspachäna munat masipax jiwxäna ukapachaxa? Lazaron familiaranakaparu, uñt'atanakaparu uñjiriw Jesusax saräna siw Biblianxa, jupanakasti wal jachapxäna Lazaron jiwatapatxa. Jupanakar jachir uñjasinsti "llakitaw uñjasina, chuymapsti ch'allxtayasirakinwa". Ukatxa, "Jesusasti jachänwa" (Juan 11:33, 35). ¿Kunatsa ukham jikxataspachäna? ¿Janit jaktañap yatkpachäna? Yatiskänwa. Jupax mä milagro niya lurañatakiskänwa (Juan 11:3, 4). Uk yatkasasa, jiwañ utjatapatxa wal llakt'asina.

⁶ Jesusan ukham llakt'asitapax wal chuymachistu. Ukampixa yatichistuwa Awkipasa jupasa jiwañaru uñisipxatapa.

4. 1) Lazarox jiwatayna ukhaxa Jesusax wal llakisina, ¿kunsä Jehová Diosat ukax yatichistu? 2) ¿Khitinakan munat masipänasa Jesusaxa? 5, 6. 1) ¿Kunjamsa Jesusax jikxatasina kunapachatix Lazaron familiaranakapasa uñt'atanakapas jachasipkäna ukhaxa? 2) ¿Kunatsa Jesusan llakt'asitapaxa wal chuymachistu?

Ukampisa, Jehová Diosaxa jiwañaru atipjañatakisa chhaq-tayañatakisa ch'amaniwa. Jesusaxa Diosan ch'amapampixa mä milagro luratayna, uk jichhax uñjañäni.

“¡LÁZARO, MISTUNIM!”

⁷ Lazaron amayapaxa mä qullu p'iyar imatäxänwa, ukatsi Jesusaxa uka sepulturar atkatat jach'a qal atiqapxam sataynawa. Ukampisa Martaxa janiw munkänti, niya thujs-tatäxpachawa, pusüruxchixay jiwatapatxa sataynawa (Juan 11:39). Janiw Lazarox jaktkaspati sapxpachänwa jaqinakaxa.


⁸ Kunapachatix qal atiqapkäna ukhaxa Jesusaxa akham sasawa jach'at art'äna: “¡Lázaro, mistunim!” sasa. Ukxaruxa, “jiwatasti mistuninwa” (Juan 11:43, 44). ¡Kunjama-kiki kusiipkäna! Kullakanakapasa, familiaranakapasa, uñt'a-tanakapasa ukat uta jak'ankirinakapasa sum yatipxäna Lazaron jiwatapxa, ukat jichhasti uka wali munat Lazarosti wasitat jupanakamp chikäxäna. Janipuniw chiqaw sañjamäkpachänti. Ukhamasti, wali kusiisitaw qhumantapxapachäna. ¡Jiwañaxa atipjatawa uñjasina!

⁹ Janiw Jesusaxa uka milagrxaxa, nayaw lurtaxa sasax sis-känti. Janira Lazaroru jaktaykasaxa, Awkiparuwa mayisina, ukhamatwa jiwatanakar jaktayir Jehová Diosätapxa uñt'a-yäna (Juan 11:41, 42). Jehová Diosaxa janiw Lázaro sapa-ruki ch'amapampixa jaktaykataynati, jan ukasti Biblianxa kimsaqallqu jiwatanakaru jaktayäwimpit qillqatawa.* Uka qillqatanaka liyt'añasa yatxatañasa wali khusapuniwa. Diosaxa taqinirusa mä wawarukiwa uñjistu, janiw yaqha yaqha

* Yaqha jaktäwinakax aka qillqatanakankarakiwa, 1 Reyes 17:17-24; 2 Reyes 4:32-37; 13:20, 21; Mateo 28:5-7; Lucas 7:11-17; 8:40-56; Hechos 9:36-42 ukat 20:7-12.

7, 8. ¿Kunatsa Lazarox janiw jaktankaspati sasax sapxpachäna, ukampisa kunsa Jesusax luräna?

9, 10. 1) ¿Lazaroru jaktayañatakixa Jesusax khitisita ch'am katuqäna, ukxa kunjamsa uñacht'ayäna? 2) ¿Jaktayäwinakata qillqatanak liyiña-xa kunatsa khusapuniw sisna?



**Dorcas sat mä cristian
kullakaruwa Apóstol
Pedrox jaktayatayna
(Hechos 9:36-42)**

**Mä viuda warmin wawaparuwa
Eliasax jaktayatayna
(1 Reyes 17:17-24)**



**Lazaron jaktäwipaxa
wali kusiskañänwa
(Juan 11:38-44)**

uñjkistuti ukanakwa yatichistu, kunattix Jehová Diosaxa jaktayataynawa chachanakaru, warminakaru, waynanakaru, chuymaninakaru, Israel markankirinakaru, yaqha markankirinakarus. ¡Uka qillqatanak uñxatasa wal kusistanxa! Sañani, kunapachatix Jesusax mä imill wawa jaktaykän ukhaxa, awkip taykapaxa “wal muspharapxäna” siwa (Marcos 5:42). Kuntí Jehová Diosaxa jupanakataki lurkäna ukxa janipuniw armapkpachänti.

¹⁰ Chiqasa, Jesusan jaktayat jaqinakaxa tiempompix wasitatwa jiwxapxi. ¿Ukhamasti jiwatanakar jaktayäwisti inamayakinati? Janiwa. Uka qillqatanakasti yaqha wakiskir yatichäwinak qhanañchistu, ukat mä suyt'äwi churistu.

¿JAKTAYÄWINAKAT BIBLIAX KUNSA YATICHISTU?

¹¹ “Jiwatanakax janiw kunsa yatipkiti” sasaw Bibliaxa yatichi, mä arunxa, janiw yaqha chiqan jakapkiti, janirakiw amuyasipkisa. Lazarot yatxatasaw ukham saraksnaxa. Kunapachatí Lazarox jaktxäna ukhaxa, ¿alaxpachat parlasati wal muspharayäna? Janiwa. Jan ukaxa, ¿infiernot parlasacha jaqinakar sustjaräna? Janiwa. Bibliax janiw ukham siskiti. Lazaroxa pusüru jiwatäxana ukhasti ‘janiw kunsa yatkänti’ (Eclesiastés 9:5). Jiwañanwa Lazarox ikt'askäna (Juan 11:11).

¹² Jiwatat jaktaniñaxa, janiw mä säwikikiti jan ukasti chiqawa, ukwa Lazaron jaktäwipat yatiqaraktanxa. Walja jaqinakan uñjkatawa Jesusax Lazarorux jaktayäna. Ukapacha yupaychäwinakan irpirinakapaxa, Jesusar uñiskasasa, uka milagroruxa chiqaw sapxänwa. “¿Kuns lurañani? Aka jaqix walja unañchanaka milagronakampwa luri” sapxänwa (Juan 11:47). Jaktat Lazaror uñjirix walja jaqinakawa sarapxatayna, ukatsti Jesusaruw iyawsxapxäna. Lazaron jaktatapa uñjasasti, Jesusax Diosan khitanitapäskapuniw sasaw jaqinakax sapxatayna. Ukax taqinin yatkañänwa, ukatwa

11. ¿Lazaron jiwatapata qillqataxa kunjamsa Eclesiastés 9:5 qillqat sum amuyañ yanapistu?

12. ¿Kunatsa Lazarox chiqapuniw jaktaniña sisna?

judionakan qhuru chuyman irpirinakapaxa Jesusampiru Lazarompiru jiwayañ amtapxatayna (Juan 11:53; 12:9-11).

¹³ ¿Jaktaniñax utjapunpachäniti? Jisa, utjapuniniwa, mä uruxa Diosaw jiwatanakar jaktayanini sataynaw Jesusaxa (Juan 5:28). Jehová Diosaxay jakäwsa, taqi kunsä Inuqirichixa, ¿janiti wasitampi lurkaspa? Jisa, Jehová Diosax jiwatanakar amxäschi ukhaxa luraspawa. ¿Jupax jiwir familiaranakasat amtaspachati? Ak amuyt'añäni: ¡Diosax taqpach millón millón warawaranakaruwa sutxa sapa maynir uchi! (Isaías 40:26.) Ukhamasti, Jehová Diosaxa kunjamäkänti jiwir familiaranakasaxa ukxa sumwa amti, ukatsti jupanakar jaktayañwa muni.

¹⁴ Ukhamasti, ¿Jehová Diosax qhawqpunsa jiwatanakar jaktayañ mupacha? Walpun jiwatanakar jaktayañ muni siw Bibliaxa. Diosar luqtiri Job chachaxa akham sasaw jiskt'asitayna: “¿Mä jaqisti jiwaxasinxä wasitat jaktanxaspati?” sasa. Diosan amtasiñapkama sepulturan suyañxatwa Job chachax parlaskäna. Ukatwa Jehová Diosaru akham säna: “Jumatix [jiwañat] jawsitasmaxa, nayax jaysarakiris-mawa; munasiñampiw uñtanitasmamaxa, jumaxay nayarü us-kuschistaxa” sasa (Job 14:13-15).

¹⁵ Uka tuqit amuyt'añäni: Jehová Diosaxa munasiñampiw uñti jiwatanakar jaktayañatakix siwa. Chiqpachansa, ¿uka arunakaxa janit chuymachkistu? Ukampisa, ¿kunjamsa jutirpachan jiwatanakaxa jaktanipxpachäni? ¿Khitinakasa jaktanipxpachäni ukat kawkhansa?

JIWATANAKASTI JAKTAYATÄPXANIWA

¹⁶ Nayra jaktäwinak tuqit qillqatanaka liyisaxa, yatiqarak-tanwa kunjamänisa jutirpachan jaktäwinakaxa. Nayra jaktirinakaxa, familiaranakapampi uñt'asitanakampiw aka

13. ¿Kunatsa Jehová Diosaw jiwatanakaru jaktayani sasax sisna?

14, 15. Job chachan aruparjamaxa, ¿Jehová Diosaxa qhawqsa jiwatanakaru jaktayañ muni?

16. ¿Jaktanirinakaxa kunjamansa jakasipxani?

Uraqin jakasxapxäna. Niya ukhamarakiwa, wali sumpunwa jaktanirinakaxa familiaranakapampi jakasxapxani. Kunjamtix 3 jaljan yatiqaniwayktanxa, Diosax aka Uraqxa kusipachaptayaniwa. Ukhamasti, jiwatanakaxa janiw nuwasifñanakampi, ñanqha luräwinakampi, usuñanakampi phugantat Uraqiru jaktanipkaniti. Jan ukasti, aka Uraqinxä wali kususitawa suman wiñayataki jakasxapxani.

¹⁷ ¿Khitinakas jaktanipxani? Taqi khitinakarutix Diosax amxäski ukanakaw jaktanipxani sataynaw Jesusaxa (Juan 5: 28, 29). Apocalipsis 20:13 qillqatanxa sarakiwa: “Lamar qu-tasti jupan ukan jiwirinakwa katuyxäna. Jiwañasa, jiwatanak katxäskän [Hades] ukasa, qawqhatí jupan utjkäna ukj-pachwa katuyxarakäna.” sasa. Jiwxtan ukhaxa “Hades” sepulturaruw taqinis sartanxa. (Uñxatarakismawa 212 ukat 213 aka libron jananakapa.) Uka sepulturaxa ch’usakixaniwa kunapachatix millón millón jiwatanakaxa jaktanxapxani ukhaxa. Apóstol Pablox sänwa: ‘Jiwatanakat ñanqha jaqinakasa, aski jaqinakasa jaktanipxaniwa’ sasa (Hechos 24:15). ¿Kamsañsa aka arunakax mumpacha?

¹⁸ Janir Jesusax aka Uraqir jutkäna uka nayra yupaychirinakawa ‘aski jaqinakjama’ uñt’atäpxarakixa, akirinakjama Noé, Abraham, Sara, Moisés, Rut, Ester ukat yaqhana-kampi. Hebreos 11 jaljanwa aka iyawsäwin chachanakxata, iyawsäwin warminakxata juk’ampi parlasiskaraki. Ukampisa, akürunakan Diosar luqtas jiwirinakarakiwa, ‘aski jaqinakjam’ uñt’atäpxarakixa. Jaktaniñxat yatisaxa janiw jiwañsa axsarxtanti (Hebreos 2:15).

¹⁹ Millón millón jaqinakawa Jehová Diosar jan uñt’asa, jan yupaychasa jiwapxi, janirakiw Diosan munañapsa lura-wayapkiti. ¿Kamachasinis jupanakampixa? Uka ‘ñanqha

17. ¿Qhawqhanis jaktanipxani?

18. ¿Khitinakasa ‘aski jaqinakjama’ jaktanipxanixa, ukat kunjamsa jaktaniñ yatiñaxa jumar yanaptamxa?

19. ¿Khitinakas ‘ñanqha jaqinakjama’ uñt’atäpxixa, ukat kunsa Jehová Diosaxa munasiñapat uka jaqinakaru churani?

jaqinakaxa' janiw armatäpkaniti. Chiqpach Diosax jupana-karusa jaktayarakiniwa, Diosar uñt'apxañapatakisa yupay-chapxañapatakisa tiempow churatäni. Waranqa marana-kankxañäni ukhawa jiwatanakax jaktanipxani, ukhamatwa aka Uraqin Jehová Diosar yupaychirinakampixa mayachas-xapxani. Wali suma maranakäniwa, uka maranakaxa Bi-blianxa Taripañ Uru satawa, mä arunxa, Juicio Uru satara-kiwa.*

²⁰ Ukhamasti, ¿taqinit jaktanipxani? Janiwa. Yaqhipana-kaxa "Gehena" ukankiw siw Biblianxa, aymara Biblians-ti 'infierno' sas jaqukipataw ukawjanxa (Lucas 12:5). Nayra Jerusalén anqäxanxa, q'añunak wartañ lugarawa utjäna, ukanxa amayanaka q'añunaka phichhaxirina, ukaw Ge-hena satänxa. ¿Kuna amayanaksa judionakax ukar liwtap-xiritayna? Wali ñanqha jaqinakan amayapwa ukar jaqtap-xiritayna, janiw jaktanipkaspati sasa. Ukhamasti, Gehenaxa jan mayampitaki t'unjañ sañ muni. Jesusawa jiwatanakaru-xa taripani, ukampisa Jehová Diosaw Jach'a Taripirixa (He-chos 10:42). Diosaxa janipuniw jan ist'asir wali ñanqha ja-qinakaruxa jaktaykaniti.

JAKTASIN ALAXPACHAR SARIRINAKA

²¹ Yaqha jaktañaw utjaraki sasaw Bibliax yatichi. Alaxpa-chan ajayjam jakañatakiwa jaktapxani, ukaw uka yaqha jak-tañaxa. Ukham jaktasin alaxpachar sariritxa, Bibliax may-nitak parli, ukasti Jesucristowa.

²² Jesusaruxa aka Uraqinkkäna ukhawa jiyayapxatayna; ukampisa, Jehová Diosaxa janiw sepulturar jaytjkänti (Sal-mo 16:10; Hechos 13:34, 35). Jan ukasti Diosax jaktayän-wa, ukampisa janiw jaqjama jaktaykänti. Apóstol Pedrox

* 213 janat 215 janakama uñxatasawa juk'ampi Taripañ Urutxa yat-xatäta, ukhamaraki kunjamsa jaqinakaruxa taripasini uka tuqitsa.

20. ¿Kunas Gehena lugaraxa, ukat khitinakas ukar sarapxi?

21, 22. 1) ¿Kuna yaqha kasta jaktaniñasa utjixa? 2) ¿Nayraqat khitis ajayjama jaktänxa?

Jesucristxat akham sasaw qhanañchistu: “Janchinaki jiwa-tänxa ukampis ajayupanxa jaktanxiwa” sasa (1 Pedro 3:18). ¡Jesusaxa wasitatwa wali ch’aman mä ajayjama jakxäna, ukasti wali jach’a milagronwa! (1 Corintios 15:3-6). Jupaw ukham nayraqat jaktayatänxa (Juan 3:13). Ukatxa yaqhana-kaxa jaktapxanaparakinwa.

²³ Alaxpacharu sarxañ yatisisaxa, Jesusax akham satay-nawa chiqa chuymän arkirinakaparuxa, “mä utjäwi jumanakatak wakichiriw sarä” sasa (Juan 14:2). Alaxpacharu saririnakaxa “jisk’a tama” satäpxiwa (Lucas 12:32). ¿Qhawqhanipxis uka jisk’a tamanxa? Apocalipsis 14:1 qillqatanxa apóstol Juanaxa siwa: “Ukatsti Corderoruw uñjta Sión qullu patana sayaskiri. Jupamp chikasti pataka pusi tunka pusini waranqa jaqinakaw ukankaskarakina, jupanakasti paranakaparux Corderon sutipampi, ukhamarak Awkipan suti-pampi qillqt’atäpxänwa” sasa.

²⁴ Uka 144.000 cristianonakaruwa Diosax alaxpachan jakpaxanapataki jaktayani, Jesusan chiqa chuymani apostolanakapaxa uka taypinkapxarakawa. ¿Kunapachas jaktapxi? Cristox jutkani jan ukax uñstkani ukhaw jaktanipxani sasaw Pablox qillqäna (1 Corintios 15:23). Jichhaw uka urunakanxa jakasktanxa, ukxa 9 jaljanwa juk’ampi yatiqaskañäni. Jichhürunakanxa mä qhawqhanikiw uka 144.000 jaqinakatxa jakxapxi. Jiwxapxani ukaratpachaw jaktasin alaxpacharu sarxapxani (1 Corintios 15:51-55). Ukampisa, niya taqi jiwatanakawa kusipachaptayat Uraqin jakañataki jaktanipxani, uk suyasipki.

²⁵ Chiqapuniw Jehová Diosax jan mayampitaki jiwañaru tukjani sisnawa (Isafas 25:8). Ukatxa, inas akham jiskt’asta: “¿Jaktasin alaxpacharu saririnakaxa kuns lurapxani?” sasa. Alaxpachatpachwa aka Uraqiru Apnaqanipxani. Jutir jaljanwa uka apnaqäw tuqitxa juk’ampi yatiqañäni.

23, 24. ¿Khitinakas ‘jisk’a tamar’ jakhutäpxi, ukat qhawqhanipxisa?

25. ¿Kuna tuqitsa jutir jaljanxa yatiqañäni?

KUNSA BIBLIA X YATICHÍ

- Jaktäwinakxata qillqatanakax mä suyt'äwi churistu (Juan 11:39-44).
- Jehová Diosax jiwatanakar wal jaktayañ muni (Job 14:13-15).
- Diosaxa sepulturankirinakaruxa taqiniruw jaktayanini (Juan 5:28, 29).

*Kusipachanxa jiwatanakaxa
jaktanxapxaniwa, ukatxa wasitatwa
familiaranakapixapxani*



¿Kunas Diosan Apnaqäwipaxa?

¿Diosan Apnaqäwipatxa
Bibliax kamsisa?

¿Kunsa uka Apnaqäwix lurani?

¿Uka Apnaqäwix kunapachasa aka Uraqxar
Diosan munañap lurayani?

WARANQ waranqa jaqinakawa aka Uraqpachanxa, Biblian-kiri wali uñt'at mayisiwi yatipxi. Jesusaw uka mayisiw-xa yatichatayna ukat wali wakisiri arunakaniwa. Kunanak mayisiñsa yatichatayna uka kimsa tuqit yatxatañäni, ukhamatwa amuyañäni kunsa Bibliaxa chiqpachapuni yatichi uka tuqita.

² Jesusaxa akham qalltasawa Diosat mayisiñ yatichäna: "Jumanakaxa akham sasaw mayisipxäta: 'Alaxpachankir nanakan Awkija, sutimax jach'añchatäpan, Apnaqäwimax jutpan. Munañamax luraspan, alaxpachansa ukhamaraki aka Uraqinsa'" sasa (Mateo 6:9-13, NM). ¿Uka kimsa mayisiwinakaxa kamsañs muni?

³ Jehová Diosan sutipatxa sum yatxtanxa. Ukhamaraki, kunsa jaqinakataki nayrax luräna ukat kunsa lurarakini uka amtapsa yatiqxaraktanwa. Ukhamaxa, ¿"Apnaqäwimax jutpan" siski uka arunakampix kun mayiñsa Jesusax yatichäna? ¿Kunas Diosan Apnaqäwipaxa? ¿Kunjamsa uka Apnaqäwin jutäwipax Diosan sutiparu jach'añchani? ¿Kunjamsa uka Apnaqäwix Diosan munañapxa lurani?

1. ¿Kuna wali uñt'at mayisiwitsa yatxatañänixa?

2. Kuna kimsa tuqitsa Jesusaxa arkirinakaparu mayisiñ yatichäna, ukarst'ma.

3. ¿Diosan Apnaqäwipatxa kunanakas yatiñasa?

¿KUNAS DIOSAN APNAQÄWIPAXA?

⁴ Diosan Apnaqäwipaxa, Jehová Diosan utt'ayata mä gobiernowa. Ukat Jupa kikapwa Apnaqiripxa jan ukax Reyipxa ajlliraki. ¿Khitis uka Apnaqirixa? Jesucristowa. Aka Uraqina apnaqirinakat sipansa wali jach'a Apnaqiriwa; ukatwa "munañaninakans Munañanipa, reyinakansa Reyiparakiwa" sataxa (Apocalipsis 17:14). Jesusaxa akapach *kawkiri* apnaqirinakat sipansa wali sumanak lurañataki ch'amaníwa.

⁵ ¿Diosan Apnaqäwipax kawkits apnaqanini? Amuyt'añäni, ¿kawkinkis Jesusaxa? Kunjamti yatxtanxa, t'aqhisiyañ mä lawar ch'akkatasaw jwayapxatayna, ukat jaktasaxa alaxpacharuwa makatxäna (Hechos 2:33). Ukhamaxa, Diosan Apnaqäwipaxa alaxpachankiwa. Ukatwa Biblianxa "alaxpach reino[...]" sataxa (2 Timoteo 4:18). Alaxpachankchisa, aka Uraqiruwa ch'amapampix apnaqanini (Apocalipsis 11:15).

⁶ Jesusjamaxa janiw yaqha apnaqirix utjkiti. ¿Kunatsa ukham sistansa? Kunattix janipuniw jiwkaniti. Jesusaxa janiw akapach apnaqirinakjamäkiti, "jupa sapakiw jan jiwkiti, jan khitimpis jak'achkaya qhananwa jakaraki" siw Bibliaxa (1 Timoteo 6:16). Ukhamasti, Jesusan suma luratanakapaxa waljäniwa, wiñayatakirakiniwa.

⁷ Jesusxat kamsis Bibliax uk uñxatañäni: "[Jehová] Tati-tun ajayupasti jupxankapuniniwa, ukatsti yatiñampi, ch'ikhi kankañampi, suma amuyt'a chuymampi, ch'amampi, [Jehová] Tatituri uñt'añampi jupar axsarañampwa churani. Jupax janiw aliq uñkatasaki kunsu uñjkaniti, ch'axwanaksa janirakiw aliqa parlanak ist'asaki t'ajjkaniti. Aynacht'atanakarusti chiqa luräwimpiw uñjani, markan utjiri pobrenakan arsusitanakapsti arxatarakiniwa" (Isaías 11:2-4).

4. ¿Kunas Diosan Apnaqäwipaxa, ukat khitis Apnaqiripaxa?

5. ¿Diosan Apnaqäwipaxa kawkitsa apnaqani, ukat kunxarusa apnaqani?

6, 7. ¿Kunatsa Jesusjama yaqha apnaqirix jan utjkaspa?

Jesusax chiqakankañampiwa, khuyapayasiñampiw jaqinakarun apnaqani, ukwa uka arunakax uñacht'ayistu. ¿Ukham apnaqir munasmati?

⁸ Kunjamānis Diosan Apnaqāwipaxa uk yatxataskakiñāni: Jesusax janiw sapaki apnaqkaniti, jan ukasti yaqhana-kampiw apnaqani. Amuyt'añataki, "khitinakatix atipjkani ukanakaruxa, nayamp chikwa qunt'asiyā tronoxana" sänwa Jesusaxa (Apocalipsis 3:21). Jesusan ajllit arkirinakapasa apostolanakapasa Jesusamp chikaw alaxpachana Diosan Apnaqāwipan qunt'asipxani. ¿Qhawqhanipxanisa?

⁹ Kunjamti 7 jaljan yatiqktanxa, apóstol Juanax uñjāwipaxa "[Jesucristo] Corderoruw uñjta Sión qullu patana [alaxpachan Apnaqirjama] sayaskiri" siwa. "Jupamp chikasti pataka pusi tunka pusini waranqa jaqinakaw ukankas-karakina, jupanakasti paranakaparux Corderon sutipampi, ukhamarak Awkipan sutipampi qillqt'atāpxānwa" sasa. ¿Khitinakas uka 144.000 jaqinakaxa? Juan pachpaw akham qhanañchi: "Akanakasti janiw warminakampi juch luras q'añuchasipkataynati, jan ukasti q'umapuniw qhiparapxatayna, ukatsti Corderorurakiw arkapxi kawkirutix jupax sarki ukaru. Jaqinak taypita jupanakax qhispiyatāpxataynawa, Diosatakisa Corderotakisa nayriri ofrendanakapā-kaspas ukhama" sasa (Apocalipsis 14:1, 4). Ukhamasti, Jesusan arkirinakapawa jupampi chika alaxpachan apnaqapxañapatak ajllitāpxixa. Jiwasinxax alaxpacharuw jaktapxi, Jesusamp chika 'taqi aka uraqpacharu apnaqapxañapataki' (Apocalipsis 5:10). Apostolanakax aka Uraqin sarnaqapkāna ukūrunakatpachwa Diosax uka chiqa chuyman cristianonakaruxa ajllitayna, 144.000 phuqachañkama.

¹⁰ Ukhamasti, Jesusampi 144.000 ajllit jaqinakampipiwa

8. ¿Khitinakasa Jesusampi chika apnaqapxani?

9. ¿Qhawqhanisa Jesusamp chika apnaqapxani, ukat kuna tiempot-pachsa Diosax uka apnaqirinaruxa ajllitayna?

10. Jesusampi 144.000 ajllitanakampipiwa jaqinakarun apnaqapxani, ¿Diosan uka amtāwipaxa kunjamsa munasiñap uñachayistu?

apnaqapxistani, ukaw Jehovah Diosan amtapaxa, ukhamwa munasiñapxa uñacht'ayistu. Jesusax jiwajam jaqñisa yatiraki. Pablox sänwa: "Jiwasan uka jach'a jilir sacerdotesasti khuyapt'ayasistaspawa t'ukha kankañasanxa, jupa kikparakiw taqi casta yant'ana-ka jiwajama t'aqhisiwayi, ukampis jan juchar purisa" sasa (Hebreos 4:15; 5:8). Khitinakatix Jesusamp chika apnaqap-kani ukanakasa, t'aqhisiwinakanwa sarnaqawayapxaraki. Juchararäkasinsa sum sarnaqapxäna ukatsti taqi kuna usu-ñanakansa t'aqhisiwayapxarakiwa. Ukhamasti, amuyapxa-niwa jaqinakan jan walt'äwinakapsa, t'aqhisiñanakapsa.

¿KUNSA DIOSAN APNAQÄWIPAX LURANI?

¹¹ Jesusaxa, arkirinakaparu mayisiñ yatichasaxa, janiwa, Diosan Apnaqäwipax jutpan sasaki yatichkänti; jan ukasti Jehovah Diosan munañapaxa luraspan "alaxpachansa ukhamaraki aka uraqinsa" sasaw yaticharakina. Alaxpachanxa, kawkinti Diosax utjaski ukanxa, angelanakaxa Diosan munañapxa phuqasipkapuninwa. Ukampisa, kunjamtä 3 jal-jan yatiqktanxa, mä ñanqha angelaw Diosan munañap jan lurañ munxataynati, ukat Adanampi Evampirusa jucharuw puriyatayna. Biblianxa kampsachas uka Satanás sutin ñanqha angelatxa, ukxa 10 jaljanwa juk'amp yatiqarakiñä-ni. Satanasampi ukat jupar arkiri ñanqha angelanakampixa mä juk'a tiempokiw alaxpachankapxäna, Diosax janiraw jaquqankänti. Ukhamasti, Jesusax aka Uraqinkäna ukhaxa, alaxpachanxa janiw taqinix Diosan munañapxa lurapkän-ti. Ukampisa, Diosan Apnaqäwipan Jesusax apnaqañ qallt-xañapäna ukhaxa janiw ukhamäxañapäkänti, Jesucristoxa Supayampi nuwasiñapäna (Apocalipsis 12:7-9).

¹² Kunas pasañapäna uka tuqitwa akir profeciax akham qhanañchistu: "Mä jach'a aru alaxpachat ist'ta akham siri:

11. ¿Kunatsa Jesusaxa arkirinakaparux Diosan munañapax alaxpachan luraspan sas mayisiñxa yatichänxa?

12. ¿Kuna pä phuqasiwitsa Apocalipsis 12:10 jisk'a t'aqan qillqataxa?

‘Purinxiwa Diosasan qhispiyasiñapaxa, munañaniñapasa, jupan apnaqañapasa, Jesucristona munañapampi apnaqañapasa. Jilanakasaru k’arintasa juchañchiriki [uka Supayasti] ukatxa jaqsutäxiwa, jupasti uruy arumarakiwa, jilanakasaru Dios nayraqatan juchañchäna’ ” sasa (Apocalipsis 12: 10). Aka profecianxa pä phuqasiwit parlasi ¿uk amuytati? Nayraqatxa Jesucristow Diosan Apnaqäwipan apnaqañ qallti. Ukxarusti, Supayaruw alaxpachata aka Uraqir jaquqasini.

¹³ Uka qillqatanakaxa phuqasxiwa, ¿ukat kunanakas pasäna? Alaxpach tuqitxa akham siwa: “Alaxpachanakasti ukan utjirinakasa kusionpxam” sasa (Apocalipsis 12:12). Ukhamaxa, Supayasa saxranakasa alaxpachat jaquqanitapxänwa, ukatxa suma angelanakaxa jan Jehová Diosat saragasaw jupanakkamas sum apasipxi, ukatwa uka angelanakaxa wal kusionpxäna. Ukhamaxa, Diosan munañapaxa alaxpachan lurasxiwa.

¹⁴ ¿Uraqinxaxa kunas pasarakitayna? “¡Wali llakisiñarakiw uraqin ukhamarak qutan utjirinakatakixa! Supayasti jumanakan ukaruw wali colerat juti, tiempopan juk’akitapa yatisina” sasaw Bibliax qhanañchi (Apocalipsis 12:12). Supayaxa alaxpachat jaquqanita, juk’a tiemponiki, ukhamaw uñjasi, ukatwa wali phiñasitaxa. Ukham wal colerasitapatwa aka Uraqin kunaymani jan walt’äwinak utjayi. 9 jaljanwa juk’ampi uka jan walt’äwinakatxa yatxataskarakiñäni. Ukampisa, mä jiskt’aw utji: ¿Diosan Apnaqäwipaxa kunjamsa aka Uraqinxaxa Diosan munañap lurayani?

¹⁵ Jichhasti, kawkirinas Diosan amtapaxa aka Uraqitaxa uk amtañäni. Kunjamti 3 jaljan yatiqktanxa, aka Uraqi kusipachaptayañwa ukat aski jan jiwir jaqinakampi phuqantayañwa Jehová Diosax munäna, ukwa Edén huerta lurasaxa uñacht’ayistu. Adanampi Evampiruwa Supayax juchachasiyatayna, ukatwa Diosan munañapaxa aka Uraqi-

13. ¿Supayax alaxpachat jaquqanitäkän ukhaxa kunas pasatayna?

14. ¿Kunas pasatayna Supayax aka Uraqiru jaquqanitäkän ukhaxa?

15. ¿Kunas Diosan Amtapaxa aka Uraqitakixa?

takixa ukürunakpacha jan phuqaskänti. Jehová Diosax aka Uraqitaki amtapxa janiw armkiti, “aski jaqinakax uraq ka-tuqapxani, wiñayatakiw ukan jakapxarakini” uka arunan kan phuqasiñapwa muni (Salmo 37:29). ¿Kunjamsa Diosan Apnaqäwipax uk lurani?

¹⁶ Daniel 2:44 profecía qillqatanxa akham siwa: “Uka re-yinakan apnaqañapkamasti, alaxpachankiri Diosax mä ya-qha reino sayt’ayarakini, uka reinosti janipuniw tukjatä-kaniti ni apnaqatäkarakinisa yaqha markanakampixa, jan ukasti jupaw taqi yaqha reinonakarux tukjani, wiñayan wi-ñayapaw uka reinox utjarakini” sasa. ¿Kamsistusa Diosan Apnaqäwipat aka profeciaxa?

¹⁷ Aka tuqinakatwa parli: nayririxa, “uka reyinakan apna-qañapkamasti, alaxpachankiri Diosax mä yaqha reino say-t’ayarakini” siwa, mä arunxa, yaqha apnaqirinak utjkani ukhaw uka Apnaqäwixa utt’ayatäni siwa. Payiristi, wiñaya-takiw uka Apnaqäwix utjani sarakiwa. Uka Apnaqäwixa janipuniw tukjatäkaniti ni yaqhampis apnaqatäkarakiniti. Kimsiristi, Diosan Apnaqäwipampi akapach apnaqäwina-kampiw mä nuwasiwix utjani siwa, ukat atipirixa Diosan Apnaqäwipäniw sarakiwa. Ukhamasti, Diosan apnaqäwipa-kiw jaqinakar apnaqxani, ukham suma apnaqirixa janipu-niw utjkänti ni utjkanisa.

¹⁸ Diosan Apnaqäwipampi ukat akapach apnaqäwina-kampi nuwasiwi tuqitxa Bibliaw sum yatiyistu. Amuyt’añä-ni, aka ñanqhachapach tukusiwi urunakanxa, saxranakaw aka-pach “taqi reyinakaru” sallqjañataki k’arinak apnaqapxani siwa. ¿Kuna amtampis uk lurapxani? Taqi apnaqirinakaru “tantachañataki taqi ch’aman Diosan jach’a urupana ju-pampi nuwasiñataki[w]” siwa. Ukhamasti “Armagedón sa-täkis uka chiqaruw” tantachatäpxani (Apocalipsis 16: 14, 16). Kunjamti aka pä jisk’a t’aqanakan siskixa, akapach

16, 17. ¿Kamsistusa Daniel 2:44 profeciaxa Diosan Apnaqäwipatxa?

18. ¿Akapach apnaqäwinakampi Diosan Apnaqäwipampi ch’axwäsip-ki uka nuwasiwixa kamsatasa?

apnaqäwinakaxa Diosan Apnaqäwipampi nuwasiñatakiwa tantachatäni, uka jach'a ch'axwäwixa Armagedón satäwa.

¹⁹ ¿Kunsa Armagedón ch'axwäwimpixa Diosan Apnaqäwipax lurani? Aka Uraqitaki Jehová Diosan munañapata amtaskakiñäni: kusipachaptayaña ukat jupar yupaychir suma jaqinakamp phuqantayañwa munäna. ¿Kunatsa Diosan munañapaxa jichhürunakan jan luraski? Kunattix juchachararätanwa, ukatwa usunttansa jiwarakantsa. Ukampisa, kunjamti 5 jaljan yatiqktanxa, wiñay jakañ katuqañasatakiwa Jesusax jiwatayna. Apóstol Juanan arunakapxa amtaskpachätawa: "Diosax akapachar wal munañap laykuw mä sapa Yuqapar khitan, taqi khitinakatix jupar iyawsapki ukanakax jan chhaqañapataki, jan ukasti wiñay jakañaniñapataki" (Juan 3:16).

²⁰ Ukatsti, jan wal sarnaqir jaqinakaw utjaraki. K'arisipxi, jaqi masiparus sallqjapxi, q'añu sarnaqäwinakan sarnaqapxi ukhamawa. Diosan munañapsa *janiw lurañ munapkiti*. Ukham jan wal sarnaqirinakaxa Armagedón sat Diosan nuwasiwipan jiwarayatäpxaniwa (Salmo 37:10). ¿Kunatsa Diosan munañapax jan phuqaskarakpacha? Kunattixa, akapacha apnaqirinakaxa janiw suma lurañaru jaqinakarux wiytapkiti. Waljaniw jan suma apnaqiripkiti, yaqhana-kasti jan sintt'asirinaka, qullq chhaqtayirinaka ukhamawa. Bibliax chiqpunwa akham saski: 'Jaqinakax ch'amapampix masinakaparu jan walinak lurapxi' sasa (Eclesiastés 8:9).

²¹ Ukatxa, Armagedón pasatatsti, jaqinakaxa mä sapa apnaqiriniñapxaniwa, ukasti Diosan Apnaqäwipawa. Uka Apnaqäwixa Diosan munañapwa lurayani ukatxa wali suma bendicionanakwa apanini. Satanasarusa ñanqha angelanakarusa jan mayampitakiw tukjani (Apocalipsis 20:1-3). Jehová Diosar taqi chuyma yupaychir jaqinakaxa jan usuntasaw sarnaqasipxani, janiw jiwaxapxaniti jan ukasti

19, 20. ¿Kunatsa Diosan munañapaxa aka Uraqinxaxa jan phuqaski?

21. ¿Kunjamsa Apnaqäwipax Diosan munañapa aka Uraqin lurayani?



*Supayasa saxranakasa alaxpachata
jaquqanitäpxiwa ukatwa aka
Uraqinxä sinti jan walt'añanakax utji.
Ukampisa niyawa tukusxani*

wiñayatakiwa jakasipxani, ukatakiwa Jesusax jakañap luq-tasña (Apocalipsis 22:1-3). Ukatsti, aka Uraqxa kusipa-charuwa tukuyani. Ukhamatwa uka Apnaqäwipaxa Diosan munañapxa aka Uraqin lurayani, ukatxa Diosan sutipasa jach'añchatarakiniwa. ¿Ukax kamsaños munpacha? Diosan Apnaqäwipa utjatapatxa, taqi jaqinakawa Jehová Diosan sutipxa wal respetapxani, jach'añchapxarakini, ukwa uka arunakax sañ muni.

¿UKA APNAQÄWIXA KUNAPACHASA AKA URAQXAR APNAQAÑ QALLTANI?

²² Kunapachatix Jesusax arkirinakaparu “apnaqäwimax jutpan” sasaw mayisipxäta siskäna ukhaxa, uka apnaqäwix janiraw jutkänti. ¿Jesusax alaxpacharu makatxäna ukhat jutpachäna? Janiwa, kunapachatix Jesusax jaktayatakäna ukat aksaruxa Salmo 110:1 uka profeciawa phuqasiñapa sasaw Pablosa Pedrosa sapxatayna, ukanxa akham siwa: “[Jehová] Tatitux Reyixarux sänwa: ‘Kupixaxar qunt’asim, timanakamar [jan ukax uñisirinakamar] takxatayañaxkama’ sasa” (Hechos 2:32-35; Hebreos 10:12, 13). Ukhamasti, Jesucristoxa mä qhawqha tiempo suyañapänwa.

²³ ¿Qhawqha tiempos suyañapänxa? 1914 marakamaw Jesucristox Apnaqañapataki suyani sasaw Bibliat taqi chuy-

22. Janiw Diosan Apnaqäwipax jutkänti kunapachatix Jesucristox aka Uraqinkkäna ukhaxa, jiwatata jaktayatakäna ukhasa, ¿kunatsa ukhamaw sisnaxa?

23. 1) ¿Kunapachasa Jesusax apnaqañ qallti? 2) ¿Kuna tuqitsa jutir jalanxa yatxataskañänixa?

Kunjamti alaxpachana Diosan munañapax luraski ukhamarakiw Diosan Apnaqäwipaxa aka Uraqin munañapxa lurayani

KUNSA BIBLIA X YATICHÍ

- Diosan Apnaqäwipaxa alaxpachankir mä gobiernowa. Apnaqiripasti Jesucristowa, jaqinak taypita 144.000 ajllitanakawa jupamp chika apnaqapxarakini (Apocalipsis 14:1, 4).
- 1914 maranwa Jesucristoxa Apnaqañ qalltawayi, ukatsti Satanasax alaxpachata aka Uraqiru jaquqanitawa uñjasiwayi (Apocalipsis 12:9).
- Diosan Apnaqäwipaxa niyaw akapach taqi apnaqäwinakaruxa t'unjani ukatsti aka Uraqxa kusipachaptayaniwa (Apocalipsis 16:14, 16).

ma yatiqirinakaxa, 1800 ukat 1900 maranakanxa juk'at juk'at amuyapxatayna. (Uka 1914 mara tuqit sum yatxataññatakixa, 215 janat 218 janakama uñxatäta.) Uka cristianonakaxa chiqpunwa amuyasipkatayna, kunattix uka 1914 maranxa Uraqpachana jach'a luräwinakaw phuqasxi. Bibliankiri profecianakan phuqasiwipaxa ukwa qhanañcharakistu, 1914 uka maranxa Jehová Diosawa Jesucristorux Apnaqirit utt'ayäna, ukatsti alaxpachana apnaqañwa qallti. Satanasaxa 'tiempopa juk'akitapwa yatisi', uka urunakanwa jakasktanxa (Apocalipsis 12:12; Salmo 110:2). Ukhamasti, Diosan Apnaqäwipaxa niyaw Diosan munañapxa aka Uraqin lurayani saraksnawa. ¿Jumatakix janit suma yatiyäwíki? ¿Chiqäpachaw sasmati? Jutir jaljanxa, kunsax Bibliaxa chiqpachapuni uka tuqinakat yatichi ukanakwa uñjañäni.



¿'Qhipa urunakankxtanti'?

¿Kampachas Bibliaxa jichhürunakatakixa?

**¿'Qhipa urunakanxa' jaqinakax
kunjamäpxaniw sispachas Bibliaxa?**

**¿'Qhipa urunakanxa' kuna aski
luräwinakaw utjani sispachas Bibliaxa?**

RADIO isch'ukisasa jan ukax televisión uñch'ukisasa, kunarukis akapachax purt'asini siripachätawa. Jan walinakiw kawkhansa utjaski, ukatxa janiw khitisa kunaw pasani sapxkistaspati (Santiago 4:14). Ukampisa Jehová Diosax yatiwa kunas pasani ukanakxa (Isaías 46:10). Kuna jan walinakasa jichhürunakan pasañapäki, ukwa Bibliax qhanañchi, ukatxa kuna bendicionanakasa jutir urunakanxa utjani ukanaksa nayratpachwa qhanañchatayna.

² Jesucristoxa Diosan Apnaqäwipatwa parlatayna, uka Apnaqäwiwa taqi jan walt'añanakxa tukjani, ukatsti aka Uraqxa kusipachaptayaniwa (Lucas 4:43). Kunapachasa uka Apnaqäwix jutpachäni ukwa Jesusar ist'ir jaqinakax yatiñ munapxäna. Ukatxa arkirinakapaxa akham sasaw jiskt'apxäna: "¿Kawkirinis chimpuxa [jan ukax señalaxa] jumax kutt'an-kät ukkaxa, ukhamarak akapach tukuskan uka urutsa?" sasa (Mateo 24:3). Jehová Diosakiw aka ñanqhapachan tukusiñ urupxa yati sasaw Jesusax säna (Mateo 24:36). Ukampisa, Diosan Apnaqäwipaxa janira aka Uraqir bendicionanaka apankipanxa, kunanakasa pasañapäna ukwa Jesusax satayna. Uka arunakapaxa jichhürunakanwa phuqasiski.

1. ¿Kunanakati jutir urunakan pasañapäki ukxa kawkhans yatxatsna?
2, 3. ¿Jesusarux kunsä arkirinakapaxa jiskt'apxatayna, ukat jupax kamsataynasa?

³ 'Akapachan tukusiñapataki' qhipa urunakat janira sum yatxatkasaxa, jaqinakan jan uñjkañ mä ch'axwäwiwa utjaitayna, uka tuqit nayraqat yatxatañani. Alaxpachanwa uka ch'axwäwixa apasitayna, ukaxa walin jan walinwa taqinirussa uñjasiyistu.

ALAXPACHAN MÄ CH'AXWÄWI

⁴ 1914 maranwa Jesusax alaxpachan apnaqañ qallti sarakiyätanwa 8 jalljanxa (Daniel 7:13, 14). Ukxarusti: "Mä jach'a nuwasinaw alaxpachanxa utjäna" siw Bibliaxa. Jesusan yaqha sutipaxa Miguelawa, uka "arcángel Miguelasti angelanakapampi sayt'asisinxu uka [Satanás] dragonampiw nuwasina. Dragonampi angelanakapampisti sayt'asipxarakinwa", sasaw qhanañcharakistu.* Supayampi saxranakapampixa atipjataw uñjasipxäna ukatsti aka Uraqiru jaquqanitäxapxänwa. Ukatwa, chiqa chuymani angelanakaxa kusisipxäna, Supayasa saxranakapasa janiw alaxpachankxapxänti. Ukatxa aka Uraqinkirinakaxa llakisipxänwa. Bibliax akham siwa: "¡Wali llakisiñarakiw uraqin ukhamarak qutan utjirinakatakixa! Supayasti jumanakan ukaruw wali colerat juti, tiempopan juk'akitapa yatisina" sasa (Apocalipsis 12:7, 9, 12).

⁵ Amuyt'añani, uka ch'axwäwin atipjat uñjasisaxa, Supayax wali phiñasitawa, ukatsti kunayman jan walt'äwinakwa aka Uraqir apani. Jichhawa uka jan wali urunakan jakasktanxa, uka tuqit jichhax juk'ampi yatxataskakiñani. Janiwa walja tiempo paskaniti siw Diosan Arupaxa, "tiempopan juk'akitapa" Satanasax yatisiwa, ukhamaxa juk'a tiempokinawa. Biblianxa uka tiempoxa "qhipa urunaka" satawa (2 Timoteo 3:1). Diosax niyawa aka Uraqitxa Satanasan jan

* Juk'ampi yatxatañatakixa 218, 219 jananakwa uñxatäta, ukanxa Miguel sutixa Jesucriston yaqha sutipaw sasaw qhanañchasiski.

4, 5. 1) ¿Kunas pasäna Jesusaxa apnaqirit alaxpachana utt'ayatäxäna ukhaxa? 2) Apocalipsis 12:12 jisk'a t'aqanxa, alaxpachan mä ch'axwäwiw utjäna siwa, ¿ukatxa kunanakas pasañapäna?

wali luräwinakapxa chhaqtayani ukatwa ¡wal kusistanxa! Bibliaxa jichhürunakan akanakawa phuqasiñap siwa, uka tuqita mä qhawqhanak uñjañäni. Qhipa urunakanwa jakasxtanxa ukwa uka luräwinakaxa uñacht'ayistu, ukatxa niyaw Diosan Apnaqäwipax Jehovah Awkisaru munasir jaqinakaruxa walja bendicionanak churani. Nayraqatxa, pusi chimpunak uñjañäni, Jesusan arunakapaxa akanakawa qhipa urunakanxa phuqasiñapa siwa.

QHIPA URUNAKAN PHUQASIRI JAN WALI LURÄWINAKA

⁶ *“Mä jach'a markax yaqha jach'a marka contraw nuwasini, mä markasti yaqha marka contrarakiw sartani.”* (Mateo 24:7.) Aka qhipa patak maranakanxa millón millón jaqinakaw ch'axwäwinakan jiwarapxi. Gran Bretañankiri yatxatat mä jaqixa akham sasaw satayna: “Jaqin sarnaqäwipanxa, 1900 marat aksaruxa wila wartäwinakax walpun utjawayi. [...] Uka maranakanxa ch'axwäwinakax walpun utjawayi, mä qhawqha tiempokiw uraqpachan uka ch'axwäwinakax jan utjkänti” sasa. Kunanakasa akapachan lurasiski uka tuqita yatxatata mä Institucionaxa akham sasaw sarakitayna: “[1900 marat aksaru] utjawayki uka ch'axwäwi-

6, 7. ¿Kunjamsa jichhürunakan Jesusan arunakapaxa ch'axwäwinakxata ukat manq'at pist'añxata phuqasiski?





nanakxa, walpunwa jaqinakaxa jiwarapxi Cristox aka uraqinkkäna ukat 1899 maranakkama utjiri ch'axwäwinakan sipansa" sasa. 1914 marat aksaru utjir ch'axwäwinakanxa niya patak millón jilaw jiwarapxatayna. Ukatxa, waljaniruwa uka ch'axwäwinakax jan familiani, wali llakita uñjasiyi. Inas jumax ukham llakin uñjasiraksta.

⁷ *"Manq'at pist'aña[w] utjani."* (Mateo 24:7.) Aka kimsa tunk qhipa maranakanxa manq'añanakaxa wal achuqaski sasaw yatxatatanakaxa sapxi. Ukampisa, manq'at pist'añaxa utjaskakiwa, janiw yapuchañataki uraqis utjixiti, janirakiw qullqis manq'a alasiñatakis utjixiti. Pisinkiri markanakanxa millón millón jaqinakaw manq'atjam t'aqhisipxi. Wawanakaxa niya phisqa millón jilawa sapa mara manq'atjam jiwarapxi, siwa Organización Mundial de la Salud sat institucionaxa.

⁸ *"Utjaniwa jach'a uraq khathatinakaxa."* (Lucas 21:11.) Jach'a utanak k'ak'atayiri ukat uraqi k'ak'ayirjam uraq khathatinakaxa, niya tunka llätunkani kutiw sapa marax utjaspa, sasaw ciencia tuqit yatxatat jaqinanakax sapxi. Sapa marawa uraq khathatinakax utjawayi, jach'a utanaksa q'alpun allthapiwayi. Ukat yatxatäwinakarjamaxa, 1900 marat aksaruxa pä millón jila jaqinakawa uraq khathatäwinakan

8, 9. ¿Uraq khathatinakxata ukat usunakxata Jesusan arunakapaxa phuqasiskiti?

jiwarapxi. Mä yatiyäwix akham saraki-wa: “Uka tuqit yanapt’asiñataki lura-tanakaxa mä juk’akwa yanapt’araki” sasa.

⁹ “*Utjaniwa usunaka taqi chiqana.*” (Lucas 21:11.) Usunaka qullañatakixa wal yatxatasipki, ukampisa kunayman uñt’ata jan uñt’at ñanqha usunakampi usutaw jaqinakaxa uñjasipxi. Aka qhipa maranakanxa jan uñt’at pä tunk jan wali usunakawa —tisiku, chujchu ukat cólera usunakjama—, wal uñstaski, ukat yaqha usunakax janiw qullañjamäxit sasaw yaqhipanakax sapxi. Ukatxa kimsa tunka jan uñt’at usunakaw uñstaskaraki. Ukanakatxa yaqhipax jan qullani usunakawa.

QHIPA URUNAKANKIR JAQINAKA

¹⁰ Qhipa urunakaxa jan wali luräwina-kampiw phuqantatäni siw Bibliaxa, ukatsti jaqinakas mayjäpxaniw saraki-wa. Apóstol Pablox uka tuqitxa akham qillqatayna. 2 Timoteo 3:1-5 siwa: “Yatiñamarakiwa, qhipa urunakanxa jan wali tiemponakaw jutani” sasa. Akham jaqinakäpxaniw siwa:

- *jaqinakaxa mich’aw tukupxani*
- *qullqi chuymäpxaniwa*
- *awkinakaparus janiw ist’apkaniti*
- *aljantasirinakäpxaniwa*

10. ¿2 Timoteo 3:1-5 qillqatanakatxa kawkirinakaw phuqasiski sasmasa?





- *jan munasiñanipxaniwa*
- *kuna jan walsa arsupxakiwa*
- *wali qhurunakäpxaniwa*
- *munañanakapakwa thaqhapxani*
Diosar munañat sipansa
- *Dios chuymäkaspas ukhamaw*
tukupxani, ukatxa luratanaka-
pampix yaqhwa uñacht'ayapxani

¹¹ ¿Comunidadamanxa ukham jaqinakax utjiti? Utjpachapawa. Taqi chiqanwa ukham jaqinakaxa utji. Diosaxa niyaw uka jaqinakarux tukjani. Bibliaxa akham siwa: “Jucharar jaqinakax qurjamas alintasipkpan, ñanqha luririnakax panqarasipkpansa, jupanakax wiñayatak tukjatäpxaniwa” sasa (Salmo 92:7).

SUMA LURÄWINAKA

¹² Aka qhipa urunakanxa kunaymani jan walt'äwinakawa utji, kunjamtı Bibliaxa siskäna ukhama. Ukampisa, Jehová Diosaru yupaychirinakatakixa suma luräwinakaxa utjarakiwa.

¹³ *Chiqpach 'yatiñanakaxa juk'ampi-niwa'* siw Daniel libronkiri mä profeciata. ¿Kunapachas uka arunakax phuqasiñapa? “Tukuya horasax purinkani” ukhaw phuqasini siwa (Daniel 12:4).

11. Salmo 92:7 qillqatarjamaxa, ¿kunasa kamachasini ñanqha jaqinakaruxa?

12, 13. ¿‘Tukuy horas’ purinxipanxa chiqpach ‘yatiñanakax’ juk’ampi w sasmati?

1914 marat aksaruxa, Juparu yupaychañ munirinakaruxa Jehovah Diosaw yanapt'i, Biblian chiqa yatichäwinakapa sum yatipxañapataki. Amuyt'añataki, sutipata, munañapata, Jesucriston luqtasiwipatwa Diosax yatichi, ukhamarak jiwatanakaxa kunjamäsipkisa ukat jaktanipxaniti jani-cha ukanak yaticharaki. Jehovah Diosan yupaychirinakapaxa Diosatakjama sarnaqañsa yatiqapxarakiwa, ukasti jupana-kataki askiwa, Diosarus jach'añcharakiwa. Diosan Apnaqäwipaxa kamsaños muni, aka Uraqit jan walinakxa kunjamsa chhaqtayani ukxa sum yatipxi. ¿Ukanak yatisaxa kuns lurapxpacha? Uka jiskt'axa, aka qhipa urunakan phuqasir yaqha profeciaruwa apistu.

¹⁴ *"Diosan reinopat aka suma yatiyäwisti aka uraqpachanwa yatiyatäni"* sasaw Jesucristoxa 'akapach tukuskan uka urunakatxa' satayna (Mateo 24:3, 14). Uraqpachanwa Diosan Reinopata, mä arunxa kunsa Diosan Apnaqäwipax lura-ni ukat kunjamsa bendicionanakap katuqsna uka tuqit suma yatiyäwinakax yatiyasiski. Ukaxa 230 jila markanakanwa yatiyasiski, ukatxa 400 jila arunakanwa yatiyasiskaraki. "Taqi markanakata, kunayman janchini, ukhamarak taqi casta parlan" Jehovah Diosan Qhanañchirinakapawa Diosan Apnaqäwipaxata jaqinakaru taqi chuyma yatiyasipki, suxta millón jilanïpxiwa (Apocalipsis 7:9). Ukatxa, kunsa Biblia-xa chiqpachapuni yatichi uka tuqit yatxatañ muniri walja jaqinakaruwa inaki yaticht'asipkaraki. Chiqa cristianonakaxa 'uñisitäpxaniw' sataynawa Jesusaxa, ukampisa uka profeciaya muspharkañwa phuqasiskaraki (Lucas 21:17).


¿KUNSA JUMAX LURÄTA?

¹⁵ Bibliankiri walja profecianakawa jichhürunakanxa

14. ¿Qhawqha markanakansa ukat qhawqha arunakansa Diosan Apnaqäwipax yatiyasiski, ukat khitinakasa yatiyasipki?

15. 1) ¿Qhipa urunakanxtanwa sasmati, kunatsa ukhamaw sasmaya?
2) ¿Jehová Diosar kutkatasirinakatakisa Apnaqäwiparu jan ist'irinakatakisa kamsaños muni 'akapach tukusiw' arunakaxa?

***"Diosan reinopat aka
suma yatiy wisti aka
uraqpachanwa yatiyat ni."
(Mateo 24:14)***



phuqasiski, ¿janit qhipa urunakan jakaskpachätanxa? ¿Kamsasmas jumaxa? Jehová Diosax ukhakamaki siskani ukhakamakiwa uka suma yatiyäwinakaxa yatiyasini, “ukatsti akapachan tukusiñapaw jutani” (Mateo 24:14). Diosaxa taqi jan walinakwa aka Uraqitxa chhaqtayani, ukwa “akapachan tukusiñapaw” siski uka arunakaxa sañ muni. Juparu kutkatasir taqi jaqinakaruwa Jesusampi ukat wali ch’amani angelanakapampi tukjayani (2 Tesalonicenses 1:6-9). Supayasa saxranakapasa janipuniw mayampisa apnaqirinakaruxa sallqjapxaniti. Ukatxa, Diosan gobiernoparu ist’irinakatakixa walja bendicionanakwa Apnaqäwipaxa apanini (Apocalipsis 20:1-3; 21:3-5).

¹⁶ Niyakixay aka ñanqhachapachan tukusiñapax jak’ankx-chixa, sapa mayniwa akham jiskt’asiñasa: “¿Kuna luraña-jäpachasa?” sasa. Jehová Diosampita ukat jupax kunsa jiwasanakaru mayistu uka tuqinakatxa yatiqaskañasakiwa, ukasti wali askiwa (Juan 17:3). Taqi chuymaw Bibliat yatiqañama. Jehová Diosan munañapa lurañ munirinakamp chika jan chhaqasisa tantachasiskakiñamawa (Hebreos 10:24, 25). Diosaxa taqinin yatiqañapwa muni, ukhamasti yatiqañamawa, ukatxa jupan chuymaparu purt’añatakixa jan wali luräwinakxa apanukuñamarakiwa (Santiago 4:8).

¹⁷ Qhipa urunakanwa jakxtanxa, ukampisa jila part jaqinakaxa janiw uka tuqit kuns yatiñ munapkanit sasaw Jesusax satayna. Ñanqha jaqinakana t’unjäwipaxa niyaw purinini, mä akatjamatwa taqinirus katjani, kunjamtí mä lunthataxa arumax mantanki ukhama (1 Tesalonicenses 5:2). Jesusax akham sataynawa: “Kunjämatix Noen urunakapanxa paskatayna ukhamarakiniwa Jaqin Yuqapax jutkani ukkhaxa. Uka urunakanxa janira uma juicio paskipanxa, jaqinakax walja manq’añanakana, umañanakana jakasipkäna, mayninakax casarasisipkänwa, mayninakasti phu-

16. ¿Kun lurañamasa wakisipa?

17. ¿Kunatsa akatjamatwa ñanqha jaqinakan t’unjasiwipax niya taqinirusa katjani sasax sisna?

chanakap casarañatak churasipkāna, Noen arcar mantañapkama, janirakiw amuyasipkānti kunürutix uma juiciox purinisin taqiniru apasxāna ukürkama, ukhamarakiniwa Jaqin Yuqapax jutkani ukkhaxa" sasa (Mateo 24:37-39).

¹⁸ Ukhamaxa, Jesusaxa sataynawa: "Amuyasipxam, jan chuymanakamxa vicionakampi machañanakampi qalariyasipxamti, ukhamarak aka jakañan llakisiñanakampisa jan khä urun jumanakax akatjamat katjayasipxañamataki, kunjämtix mä sipitax jist'antaskis ukhama. Uka urusti ukhamwa jutani taqi uraqpachan jakirinakxaru. Jumanakax jank'akipxamaya, ukhamarak orapxam, taqi hora-sana ukhamat taqi akanak paskani ukat jaltapxañamataki, ukhamarak Jaqin Yuqap nayraqatan uñstapxañamatakisa" sasa (Lucas 21:34-36). Sum katuqañasawa Jesusan arunakapxa. ¿Kunatsa? Kunattixa, Jehová Diosampi ukat Jesucristo 'Yuqapampi' iyawsata jaqinakaxa, jakasipkakiniwa kunapachatix Supayana aka ñanqha pachapaxa tukjatäxani ukhaxa. Ukatxa wiñayan wiñayapatakiwa machaq jutir pachan jakasxapxani, ukasti wali jak'anxixiwa (Juan 3:16; 2 Pedro 3:13).

18. ¿Jesusan kuna arunakapsa sum katuqañasaxa?

KUNSA BIBLIA X YATICHÍ

- Qhipa urunakaxa ch'axwäwinakampi, manq'at pist'añanakampi, uraq khathatinakampi, usunakampi chimputawa (Mateo 24:7; Lucas 21:11).
- Aka qhipa urunakanxa jaqinakasti jupanakakiwa munasisipki, qullqik munasipki, munañanapakwa thaqhasipki ukatxa janiw Diosatxa kuns yatiñ munapkiti (2 Timoteo 3:1-5).
- Diosan Apnaqäwipat suma yatiyäwinakaxa qhipa urunakanx uraqpachan yatiyasiski (Mateo 24:14).

¿Angelanakasa saxranakasa kunjamt'ayapxistusa?

¿Angelanakaxa yanapt'apxistaspati?

¿Kunjamsa saxranakax jaqinakar mayjt'ayi?

¿Ñanqha ajayunakarux axsarañasäspati?

MAYNIRU sum uñt'asinxá familiapsa uñt'araktanwa. Ukhamarakiwa, Jehová Diosar sum uñt'añatakixa alaxpachankiri familiapxa uñt'añasarakiwa. ¿Familiapankirinakax Jehová Diosan munañapxa lurapxpachati? ¿Nayrax jaqinakar yanapaxxiripachänati? ¿Jiwasanakaru yanapt'apxistaspati? Ukhamächi ukhaxa, ¿kunjamsa yanapt'apxistaspa?

² Biblianxa walja kutiwa angelanakxat qillqataxa. Uka angelanakxata juk'ampi yatxatañäni. ¿Khitin uka angelanakaru lurpachäna? Colosenses 1:16 siwa: "Jupa [Jesucristo] tuqirakwa Diosax luri taqi kunatix alaxpachansa akapachansa utjki ukanakxa" sasa. Ukhamasti, Diosawa jiliri Yuqapampi taqi angelanakaru mayat mayat luratayna. ¿Qhawqha angelanakas utjpacha? Waranq waranq angelanakaw utji, ukat taqinisa wali ch'amanïpxiwa siw Bibliaxa (Apocalipsis 5:11).

³ Kunapachati Jehová Diosaxa aka Uraqi lurkäna ukhaxa 'alaxpachankir servirinakaxa kusiisipxänwa' siw Diosan Arupaxa (Job 38:4-7). Ukhamaxa janïra aka Uraqisa ni jaqisa utjkäna ukhawa angelanakaxa utjxapxatayna, ukwa Job qillqatax qhanañchistu. Ukat jiwasanakjama 'kusiisirïpxa-

-
1. ¿Kunatsa angelanakat yatiñaxa wakispacha?
 2. ¿Angelanakaxa khitin luratasa, ukat qhawqhanïpxisa?
 3. ¿Angelanakatxa Job 38:4-7 jisk'a t'aqaxa kamsistusa?

rakiwa'. Taqi angelanakawa mä familiaki Jehová Diosaru yupaychaxiritayna.

ANGELANAKAN YANAPT'ÄWIPA

⁴ Nayra awk taykasax inuqatapkäna ukhaxa, jaqinakana suma jakasipxañanakapwa angelanakaxa munapxäna, ukatxa Diosan amtanakap phuqasiñapwa munapxarakäna (Proverbios 8:30, 31; 1 Pedro 1:11, 12). Ukampisa, niya taqi jaqinakawa, munasir Inuqiriparuxa jan luqtañ munxapxänti, ukxa chiqä chuyman angelanakaxa uñjasipkarakinwa. Ukatxa wal llakt'asipxpachäna. Maysa tuqitxa, "kusi-siñax Diosan angelanakap taypinx utji[w]a" kunapachati maynikis Jehová Diosaru kutt'xi ukhaxa (Lucas 15:10). Diosan yupaychirinakapax suma sarnaqasipxaspa ukwa jupanakax munapxi. Ukatwa Uraqinkiri yupaychirinakaparu yanapt'añataki ukat chuymachañataki Diosaxa angelanakaparu khitaniripachanxa (Hebreos 1:7, 14). Jichhax uka tuqita mä qhawqha uñjañäni.

⁵ Kunapachati Sodoma ukat Gomorra sat markanakan-kiri ñanqha jaqinakaru Diosax t'unjkäna ukhaxa, Diosar yupaychir Lot chachampiru ukat phuchanakapampiruxa pä angelanakawa qhispiyatayna (Génesis 19:15, 16). Ukat qhipa maranakanxa, Daniel profetaruwa leonanakan uyuparu uñisirinakapaxa jaquntapxatayna, ukat leonanakaxa janiw kunsä juparux kamachkataynati. Ukat jupaxa akham siwa: "Nayan Diosaxax angelapwa khitani, juparkiwi leonanakan lakapsa jist'anti jan nayaran kuna ñanqh-sa luraskañapataki" sasa (Daniel 6:22). Ukatxa, nayra patak maranakanxa mä angelaw apóstol Pedroruxa carcelat apsutayna (Hechos 12:6-11). Kunapachatixa, Jesusax aka Uraqina Diosan munañapa lurañ qalltkäna ukhaxa, mä

4. ¿Kamsapxpachasa angelanakaxa kunapachati jaqinakax sum sarnaqapxi, ukat jan walinak lurapxi ukhaxa, uka tuqitxa kamsisa Bibliaxa?

5. ¿Khitinakarux angelanakax yanapt'apxäna?

angelarakiwa juparux yanapt'atayna (Marcos 1:13). Ukat ji-wañap jak'ankxäna ukhaxa "mä angela[w] uñstäna juparu ch'amañchañataki" (Lucas 22:43). Ukapachaxa, juka angelan arunakapaxa Jesusarux wali ch'amañchpachäna!

⁶ Jichhürunakanxa janiw uka angelanakaxa uñjatäxiti, Jehová Diosan Uraqxankiri yupaychirinakaparux janirakiw uñstxapxiti. Ukampisa, Jehová Diosan markaparuxa yanapt'asipkakiwa, ajayu tuqita kunanakatí aynacht'ayirjamäki ukanakatxa jank'akiw jark'aqapxi. Bibliax akham siwa: "[Jehová] Tatitun angelapaw iyawsirinakarux uñjaski, Tati-tur waqaychirinakarusti imaskaraki[w]" sasa (Salmo 34:7). ¿Kunatsa aka arunakaxa wal chuymachistaspa? Kunattixa ñanqha ajayunakaw utji, tukjañwa munistu. ¿Khitinakäpxi-sa? ¿Kawkits jutapxpacha? ¿Jiwasanakar jan walt'ayañataki-xa kunsa lurasipki? Jaqinakaxa aka Uraqina jakañ qalltapkä-na ukhaxa kunas pasatayna, uka tuqita sum yatxatañäni.

JIWASARU UÑISIRI AJAYUNAKA

⁷ Kunjamti kimsa jaljana yatiqanktanxa, mä angelawa yaqhanakaru apnaqañ munasaxa Diosaru kutkatasitayna. Ukatwa Supaya, Satanás sutinakampi uñt'ataxa (Apocalipsis 12:9). Evar sallqjasinxä, niya waranqa suxta patak maranakawa niya taqi jaqinakaru Diosata jithiqtayi. Mä qhawqhanikiwa Diosat jan jithiqtapkänti; Abel, Enoc ukat Noé sat chachanakjama (Hebreos 11:4, 5, 7).

⁸ Noé chachan urunakapanxa yaqha angelanakawa Diosar kutkatasipxatayna. Alaxpachankiri Diosan familiapat saraqxasaxa, jaqinakjama jañchir tukuñatakiwa aka Uraqiru saraqanipxäna. ¿Kunatsa? Génesis 6:2 akham sasaw qha-

6. 1) ¿Kunjamsa angelanakaxa Diosan markaparu yanapt'apxi?

2) ¿Kuna jiskt'anakatsa jichhax yatxatañäni?


7. ¿Qhawqhanirusa Satanasaxa Diosat jithiqtayäna?

8. 1) ¿Kunjamatsa yaqhipa angelanakaxa ñanqhaptapxatayna?

2) ¿Uma Juiciot qhispiñatakixa kamachapxataynasa uka ñanqha angelanakaxa?

nañchistu: “Diosan wawanakapasti uka warminakan sumäpxatapwa uñjapxäna. Ukatsti uka warminakwa katuntasipxäna, ukanakampiw mayachasipxarakina” sasa. Uka angelanakaxa jaqinakaruwa jan walinakampi mayjt'ayapxäna, ukatxa Jehová Diosaxa janiwa ukhamaki jupanakarux uñch'ukkünati. Ukatwa Uma Juicio apayanitayna taqi ñanqha jaqinakaru akapachat tukjañataki; Jupar yupaychirina-kakiwa qhispiyatäpxäna (Génesis 7:17, 23). Qhispiñatakixa uka ñanqha angelanakaxa jan ukax saxranakaxa jañchinakapatxa mistxapxänwa alaxpacharu ajayunakjama kutkatxañataki. Luräwinakapampiwa Supay tuqita sayt'asitanakapxa uñacht'ayapxäna, ukhamatwa Supayax 'ñanqha ajayunakan jiliriparu' tuküna (Mateo 9:34).

“Nayan Diosaxax angelapwa khitani, juparakiw leonanakan lakapsa jist'anti.” (Daniel 6:22)



⁹ Kunapachati jan ist'asir angelanakax alaxpacharu kutkatxapxäna ukhaxa, Diosax alaxpachankiri familiap taypiruxa janiw mantayxänti, Supayarjamaw jupanakarux alisnukurakitayna (2 Pedro 2:4). Saxranakaxa, janiw jichhax jaqinakjam jañchir tukxapxiti, ukampisa jaqinakarux mayjt'ayasipkakiwa kunayman jan walinakampi. Supayaw uka saxranakampi yanapt'ayasisax "aka uraqin jaqinakarux wali sallqjañanak luri" (Apocalipsis 12:9; 1 Juan 5:19). ¿Kunjam-sa saxranakax jaqinakaru sallqjapxi? Kunaymanit sallqjañ-wa yatipxi (2 Corintios 2:11). Uka tuqita uñjañäni.

KUNJAMSA SAXRANAKAXA SALLQJAPXI

¹⁰ Saxranakaxa layqanakampi, yatirinakampi ukat ch'amakaninakampiwa jaqinakarux sallqjapxi, taqi uka jan wali luräwinakaxa espiritismo satarakiwa. Uka jan walinak lurasaxa saxranakampisknasa ukhamawa. Uka luräwinakax janipuniw walikit siw Bibliaxa, ukatxa janipuniw ukanak lurapxätati sarakistuwa (Gálatas 5:19-21). Uka luräwinakaxa jamach'inak katuñ mä sipitampi sasiwa. Kunaymani jamach'inak katuñatakixa jamach'i katurinakaxa kunaymani sipitanakanipxarakiwa. Ukhamarakiwa, layqanakampi, yatirinakampi ukat ch'amakaninakampiwa ñanqha ajayunakaxa kunayman tuqita taqi kasta jaqinakaru sallqjayi.

¹¹ Uka sipitanakatxa maynirix akaspawa, jutir urunakat yatiña. ¿Kunjams uk lurapxi? Jutir urunakat yatiñataki, ukat jan uñt'añjamäki uk yatiñatakisa akirinakwa lurapxi: cartatwa uñayasipxi, ampar uñayasipxi, cocat uñxataya-sipxi ukat samkanakaruwa jaysapxi. Ukampisa walikiskiwa uka luräwinakaxa sasaw yaqhipanakaxa sapxi, ukatsti yatirinakaxa ñanqha ajayunakampi yanapt'atawa irnaqapxi siw Bibliaxa, ukhamax janipuniw walikiti. Amuyt'añataki,

9. 1) ¿Diosaxa kamachataynasa saxranakaruxa alaxpacharu kutkatxapxäna ukhaxa? 2) ¿Jichhax kunsa yatiqañäni saxranak tuqitxa?

10. ¿Kuna jan wali luräwinakasa espiritismo sataxa?

11. ¿Kunanakampis jutirit yatiñ tirapxi, ukax kunatsa jan waliki?



Saxranakaxa kunaymanitwa jaqinakaru sallqjañ yatipxi

Hechos 16:16-18 qillqatanakanxa, mä tawaquwa “ñanqha ajayumpix kunatix qhipürun pasañapäkän ukanak qha-nañchirinwa” siwa. Ukatxa, ñanqha ajayux jupat mistxäna ukhaxa, janiw uka tawaquxa jutirinakat kunsä yatxänti.

¹² Jiwatanakaxa jakaskaspasa, ukat jupanakampix parla-ñasäkaspara ukhamwa saxranakaxa sallqjapxaraki. Jiwirin llakit familiaranakaparuwa ukham kunaymani k'arinakampi sallqjapxi. Inasa mä ch'amakanixa jiwatamaxa t'aqhisiskiwa jan ukaxa walikiskiwa sasax siristma, jan ukaxa jiwatan arupäkaspara ukhamwa ist'ayiristamxa. Ukhamanak yatisaxa, “jiwatanakaxa jakasipkakiwa” sasaw yaqhipanakaxa sapxi, ukat chuymachayasiñatakixa jupanakampi parla-siñasawa sasaw sapxi. Ukatxa uka chuymachäwixa janiw chiqäkiti, jan walinakaruwa apistaspa. ¿Kunatsa? Kunattix saxranakakiwa jiwatanakar tukusina parlamxi, ukatxa jiwatanakax jan walsa jikxatasipkaspasa ukhamwa layqanakaru yatiyapxi (1 Samuel 28:3-19). Ukampisa, kunjamti 6 jalan

12. ¿Kunatsa jan waliki jiwatanakampi parlañaxa?

**KUNJAMSA
SAXRANAKARU
SAYKATSNA**

- Layqasiñataki
utjktam ukanakxa
apanukuñamawa
- Bibliat yatiqaskakma
- Diosat mayisipunma

yatiqanktanxa, kunapachatī maynix jiwxi ukhaxa tukusxi-wa mā arunxa janiw jakxiti (Salmo 115:17). Ukhamaxa 'jiwatanakan ajayunakaparu thaqirinakaxa' Jehová Diosar kutkatasiri ñanqha angelanakampi sallqjatäpxiwa (Deuteronomio 18:10, 11; Isaías 8:19). Ukhamaxa, saxranakan uka sipitanakapatxa jithiqtapxañasapuniwa.

¹³ Ñanqha ajayunakaxa janiw aliqaki jaqinakaruxa sallq-japkiti jan ukasti sustjapxarakiwa. Satanasampi saxranakapampix yatisipxiwa 'tiempopan juk'akítapa', niyaw chhaq-tayatäxapxani, ukatwa jan sintt'asisax kuns lurasipkaki (Apocalipsis 12:12, 17). Ukatxa, waranq waranqa jaqinakawa nayrax uka saxranakaru axsarasa sarnaqapxiñina, ukat jichhax janiw ukham jakxapxiti, jan ukasti uka saxranakat qhispiatäxapxiwa. ¿Kunjamsa qhispiäxpaxa? ¿Kunjamsa maynix qhispirakisa, nayrax layqäkchin ukhasa?

KUNJAMSA ÑANQHA AJAYUNAKARU SAYKATSNA

¹⁴ Kunjamsa uka saxranakar saykatsna ukat kunjamsa qhispiraksna ukxa Bibliaw yaticharakistu. Nayra patak maranakana, Éfeso markankir cristianonakata amuyt'añäni. Janir cristianükasinxa yaqhipanakax layqanakapxänwa. Kunapachatī uka jan walinak armañ munapxäna ukhaxa, ¿kunsä luräxpaxäna? Bibliax akham siwa: "Khitinakatix layqäpkäna ukanakaxa libronakap apanisinwa taqinin nayraqatapan ninar phichantäpxi" sasa (Hechos 19:19). Khä machaq cristianonakax layqasiñatak libronakapxa q'al phichhantäpxatayna. Ukat jichhürunakanxa, saxranakar saykatañ munirinakax kikipwa luräpaxänaparaki. Jehová Diosar yupaychañ munirinakax taqi uka jan walinakxa apanukupxänapawa. Ukanakax libronaka, casetenaka, videonaka, fotonaka, music tukart'äwinakawa, layqasiñax wali munañ-jamäkaspasa, yanäpkistaspasa ukhamwa amuyt'ayistaspa,

13. Saxranakar axsarir jaqinakaxa, ¿jichhax kunjamas jakasxapxi?

14. ¿Éfeso markankiri nayra cristianonakat yatiqasisax kunjamsa qhispsna ñanqha ajayunakatxa?

layqasiñaruwa wiytistaspa. Ukat yaqhipanakax illanakwa jan walinakata jark'aqasiñataki apnaqapxi, ukanakasa ap-nukuñarakiwa (1 Corintios 10:21).

¹⁵ Éfeso markankir cristianonakaxa layqasiñatak librona-kap phichhantapxatayna ukat mä qhawqha maranakatxa apóstol Pabloxa akhamwa jupanakaru qillqatayna: 'Alax-pachanakankiri ñanqha ajayunakampiwa nuwastanxa' sasa (Efesios 6:12). Ukhamasti uka saxranakax janiw ukha-maruki jaytjapkänti. Jan ukasti cristianonakarux munaña-nakaparu apnaqañ munasipkakinwa. ¿Ukat kunanakamp-sa cristianonakax lurapxañapäna? "Iyawsañanakamax mä escudjamäpan, Supayan aqkir flechanakapat jark'aqasiña-taki" sasaw Pablox jupanakaru satayna (Efesios 6:16). Iyaw-säwisax mä escudjama wali ch'ullqinixa, ñanqhanakaruxa juk'ampwa saykatsnaxa (Mateo 17:20).

¹⁶ Ukhamasti, ¿kunjamsa iyawsäwisaru ch'amañchsna? Bibliat yatiqasaw ch'amañchsna. Mä pirqax suma sayt'atä-ñapatakixa manqhatpacha sum lurañaw wakisispa. Ukha-marakiwa, iyawsäwisaxa suma ch'ullqiñapatakixa, Biblian yatichäwinakapxaru suma utt'ayatäñapawa. Sapürutí Bi-bliat yatiqañänixa sapürutjamarakiwa iyawsäwisax ch'ull-qiptani. Ukat saxranakampi jan atipjayasiñataki imantasiñ mä ch'ullqi pirqjamäniw iyawsäwisaxa (1 Juan 5:5).

¹⁷ ¿Kunampsa Éfeso markankir cristianonakaxa lurapxa-ñapäna? Saxranakampi atipjata markanwa jakasipxäna, ukatwa wal jark'aqasipxañapänxa. Ukatwa, Pablox jupana-karu akham säna: 'Oración lurapxam, Diosar mayisina Qullan Ajayu' sasa (Efesios 6:18). Saxranakampi mayjt'aya-ta jan wali pachanwa jakasiraktanxa, uka saxranakampi jan atipjayasiñatakixa, Jehová Diosat mayisiñasapuniwa, ya-napt'ita sasa. Diosan sutipxa mayisiwinakasanxa arsuñasa-puniwa (Proverbios 18:10). "Ñanqhatxa [Supayatxa] qhis-

15. ¿Kun lurañasasa ñanqha ajayunakaru saykatañatakixa?

16. ¿Kunjamsa iyawsäwisaxa ch'ullqiptaysna?

17. ¿Kuna lurañasasa saxranakata jark'aqasiñatakixa?

piyapxita" sasaw mayisiñasa (Mateo 6:13). Ukatxa, Diosax ist'apuniniwa mayisiwinakasaruxa (Salmo 145:19).

¹⁸ Chiqasa, uka ñanqha ajayunakaxa jan sintt'asirinakap-xiwa. Ukatxa jupanakaru saykataññani ukat Jehová Diosaru jak'achasiññani Munañapa lurañatakixa, janiwa uka saxranakaru axsarxaññani (Santiago 4:7, 8). Ñanqha ajayunakana ch'amapaxa janiwa wiñayatakikiti. Noen urunakapanxa castigatawa uñjasipxäna, ukat niyawa jan mayampitaki taripatäpxani (Judas 6). Amtarakiññani, Jehová Diosan ch'amani angelanakapawa arxataskistu (2 Reyes 6:15-17). Kunjamsa ñanqha ajayunakaru saykatasiptan ukxa jupanakaxa sum uñjasipki, ukat atipjsna ukwa jupanakaxa munapxi. Atipjapxam siskistaspasa ukhamawa. Janipuni Jehová Diosatxa jithiqtaññani, ni alaxpachankiri suma familiapatsa. Ukatxa janiraki layqanakarusa, yatinarakarusa ch'amakani-nakarusa saraññani, jan ukasti Diosan arunakaparu ist'asapunni sarnaqaññani (1 Pedro 5:6, 7; 2 Pedro 2:9). Ukham sarnaqaññanixa, ñanqha ajayunakaxa atipjatawa uñjasipxani.

¹⁹ Ukatxa, ¿kunatsa Diosaxa wali t'aqhisiyiri ñanqha ajayunakarusa jan wali luräwinakaparusa utjayaskakpacha? Jutiri jaljanwa uka tuqita yatxataskaññani.

18, 19. 1) ¿Kunatsa ñanqha ajayunakaruxa atipjsnawa sasax sisna?
2) ¿Kuna tuqitsa jutir jaljanxa yatiqaskaññanixa?

KUNSA BIBLIAX YATICHI

- Chiqa angelanakaxa Jehová Diosan yupaychirina-kaparuw yanapt'apxi (Hebreos 1:7, 14).
- Supayampi saxranakapampixa jaqinakaruw sallqjapxi, ukatxa Jehová Diosatwa jaqinakaru jithiqtayapxi (Apocalipsis 12:9).
- Supayaru saykatäta ukat Diosan munañapa lurä-taxa, Supayax jithiqtxätamwa (Santiago 4:7, 8).

¿Kunatsa Diosax t'aqhisiñanaka utjayaskakpacha?

¿Diosat taqinirus t'aqhisiypachistu?

¿Kuna jan walt'äwisa Edén huertan uñstäna?

¿Kunjamsa Diosax t'aqhisiñanaka askichani?

MÄ MARKAX ch'axwankkäna ukhaxa waranq waranqa wanakamp warminakampiw jiwarapxatayna. Uka jiwatanakax mä p'iyar allintatäpxänwa, ukat crusanakampiwa muyuntayapxatayna, ukat uka crusanakanxa “¿kunatsa?” sasa qillqxatatänwa. Jachañan uñjasirinakax ukhampunwa jiskt'asipxi. Kunapachati ch'axwäwinakana, uraq khatatiwinakana, usuntañanakana ukat kuna jan walt'äwinakan-sa familiaranakax jiwaxapxi, utasa allthapit uñjasxi ukat wal t'aqhisipxi ukhawa ukham wali llakita jiskt'asipxi. Kunatsa uka llakinakaru purt'asipxpacha, ukwa yatiñ munapxi.

² ¿Kunatsa Diosax t'aqhisiñanak utjayaskakpacha? Jupati taqi ch'amani, chiqakankañani, yatiñani ukat munasiri Diosächixa, ¿kunatsa uñisiñanakas jan wali luräwinakas aka Uraqin utjaskakpacha? Inasa ukham jiskt'asirista.

³ ¿Ukham jiskt'asiñax waliskpachati? Ukham jiskt'asisax janis Diosar respetksna ukat janis iyawsäwiniksna ukham yaqhipanakax amuyapxi. Ukampisa, ukxa Biblia liyisaw yatxatäta, Diosan yupaychirinakapax niya ukhamwa jiskt'asipxarakiritayna. Habacuc profetax akham sataynaw Jehová Diosaruxa: “¿Kunatsa ukataq llakisiñanaka, t'aqhisi-

1, 2. ¿Kunanakasa t'aqhisiyistu, ukat kunsä jaqinakaxa jiskt'asipxi?
3, 4. 1) ¿Kunatsa Diosax t'aqhisiñanaka utjayaskakpacha sas jiskt'asiñax waliskpachati, khitit parlasasa uk amuyt'asna? 2) ¿Kamspachasa Jehová Diosaxa jan wali luräwinakampita ukat t'aqhisiñanakampitxa?



Jehová Diosaxa taqi t'aqhisiñanakuwa tukjani

ñanaka uñjayista? Nayax t'aqhisiyañanakampi, tukjañanakampi muyuntatäwta; ukhamarak quejasiñanakasa, ch'axwañanakasa, taqi chiqanwa utjixa" sasa (Habacuc 1:3).

⁴ Ukham jiskt'asitapatxa, ¿kunatsa ukham parltä sispachänati Jehová Diosax Habacuc chacharuxa? Janiw ukham tuqinuqkänti. Jan ukasti, uka arunakapaxa Biblian qillqatawa. Ukat juparuxa sumwa uka tuqit amuyt'ayäna, iyaw-säwipasa jilxatarakinwa. Jehová Diosaxa ukwa jumatakix munaraki. Amtañäni Bibliaxa akham sasaw yatichi: "Jupasti jumanakatxa llakisirakiwa" sasa (1 Pedro 5:7). Taqi jaqinakat sipansa, Diosaxa juk'ampwa jan wali luräwinaksa t'aqhisiñanakasa uñisi (Isaías 55:8, 9). Ukhamasti, ¿kunatsa t'aqhisiñanakax utjaskakpacha?

¿KUNATSA T'AQHISIÑANAKAX UTJPACHA?

⁵ Kunayman yupaychäwinkiri jaqinakawa yatichirinakaparu ukat sarayirinakaparu akham jiskt'asipxi: "¿Kunatsa wal t'aqhistanxa?" sasa. Ukat yatichirinakapaxa, Diosan munañapawa sasaw sapxi, ukat kunati pasañapäki, jan walinakasa pasañapäki ukxa Diosawa nayratpach amtäna sasaw sapxaraki. Diosan thakinakapaxa jan amuyañjamawa,

5. ¿Kunat t'aqhistan sapxisa, ukat kunsä Bibliaxa yatichi?

ukat maynix jiwxi ukhaxa alaxpacharuw Diosax apasxi, wawanakarusax alaxpacharuw jupampiñataki apasxi sasaw walja jaqinakaru yatichapxi. Ukampisa, kunjamtĩ yatiqkta-xa, Jehová Diosaxa janipuniwa jan walinakxa lurkaspati. Bibliaxa akham siwa: “¡Taqi ch’amani Diosax janiw kuna jan walsa lurkaspati, janirakiw kunatix jan chiqapaki ukxa lurkaspati!” sasa (Job 34:10).

⁶ ¿Kunatsa Diosaw t’aqhisiypachistu sasa Diosar juchañ-chasax jaqinakax pantjasipxi? Niyakixay Diosax taqi ch’a-manichixa jupaw akapach apnaqpacha sasaw sapxi. Kun-jamtĩ 3 jaljan yatiqktanxa, Biblian chiqa yatichäwipwa jan yatipkiti. Akapachax Supayan apnaqatawa, uk yatiqktanxa.

⁷ ‘Taqi akapachaxa Supayan munañapankiwa’ sasaw Bi-bliax yatichi (1 Juan 5:19). ¡Ukaw sum qhanañchistu! ‘Aka uraqin jaqinakaru wali sallqjañanak lurir’ Supayjama-wa jaqinakaxa sarnaqapxi (Apocalipsis 12:9). Sallqjiri, uñi-siri ukat jan sintt’asiriw Satanasaxa. Ukatwa jupan apnaqat akapachaxa uñisiñanakampi, sallqjasiñanakampi, jan sint-t’asisa jan walinak lurañampi phuqantataxa. Ukatwa t’a-qhisiñanakaxa utji, ukäspawa nayrĩrixa.

⁸ Payrĩx akarakispawa, kunjamtĩ 3 jaljan yatiqktanxa, Edenanwa nayrĩri chacha warmixa Diosar kutkatasipxätay-na, ukatwa taqinis juchararätanxa. Ukat jaqixa jupatakikiw taqi kunsa munaski, jilankañakwa munaski, ukatwa ch’ax-wañanakasa, t’aqhisiyañanakasa, jan walt’äwinakasa utjixa (Eclesiastés 4:1; 8:9). Kimsirix akarakispawa, awisaxa “jan walt’añax taqiniruw puri” siw Bibliaxa, ukatwa t’aqhisi-raktanxa (Eclesiastés 9:11). Niyakixaya akapachaxa Jehová Diosampi jan apnaqatakchixa, jan walinakaxa utjakipuni-wa. Ukhamaxa, jan waliwjana jan ukaxa jan wali horasan jikxatasisaxa jaqinakaxa chijirusa puripxakispawa.

6. ¿Kunatsa walja jaqinakaxa Diosaw t’aqhisiypachistu sasax sapxi?

7, 8. 1) ¿Kunjamsa jaqinakaxa akapach apnaqiripjam sarnaqapxixa?

2) ¿‘Juchanitasasa’ ukat ‘chijir puriñasa’ kunatsa t’aqhisiyistu?

⁹ Diosax janiw t'aqhisiñanak apankiti, uk yatiñax wal chuymachistu. Jupax janiw ch'axwäwinakaru, jiwayasiñanaku, t'aqhisiñanakaru, uraq khathatinakaru apt'kistuti. Ukampisa, ¿kunatsa t'aqhisiñanak utjayaskakpacha? Uk amuyt'añäni. Taqi ch'amanichixa, t'aqhisiñanakarux tukjaspawa. Ukatxa, ¿kunatsa jan tukjpacha? Jehová Diosatxa yatxtanwa, Jupaxa wali munasiriwa, ukhamaxa, uka jan walinak tukjañatakix suma amtanipachawa (1 Juan 4:8).

MÄ JAN WALT'ÄWIW UÑSTI

¹⁰ Kunatsa Diosax t'aqhisiñ utjayaskakpacha, uk yatiñatakixa, taqi jan walt'añanakax qalltkäna uka tuqit amuyt'añäni. Kunapachati Supayax Adanampiru Evampiru Jehová Diosar jan ist'ayasa juchachasiykäna ukhaw mä jan walt'äwix uñstäna. Satanasax janiw Jehová Diosan *ch'amaparux* qallaskänti, taqi ch'amanitapxa yatınwa. Jan ukasti, Jehová Diosan *apnaqäwiparuwa* qallasitayna. Diosax k'ariwa ukat kusisit jakasipxañamsa janiw munkiti sasaw satayna, Diosax jan wali apnaqirikaspasa ukhamwa Supayax satayna (Génesis 3:2-5). Ukatxa, jaqinakaxa jan Diosampi apnaqayasisax juk'amp sumwa sarnaqasipxaspa siskaspas ukham säna. Ukhamatwa Jehová Diosan *apnaqäwiparu* qallasina.

¹¹ Adanampi Evampixa Jehová Diosaru kutkatasisaxa, "walsa jan walsa munañasarux lurasksnawa, janiw Diosampipuni apnaqayasksnati" sapkaspänsa ukhamänwa. ¿Kunjamsa Jehová Diosaxa uka jan walt'äw askichaspäna? ¿Kunjamsa Diosax taqi angelanakaru uka kutkatasirinakax pantjasitanakap uñacht'ayasapänxa? ¿Kunjamatsa Jupamamtäwipaxa wali askipunitap uñacht'ayasapänxa? Diosax jank'akiw uka kutkatasirinakaruxa tukjañapäna ukat yaqha chacha warmi lurañapäna, sasaw yaqhipanakax sapxi.

9. ¿Kunatsa Jehová Diosax suma amtanipachawa t'aqhisiñanak jan tukjañataki sasax sisna?

10. ¿Kuna tuqitsa Satanasaxa qallasitayna, ukat kunjamsa?

11. ¿Kunatsa Jehová Diosax kutkatasirinakaru Edenan jan tukjkäna?



¿Yatiqirixa yatichirit sipansa sumt yati?

Ukampisa, aka Uraqxa kusipachaptayaña ukat Adán Evan wawanakapampi phuqantayaña Diosax amtäna, uka amtapxa nayrawa qhanañxatayna (Génesis 1:28). Ukat Jehová Diosaxa amtanakapxa *phuqapuniwa* (Isaías 55: 10, 11). Edén huertana uka kutkatasirinakaru tukjasapäna ukhaxa, janiwa suma Apnaqirítapxa uñchat'aykasapänti.

¹² Uk amuyt'añatakix mä profesor at parl'tañäni, uka yatichirix matematisa yatichkaspa ukham sañäni. Akatjamat kutkatasir mä ch'ikhi waynaxa, "yatichirix janiw sum yatichkiti, nayawa jupat sipansa sum yatichañ yatxa" sas sayt'asispa. Uk at yaqha yatiqirinakax yatichir contra sayt'asxapxarakispa chiqäpachaw sasa. ¿Kamachañapasa yatichirixa? Jupa contra sayt'asir yatiqirinakar alisnukuspaxa, ¿kamsapxakispas chikataxa? "Ukhamäskapunpachaw, yatiqir masinakasax yatixpachaw" sapxaspawa. Uk at yatichirirux janiw respetxapxaspati, pantjasitap qhanstayaña axsarkaspa ukhamwa amuyxapxaspa. Jichhaxa, mayni yatiqirinakapax jan ukham amuyapxañapatakixa, kutkatasir

12, 13. Akapachaxa Satanasampi apnaqatawa ukat jaqinakasa jupanakpachawa apnaqasipxi, Jehová Diosax ukxa janiw jarkt'kiti, ¿kuna uñacht'äwimpisa uka amuyt'sna?

ch'ikhi waynarux janiw alisnukkaspati, jan ukasti uka yatiqirimpaw yatichayaspa kuntix siski uk uñacht' ayañapataki.

¹³ Jehová Diosaxa niya ukhamjamrakwa luräna. Amtañäni, Edenanxa janiwa Jehová Dios contra sayt'irinakaki uka qallasíwitxa yatipkänti. Jan ukasti, millón millón angelanakawa kunatí pasaskäna ukxa uñjasipkäna (Daniel 7:10). Kunjamtí Jehová Diosaxa uka jan walt'äwi askichasapän ukaxa, angelanakaruwa ukatxa jaqinakampacharuwa walsa jan walsa amuyayaspäna. Ukhamasti, ¿kamachpachänsa Jehová Diosaxa? Satanasaxa kunjamxay jaqinakaru apnaqchini, uk uñacht'aypan sataynawa, jaqinakasa apnaqasipxpan sarakitaynawa.

¹⁴ Yatichirit parlaskakiñäni, jupa contra sayt'ir waynasa mayninakasa, pantjasitapxa yatichirix yatiwa. Jichhax uka yatiqirimpi yatichayaspaxa, taqinitaki askispawa, ukxa yatichirix yatirakiwa. Ukhamawa, kunapachatí profesor contra sayt'ir waynax jan yatichirjamäxanixa, mayni suma yatiqirinakapaxa, profesorakipuniw sum yatichaspax sapxaniwa. Ukatxa, kutkatasir yatiqirinakaru alisnukuni ukhasa yatipxaniwa kunatsa alisnukuxa. Ukhamarakiwa, kunapachatí Satanasana arkirinakapana pantjasitanakapaxa qhanstani, ukat jaqinakasa janiraki jupanakpacha apnaqasirjamäpkaniti, ukanak sum yatisini ukhaxa suma angelanakatakisa suma jaqinakatakisa askiniwa, ukwa Jehová Diosax yatina. Uka tuqitxa akham sasawa Jeremías profetaxa satayna: "Tata, nayax yattwa jaqix janiw alaskiti pachpa jakañapxa, janirakiw tukuyawipsa munañapar apnaqkaspati" sasa, uka chiqä yatichäwxa yatipxañapänwa (Jeremías 10:23).

¿KUNATSA DIOSAX JICHHAKAM SUYPACHA?

¹⁵ Ukampisa, ¿kunatsa Diosax t'aqhisiñanak jichhakama

14. Jaqinakaxa jupanakpacha apnaqasipxpan sataynawa Jehová Diosaxa, ¿ukham amtatatapxa kuna askinakasa utji?

15, 16. 1) ¿Kunatsa Diosax t'aqhisiñanaka utjayaskakpacha? 2) ¿Kunatsa Diosax ñanqha luräwinakatsa chijinakatsa jan jark'aqkpachistu?

utjayaskakpacha? ¿Kunatsa jan walinakxa jan chhaqtaypacha? Kunanaksa profesorax *jan lurkaspa* uka tuqit amuyt'aññani. Mä tuqitxa, yatichirixa janiwa kutkatasir yatiqiriruxa jark'kaspati, jan ukasti yatichayaspawa. Maysa tuqitxa, janiwa juparu yanapt'kaspati. Ukhamarakiwa, Jehová Diosaxa akanakwa *jan lurkänti*. Mä tuqitxa, Supayarusa arkirinakaparusa janiwa jark'känti munañanakapa lurapxañapatakixa. Ukatakisti tiempowa munasina. Waranq waranqa maranakawa jaqinakaxa kunaymanit apnaqasiñ yant'apxi ukatxa ciencia tuqinsa yaqhanak tuqitsa nayraruwa sarsasipki. Ukampisa, k'arimpi aynacht'ayasiñasa, pisinkañasa, jan wali luräwinakasa ukat ch'axwäwinakasa jilxattaskakiwa. Ukhamaxa qhanawa, jaqinakana apnaqäwinakapaxa janiw kunatakikisa, jan waliruw apt'istu.

¹⁶ Pä tuqitxa, Jehová Diosax janiwa Satanasaru akapach apnaqañ yanapkiti. Diosatí chijinakata, jiwayasiñanakata ukat jan walinakata jark'aqkistaspaxa, ¿janiti kutkatasirinakaru yanapkaspa? T'aqhisiñanakat qhispiyatäsnaxa, ¿janiti jaqinakax jiwasanakpachax apnaqasisksnawa sasax sapxkaspa? Jehová Diosatí ukham luraspa ukhaxa Supayarusa yanapkaspa, k'arikaspasa ukhamäspawa. Ukampisa, "Diosax jani[puni]w k'ariskaspati" (Hebreos 6:18).

¹⁷ Diosarux nayratpachwa kutkatasipxi, ukax jan walinaruw apt'istu, ¿kamsakismas uka tuqitxa? Amtaññani, Jehová Diosax taqi ch'amaniwa. Ukhamaxa, taqi jan wal-t'äwinakxa askichaspawa, jisa, askichaniwa. Aka Uraqixa waliptxaniwa ukatxa kusipachaptayatäxaniwa. Jesusan luqtasiwiparu iyawsir jaqinakan juchanakapax pampachatäxaniwa, janiw jiwaxpaxaniti, ukat jiwatanakasa jaktanxapxaniwa. Ukhamatwa Diosaxa 'Supayan luratanakap' Jesusampi t'unjayani (1 Juan 3:8). Kunapachaxay wakischini ukhaw Jehová Diosax taqi ukanakxa lurani. Kutkatasirina-

17, 18. Supayasa, jaqinakan apnaqäwipasa t'aqhisiñanakwa apani, ¿Jehová Diosaxa kamachanisa taqi uka t'aqhisíwinakaruxa?

karu ukaratpacha tukjasapän ukhaxa janiwa kunatı chiqäki ukxa yatkasänti, janirakiwa juparus yupaychkasänti, Diosax wali llamp'u chuymampiw uñjaskistu, ukatwa wal kusistanxa (2 Pedro 3:9, 10). Ukañkamasti, Diosaxa juparu taqi chuyma yupaychañ munir jaqinakaruw thaqhasaki ukat kunayman jan walt'äwinakampi phuqantat akapachan aguantaña yanaparakiwa (Juan 4:23; 1 Corintios 10:13).

¹⁸ Inasa yaqhipanakax akham sapxchispa, Diosatı Adanampiru Evampiru taqi kunan iyawsir lurasapän ukhaxa janiwa t'aqhisiñanakaxa utjkasapänti sasa. Kunatsa jan ukham lurkäna, uka yatiñatakixa ak amtañäni, kuntı Diosax jiwasarı churkistu uka mä jach'a churäwi.

¿KUNJAMSA DIOSAN CHURÄWIPA KATUQASAXA SARNAQÄTA?

¹⁹ Kunjamtı 5 jaljan yatiqktanxa, jaqinakaxa taqi kunsachuymat luriri, mä arunxa, amtasarjam sarnaqiri lurätantanwa. Wali askipuniw uka churäwixa. Diosaxa kunayman animalanakwa luratayna ukat janiw jiwasanakjamäpkiti. Jaqinakax autonakwa lurapxi, ukat jaqin apnaqatakiw ukसारुस aksarus sartixa. ¿Diosax ukham luristaspäna ukhaxa kisisitati sarnaqasisäna? Janiw ukham lurätäktanti, ukatwa wal kusistanxa. Taqi kunsachuymat luriri jaqıtanwa, kuna kasta jaqıñänisa, kunjam sarnaqäwiniñänisa, khitinakampisa sarnaqañäni uk amtasarjamaw lurtanxa. Ukham sarnaqasiñxa wal muntanxa, ukat Diosaxa ukham sarnaqasiñaswa munaraki.

19. ¿Kuna suma churäwsa Diosatı katuqtanxa, kunjamsa uk uñañasa?

***Diosawa t'aqhisiñanakan
aguantañ yanapt'ätamxa***



²⁰ Jehová Diosaxa janiwa maynimpi jariyataki yupaychayasiñ munkiti (2 Corintios 9:7). ¿Mä awkisa jan ukax mä taykasa wawaparu jariyasakiti “walpun munassma” sayasiñ muni? ¿Jan ukax taqi chuymacha “walpun munassma” sayasiñ muni? Ukhamaxa akham jiskt’asiñamawa: “Taqi kunsa chuymat luriri, amtajarjam sarnaqiri Diosan luratästxaya, jichhax, ¿kunjamsa *nayax* ukarjama sarnaqäxa?” sasa. Supayasa, Adanampi Evampisa ukham inuqatäkasaxa jan walpunwa lurapxäna, Jehová Diosaruwa qallasipxäna. ¿Jumasti? ¿Kuns luräta?

²¹ Taqi kunsa chuymat luriri, mä arunxa, amtasarjama sarnaqir luratätanwa, uka suma churäwi katuqasaxa jumax sumwa sarnaqasma. Jehová Dios tuqit sayt’asiri millón millón jaqinakamp chikäsmawa. Uka jaqinakaxa Jehová Diosarux walpun kusisiyapxi, kunattixa Satanasaxa k’aritäpa ukat jan wali apnaqiritäpwa uñacht’ayapxi (Proverbios 27:11). Jumatix ukham suma jakasiña ajllismaxa ukhamwa uñacht’ayarakisma. Jutir jaljanwa uka tuqita juk’ampi yatxataskañäni.

20, 21. ¿Kunjamsa taqi kunsa chuymat lurañäki Diosan uka churäwipa katuqasaxa sum sarnaqasma, ukat kunatsa ukham munañasaxa?

KUNSA BIBLIAX YATICHI

- Janiw Diosax jan walinakaru apt’kistuti (Job 34:10).
- Jehová Diosax k’ariwa ukat janiw kusisiñasxa munkiti sasaw Supayax Diosan Apnaqäwiparuxa qallasitayna (Génesis 3:2-5).
- Jehová Diosaxa Yuqapar Apnaqirit utt’ayasinwa taqi t’aqhisiñanakxa tukjayani, ukatxa taqi jan walinaksa askichayani (1 Juan 3:8).

Diosatakjam sarnaqañäni

¿Kunjamatsa Diosan munasitapäsmaxa?

¿Supayan qallasiwipatxa kunatsa yatiñamaxa?

¿Kuna jan wali sarnaqäwinaksa Diosax uñisi?

¿Kunjamsa Diosatakjam sarnaqasma?

¿KHITIRUSA munat masimäñapataki ajllisma? Inasa, jum-jam amuyt'ani, amtani, sum sarnaqiri munat masiniña munchisma. Chiqansa, ukham suma jaqimpi sarnaqañwa munasmamaxa. Lunthatasiri, uñisir jaqin munat masipañxa janiw munkasmati.

² Ukhamarakwa Diosax jaqinakaru ajllitayna jupan munasitanakapäpxañapatakixa. Khitinakäpachas uk uñjañäni. Abrahamax munatajaw sataynaw Diosaxa (Isaías 41:8; Santiago 2:23). David reyitxa akham sataynawa: 'Munañajarjam sarnaqiriwa' sasa, kunattix ukham jaqinakaruw Diosax munasi (Hechos 13:22). Ukhamarakiw Daniel profetaruxa Diosax 'walpun munasirakina' siw Bibliaxa (Daniel 9:23).

³ ¿Kunatsa Jehová Diosaxa Abraham David Daniel chachanakarux munasitanakajaw sispachäna? Kunattix Abrahamarux sänwa: "Nayaru obedecitam layku[wa]" sasa (Génesis 22:18). Ukhamasti, mayitanakap alt'at chuymampi luririnakaruw Diosax jak'achasi. Israelitanakarux Diosax akham sarakinwa 'nayaru ist'apxita; ukhamatwa nayax jumanakan Diosamäxä, jumanakasti nayan markajapxarakitawa' sasa (Jeremías 7:23). Diosaru ist'äta ukhaxa, munasitaparakismawa.

1, 2. Khitinakas Jehová Diosan munasitanakapax uka tuqit arst'ma.
3. ¿Kunatsa Jehová Diosax yaqhipanakaru ajllpacha munasitanakapäpxañapatakixa?

MUNASITANAKAPARUX DIOSAX CH'AMAÑCHIWA

⁴ Diosan munasitapñañax kunjamäpachasa uk amuyt'añañ-ni. Jehová Diosax sapüruw jaqinakarux uñjaski "ukhamata ch'ama churañataki khitinakatix chiqpachana juparu iyaw-sasipki ukanakaru" siw Bibliaxa (2 Crónicas 16:9). ¿Kunjamatsa Diosax ch'am churiristamxa? Salmo 32:8 qillqatanxa Jehová Diosax siwa: "Nayranakaxax jumaruw uñch'ukisk-tam, nayaw yatichaskäma, nayaw amuyt'ayaskäma, nayaw sarañamäki uka thak uñachayaskäma" sasa.

⁵ ¡Ukham suma arunakampiwa Jehová Diosax uñjaskä-maw sistamxa! Sum sarnaqañataki yanap munätaxa ya-napt'ätamwa, ukat ukarjam sarnaqätaxa uñjaskarakitamwa walikiskañamataki. Jan walt'äwinakata, yant'anakata mis-tuñamatakiw Diosax yanapt'añ *muntamxa* (Salmo 55:22). Ukhamasti, Diosaruti taqi chuyma luqtätaxa, Salmo qillqir-jamaw jikxatasita, jupasti sänwa: "Nayax [Jehová] Tatitump chikapuniw sarnaqaskta, jupaw kupixaxanki, janiw kunas tinkuykitaniti" sasa (Salmo 16:8; 63:8). Jisa, Jehová Diosaw yanapt'askätam Jupar kusisiykir suma jakäwiniñamatakixa. Ukampisa, Diosan mä uñisiripawa, ukham sum sarnaqa-ñamxa janiw munkaniti, ukxa taqiniw yattanxa.

SATANASAN QALLASIWIPA

⁶ Kunjamti 11 jaljan yatichaskixa, Supayaw Diosan jach'a kankañaparux qallasitayna. Jehová Diosax k'arñikaspasa, janis suma apnaqirirkaspa ukhama, Adanas Evas munañapa-ruw walsa jan walsa amtapxaspa sasaw satayna. Nayra awk taykasax juchachasipxäna uka qhipatxa, aka Uraqirux wal wawanakapax mirantxapxäna. Ukatxa, jan wali amtampiw taqi jaqinakax Diosar yupaychapxi sarakitaynaw Supayaxa. "Jaqinakax janiw Diosar munasiñat yupaychapkiti. Diosati jan arxatkaspaxa, *khitsa* Dios contra sayt'ayaskakiristwa" siskaspas ukhama. Job libronwa Supayan ukham amuyata-

4, 5. ¿Kunjamsa Jehová Diosax markaparux ch'am churi?

6. ¿Jaqinaxat kamsataynasa Satanasaxa?

pax sum qhanañchasi. ¿Khitinsa Job chachaxa? ¿Kunatsa Diosar qallasıwıpat parlasın jupar aytıtanxa?

⁷ Niya 3.600 maranakaw pasxi Job chachan jakatapatxa. Wali suma jaqınwa, ukatwa Diosax säna: “Janiw khitisa uraqınxa utjkıti jupjama chiqa, aski jaqıxa, jupasti janıpunıw khitirus ñanqha lurañ munkiti” sasa (Job 1:8). Ukhamasti, Jehová Diosax Job chacharux suma nayrampiw uñjäna.

⁸ Job chachaxa janis taqi chuyma Diosar yupaychkaspa ukhamwa k’arintäna. Supayax Jehová Diosarux sänwä: “Jumax janiw khitina juparu llamkt’añapsa munktati, janirakiw familiaparusa, kuna yänakapatix utjki ukanakarusa. Jumasti taqi luratanakaparux bendeciraktawa, ukatwa jupax uraqınxa walja uywanakani qamir jaqıxa. Jichhasti kuna nakapatix utjki ukanakxa apaqxam ukapachaw uñjäta kunjamtix juman ajanumaru ñanqha arunakampi maldecitam ukxa” sasa (Job 1:10, 11).

⁹ Diosaw taqi kuns Job chachar churi uka laykukiw yupaychaski sataynaw Supayaxa. Job chacharutı yant’asispaxa, Dios contraw sayt’aspa sarakıtaynawa. ¿Kamachataynas Jehová Diosax Supayan qallasıwıparuxa? Yant’may sataynawa. Chiqaıpunit Job chachax Diosar munasisin luqtpachäna jan ukax janıcha, ukax ukhamatwa qhanañchasiñapäna.

JOB CHACHARUW YANT’ASI

¹⁰ Ukaratpachaw Supayax taqi tuqıt yant’äna. Uywanakap lunthatsuyäna, chikat jiwarayarakına ukat niya taqpach yanapirinakapaw jiwarayatäna. Taqi ukanakax jan kunan uñjasıyäna. Ukat mä jach’a thayampiw wawanakapar jiwarayäna ukampirakiw t’aqhisıyäna. “Taqi ukhamanaka uñjkasasa Job chachax janiw kuna juchsa lurkänti, janirakiw kuna jan walinaksa Dios tuqıx arskarakinsa” (Job 1:22).

7, 8. 1) ¿Khä tiemponxa kunatsa Job chachax wali uñt’atänxa? 2) Job chachax Diosar taqi chuyma yupaychaskäna ukhaxa, ¿Supayax kam-sataynasa Job chachatxa?

9. ¿Kamachataynas Jehová Diosax Supayan qallasıwıparuxa, kunatsa?

10. ¿Kuna yant’anakans Job chachax uñjasına, ukat kamachakinsa?



*Job chachax Diosat jan
jithiqtas sum sarnaqatapatxa
bendicitänwa*

¹¹ Supayax janiw ukhamaruk jaytkänti. Akham amuyt'as-pachänxa, taqi yänakap yanapirinakap wawanakap apaqka-tasa Job chachax aguantaskakispawa, usuntayä ukhapï ni-yas Dios contra sayt'anix sasa. Jehová Diosax ukhamax yant'may sataynawa. Supayax axtkañ usumpiw khuyañ usuntayäna. Ukhamäkipansa Job chachax Diosatxa janiw ji-thiqtäkänti, iyawsäwiniskakînwa. Ukhamasti, "Job chachaxa janiw kuna juchanaksa lurkänti, janirakiw lakapampis kuna jan walinaksa arskaräkinti" Dios contraxa (Job 2:10).

¹² Supayaw ukham t'aqhisiyaskäna, ukxa janiw Job cha-chax yatkänti. Diosach ukham t'aqhisiypachitu sasaw amu-yasîna, janipï yatkäntix Diosan jach'a kankañapar Supayan qallasitapxa (Job 6:4; 16:11-14). Ukampisa, Jehová Diosata-kix aski jaqiskakînwa. Ukhamaraki suma sarnaqäwipampi-xa uñacht'ayänwa Supayan arupax k'aritäpa, kunattix jupax taqi chuymapuniw Diosar yupaychaskäna.

¹³ Job chachan ukham chiqap sarnaqatapampiw Diosax Supayan ñanqha k'ariparux janiw ukhamäkiti satayna. Je-hová Diosan munasitapäskapunînwa Job chachaxa, ukatwa ukham sum sarnaqatapatxa bendicirakîna (Job 42:12-17).

¿SUPAYAN QALLASIÏWIPATXA KUNATSA YATIÑAMAXA?

¹⁴ Jaqinakax janiw taqi chuyma luqtktamti sas Diosar qa-llasisinxä, Supayax janiw Job tuqitak parlkänti, jan ukasti jiwasanakamppachatwa qallasîna. Bibliax uk sum qhanañ-chi, Proverbios 27:11 siwa: "Munat wawaxay, yatiñanîma-ya, nayarux kusisiyitâtawa; ukhamatwa arsusixa nayar tu-qir jaqinakarusa [qallasirijarusa, NM]" sasa. Job chachan ji-watapatxa walja maranakaw pasxäna ukhawa aka arunakax

11. 1) ¿Kun uñacht'ayañsa Satanasax munäna, ukat Jehová Diosax ka-machataynasa? 2) ¿Khuyañ usunkasasa kamachänsa Job chachaxa?

12. ¿Supayan qallasîwiparux kunjamsa Job chachax saykatatayna?

13. Job chachax Diosatakjam chiqapar sarnaqatapatxa, ¿kunsä Dio-sax Supayarux uñacht'ayi?

14, 15. Janiw Job saparuki k'arintkänti jan ukasti *taqiniruw* k'arintä-na, ¿kunatsa ukham sisnaxa?

qillqasina, ukürunakanxa Supayax qallasiskakinwa, Diosan luqtirinakaparus k'arintaskakinwa ukwa ukax uñacht'ayistu. Jehová Diosatakjam sarnaqasaxa yanapt'tanwa, Supayan k'arinakaparu janiw ukhamäkit sayañataki, ukhamatwa Diosarux kusisiyaraktanxa. ¿Uka tuqit kamsasma? Jan wali luräwinak apanukuñamächinisa, ¿janit munkasma Supayan k'arinakaparu 'janiw ukhamäkiti' sañ yanapt'añxa?

¹⁵ Supayax akham sänwa: "Mä jaqixa jakañapa qhispiyasiña laykuxa kunsa lurakispawa" sasa (Job 2:4). 'Mä jaqi' sasinx, janiw Job saparukix k'arintkänti, jan ukasti *taqi* jaqinakaruw k'arintäna. Uk yatiñax wali wakisiriwa. Kunattix *jumax* janis Diosar *taqi* chuyma yupaychkasma ukham k'arinttamxa. Jan walt'äwinakankkäta ukhax Diosar jan ist'añamwa Supayax muni, kunati jan walik uk lurañamwa munaraki. ¿Kunjamanakats Supayax amtaparjam sallqjistaspa?

¹⁶ Kunjamti 10 jaljan uñjktanxa, Satanasax walja sipitanakaniw Diosat jaqinakar apaqañatakixa. Mä tuqitxa, "mä leonar uñtataw warart'asisa sarnaqaski khitiru manq'antañatakisa" (1 Pedro 5:8). Kunapachatì uñt'atanakamasa, familianakamasa, yaqha jaqinakasa, jan Bibliat yatiqañama, ni ukarjam sarnaqañamsa munapkaniti ukhaw Supayan jan walinak wiytatapxa amuyasita (Juan 15:19, 20).^{*} Maysa tuqitxa, "pachpa Supayapuniw [...] mä qhana angeläkaspa ukham tukuxa" (2 Corintios 11:14). Ukhamawa, Supayax kunaymani sipitanakwa aptaspa jumar sallqjañatakixa, Diosar jan kusisiykir jakäwiniñamatakisa. Mayniristi Diosar yupaychañataki ch'am apaqañawa. Janipunis Diosar kusisiykasma ukhamwa jumar amuyayiristamxa (Proverbios

^{*} Diosa tuqit jan yatiqamti sirinakaxa janiw Supayan amparapampi apnaqatäpxiw sañ munkiti. Ukampisa, jupaw akapachan diosapaxa, ukhamaraki akapachaxa Supayan munañapankiwa (2 Corintios 4:4; 1 Juan 5:19). Ukatwa niya taqinixa Diosar kusisiyir jakäwinxa jan sarnaqapkiti, ukatarakwa yatiqañamsa jan munapkaniti.

16. 1) ¿Supayax kuna sipitanakampisa Diosat jaqinakaru apaqi?
2) ¿Kunjamatsa jumar sallqjiristamxa uka sipitanakampixi?

24:10). Ukampisa, Satanasax 'leonar uñtatasa' sarnaqaskpan jan ukax "mä qhana angeluarus" tukuskpana, qallasiwipaxa pachpakiskiwa, jupax siwa: jan walt'äwinkkätasa jan ukax yant'anakkätasa Diosar yupaychañatxa saraqäta-wa sasa. ¿Kunjamsa jumax janiw ukhamäkiti sasma? ¿Ukat kunjamsa Job chachjamarakisma Diosar yupaychkasaxa?

JEHOVÁ DIOSAN KAMACHINAKAPAR IST'APXAÑÄNI

¹⁷ Diosar kusisiykir jakäwimpiw uñachayäta Supayan qallasiwipax k'aritäpa. ¿Ukax kamsañs muni? Bibliax akham siwa: "[Jehová] Diosamarusti taqi chuymamampi, taqi jakañamampi, taqi ch'amamampi munam" sasa (Deuteronomio 6:5). Diosaruti juk'amp munasitaxa, juk'ampwa munañap phuqañ munätaxa. Apóstol Juanax sänwa: "Diosar munañaxa mandamientonakar phuqhañawa" sasa. Jehová Diosaruti taqi chuymamampi munasitaxa "mandamiento-nakapasti janirakiw jan phuqhañjamäk[aniti]" (1 Juan 5:3).

¹⁸ ¿Kawkirinakas Jehová Diosan kamachinakapaxa? Yaqhipanakax jan wali sarnaqäwinakan jan sarnaqañatak qillqatawa. Amuyt'añataki, 122 jana uñxatma, p'iqiñchapax "Diosan uñisit luräwinakxa jan lurapxañäniti" satawa. Bibliax ñanqha luräwinakawa siski ukanakawa mayat mayata uñacht'ayasiski. Inas may uñxatäta ukhaxa jan ñanqha luräwinakjamäkchiniti. Bibliat apst'ata jisk'a t'aqanakat lup'ita ukhawa uñjätä Diosan kamachinakapaxa wali askitapxa. Jichhax inas jan walinakax jan apanukuñjamäkchiniti, inas jumatakix wali ch'amächini ukaxa. Ukampisa, khitinakati Diosar kusisiykir jakäwin sarnaqapxki ukanakaxa chuymas phuqt'ata kuisita ukhamaw sarnaqasipxi (Isafas 48:17, 18). Jumax ukhamarakismawa. ¿Kunjamatsa uk yatsna?

¹⁹ Kunattix Jehová Diosax janiw maykistuti jan phuqañjamanakxa (Deuteronomio 30:11-14). Jupax yatiw

17. Chiqpachansa, ¿kunatsa Jehová Diosan kamachinakap ist'tanxa?
18, 19. 1) Diosan mä qhawqha kamachinakap arst'ma (122 janja uñxatma). 2) ¿Diosax janiw ch'amasat jil maykiti uk kunjams yattanxa?

kawkikamatakis ch'amax utjistu, kunanakaksa lursna uks yatirakiwa (Salmo 103:14). Ukat jupar jaysañatakix ch'amsa churistaspawa. Pablox sänwa: "Jupasti janiw jumanakarux jach'a jan atipkaya yant'anakxa churapkätamti. Kunapachatä yant'ax jutkani ukkhaxa, Diosax kunjämatsa uka yant'ar atipjaña yanapapxarakitamwa, ukhamatwa atipjapxäta" sasa (1 Corintios 10:13). Aguantaskakiñatakixa, Jehová Diosax 'jach'a ch'amapxa' churistaspawa (2 Corintios 4:7). Ukhamwa Pablörux ch'am churäna; yant'äwinaka pasasax akham sänwa: "Ch'amapampix taqi kunaruw saykatirista" sasa (Filipenses 4:13).

DIOSAN UÑISIT LURÄWINAKXA JAN LURAPXAÑÄNITI

Jiwayaña

(Éxodo 20:13; 21:22, 23).

Q'añun sarnaqaña

(Levítico 20:10, 13, 15, 16; Romanos 1:24, 26, 27, 32; 1 Corintios 6:9, 10).

Layqasiñanaka

(Deuteronomio 18:9-13; 1 Corintios 10:21, 22; Gálatas 5:20, 21).

Yaqha diosanakar yupaychaña

(1 Corintios 10:14).

Machantasiña

(1 Corintios 5:11).

Lunthatasiña

(Levítico 6:2, 4; Efesios 4:28).

K'arisiña

(Proverbios 6:16, 19; Colosenses 3:9; Apocalipsis 22:15).

Mich'asiña

(1 Corintios 5:11).

Nuwasiña

(Salmo 11:5; Proverbios 22:24, 25; Gálatas 5:20, 21).

Jan wali arunak parlaña

(Levítico 19:16; Efesios 5:4; Colosenses 3:8).

Jan walinakatak wil apnaqaña

(Génesis 9:4; Hechos 15:20, 28, 29).

Familiaru jan yanapt'añ munaña

(1 Timoteo 5:8).

Ch'axwäwinakankaña, politicar mitisiña

(Isaías 2:4; Juan 6:15; 17:16).

Droganakampi qulljasiña

(Marcos 15:23; 2 Corintios 7:1).

DIOSAX KUNJAMÄÑASSA MUNI UKANAK YATIQASKAKIÑÄNI

²⁰ Diosar kusisiyañatakix janiw uñisitanakapak uñisiñasä-kiti. Jan ukasti munatanakapxa munasiñasarakiwa (Romanos 12:9). ¿Janit jumjam amuyani, amtani, sarnariqim-pix chikachasiñ munkasma? Jehovah Diosax ukhamaraki-wa. Ukhamax munasirakimay Diosan munatanakapxa. Kunjam jaqinakas Diosan munasitanakapäpxi ukax Salmo 15:1–5 qhanañchasiski. Diosan munasitanakapax kuntí

20. ¿Diosar kusisiyañatakix kunjam jaqñamasa, ukat kunats wakisiri?



Bibliax ‘qullan ajayun luräwipa’ siski uk uñacht’ayap-xi, ukanakasti akanakawa: “munasiña, kusisiña, samaraña, llamp’u chuymaniña, taqimpis sumankaña, khuyapayasiriña, taqi kunansa phuqhiriña, llamp’u chuymaniña, jan-chin munañapar atipjaña” (Gálatas 5:22, 23).

²¹ Biblia sapüru liyita ukat yatxatarakita, ukaw Diosar kusisiykir jakäwiniñatakix yanapt’ätamxa. Ukat kunjam sar-naqañamsa Jehová Diosax muni uk yatiqaskakitaxa, Diosan munañaparjamarakiw sarnaqxäta (Isaías 30:20, 21). Jehová Diosaruti juk’ampi munasitaxa, juk’ampirakwa Diosaru kusisiyaña munäta.

²² Diosar kusisiyas jakañatakixa wakisiw ch’amacht’asiña-sa. Maynitix jan walinaka jakäwipat apanukxanixa, thantha isips apanukkaspa ukat machaqatsa isthapiskaspa ukhamaw siw Biblianxa (Colosenses 3:9, 10). Ukatxa, Salmo qillqirix akham sataynawa kamachinak tuqitxa: “Arunakam imañax askinak jikxatañawa” sasa (Salmo 19:11). Jumati Diosar kusisiyasa jakasitaxa, walja bendicionanakarakwa katuqäta. Ukhamarusa, Satanasan qallasiwiparusa saykatarakitawa, Diosan chuymaparusa kusisiyarakitawa.

21. Diosar kusisiykir jakäwiniñatakixa, ¿kunas yanapt’iristamxa?

22. ¿Diosan chuymapar kusisiyasa jakasisaxa kuns jikxatäta?

KUNSA BIBLIAX YATICHI

- Diosar ist’asaxa munasitapäsmawa (Santiago 2:23).
- Jaqinakax janiw taqi chuyma Diosar yupaychapkiti jan ukasti jakañ laykukiw yupaychapxi sataynaw Supayaxa (Job 1:8, 10, 11; 2:4; Proverbios 27:11).
- Diosan uñisita sarnaqäwinakanxa janiw sarnaqap-xañasäkiti (1 Corintios 6:9, 10).
- Jehová Diosar kusisiyañatakix uñisiñasaw uñisitanakaparuxa, munasiñasarakiw munatanakaparuxa (Romanos 12:9).

Jakäwxa Diosjama uñjapxañäni

¿Jakäwxa kunjamsa Diosax uñji?

¿Sullsuñxata Diosax kampsachasa?

¿Kunjamsa jakäwir respetatasxa uñacht'aysna?

JEHOVÁ sapakiw “chiqpach Diosaxa, jakkiri Dios[axa]” sataynaw Jeremías profetaxa (Jeremías 10:10). Taqi jakirina-kaxa jupan Luratarakiwa. Ukhamwa alaxpachankir yaqhip wawanakapaxa sapxatayna: “Tata, nanakan Diosaxa, jumax askitawa jach'añchäwi, gloria, ukhamarak munañaniña katuqañatakixa. Jumaw taqi kuns ina ch'usat lurtaxa, munañamatarakwa taqi kunas jakaskaraki, juman uskutarakiwa” (Apocalipsis 4:11). Ukatxa, Jehová Diosar q'uchkasinx, David reyix akham sänwa: “Juman jakkir umax utji” sasa (Salmo 36:9). Ukhamasti, jakäwix Diosan suma churäwipawa.

² Ukhamasti, Jehová Diosawa jakayasiskistu (Hechos 17:28). Jupaw samansa, umsa, manq'añanaksa, uraqsa churistu (Hechos 14:15-17). Taqi ukanakxa wali kusiona jakasiña-satakiwa churistu. Ukampisa, ukham suma jakäwiniñatakixa, wakisiwa Diosan kamachinakap yatiñasa, ukat ukarjam sarnaqañasa (Isaías 48:17, 18).

JAKÄWXA RESPETAPXAÑÄNI

³ Diosax muniwa, jakäwisarusa yaqhanakan jakäwiparus respetomp uñjañasa. Amuyt'añataki: Adanampi Evampina Caín yuqapaxa, sullkapatakiw wal colerasitayna. Jach'a juchar jan puriñapatakix Jehová Diosax iwxänwa, ukampisa

1. ¿Taqi jakirinakaruxa khitis luratayna?

2. Jakaskakiñasatakixa, ¿kunanaksa Diosax churistu?

3. Cainaxa Abel sullkaparuw jawayatayna, ¿kampsachänsa Diosaxa?

JAKÄWXA RESPETTANWA



- taykan purakapankir
wawaru jan jiwayasa



- Diosan uñisita
q'añu luräwinak
jaytanukusa



- jaqi masisaru
uñisiñanaka
chuymasat
apsusa

Cainax jan ist'asisaw Abel sullkaparux 'jiwayañkama nuwja-tayna' (Génesis 4:3-8). Ukham jiwayatapatxa Jehová Diosax alisnukutaynaw siw Bibliaxa (Génesis 4:9-11).

⁴ Waranq waranqa maranak pasatatsti, Jehová Diosax israelitanakaruw kamachinak churäna, kunjamtí jupax mun-käna ukhamaru yupaychapxañapataki. Moisés profetawa uka kamachinakxa katuqatayna, ukatwa Moisesan Leyipa satarakixa. Ukhamasti Moisesan Leyipanxa: "Janiw jiwayä-tati" sas qillqatänwa (Deuteronomio 5:17). Uka kamachiw israelitanakarux uñacht'ayäna jaqin jakäwipaxa Diosatakix wali valoranitapa, ukatxa jaqinakaxa ukhamarakiwa jaqi masipan jakäwiparus uñjapxañapäna.

⁵ ¿Kamsarakpachas Diosaxa taykan purakapankaskiri wawatxa? Moisesan Leyipanxa siwa: "Chachanakatix jupanak-pura nuwasisina chiqpachapuni mä usur warmiru nuwan-tani ukat janir ususiñapäkipana sullsuyni, ukampisa jan khitis jiwkani ukhaxa, warmin chachapax qhawqxay usuch-jäwit maychini ukhaw wayt'asiñapa nuwantir jaqiruxa; ukat jupasti juesanakan nayraqatapanwa churañapa. Ukam-pisa jiwatati utjanixa, almat almaw churañapa" sasa (Éxodo 21:22, 23, NM). Ukhamasti, taykan purakanpakir wawarux janiw jiwayasiñapäkänti. Uka jakäwixa Jehová Diosatakix wali valoranirakiwa (Salmo 127:3). Ukhamasti, janiw walikit purakankaskir wawa jiwayasin apsuyasiñaxa.

⁶ Jaqi masisan jakäwiparux suma nayrampiwa uñjañasa, ukhamatwa jakäwirux respetaraktanxa. Bibliax siwa: "Taqi khinitix jaqi masipar uñiski ukax jaqi jiwayiriwa. Jumanakax yatipxarakatwa janiw khiti jaqi jiwayirinsa wiñay jakañapax utjkaspati" sasa (1 Juan 3:15). Wiñay jakasiñti munstanxa, chuymasanxa janiw utjañapäkiti uñisiñaxa, uñisiñatwa nu-wasiñasa utji (1 Juan 3:11, 12). Wali wakisiriwa maynit may-nikama munasiñ yatiqañasaxa.

4. ¿Moisesan Leyipanxa jakäwirux kunjam uñjañasaw sisa?

5. ¿Kunatsa sullsuñax jan waliki?

6. ¿Kunatsa jaqi masisarux jan uñisiñasäki?

⁷ ¿Kamsaraksnasa jakäwisarü respetañ tuqitxa? Janiw khitis jiwañ munktanti, ukampisa yaqhipanakax munañanakap thaqhasaxa, jakäwip apt'irjamaw sarnaqapxi. Sañäni, cigarro ch'amupxi, coca akhullipxi jan ukax jan wali qullanakampiw qulljasipxi. Ukanakax usuntayiriwa, jiwañar puriyiriwa. Ukhamasti, uka vicionakan sarnaqirinakaxa janiw jakäwirux respetapkiti. Diosatakix jan wali q'añu luräwina-kawa (Romanos 6:19; 12:1; 2 Corintios 7:1). Kunjamti Diosax munki ukhamarjama yupaychañatakixa, jaytxañamawa uka vicionakxa. Inas ch'amächini, ukampisa Jehová Diosaw ch'amap churistani ukanak jaytañatakixa. Jakäwix Diosan wali suma churäwipawa, ukham uñjañataki ch'amachasir jaqinakaruxa Jehová Diosax wal munasi.

⁸ Jakäwiruti respetstanxa, jan chijir puriñatakixa sum amuyt'asisaw sarnaqañäni. Janiw kusisiñ laykuki chijir purirjam sarnaqañäniti. Autsa motsa amuyt'asisaw apnaqañäni, janirakiw usuchjasiñ anatt'añanakansa anatkañäniti (Salmo 11:5). Israelitanakar churaskäna uka kamachinakataxa mä kamachix akham siwa: "Kunapachatix maynix mä machaq uta lurasini, uta patapan terrasaru mä pirqampi muyuntayañapawa; ukhamatwa familiapax jan juchañchata uñjasini, khitis uka terrasat jalaqtasin jiwkaspä ukatxa" sasa (Deuteronomio 22:8). Uka kamachix wali suma yatichäwiniwa, ukarjamarakiw sarnaqañamaxa. Sañäni, utamati escaleranichixa, sum uñakipt'añama jan khitis jalaqtasin usuchjasiñapataki. Jan ukax carronistasa carromax suma askichatäñapawa. Ukhamasti, utamas motomas automasa, jumatakisa mayninakatakisa jan chijir puriyirjamäpanti.

⁹ ¿Kunjams Inuqirix animalanakan jakäwipar uñjpacha? Wali valoranirakikiwa. Manq'añataki, isisiñataki, jark'aqasiñataki ukanakatakikiw animalanakarux jiwaysna siw Diosaxa (Génesis 3:21; 9:3; Éxodo 21:28). Khititi animalanakar

7. ¿Kuna vicionakasa jakäwir jan respetatasxa uñacht'ayi?

8. ¿Kunatsa sum amuyt'asisa sarnaqañasa?

9. Jakäwiruti respetstanxa, ¿kunjamsa animalanakarux uñjañasa?

t'aqhisiychi jan ukax anatiñanakan jiwaychi, uka jaqix janiw jakäwir respetkiti (Proverbios 12:10).

WILXA RESPETAPXAÑÄNI

¹⁰ Kunapachatí Cainax Abel sullkaparu jiwayatayna ukhaxa, Jehová Diosax sänwa: "Jila[ta]man wilapa uraqir wartk-tasa ukaw nayarux art'asinitu" sasa (Génesis 4:10). Jilatama-na wilapaw sasinxa, Diosax jakäwipaw sañ munäna. Cainax sullkapan jakäwipwa apaqatayna, ukham luratapatsti juchañchatañapänwa. Abel sullkapan wilapasa jan ukax jakä-wipasa art'asinkaspa chiqaparu uñjatañatak ukhamänwa. Uma Juicio pasatatsti wilampi jakäwimpix mayakispasa ukhamäskakinwa. Uma Juicio janir purinkipanxa, jaqinakaxa muxsa achunaka, ch'uxña manq'anaka, yaqha ukham achunakampi manq'asipxirina. Ukampis Uma Juicio pasatatxa janiw ukhamäxanti. Noempi yuqanakapampirux Diosax sänwa: "Taqi animalanaka, ukhamarak kawkiri man-q'añ ch'uxñanaktix churapksma ukanakxa manq'asipkaki-tawa, nayaw ukanakxa churapxsma. Ukampis wilanpach aychxa janiw manq'apxätati, jakañax wilankatap layku" sasa (Génesis 1:29; 9:3, 4). Ukhamasti qhanawa, wilasa jaka-ñasa mayakikaspasa ukhamawa Jehová Diosatakixa.

¹¹ Wil jan manq'asaw wilarux respettanxa. Israelitanakar churkäna uka Leyinxä, Jehová Diosax sänwa: "Kawkiri israe-litanakatixa, jan ukax kawkir yaqha markat jutasina jakiri-nakasa mä uywa jiwayapxani ukapachasti, jan ukax kawki-ri jamach'inakatix manq'añataki uchataki ukanaksa, uka-pachasti wilapxa uraqiruw wartxarakini, ukatsti laq'ampiw imt'xani, uka wilax taqi jakirinakarusa jakaña churatap layku, ukampisa kawkiri jaqitix wila manq'ani ukasti jiwaya-täxaniwa" sasa (Levítico 17:13, 14). Ukhamaxa, Noeru chu-rat kamachix niya 800 maranak pasatatsa wakisiskakin-wa phuqañaxa. Ukhamax qhanänwa Diosan amuyatapaxa:

10. Wilas jakañas mayakispasa ukxa, ¿Diosax kunjams qhanañchäna?

11. Noé tiempotpachxa, ¿kamsänsa Diosax wila tuqitxa?

yupaychirinakapaxa manq'asipkañapänwa animalanakan aychapxa, ukampisa janiw wilapxa manq'apxañapäkänti. Uraqiruw wartapxañapäna, ukhamatsa Diosaru animalan jakäwip kutt'aykaspä ukhama.

¹² Cristianonakatakixa ukham kamachix utjarakiwa. Nayra patak maranakanxa, apostolanakampi, irpir yaqha cristianonakampiw tantachasipxatayna, kuna kamachinakarus cristianonakax ist'apxañapa uk amtañataki. Ukanxa akham amtapxatayna: "Qullan Ajayutakis nanakatakis waljamakiw amuyasi taqi akanakxar jan kuna lurañanaksa juk'ampi jumanakxar apxatañataki. Idolonakar luqtatäkis ukanakxa jan manq'apxamti. Janirak wilsa manq'apxamti, ni kunkat jaychjat jiwayat uywanaksa. Janirak wachuq jucha lurañansa sarnaqapxamti" (Hechos 15:28, 29; 21:25). Ukhamax 'janiw wil manq'añasäkiti'. Diosatakixa wil manq'añaxa, yaqha diosanakar yupaychañampi, q'añu lurañanakan sarnaqañampi sasiwa, ukatwa janipuni manq'añasäkiti.

¹³ ¿Janiw wil manq'apxätati sasinxa janiw wil uchayasipxätati sarakpachänti? Ukhamawa. Amuyt'añataki: doctorati janiw alcohol umätati siristam ukhaxa, ¿venat alcohol uchayasismati? Janiwa. Ukhamarakiwa, janiw wil manq'apxätati siski uka arunakaxa, janiw kuna tuqitsa wilax cuerposar mantañapäkit sañ munaraki. Ukhamasti aka kamachir jaysañatakixa janiw wila uchayasiñasäkiti.

¹⁴ Ukatxa, ¿kamachaspas mä cristianox wali usuchjatäsapa jan ukax operación munasispa ukhaxa? Doctoranakaxa, janiti wil uchayaskätaxa jiwätawa sapxaspa ukhaxa, ¿kamachaspasa? Cristianox janiw jiwañ munkiti. Diosan churata wali valorani jakäwipa jan apt'añatakixa, jan wilani yaqha kasta qullayasiñanakampiwa qullayasispa. Ukhamaxa, wila-

12. ¿Nayra patak maranakanxa kawköri kamachisa qullan ajayu taypixa churasitayna cristianonakaruxa?

13. Janiw wil manq'apxätati siski uka kamachix janiw wila uchayasipxätati sañ munaraki, ¿ukxa kuna amuyt'äwisa sum uñacht'ayistaspa?

14, 15. Doctoranakati mä cristianoru wila uchayasiñamawa saspa ukhaxa, ¿kamachaspasa, kunatsa?

ru yaqhip yanapt'ir qullanakampiwa yanapt'ayasirakispa.

¹⁵ Akapachana mä qhawqha urunakampi jakasiñ laykuxa, ¿Diosan kamachipxa p'akintaspati mä cristianoxa? Jesusax sänwa: “Khititix jakañap qhispiyasiñ munanixa, apt'asiniwa, ukampisa khititix jakañap naya layku apt'asinixa, qhispiyasiñiwa” sasa (Mateo 16:25). Janiw khitis jiwañ munktanti. Jichhati ju-charar jakañasa qhispiyasiñ munasaxa Diosan kamachinakapa p'akintañänixa, wiñay jakañwa apt'snaxa. Ukhamasti, Diosan kamachipaxa jiwasan askisatakixa, ukatwa ukaru atinisiñasaxa. Jiwañänisa, jakañ Chuririwa jaktayañ horasax amtasisin jaktayistani, ukhamatwa wali valoran jakäwxa wasitat katuqañäni (Juan 5:28, 29; Hebreos 11:6).

¹⁶ Diosar yupaychirinakax taqi chuy-maw wila tuqit kamachiru ist'añ amtap-xi. Ukatwa, janipuni wil manq'apkiti, ni qullayasiñatakis uchayasipkarakiti.* Jupanakax wil Utjayiriruw atinisipxi, kunattix Jupakiw yati kunas jiwasan askisatakixa. ¿Ukhamaw sarakismati?

KUNATAKIKIS WILAXA

¹⁷ Wilax kunatakikisa, ukax Moisesan Leyipanwa qhan uñacht'ayasi. Kunjamsa israelitanakax yupaychapxañapäna

* Wil jan uchayasiñataki yaqha yanapt'anakata juk'ampi yatxatän munasaxa, uñxatarakismawa akir folleto, *¿Cómo puede salvarle la vida la sangre?*, 13 janat 17 janakama, ukasti Jehová Diosan Qhanañchirinakapan español aruta qillqatawa.

16. ¿Wila tuqit kamachiru phuqañatxa kamsapxis cristianoaxa?

17. Israelitanakaruxa, ¿kunatakikiw wilax sataynas Diosaxa?



Doctorati janiw alcohol umätati siristam ukhaxa, ¿venat alcohol uchayasiskakismati?

uk sasinxa, Jehová Diosax akham sänwa: “Taqi jakirinakas-ti kuna wilatix jupanxa utjki ukampiwa jakaraki. Nayaw jumanakarux altaraxan wila churapxsma, ukhamat jumana-kax uka wila tuqi kutsuyatäpxañamataki, uka wilapï phuq-xixa jumanakan jakañaniäpxañamatakixa” sasa (Levítico 17: 11). Israelitanakax juchar purisinxa, mä animalwa luqtap-xaňapäna ukat wilapxa tabernaculon altaraparuw apapxa-rakiňapäna ukhamat juchanakapat pampachatäpxaňapata-ki, Diosan templopax utjxäna ukhasti, templon altaraparuw wilax apatarakäna. Wilax ukatakikänwa.

¹⁸ Chiqap cristianonakaxa janiw Moisesan Leyiparjam sarnaqxapxiti, ukatwa, animalanaksa jan luqtxapxiti, janiw animalanakan wilapsa altararus apxapxiti (Hebreos 10:1). Ukampisa, israelitanakaxa wil altarar apapkäna ukaxa, Dio-san Yuqapax luqtasiňapäkäna ukwa uñacht’ayäna. Kun-

18. ¿Kuna bendicionanaksa katuqañäni Jesusan wila wartasiwipatxa?

¿Kunjamatsa jakañampi wilampiru respetatasxa uñacht’aysna?



jamti 5 jaljan yatiqktanxa, Jesusax jiwasanak layku jakäwip luqtasisinwa wilapxa wartasiwayi. Uka qhipatsti alaxpacharuw kutkatxi, ukatsti wilap wartasiwayki uka wilapwa mä kutiki Diosar luqtxarakina jan mayampi luqtasxañapataki (Hebreos 9:11, 12). Ukhamatwa jiwasanakaxa juchanakasatxa pampachatäsnaxa, ukhamatarakwa wiñay jakañsa katuqaraksnaxa (Mateo 20:28; Juan 3:16). Ukhamasti, ukataki wila aptäwixa wali wakisirinwa (1 Pedro 1:18, 19). Jesusax wilap wartasiwayki ukar iyawsasakiwa qhispiyatäsnaxa.

¹⁹ ¡Munasir Diosasarux walpun yuspärtanxa jakañ churistu ukatxa! Wiñay jakañatakix Jesusan luqtasiwipar iyawsañäni sasawa jaqi masisaru yatiyañasa, ukhamatwa Diosar yuspäratasxa uñacht'ayañäni. Wali k'uchikiw ukxa lurañäni, kunattix Jehová Diosjamarakiw jaqi masisan jakäwiparuxa wali valorani uñjaraktanxa (Ezequiel 3:17-21). Ukhamti phuqañänixa, Pabljamwa saraksna: "Mayniritix jumanakat chhaqañar saraskan ukaxa, janiw khitis nayarux juchañchkitaspati ['nayax taqinin wilapatxa q'umätwa', MT]. Nayasti jumanakarux yatiyapxsmawa taqpach Diosan thakipatxa, jan kuns imt'asa" sasa (Hechos 20:26, 27). Ukhamasti jakäwimpi wilampi respetatasxa uñacht'aysnawa, jaqi masisaru Diosa tuqita, Diosan amtanakapata yatiyasa.

19. ¿Kunsa cristiano x lurañapa 'taqinin wilapat' jan juchaniñatakixa?

KUNSA BIBLIA X YATICH

- Jakäwixa Diosan churäwipawa (Salmo 36:9; Apocalipsis 4:11).
- Janiw walikit taykan purakapat wawa jwayasna apsuñaxa, kunattix uka wawaxa wali valoraniw Diosatakixa (Éxodo 21:22, 23, NM; Salmo 127:3).
- Jakäwir respetatasxa uñacht'aysnawa jan chijiru apt'asa, wilsa jan manq'asa (Deuteronomio 5:17; Hechos 15:28, 29).

Kunjamatsa familiasampi kusisit jakassna

- ¿Kunas munasi warmin suma chachãñatakixa?
- ¿Kunjamsa chachan warmix lurañap phuqaspa?
- ¿Kunas lurañaspa suma awk taykäñatakixa?
- ¿Kunjamsa wawanakax familiar kusisiyapxaspa?

FAMILIANAKAX wali kusisit jakasipxañapwa Jehová Diosax muni. Ukatwa Arupanxa, familiankiri sapa maynirux yati-chi, ukat sapa maynit kunsa Jupax mayi ukxa qhanañchara-kiwa. Uka iwxanakarjam sarnaqañaxa familiatakix kusisiñ-wa apani. Kunjamti Jesusax siskäna: “¡Juk’amp kusisiñanip-xiwa khitinakatix Diosan arunakap ist’apki, ukhamarak jaysapxi ukanakaxa!” (Lucas 11:28).

² Familiaxa Jehová Diosan utt’ayatawa, uk yatiñasawa kusisita familianiñasatakixa. Ukatwa Jesusaxa ‘Awkisaw’ satay-naxa (Mateo 6:9). Chiqasa, taqpach familianakaxa alaxpa-chankir Awkisampi utt’ayatawa, ukat jupax yatiwa kunana-kasa familiaru kusisiyi (Efesios 3:14, 15, MT). Ukhamasti, Bibliarjamaxa, ¿kunsax Diosax sapa maynit maypacha?

FAMILIAN QALLTAPA

³ Jehová Diosawa, Adanampi Evampiru lurasaxa jaqicha-tayna. Utjasipxañapatakix Edén sata mä suma huertwa chu-ratayna ukat wawanakanipxätaw sarakitaynawa. Jupanakarux akham sänwa: “Jichhax wali mirantapxam, aka ura-

-
1. ¿Kunjamatsa familiaxa kusisit jakasispa?
 2. ¿Kusisita familianiñatakixa kun yatiñasasa wakisi?
 3. ¿Familian qalltapatxa kamsis Bibliaxa, ukat kunjamsa chiqätap yat-tanxa?

qirusti phuqhantapxarakim” sasa (Génesis 1:26-28; 2:18, 21-24). Uka arunakax janiw mä cuentokikiti ni mä säwikikisa. Familian qalltäwipat Génesis libron qhanañchaski ukaruxa Jesusax chiqaw sataynawa (Mateo 19:4, 5). Jichhürunakanxa llakinakakiw utjaski, janiw kunjamtí Diosax qalltan munkäna ukhamäxiti. Ukampisa, jichha tiemponsa familianakaxa kusisitawa jakasipxaspa. Uk uñjañäni.

⁴ Familiasax kusisit jakasiñapatakixa taqiniw yanapt’sna. Ukatakixa Diosat yatiqasiñasawa, munasiñ uñacht’ayañasarakikiwa (Efesios 5:1, 2). Ukampisa janiw Diosarux uñjktanti, ¿kunjamaraki jupatxa yatiqassnasti? Janis uñjktanxa, yatsnaw kunanaksa luri. Uk yatiñasatakiw jilir Yuqaparux khitanitayna (Juan 1:14, 18). Jesucristox alaxpachankir Awkipjamapuniw sarnaqäna, ukat jupar uñjañas ist’añasa, Awkiparu uñjañäkaspasa ist’añäkaspasa ukhamänwa (Juan 14:9). Ukhamasti, Jesusan munasiñapat yatiqasawa, jupjam sarnaqasawa taqinis familiasan kusisit jakasiñapatakix yanapsna.

CHACHANAKAN YATIQASIPXAÑAPATAKI

⁵ Kunjamti Jesusax arkirinakapar uñjkänxa ukhamrakwa chachax warmiparu uñjañapa siw Bibliaxa. Aka jisk’a t’aqanakan iwxap uñjañäni: “Chachanaka, munasipxam warminakamaru, *kunjamti Cristox iglesiari munasi* [jan ukax tamaru], ukhamarak jakañapsa jupa layku apt’asiwayi ukhamma. Chachax ukhamwa warmiparux munasiñapa, pachpa janchiparjama. Khititix warmiparux munaski ukax jupa pachpaw munasi. Janiw khitis pachpa janchiparux uñiskiti, jan ukasti manq’ayiw ukhamarak imaraki. *Cristox uka pachparakiw iglesiampix luri*” (Efesios 5:23, 25-29).

⁶ Jesusax arkirinakaparux munasinwa, ukwa chachanakax yatiqasipxañapa. Arkirinakapax juchararäpxchinsa,

4. 1) ¿Familiasax kusisita jakasiñapatakixa kunjamsa taqinis yanapt’sna? 2) Familianakaxa kusisita jakasipxañapatakixa, ¿kunatsa Jesusan jakäwipat yatiqasiñax wakisi?

5, 6. 1) ¿Kunsa Jesusax chachanakaru yatichi tamapankirinakaru uñjasaxa? 2) ¿Diosampi juchanak pampachayasiñatakix kun lurañasasa?

Jesusax “munasiñapsti qhipakamarakiw uñacht’ayäna”, jupanak laykuw jakañaps apt’asina (Juan 13:1; 15:13). Ukatwa chachanakarux sasixa: “Warminakamarux *munapxarakim*, janiraki jupanakatakix qhurüpxamti” sasa (Colosenses 3:19). ¿Kunas chacharux uka arunakarjam sarnaqañapatakix yanapt’ani, warmix pantjaschi ukhasa? Pantjasirítapwa amtasiñapa, ukat Diosampi juchanak pampachayasiñatakixa, yaqhanakan juchanakap nayraqat pampachañapawa, ukax sañ muniwa, warmipan juchanakapamppacha. Maysa tuqitxa warmixa ukham lurañaparakiwa (Mateo 6:12, 14, 15). Ukatpi sapxixa, juchanak pampachasir chacha warmin jaqichasiwipaxa kusisiñaniw sasa.

⁷ Arkirinakapax kunjamäsiapkänsa ukxa Jesusax sum amuyarakiña, uka tuqitsa chachanakax yatiqasipxañaparakiwa. Qhawqhakamxay arkirinakapax lurirjamapxchäna ukat kunanaxay munapxchäna ukanaksa Jesusax sum amuyirina. Amuyt’añäni, kunapachatì wali qaritapkäna ukhaxa, akham sataynaw Jesusaxa: “Jutapxam, mä wasar chiqar samart’ir sarapxañäni” sasa (Marcos 6:30-32). Warmix ukham uñjatäñaparakiwa. Warmix [‘p’akisiri vasoru uñtatataw’, MT] siw Bibliaxa —ukaxa pisi ch’amanikaspa ukham sañ muni— ukatsti chachax warmiparux “jach’aru” aptañapaw siwa. ¿Kunatsa? Kunattix, “Diosax munasiñapanxa [chacharusa warmirusa] mayakwa jakañ churapxtam” siw Bibliaxa (1 Pedro 3:7). Jaqichasitanakax ak amtapxañapawa, Diosatakix taqi chuyma yupaychirinakapaw wali askixa. Dios nayraqatanxa chachas warmis mayakitanwa (Salmo 101:6).

⁸ “Khititix warmiparux munaski ukax jupa pachpaw munasi” siw Bibliaxa. Kunattix “janiw paninikxapxiti jan ukasti *mayakixapxiwa*” sasaw Jesusax satayna (Mateo 19:6). Ukhamasti, chachaxa warmipampikiw sarnaqasiñapa, janiw ya-

7. ¿Kunanaksa Jesusaxa arkirinakapat amuyirina, ukat kunatsa chachanakaxa yatiqasipxañapaxa?

8. 1) ¿Kunatsa “khititix warmiparux munaski ukax jupa pachpaw munasi” sisnaxa? 2) ¿Kamsañs mupacha jaqichasitanakaxa “mayakixapxiwa” siski uka arunakaxa?

qhampi ikintasiñapäkiti (Proverbios 5:15-21; Hebreos 13:4). Ukatakixa, chachas warmipatakix chachjamaw phuqañapa, warmis chachapatakix warmjamarakiwa phuqañapa, janiw maynix jupan munañapaki phuqañapäkiti (1 Corintios 7: 3-5). Ukatxa akham sasirakiwa: “Janiw khitis *pachpa janchi-parux uñiskiti, jan ukasti manq’ayiwa ukhamarak imaraki*”. Chachax kunjamtı jupa pachpa munaskixa ukhamwa warmiparux munasiñaparaki, ukatxa ak amtañaparakiwa, Jesucristoruwa cuenta churani (Efesios 5:29; 1 Corintios 11:3).

⁹ Apóstol Pabloxa “Jesucriston munasiñap[atwa]” parlarakina (Filipenses 1:8). Jesusampi munatäsınxa arkirinakapaxa wali sum jikxatasıpxäna. Uka arkirinakap taypinxa warminakaw utjarakina, ukat jupanakarusa wali sumwa uñjäna (Juan 20:1, 11-13, 16). Ukhamarakiwa, warmix chachapampi munasiñäwa q’ayacht’atäñwa munaraki.

WARMINAKAN YATIQASIPXAÑAPATAKI

¹⁰ Mä institucionanjamarakiwa, familianxa mä p’iq’t’irix munasi suma irpatäñapatakixa. Jesusasa p’iq’t’iriniwa, ukat juparuw ist’i. “Chachasti warmin p’iqiparakiwa, kunjamatix Diosax Criston p’iqipäki ukhama” (1 Corintios 11:3). Jesusaxa p’iq’t’iriparuxa, mä arunxa, Diosaruxa ist’apuniwa. Ukaxa yatiqasiñasatakiwa, kunattixa taqiniwa p’iq’t’iriniñtanxa ukat ist’asiriñasawa.

¹¹ Chachanakax juchararätapatxa pantjasıpxapuniwa, ukat janiw suma p’iq’t’irıpkapuniti. ¿Ukhamäkipansa kamañapas warmixa? Janiw chachapar jisk’achas yaqhanakar parlasiñapäkiti, ni familiansa p’iq’t’añ munañapäkarakiti. Ak amtañapawa, suma chuymaniñas llamp’u chuymaniñas Diosatakix wali askiwa (1 Pedro 3:4). Ukham amuyätaxa, chachamar ist’añax janiw ch’amäkaniti, jan walt’äwıkkäta

9. ¿Kunjamänaw Jesusax sisa Filipenses 1:8 qillqataxa, ukat kunatsa chachaxa ukhamäñaparakixa?

10. ¿Kunsa warminakax Jesusat yatiqasıpxaspa?

11. ¿Kunjamsa warmix chachaparu uñjañapa, ukat kunsa ukampix jikxataspa?

ukhasa. Ukat Bibliax akham siwa: ‘Warmisti chachaparux ist’añapapuniwa’ sasa (Efesios 5:33). Ukatxa, ¿kamachaspasa chachatī Cristoru p’iq̄t’iriparjam jan iyawskani ukhaxa? Bibliax akham siwa chachaninakaruxa: “Chachanakamar ist’asa sarnaqapxam, ukhamata inas kawķiri chachas jan Tati-tutur iyawskchi ukax jumanakan sarnaqawinakam tuqī Tati-tutaki jikxatatāñapataki jan kuna arumpisa, jan ukasti jumanakan *suma sarnaqatam uñjasaki*” sasa (1 Pedro 3:1, 2).

¹² Chachax cristianüskpansa janisa, awisaxa warmix janiw chachapampi kīp amtanikapuniti. Ukat suma arunakampi chachaparū amtanakap sani ukhaxa, janiw respet faltkaniti. Warmixa chiqankaspawa, ukat chachatix warmīn arupa ist’ani ukhaxa familiapatakix askīspawa. Bibliax Sara warmitwa parli, familiapan jan walt’añ askichañatakiwa Abraham chachaparux suma arunakampi iwxt’atayna. Ukat Abrahamax warmiparux janiw ist’kānti, ukatpi Diosax satayna: “Kuntix Sara warmimax mayktam ukanakxa phuqhaskakim” sasa (Génesis 21:9-12). Ukampisa chachatix kuns amtani ukat uka amtapaxa janiraki Diosan kamachinakap p’akintkaniti ukhaxa warmixa chachaparū ist’añapawa ukatsti yanapt’añaparakiwa (Hechos 5:29; Efesios 5:24).

¹³ Warmin lurāwinakapax wali askiw familian kusisit jakasiñapatakixa. Bibliax siwa: ‘Warminakax chachanakapar munapxpan ukhamarak wawanakaparusa’. “Suma amuyunipxañapawa, q’uma chuymaninaka, ukhamarak utapsa sum apnaqirinaka, suma chuymaninaka, chachanakaparux ist’irinaka” sasa (Tito 2:4, 5). Ukham sarnaqir warmisa taykasa familiapan wali munatāniwa respetatarakīniwa (Proverbios 31:10, 28). Ukampisa, taqī jaqichasitanakaw pantjasirīpxi. Ukatwa, sinti jan walt’añanakanxa jaljtañaru jan ukax divorciuru puripxaspa. Diosan Arupax jaljtapxaspaw

12. ¿Warmitī chachaparū respetompi suma arunakampi iwxt’ani ukhaxa walikīskaspati?

13. 1) ¿Kun lurapxañapaw chachan warminakax sisa Tito 2:4, 5 qillqataxa? 2) ¿Jaljtañampit divorciasīñampit kamsis Bibliaxa?



¿Kunatsa Sara warmitxa chachan warminakax yatiqasipxañapa?

siwa, ukampis janiw khitisa ukhamaki jaljtkaspati, “warmix jan chachaparux apanukpati. [...] Ukhamaraki chachax janiw warmipampix jaljtañapäkiti” siwa (1 Corintios 7:10, 11). Ukatxa, chachas jan ukax warmis yaqhampi ikintaschi ukhakiw divorciasipxaspa siw Bibliaxa (Mateo 19:9).

AWKINAKAN YATIQASIPXAÑAPATAKI

¹⁴ Kunjamsa wawanakaru uñjaña uka tuqitwa Jesusax sar-naqäwipampi awkinakarux yatichäna. Kunapachati wawanakax Jesusar jak’achasipxän ukhaxa yaqhipanakax jark’apxataynawa, ukatwa Jesusax säna: “Wawanakax nayan ukar jutasipkpan sam, jan jark’apxamti” sasa. Ukxarusti Bibliax sarakiwa “wawanakar ichxarusinsti, amparapamp luqxata-saw jupanakarux bendecirakina” sasa (Marcos 10:13-16). Jesusax wawanakatakix tiempo apst’asirînwa, ¿janiti jumax awkjamaxa wawanakamataki tiempo apst’asirakisma? Wawanakamatakix walja tiempo apst’asiñamawa, ukwa wawanakax munapxi, janiw juk’a tiempokiñapäkiti. Jupanakaru yatichañatakixa tiempo apst’asiñamapuniwa, ukham sasa-wa Jehová Diosaxa awkinakaru iwxi (Deuteronomio 6:4-9).

14. ¿Kunjamsa Jesusaxa wawanakaru uñjäna, ukat wawanakaxa awk taykapata kunsä munapxi?

¹⁵ Sapürutjam ñanqhaptaskir pachanwa jakastanxa. Ukatwa, awkinakax wawanakaparu jark'aqapxañapaxa jan wali-nakatxa, sañäni, jan wali amtani q'añu jaqinakaw wawana-karu jan walinak lurapxaspa. Jesusax arkirinakaparux sum uñjäna, ukat 'munat wawanakaja' sasaw jupanakarux säna. Jiwayañataki katuntapkäna ukhasa, arkirinakaparu qhispi-yañwa munäna (Juan 13:33; 18:7-9). Awkjamaxa jan ukax taykjamasa wal amuyasipxañamawa, Supayax jan waliruwa wawamaruxa purt'ayaspa. Ukatxa, uka jan walinakatxa iwx-t'añamapuniwa (1 Pedro 5:8).^{*} Wawanakaru ajayu tuqita,

^{*} *Aprendamos del Gran Maestro*, sat librona, 32 jaljanwa, kunjamsa wawanakaru uñjaña uka tuqit sum iwx't'asiski, uka librosti Jehová Diosan Qhanañchirinakapan español arut luratawa.

15. ¿Wawanakar jark'aqañatakixa kuns lurapxaspa awkinakaxa?

Jesusax wawanakarux sum uñjäna, ¿kunsa awkinakax ukat yatiqasipxaspa?



jañchi tuqita, amuy tuqita jan walt'ayañanakaxa añchäxapuniw jichhürunakanxa, janiw nayrax ukhamirikänti.

¹⁶ Janir Jesusar jawayapkäna uka arumaxa, khitis jilirinxa uka tuqitwa arkirinakapax jiskhisipkäna. Ukat Jesusax janiw jupanakataki thitkänti, jan ukasti suma arunakapampi ukat uñacht'äwimpiwa jupanakarux chiqañchäna (Lucas 22:24-27; Juan 13:3-8). Wawanistaxa, ¿kunjamsa Jesusat yatiqasisma wawamaru chiqañchañatakixa? Wawanakatakix chiqañchäwix munasipuniwa, ukampisa janipuniw thithita chiqañchañasäkiti jan ukasti 'juchapatjamakwa chiqañchañasa'. Janir arxaykasax amuyt'asipunma, parlatanakamampi jan 'usuchjañamataki' (Jeremías 30:11; Proverbios 12:18). Wawax chiqañchataxa yatiñapaw kunatsa uka chiqañchäwix jupataki wali askixa (Efesios 6:4; Hebreos 12:9-11).

WAWANAKAN YATIQASIPXAÑAPATAKI

¹⁷ ¿Wawanakax Jesusat yatiqasipxarakispati? Jisa. Wawanakax awkinakaparu ist'apxañapapuniwa, ukwa Jesusax sarnaqäwipampix uñacht'ayäna. Ukatxa sänwa: "Nayax arstwa kuntix Awkix yatichkitu uka [...]. Nayax jupar kusisiykirpun kuns lur[txa]" sasa (Juan 8:28, 29). Kunjamti Jesusax alaxpachankir Awkiparu ist'känxa, ukhamwa wawanakax awkinakaparu ist'apxañapa. Ukham siw Bibliaxa (Efesios 6:1-3). Jesusax jan juchan wawänwa, ukat José awkipasa María taykapasa juchararapxänwa, ukhamäkipansa Jesusax jupanakarux ist'apuninwa. Ukat, ukham sarnaqatapatxa Jesusan familiapaxa kusisitapxänwa (Lucas 2:4, 5, 51, 52).

¹⁸ ¿Kunjamsa wawanakax Jesusjamäpxarakispa awkinakapar kusisiyañataki? Ist'asiripxañapawa. Chiqasa, wayn tawaqunakatakixa awk taykaru ist'añax ch'amäspawa, ukampis uk lurañaswa Diosax muni (Proverbios 1:8; 6:20). Jesusaxa

16. ¿Kunsa awkinakax yatiqasipxaspa kunjamti Jesusax jucharar arkirinakaparu uñjkatayna ukatxa?

17. ¿Kunatsa wawanakaxa Jesusat yatiqasipxañapa?

18. Kunatsa Jesusax alaxpachankir Awkiparu ist'apuniritayna, ukat wawanakaxa awkinakaparu ist'asaxa khitirus kusisiyi uk arst'ma.

Awkiparuxa ist'apunirínwa, sinti jan walt'añankkāna ukhasa ist'askakínwa. Diosax wali t'aqhiskañ lurañwa Jesusarux churatayna, uk phuqaskāna ukhaxa akham sánwa: "Aka t'aqhisñiatxa qhispiyita" sasa. Mä arunxa, uka luräwit qhispiyit sánwa. Ukhampachasa, Diosan munañapxa phuqaskakínwa. Kunatí wakiski ukxa Diosaw yati, ukwa Jesusax amuyasina (Lucas 22:42). Kawkír wawanakatí ist'asiñ yatiqapki ukanakaxa awkinakaparusa ukat alaxpachankir Awkiparusa wal kusisiyapxarakini (Proverbios 23:22-25).*

¹⁹ Supayax Jesusaruw yant'ána, jichhax ukhamarakiw jan walinakampi waynanakarux yant'i (Mateo 4:1-10). Sañáni, jan walinak lurañatakiw wayna masinakapampi yant'ayaspa, ukat janiw sañax ch'amäspawa ukxa yatiw Supayaxa. Ukhamasti waynanakax janiw jan wali jaqinakampi sarnaqapxañapäkiti (1 Corintios 15:33). Jacobon Dina phuchapat parl'tañani: Jehová Diosar jan yupaychirinakampiw mayachasitayna, ukax jan walt'añanakaruw apt'ána (Génesis 34:1, 2). Kunapachati familiata maynix jan walinakar purt'aski jan ukax q'añu lurañanakar purt'aski ukhaxa taqiniw familianxa jachañan uñjasipxi, wayn tawaqu uk amuyt'asiñamawa (Proverbios 17:21, 25).

* Awkis taykas Diosan kama-chinakap p'akintir lurañanaka wawaparu mayispa ukhakiwa wawax awkinakapar jan ist'añapäkiti (Hechos 5:29).

19. 1) ¿Kunjamsa waynanakaru Supayax yant'i? 2) ¿Wawanakana jan wali sarnaqatapaxa kunjamt'ayisa awkinakaruxa?

**¿Kunapachati wayn
tawaqunakax jan
walinak lurañataki
yant'ata uñjasipki
ukhaxa kunsa
amtapxañapa?**



KUSISIT FAMILIANĨÑATAKI

²⁰ Familian jan walt'añax utjki ukhaxa, Biblian iwxxanaka-parjam askichañax janiw ch'amäkiti. Kunjamti yatiqktan-xa, uka kamachinakarjam sarnaqañax wali askiwa familian kusisit jakasiñatakixa. Ukhamax warmininaka, kunjamti Je-sucristox tamaparu uñjkän ukham warmimarux munasip-xarakma. Chachaninaka, chacharuxa ist'apxapunim ukat Proverbios 31:10-31 aytat warmitsa yatiqasipxarakma. Aw-kinaka, wawanakamarux yatichapxapunma (Proverbios 22: 6). Familia p'iq't'irinaka, 'utamxa sum apnaqapxma' (1 Ti-moteo 3:4, 5; 5:8). Wawanaka, awkinakamar ist'apxapun-ma (Colosenses 3:20). Janiw familianxa khitis chiqapäktan-ti; pantjasiritanwa. Ukhamax alt'at chuymanipxañäni, ya-qhanakarus juch pampachita sas mayisipxapuniñäni.

²¹ Jisa, Bibliax walja iwxxanakaniwa familian sum jakasi-ñasatakixa. Ukatxa jutirpachatawa parlaraki, kunjamas kusi-pach uraqix Jehová Diosar taqi chuyma yupaychirinakampi phuqantayatäni ukampita (Apocalipsis 21:3, 4). ¡Wali suma suyt'äwiw ukaxa! Ukatxa, Diosan iwxxanakaparjamati sarna-qañänixa, jichhürunakansa wali kusisit familianĩñäniwa.

20. Familian kusisit jakasiñatakixa, ¿kunsasapa maynix lurapxañapa?

21. ¿Kuna wali suma suyt'äwisa utjixa, ukat kunjamsa jichhasa wali kusisit familian jakassnaxa?

KUNSA BIBLIAX YATICHİ

- Chachaxa warmiparu munasiñapawa pachpa janchiparjama (Efesios 5:25-29).
- Warmixa familiaparu munasiñapawa ukat chachaparuxa respetañapawa (Tito 2:4, 5).
- Awkinakaxa wawanakaparu munasipxañapawa, ukatxa yatichapxañapawa, jan walinakatsa jark'aqapxañaparakiwa (Deuteronomio 6:4-9).
- Wawanakaxa awkinakaparu ist'apxañapapuniwa (Efesios 6:1-3).

Diosan iyawsata yupaychäwi

¿Taqi yupaychäwinakaruti Diosax iyawspacha?

¿Kawkiris chiqa yupaychäwix uk kunjamatsa yatsna?

¿Khitinakasa jichhürunakanxa Diosan chiqa
yupaychirinakapaxa?

JEHOVÁ DIOSAX wal munasistu. Ukatwa, sum jakasiñasa-takixa yanapañ munistu. Munañaparjam yupaychañänixa, wali kusicitaw sarnaqasiñäni ukat jan walt'äwinakarusä atipañäniwa. Ukhamarusä bendicionanakwa katuqañäni, ukat yanapt'arakistaniwa (Isaías 48:17). Ukampisa, patak patak yupaychäwinakawa jan ukax religionanakaw utji. Diosat kunatí chiqäki ukwa yatichapxta sasaw taqinis sapxi, ukampisa, khitis Diosaxa ukat kunsä Diosax jiwasanakaru mayistu uka tuqinakatxa may maywa parlapxi.

² ¿Kunjamas Jehová Diosar yupaychañäpacha uk kunjamatsa yatisma? Uk yatxatañatakix janiw wakiskiti taqi yupaychäwinakaru yatichäwinakap uñaqir sarañaxa. Jan ukas-ti, kunti chiqa yupaychäwit Bibliax *chiqpachapuni* yatichki ukwa yatiqañäma. Sañäni: kunjamti yatktaxa, falso qullq-xa taqi markanwa apnaqapxi. Ukat falso qullqinakat chiqa qullqinak apst'arapit sapxiristamxa, ¿kunjamatsa apsusma? ¿Falso qullqi sum uñt'añamat wakisispa? ¿Janit *chiqa qullqi* sum uñt'añamax wakiskaspa? Chiqa qullqti sum uñt'ätaxa janiw ch'amäkaniti falso qullqinakat ajllsuñaxa. Ukhamara-kiwa, kunapachatí chiqa yupaychäwi sum uñt'xtan ukhaxa janiw ch'amäkiti k'ari yupaychäwinakaru uñt'añaxa.

1. ¿Diosarux munañaparjam yupaychañänixa kunsä katuqañäni?

2. ¿Kunjamsä Jehová Diosar yupaychañaxa ukxa kunjamatsa jumax yatisma, ukat kunampisa uk amuyt'sna?

³ Kunjamti Jehová Diosax munki ukham yupaychañasawa. Taqi yupaychäwinakaruw Diosax iyawspacha sasaw yaqhipanakax sapxi, ukampisa janiw Bibliax ukham yatichkiti. Janiw cristianüxtwa sañakikarakisa, Jesusax akham sänwa: “Janiw khitinakatix: ‘Tatay, Tatay siskitus ukanakax taqini alaxpach markarux [apnaqäwirux, NM] mantkaniti, jan ukasti khitinakatix Awkixan munañapa lurki ukanakiw mantani” sasa. Ukhamasti, kunti Diosax maykistu ukanak yatiquañäni ukat ukarjam sarnaqañäni ukhakiwa Diosax iyawsistani. Diosan munañap jan lurañ munirinakaruwa, Jesusax “jan wali luririnaka” sasaw säna (Mateo 7:21-23). K’ari yupaychäwinakaxa falso qullqimp asiwa, uñxatatax suma qullqjamäspawa, ukampisa jan kunataki inamayawa. Ukatxa jan walt’añanakaruwa puriyistaspa.

⁴ Jehová Diosax taqiniruw wiñay jakañxa churañ muni. Ukat Kusipachan wiñay jakañatakix munañaparjam yupaychañasawa, munañaparjam sarnaqañasarakiwa. Ukampisa waljaniw ukham jan sarnaqañ munapkiti, ukatwa Jesusaxa akham säna: “K’ullk’u punku tuqi mantapxam. Chhaqhañaru irpiri thakisti anchowa, punkupasti wali anchorakiwa; waljanirakiwa uka tuqi mantasipki. Jakañaru irpiri thakisti wali k’ullk’uwa, punkupas uka k’ipka k’ullk’urakiwa, juk’anikirakiw ukarux mantapxi” sasa (Mateo 7:13, 14). Ukhama-xa, chiqa yupaychäwix jakañaru irpiriwa, ukat k’ari yupaychäwisti jiwañar irpiriwa. Ukampisa, Jehová Diosax janiw khitin jiwañapsa munkiti, ukatwa taqi jaqinakaru jupxat yatiyaski (2 Pedro 3:9). Chiqasa, kunjamti Diosar yupaychasktan ukaxa, wiñay jakañaru jan ukax jiwañaruw irpistaspa.

¿KAWKİRISA CHIQA YUPAYCHÄWIXA UK KUNJAMATSA YATSNA?

⁵ ¿Kunjamaraki ‘jakañaru irpiri thaksti’ jikxatsna? Chiqa

3. Jesusan aruparjamaxa, ¿Diosan iyawsatäñatakix kun lurañasasa?

4. ¿Jesusax pä thakit parlasinx kamsañ munpachäna, ukat kunarus uka pä thakixa irpistaspa?

5. ¿Kunjamatsa uñt’sna chiqa yupaychirinakaruwa?

yupaychāwinkirinak uñt'añax janiw ch'amākaniti, sarna-qāwinakapatwa uñt'apxāta sataynaw Jesusaxa. "Jumanakax lurāwinakap tuqiw uñt'apxasma", kunattix "taqi suma qu-qaxa suma achunakwa achu" sasaw satayna (Mateo 7:16, 17). Mā arunxa, chiqa yupaychāwinkirinakax yatichāwina-kapansa lurāwinakapansa qhanawa. Juchanīpxchisa pantja-sirīpxchisa, tamjamax Diosan munañapa lurañatakiw ch'a-machasipxi. Sum uñt'añatakix suxta tuqit yatxatañäni.

⁶ *Diosan yupaychirinakapax Bibliampipuniw yatichapxi.* Diosan Arupax akham siwa: "Taqi Qillqatasti Diosan amuyt'ayatawa, askirakiw yatichañataki, chiqachañataki, ukhamarak q'uma jakañan sarnaqañ yatichañatakisa, ukhamat Diosankirinakax wali yatiñanīpxañapataki, taqi casta suma lurāwinakatak suma wakichatāpxañapataki" sasa (2 Timoteo 3:16, 17). Ukat apóstol Pablox akham sasaw jilat kullakanakaparux qillqarakitayna: "Kunapachatix jumanakax Diosan Arunakap ist'apxta nanakax qhanañchapkayāsma ukkhaxa, jumanakax janiw jaqinakan arunakapjamti katu-qapkäyātaxa, jan ukasti Diosan arunakapjamwa katuqapxta. Chiqpachansa Diosan arunakapawa" (1 Tesalonicenses 2: 13). Ukhamasti, chiqa yupaychāwinkirinakan yatichāwina-kapasa lurāwinakapasa janiwa jaqinakan yatichāwinakapata jan ukax jaqinakan sarnaqāwinakapata apsutākiti. Jan ukasti, Diosan amuyt'ayata Arunakapata apst'atawa.

⁷ Jesucristox Diosan Arupatpunwa yatichāna, ukhamatwa yatiqasiñasataki mā uñacht'āwi jaytawayistu. Alaxpachankir Awkiparu mayiskāna ukhaxa akham sänwa: "Arunakamasti chiqawa" sasa (Juan 17:17). Jesusax Diosan Aruparux iyaw-sänwa, Bibliatpunwa yatichānxa. "Qillqatawa" sapunirīnwa, ukatxa Diosan Arupatpunwa arst'irīna (Mateo 4:4, 7, 10). Ukhamarakiwa, jichhūrunakan Diosan yupaychirinakapax janiw amuyunakapaki yatichapkiti. Jan ukasti, Bibliax Diosan Arupaw sapxiwa, ukampiwa yatichapxaraki.

6, 7. ¿Diosan yupaychirinakapax kamsapxisa Bibliatxa, ukat kunjamsa Jesusax uka tuqit mā uñacht'āwi jaytawayistu?

CHIQA DIOSAR YUPAYCHIRINAKAXA

- Bibliampipuniw yatichapxi
- Jehovah Diosarukiw yupaychapxi ukat Sutip yatiyapxi
- chiqapuniwa munasipxi
- Jesucristoruwa iyawsapxi, kunattix jupnamwa Diosax jaqinakaru qhispiyi
- janiw akapachankiripkiti
- Diosan Apnaqäwipakiwa jaqinakataki mä suyt'äwixa sasaw yatiyapxi



⁸ *Chiqa yupaychäwinkirinakax Jehová Diosarukiw yupaychapxi ukat Sutipwa yatiyapxaraki.* “[Jehová] Tatitu Diosamarukiw yupaychäta, jupa saparukirakiw servita”, ukham sasaw Jesusax yatichäna (Mateo 4:10). Ukhamasti, Jehová Diosan yupaychirinakapaxa Juparukipuniwa yupaychapxi, janipuniwa yaqharuxa yupaychapkiti. Kunjam Diosasa uka tuqit yatiyasawa ukat sutipat yatiyasarakiwa yupaycharaktanxa. Salmo 83:18, *Traducción del Nuevo Mundo* sat Biblianxa siwa: “Jaqinakan yatipxañapataki, jumaxa Jehová sutiniñtama, juma sapakiw uraqpachxaru taqi Munañanñitaxa” sasa. Diosan yupaychirinakapaxa Jesusat yatiqasisaw jaqinakarur Diosat yatichapxaraki. Jesusaxa akham sasawa Awkipar mayisina: ‘Sutimxa uñt’aytwa akapachata churkista uka jaqinakaruxa’ sasa (Juan 17:6, MT). Jichhürunakanxa, Diosan chiqpach yupaychirinakapaxa ukhamarakiwa jaqi masinakaparu kunjam Diosäkitix uk yatiyasipki, ukat Diosan sutipsa, amtanakapsa yatiyasipkarakiwa.

⁹ *Diosan yupaychirinakapaxa chiqpachapuniw munasipxi, janiw uñisipkiti.* Jesusax akham sänwa: “Jumanakatix maynit maynikama munasipxätaxa, taqiniw amuyapxani nayan discipulonakaxäpaxatama” sasa (Juan 13:35). Nayriri cristianonakaxa ukhamwa munasipxäna. Diosan yupaychirinakapan munasiñapaxa, yaqha kasta jaqinakarusa, yaqha markankirinakarusa mayarukiw tukuyi mä familiäkaspara ukhama (Colosenses 3:14). K’ari yupaychäwinkirinakaxa janiw jupanakkamax ukham munasipkiti. Yaqha kastätapata jan ukax yaqha markankiritapatxa jupanakkamaxa jiiwayasipxakiwa, munasipxaspaxa janiw jiiwayasipkaspati. Chiqa cristianonakax janipuniw kunampisa jilat kullakana-kaparu jiiwayapkiti, janirakiwa yaqhanakarus jiiwayapkaspati. Bibliax akham sasaw yatichi: “Ukhamatwa yatisi khitinakas Diosan wawanakapaxa, khitinakarakis Supayan wawanakapäkarakis ukaxa. Kawkiritix jan aski lurkixa,

8. ¿Chiqa yupaychäwinkirinakaxa kunsa lurapxi?

9, 10. ¿Kunjamatsa chiqa cristianonakax munasiñ uñacht’ayasipxi?

ukhamarak jan jilaparus munaski ukaxa, janiw Diosankiti [...]; ‘munasipxam maynit maynikama’. Janiw Cainjamañasäkiti, jupax Supayankirînwa ukatwa jila[ta]paru jiwayi” sasa (1 Juan 3:10-12; 4:20, 21).

¹⁰ Ukhamawa, chiqa munasisaxa janiw khitisa jaqi masiparu jiwaykaspati, ukampisa janiw ukakikiti. Chiqa cristianonakaxa tiempsa ch’amsa jan ukax yänakapsa apst’asipxiwa maynit maynikama yanapt’asiñataki ukhamaraki chuy-macht’asiñatakisa (Hebreos 10:24, 25). Jan walt’añanakansa taqi chuymawa yanapt’asipxi ukat janiw mayninakat kunsapaqapkarakispati. Ukhamasti, Biblianxa ‘taqiniruw aski luraña’ siski uka iwxarusa ist’apxarakiwa (Gálatas 6:10).

¹¹ *Diosaw jaqinakaru Jesucristompi qhispiyi ukaruw chiqa cristianonakaxa iyawsapxi.* Bibliax akham sasaw yatichi: “Janiw yaqha khitinsa qhispiyasiñax utjkiti. Janirakiw akapachanxa yaqha sutix Diosan churata utjkiti, jaqinakan qhispiyasipxañapatakixa” sasa (Hechos 4:12). Kunjamti 5 jaljan yatiqktanxa, Jesusawa ist’asir jaqinakar qhispiyañatakixa jakañapa luqtasina (Mateo 20:28). Ukatsti, aka Uraqiru apnaqaniñapatakiwa Jehová Diosax alaxpacha Apnaqäwipana Apnaqirit Jesusarux utt’ayi. Ukhamasti, Jesusan yatichäwinakapar ist’añaswa Diosax muni. Ukhamatakwa wiñayas jaksnaxa. Ukatwa Bibliax akham sixa: “Khititix Yuqar iyawski ukaxa wiñay jakañaniwa, ukampis khititix jan Yuqaru iyawski ukaxa janiw wiñay jakañanikaniti” sasa (Juan 3:36).

¹² *Diosan chiqa yupaychirinakapax janiw akapachankiripkiti.* Kunapachatî Jesusax Pilato sat apnaqiri nayraqatan taripatakän ukhawa akham säna: “Nayan reinoxax janiw akapachankiti” sasa (Juan 18:36). Chiqa cristianonakax kawki markansa jakasipkpan Diosan Apnaqäwiparupuniw ist’apxi. Ukatwa, ch’axwäwinakarusan politicanakarusan janiwpun mitisipkiti. Ukampisa, yaqhanakatî politicaru mantañ munapxchi, marka apnaqiriñsa amtapxchi jan ukax marka

11. Diosaw Jesucristompi qhispiyistu, ¿kunatsa ukar iyawsañaxa?

12. ¿Jan akapachankirirñax kamsañs muni?

irpiri chhijllir sarañ munapxchi ukhaxa, janirakiw ukanakarus mitisipkiti. Diosan chiqa yupaychirinakapax janis politicaru mitisipkchixa, markan kamachinakaparuxa ist'apxiwa. ¿Kunatsa? Kunattix Diosan Arupaxa cristianonakarux akham siwa: "Autoridadanakarux jaysapxañama[wa]" sasa (Romanos 13:1). Ukampisa, kunapachatì marka apnaqirina-kax Diosan kamachinakap contra lurañaru wayt'ki ukhaxa, chiqa yupaychirinakaxa apostolanakat yatiqasisaw sarnaqapxi, uka apostolonakaxa akham sapxänwa: 'Diosar nay-

*Jehová Diosar markapampchika yupaychäta ukhaxa,
walja jaqinakawa jumaru jak'achasipxätamxa*



raqat ist'apxañasaw wakisi, jaqinakar sipansa' sasa (Hechos 5:29; Marcos 12:17).

¹³ *Jesusan chiqa arkirinakapaxa Diosan Apnaqäwipakiwa jaqinakataki mä suyt'äwixa sasaw yatiyapxi.* Jesusax akham sänwa: "Diosan reinopat aka suma yatiyäwisti aka uraqpa-chanwa yatiyatäni, ukhamat taqi markanakan yatipxañapataki, ukatsti akapachan tukusiñapaw jutani" sasa (Mateo 24:14). Jesucriston chiqa arkirinakapaxa janiw akapach apnaqirinakaru atinisiñ yatichapkiti. Jan ukasti, Diosan Apnaqäwipakipuniw jan walt'añanakxa askichani sasaw yatiyapxi (Salmo 146:3). Ukat Diosar jak'achasipkäta ukhaxa uka suma apnaqäwix jutpan sasaw mayisipxäta sataynawa Jesusaxa, akham arunakampi: "Apnaqäwimax jutpan. Munañamax luraspan, alaxpachansa ukhamaraki aka Uraqinsa" sasa (Mateo 6:10, NM). Uka Apnaqäwitxa Diosan Arupaxa akham siwa: "Jupaw taqi yaqha reinonakarux tukjani, wiñayan wiñayapaw uka reinox utjarakini" sasa (Daniel 2:44).

¹⁴ Ukanak yatisax akham sas jiskt'asiñamawa: "¿Kawkiri yupaychäwisa jan ukax kuna religionasa Bibliatpun yatichapxixa, ukat Diosan Jehová sutipsa yatiyapxixa? ¿Khitinakas cristianonakjama chiqapuni munasipxixa, Jesucristorus iyawsapxixa, ukat jan akapachankiripkixa? ¿Kawkiri yupaychäwisa Diosan Apnaqäwipakiwa jaqinakataki mä suyt'äwix sas yatichapxi? Taqi yupaychäwinakatxa, ¿kawkir yupaychäwikisa taqi ukanak phuqhixa?". Jehová Diosan Qhanañchirinakapawa taqi ukanak phuqasipki (Isafas 43:10-12).

¿KUNSA JUMAX LURÄTA?

¹⁵ Diosar kusisiyañatakix janiw juparux aliqaki iyawsañasäkiti. Saxranakas Diosan utjatapa iyawsäpxarakiwa siw Bibliaxa (Santiago 2:19). Ukatxa janiw Diosan munañapxa

13. ¿Kamsapxixa Diosan Apnaqäwipatxa Jesusan chiqa arkirinakapaxa, ukat kunsa lurapxi?

14. Amuyatamatxa, ¿kawkiris chiqa yupaychäwixa?

15. Jupar utjatap yatifiat sipansa, ¿kunsa Diosax mayistu?

lurapkiti, janirakiw Diosampi iyawsatäpkisa. Diosan chuy-maparu purt'añatakixa janiwa jupan utjatapaki yatiñasäkiti, jan ukasti munañap lurañasawa. Ukatxa, k'ari yupaychä-witsti mistxañasawa, chiqa yupaychäwir makatxañataki.

¹⁶ Apóstol Pabloxa janiw k'ari yupaychäwirux sarañati sänwa. Akham qillqäna: "Ukatwa [Jehová] Tatitux sarakixa: 'Mistunxapxam jupanak taypita, jupanakat jithiqtapxarakim. Q'añu lurañanaksti jan lurapxamti, nayasti jumanakarux katuqxapxämawa' " sasa (2 Corintios 6:17; Isaías 52:11). Ukhamaxa, kunanakatä k'ari yupaychäwiru apkistaspa ukanakxa q'alwa chiqa cristianonakaxa apanukxapxi.

¹⁷ Taqi k'ari yupaychäwinakaxa 'Jach'a Babiloniankiripxiwa' siw Bibliaxa (Apocalipsis 17:5).^{*} Uka sutix Babilonia sata nayra markatwa amtayistu, Uma Juicio qhipatxa uka mar-kanwa k'ari yupaychäwixa qalltäna. K'ari yupaychäwin yatichäwinakapasa luräwinakapasa nayraw uka markan uñstäna. Babiloniankirinakaxa, kimsa diosat mayar tukuyasawa yupaychaxiritayna mä diosakikaspas ukhama, ukat jichhürunakanxa k'ari yupaychäwinakan wali uñt'at yatichäwipaxa ukarakiwa, Trinidad satäkis ukwa yatichapxaraki. Ukampis Bibliax qhan yatichi, mä sapa Jehová Diosakiw utji ukat Jesucristox Yuqapaw siwa (Juan 17:3). Babiloniankirinakaxa, jaqix almaniw ukat uka almax jakaskakiw kunapachatä maynix jiwxi ukhaxa ukat infiernon t'aqhisipxi sasaw sapxiritayna. Jichhürunakanxa, jila part yupaychäwinakaw ukham yatichapxi jan jiwir almaniksnasa jan ukax jan jiwir ajayuniksnasa ukat infiernonsa wal t'aqhiskaspa ukhama.

¹⁸ Ukhamaxa, nayra Babilonian k'ari yatichäwinakapawa uraqpachan yatichasi. Ukhamasti, Jach'a Babiloniaya Jehová Diosar kutkatasiri taqi k'ari yupaychäwinakawa, uraq-

^{*} Juk'ampi yatxatañatakixa 219, 220 jananakwa uñxatäta, Jach'a Babiloniaya Jehová Diosar kutkatasiri taqi k'ari yupaychäwinak sañ muni, ukawa ukan qhanañchasiski.

16. ¿Kun lurañasasa jan k'ari yupaychäwinkañasatakixa?

17, 18. ¿Kunas "Jach'a Babiloniaya", kunatsa jank'ak 'mistxañasa'?

pach apnaqiri k'ari yupaychäwi sas uñt'atarakiwa. Ukatxa, uka Babiloniya mä akatjamat chhaqtayatäniw siw Diosaxa (Apocalipsis 18:8). ¿Amuytati kunatsa Jach'a Babiloniat q'al mistxañax wali wakisirixa? Jehová Diosaxa tiempo utjkipa-na jank'aki 'mistxañamwa' muni (Apocalipsis 18:4).

¹⁹ Uka k'ari yupaychäwita mistxañ amtatamatxa inas yaqhipanakax jumat jithiqtapxchini. Ukampisa, markapamp chika Jehová Diosaru yupaychätaxa, jumat jithiqtirinakat sipansa, walja jaqinakaw jumaru jak'achasipxätamxa. Jesusan nayrër arkirinakapjamarakiwa walja jilat kullakanakanixäta, Jesusan arkirinakapaxa taqi kunwa jaytjapxatayna. Chiqasa, Uraqpachan mä jach'a familianixätawa, ukaxa millón millón chiqa cristianonakawa, ukatxa chiqa munasiñampiwa uñjapxätamxa. "Ukampis khä pachanxa wiñay jakañ katuqara[kita]" (Marcos 10:28-30). Ukhamarusa, Bibliat yatiqatamatwa inas jumat jithiqtapxchini, ukampisa tiempompixa kunti Bibliax yatichki ukxa yatiqapxaspawa, ukat Jehová Diosan yupaychirinakapäpxarakispawa.

²⁰ Diosax niyaw aka ñanqhacharux tukjani, uka lantxa Apnaqäwipampi apnaqat mä suma jutirpachwa apanini siw Bibliaxa (2 Pedro 3:9, 13). ¡Ukax kunja sumakikani! Ukanxa mä sapa chiqa yupaychäwikip utjxani. ¿Janiti jichhatpacha Diosan chiqa yupaychirinakapampi tantachasiñamäkaspa?

19. ¿Jehová Diosar yupaychasax kuns katuqäta?

20. ¿Kuna suyt'awis chiqa yupaychäwinkirinakatakix utji?

KUNSA BIBLIAX YATICHI

- Mä sapa chiqa yupaychäwikip utji (Mateo 7: 13, 14).
- Chiqa yupaychäwixa luratanakapata ukat yatichäwinakapatwa uñt'asi (Mateo 7:16, 17).
- Jehová Diosan Qhanañchirinakapaw Diosan iyawsat yupaychäwixa (Isaías 43:10).

Chiqa yupaychäwi tuqit sayt'asiñamawa

¿Kamsis Bibliax santonakatxa?

K'ari yupaychäwinakan
fiestanakaparuxa, ¿kunjamsa
cristianonakax uñjapxi?

Yatiqatanakamatxa,
¿kunjamsa jan chuym ust'ayasa
yaqhanakaru qhanañchasma?

AMUYT'AÑATAKI, phujumaru mä jaqixa jamasat q'añuna-kampi warantaspa, uk yatisaxa, ¿kamachasma? Jan ji-wañatakixa yaqha phujutwa um waytasinxasmaya. Ukam-pisa, jiskt'asiñamawa: “¿Uka q'añu uma umasax usutäpa-chätti?” sasa.

² Niya ukhamjamarakiwa, k'ari yupaychäwinakaxa jan wali yatichäwinakampi, q'añu luräwinakampi phuqanta-täpxiwa siw Bibliaxa (2 Corintios 6:17). Ukatwa wali waki-sirixa uraqpach apnaqiri k'ari yupaychäwi “jach'a Babilo-niata” mistxañaxa (Apocalipsis 18:2, 4). ¿Jumax mistxtati? Ukhamächixa, walik mistxtaxa. Jichhaxa, janiw k'ari yu-paychäwi jaytañakikiti, janirakiw uka yupaychäwit sarxäw sañakikisa. Jan ukasti akham jiskt'asiñamawa: “Uka k'ari yupaychäwin luräwinakapaxa jan ukax yatichäwinakapasa, ¿jakäwijan utjaskapachati?” sasa. Uka tuqit mä qhawqha uñacht'äwinak uñjani.

1, 2. K'ari yupaychäwiru jaytxasaxa, ¿kun jiskt'asiñamasa ukat ku-natsa wakisipa uk jiskt'asiñaxa?



SANTONAKARU, JIWATANAKARU YUPAYCHAÑA

³ Santonaka jan ukax lurat diosanakwa yaqhipanakaxa utanakaparu nayratpach uchasipxi. ¿Juman utjaraktamti? Utjstamxa, inas jumatakix ukanakampipuni Diosar mayisiñjamächi, ukat inas wali munatächi. Ukampisa, kunjamsa Diosar yupaychañasa ukxa jupa pachpaw sañapa. Ukhamasti, Diosax janiw munkiti kuna kasta diosanaka apnaqañassa siw Bibliaxa (Éxodo 20:4, 5; Salmo 115:4-8; Isaías 42:8; 1 Juan 5:21). Ukatwa, *chiqa* yupaychäwiru makatañatakixa, t'unjxañamawa taqi kunanakati *k'ari* yupaychäwiniki ukanakxa. Jehová Diosaruxa “axtasiyiwa” ukanakaxa, ukhamarakiw jumax uñjañama (Deuteronomio 27:15).

⁴ Yaqhip *k'ari* yupaychäwinakanxa jiwatanakaruwa jach'añchapxaraki. Janir Bibliat *chiqa* yatiqkasaxa yaqhipax

3. 1) ¿Bibliax santonak tuqitxa kamsisa, ukat yaqhipanakatakix kunatsa santonak jaytañax ch'amäpacha? 2) K'ari yupaychäwin apnaqapki ukanakax utjstamxa, ¿kamachañamasa?

4. 1) ¿Kunatsa inamayakipacha jiwatanakaru yupaychañaxa? 2) Israel markarux Jehová Diosax janiw kuna kasta layqasiñanaksa lurapxätati sänwa, ¿kunatsa ukham sispachänxa?

akhamwa amuyapxäna: jiwatanakaxa nayra jiwatanakamp chikasa jakasipkaspa, jakaskirinakarux yanapt' ankistaspasa jan ukax ñanqhachkistaspasa ukhama. Inas jumax jiwatanakaru sumachañataki ch'amachasirista. Ukampisa, kunjamtĩ 6 jaljan yatiqaniwayktanxa, jiwatanakax janiw kawkins jakapkiti. Ukatwa, jiwatanakampi parlañ munañaxa inamayaspaxa. Kuna aruti jiwat familiaramatjama ist'asini-xa, janiw uka jiwat familiaraman arupäkiti, jan ukasti sax-ranakan arupawa. Ukatwa, Jehová Diosax Israel markaruxa iwxatayna, jan jiwatanakampi parlañ yanapxañapataki, jan kuna kasta layqasiñanaksa lurapxañapataki (Deuteronomio 18:10-12).

⁵ Kawkĩri yupaychäwirutix jumax saraskayäta ukanxa santonakaru, jiwatanakaru yupaychapxchixa, ¿kamachas-masa? Uka tuqit Diosax kamsisa uka arunakapwa Bibliat sum liyt'añama. Jehová Diosarux sapürupuniw mayisiñama; chiqa yupaychäwinkañwa munta, jumjam amuyañwa munta sañamarakiwa (Isaías 55:9).

NAYRA CRISTIANONAKAXA JANIW NAVIDAD AMTAPXIRİKÄNTI

⁶ Jiwasanakati uñt'at fiestanaka amtaskakiñänixa k'ari yupaychäwinakampiwa yupaychäwisaru q'añuchsna. Navidadat parl'tañäni. Jesucriston yurit urupaw amtasi sapxiwa, niya taqpach cristianopxtwa siri yupaychäwinakawa Navidad amtapxi. Ukampisa, janiw kuna qillqatasa utjkiti Jesusan nayrĩr arkirinakapaxa yuriwip amtapxirĩnti uka tuqitxa. *Los orígenes sagrados de las cosas profundas* sat libroxa siwa: "Criston yuriwipata pä patak maranak saraqataruxa, janiw khitis yatkänti, ni yäqapkarakĩnsa kunapachasa chiqpachapuni Jesusax yuritayna ukxa".

5. Santonakaru jan ukax jiwatanakaru yupaychiristaxa, ¿kamachañamasas?

6, 7. 1) ¿Navidadanxa khitiruw uruyasi sapxisa, ukat Jesusan arkirinakapax amtapxirĩnti? 2) ¿Nayra patak maranakanxa uruyasiñat kam-sapxirĩnsa?

⁷ Arkirinakapaxa Jesusan yuriw urupata yatkasinsa, janiw amtapkasapänti. ¿Kunatsa? Kunattix nayrír cristiano-nakatakixa “uka fiestanakaxa [...] Diosar jan yupaychiri jaqinakan luräwinakapänwa” (*Las cosas nuestras de cada día*). Biblianxa, Jehová Diosar jan yupaychiri pä apnaqirinakan uruyäwitakwa qillqataxa (Génesis 40:20; Marcos 6:21). K’ari diosanakarurakiwa ukham uruyapxirina. Sañäni, Roma markan utjasirinakaxa mayo phaxsit 24 urunak saraqataruw Diana sat diosaparuxa uruyapxirina, ukat qhipürusti Intin Apolo diosaparurakiw uruyapxirina. Ukhamasti, chiqa cristiano-nakax mara uruyasiñxa janiw amtapkänti, kunattix k’ari diosanakar yupaychañänwa.

⁸ Nayrir cristiano-nakaxa Jesusan yuriw urupxa, ak yatisarakiw jan amtapxiríkpachänti: nayra Greciankirinaka, Romankirinakawa uka mara uruyasiñanakxa yaqha amuyumpi amtapxirina. Akham sapxirínwa, sapa jaqixa jark’ir ajayuniwa, uka jaqi yurki uka uruwa uka ajayux ukankirina ukat jakäwipansa uñjarakínwa, sasa. Uka ajayusti mä diosampi mayachatänwa, uka diosaxa mara phuqir jaqin urupanwa mara phuqarakina siw mä libroxaxa (*The Lore of Birthdays*). Ukham uruyasiñanakaxa janipuniw Jehová Diosata-kix walikaspasi (Isaías 65:11, 12). Ukhamasti, ¿kunatsa walja jaqinakaxa Navidad amtapxpacha?

NAVIDADAN QALLTAPA

⁹ Jesusax aka Uraqiru jutkäna uka maranakatxa walja maranakaw pasxatayna, ukhaw diciembre phaxsit 25 urunak saraqat uru ajllipxatayna Jesusan yuriwipa amtañatakixa. Ukampisa Jesusax *janiw* diciembre phaxsinxa *yurkänti*.^{*} Ukhamasti, ¿kunatsa uka uru ajllipxpachänxa?

^{*} Uñxatarakismawa 221, 222 jananaka.

8. Kunatsa mara phuqäwip amtapxiríkpachäna uka tuqit arst’ma.

9. Diciembre phaxsit 25 urunak saraqataruxa, ¿kunatsa Jesusan yuriwipa amtañataki ajllipxatayna?

Cristianopxtwa sirinakaxa inas munapxchîna “uka markanakan fiestanakapa, cristiano fiestanakaru tukuyaña. [...] Diciembre phaxsit 25 urunak saraqataruxa, Diosar jan yupaychir Roma markankirinakaxa [...] ‘jach’a ch’aman Intin’ mistsunîwipwa uruyapxirîna” (*Enciclopedia de la Religión Católica*). Khaysa, Europa, inti jals tuqi markanakanxa, thaya pachanxa, kunapachati Intis jayankxi ukapachaxa, uka markan utjasirinakaxa Intiruw uruyapxirîna sarâwipat kutt’anxañapataki, ukhamat wasitat sum lupt’anxañapataki, junt’utatayanxañapataki. Diciembre phaxsit 25 urunak saraqatarusa Intis kutt’anxaspa ukhamwa amuyapxâna. Uka jaqinakaru cristianoptyañatakiwa uka fiestanakxa “cristianonakankaspasa” ukham tukuyapxatayna uka k’ari cristianonakan irpirinakapaxa.*

¹⁰ Navidadaxa Diosar jan yupaychirinakan fiestapawa ukax jaya maranakatpachwa yatisxi. Uka uruchâwixa janixay Bibliankchitixa, ukatwa 1600 maranakanxa Inglaterra markansa, Estados Unidos jach’a markan markanakapansa jark’a-tânxa. Navidad urun jan irnaqañ munirinakaxa multa apsutapxânwa. Uka qhipatwa, wasitata uka nayra costumbrenakaxa amtasxarakîna, ukat yaqha fiestanakampwa uñstayxapxarakîna. Navidadasti jach’a fiestjama uñjatâxarakiwa, ukat yaqha markana-

*¿Axtkañ q’añu
ñiq’i taypit dulce
aptasisin
ch’amuntasmati?*

* Diciembre phaxsit 25 urunak saraqat urxa ajllipxarakînwâ fiestanak utjatapata. Uka phaxsinxa 17 urut 24 urukamawa yapunakan diosaparux romanonakax uruyapxirîna. Uka fiestanwa manq’âwinakasa, umañanakasa, waxt’asiñanakasa utjirîna.

10. ¿Kunatsa nayrax yaqhip jaqinakaxa Navidadxa jan amtapxirikâna?



kansa ukhamarakiwa. Ukampisa Diosar kusisiyasa sarnaqañ munirinakaxa amuyasipxiwa, uka fiestanakaxa k'ari yupaychäwita jutatapa, ukatwa jan amtapkiti, ni ukham uñstayat yaqha fiestanaksa uruyapkarakiti.*

¿CHIQPACHANSA QALLTAPAT YATIÑAX WAKISITI?

¹¹ Navidadasa ukat yaqha fiestanakasa janiw chiqap cristianonakan uñstayatakiti, ukxa yaqhipanakax yatisipkiwa, ukampisa jupanakax walikiskaspasa ukhamwa amuyapxi. Jupanakax akham sapxiwa: janiw khitis k'ari yupaychäwin uñstayatjam uñjxiti, ukampisa familiampiw uka urux sum qamart'astanxa sasa. ¿Jumax ukhamarakti amuyta? Ukhamasti chiqa yupaychäwiru makatañxa familiamar munasiñawa jark'tamxa, janiw k'ari yupaychäwiru munasiñakiti. Ukatxa ak yatiñamarakiwa, familia Inuqiri, Jehová Diosaxa, familiamampi kusisita sarnaqasiñamwa munaraki (Efesios 3:14, 15, MT). Yaqha tuqinakatwa familiasaru kusisiysna, ukat Diosan chuymaparusa kusisiyaraksnawa. Apóstol Pablowa kunas wali wakisirix jiwasanakatakixa uk akham sas arsutayna: "Kun[a]tix Diosatakix askiki uk [...] munapxapunim" sasa (Efesios 5:10).

¹² Inas jumax akham amuyaraksta, uka fiestanakax janiw nayra amtampix uruyasxiti sasa. ¿Chiqpachansa qalltap yatiñaxa wakisiti? Wakisiwa. Saññani, mä dulce axtkañ q'añu ñiq'in jaquntat uñjasma. ¿Aptasisin ch'amuntasmati? Janiwa; axtkañ q'añüchixaya. Uka dulcer uñtasita fiestanakaw utji, amuyataxa sumjamaspawa, ukampisa axtkañ q'añutwa uka fiestanakax juti. Chiqa yupaychäwiru makatañ munasaxa, Isaías profetjamawa amuyañasa.

* 222, 223, jananakanwa qhanañchasi kunjamsa chiqap cristiano-nakaxa yaqha fiestanak uñjapxi uka tuqitxa.

11. Kunatsa yaqhip jaqinakaxa fiestanakxa amtapxi, ukat jiwasanakatakixa kunas wali wakisirixa uka tuqit arst'ma.

12. Q'añu tuqit jutiri costumbrenaka fiestanaka apanukuñatakixa, ¿kuna amuyt'äwisa sum uñacht'ayistaspa?

Taqi chuyma Diosar yupaychirinakaruxa sänwa: “Jan kuna q’añurus llamkt’apxamti” sasa (Isafas 52:11).

SUMA ARUNAKAMPIWA YATIQTATANAKAMATA PARLT’AÑAMA

¹³ Inas uka costumbrenak jaytañax ch’amächini. Sañäni: irnaqir masinakamaxa, kunatsa uka fiestanakar jan sarkta sapxiristam ukhaxa, ¿kamachasma? ¿Navidad fiestan mä waxt’a churiristamsti? ¿Katuqañax waliskaspati? ¿Kamachasma chachamasa jan ukax warmimasa jan Bibliat jumjam yatkaspa ukhaxa? Uka fiestanakan yaqha wawanakaxa churäwinak katuqapxi, ¿wawanakamaxa uk jan uñch’ukipxañapatakixa kuns lurasma?

¹⁴ Ukhamanakan uñjasisaxa sum amuyt’asawa kuns säta kuns lurärakita. Amuyt’añataki, maynitix ¡feliz navidad! ¡Suma machaq maräpana! siristamxa, yuspärañamakiwa. Sapa kutiti jikisipxätaxa, inas irnaqir masimächisa, wakisispawa juk’ampi qhanañcht’aña. Suma arunakampiw qhanañchañama. Bibliaxa akhamwa iwxi: “Parlatanakamasti sumañapapuniwa jan khitirus coler churirjama, sapa mayniru kunjam aruxxataña yatipxañamarakiwa” sasa (Colosenses 4:6). Ukhamasti, chuymar jan usuyir arunakampiw qhanañchañama kunjamsa uka costumbre tuqinakatxa amuyxta ukanaka. Waliskiw waxt’asiñasa, qamart’asiñasa, ukampisa yaqhüruw walispa, sasaw qhanañchañama.

¹⁵ ¿Maynitix uka fiestanakan waxt’aña muniristamsti? ¿Kamachasma? Inas akham sapxiristma: “Nayasti, jumman aka fiesta jan fiestachiritamxa yattwa, ukatpï aka waxt’a apanirapsmaxa” sasa. Inas jumatakixa uka waxt’a katuqañaxa waliskchispa, ukaxa janiw fiestar sarañ sañ muniki. Ukampisa Bibliat yatiqatama jan yatkchixa, uka fiesta jan uruchxatamatxa wakisispawa yatiyañama. Ukawa sum

13. ¿Kunatsa ch’amäspaxa fiestanak jaytxañaxa?

14, 15. ¿Kamachasma maynitix ¡feliz navidad! ¡Suma machaq maräpana! siristam ukhaxa, jan ukax kuns churiristam ukhaxa?

qhanañhaspa kunatsa jumax waxt'a katuqasisaxa jan yaqha kutt'ayktaxa. Mä tuqitxa, inas khitis yant'añatakiki waxt'a apanirapiristam akham sasa: waxt'a mayisiñ laykuxa, Bibliat yatiqatanakapsa p'akintaspawa sasa. Ukham jaqinakat katuqañax janipuniw walikaspati.

FAMILIARANAKAMARUX KAMSASMASA

¹⁶ ¿Familiaranakamaxa Biblian yatichäwinakaparjam jan sarnaqapkchixa kamachasma? Wasitata, suma aruna-kampiwa parl'tañama, janiw chuym usuyañamäkiti. Janiw wakiskiti sapa costumbrenakapata jiskhisiskañaxa. Arsüwiparuxa respetañamawa, kunjamt'i jumax yatiqatanakamaru respetatän munktaxa ukhama (Mateo 7:12). Ukampisa, amuyasiñamawa janiw kunjamatsa uka fiestanakaru yanapt'añamäkiti. Maysa tuqitxa, amuyasiñamarakiwa, uka fiestar jan yanapt'irjamäkchi uka lurañanakxa luraskarakismawa. Kunjamti yatktanxa, chuymamax sumäskañapatakipuniw sarnaqañamaxa (1 Timoteo 1:18, 19).

¹⁷ Fiestanakan yaqha wawanakaxa churäwinak katuqapxi, ¿wawanakamaxa uk jan uñch'ukipxañapatakixa kuns lurasma? Yaqhip awkinakaxa yaqha urunakawa wawanakaparuxa kunanaks churapxi. Ukhamatwa wawanakamaxa yaqha wawanakaru jan uñch'ukipkaniti. ¿Wawanakamataki wali suma churäwixa kunäspasa? Jupanakampiñataki tiempo apst'asiña, munasiñ uñacht'ayaña, ukanakawa.

CHIQA YUPAYCHÄWINKAÑÄNI

¹⁸ Diosar kusisiyañatakixa, k'ari yupaychäwitxa mistxañamawa, chiqa yupaychäwuruwa makatxañama. ¿Kunjam-sa uk lurasma? Bibliax siwa: "Uñjasipxarakiñäni purapata

16. Fiesta tuqinakatxa, ¿familiaranakamaru jan chuyma usuyañatakixa kamachañamasa?

17. ¿Kuns lurasma wawanakamaxa fiestanakan yaqha wawanakaru jan uñch'ukipxañapatakixa?

18. ¿Kunjamsa cristianonakan tantachäwinakapaxa yanapt'aspa chiqa yupaychäwuru makatañaxa?

wiytasiñasataki munasiñaru aski lurawinakampiru; tanta-chasiwisxa jan jaytanukusa, kamisati yaqhipanakax ukaru yatitäpxi, ukatsipana purapat ch'amañcht'asisa, ukat juk'ampi, khä uru jak'achasisinkiri uñjasina" sasa (Hebreos 10:24, 25, MT). Diosax kunjamtı munki ukhamaruwa uka tantachäwinakanxa yupaychaxpi, kusiskañ tantachäwinakawa (Salmo 22:22; 122:1). Chiqa chuymampi Jesusar arkirinakaxa, uka tantachäwinakanxa 'maynit maynikamaw yanapt'asipxi' (Romanos 1:12).

¹⁹ Chiqa yupaychäwi tuqitxa sayt'asirakismawa: Jehová Diosan Qhanañchirinakapampi kuntı Bibliat yatiqaskta uka tuqit yaqhanakaru parlasa. Chiqasa, walja jaqinakawa "llakt'atäsipki" akapachan jan wali luräwinaka uñjasinxa (Ezequiel 9:4). Inas jumax ukham jaqinaka uñt'sta. Bibliax kuntı jutirpachataki siski uka tuqinakat yatiyma. Jan armasimti Bibliat yatiqkta uka yatichäwinakata yatichañxa, janirak armasimti chiqap cristianonakampi tantachasiñsa. Ukhamti lurätaxa, sapürutjamwa k'ari yupaychäwin costumbrenakapa armxätaxa. Jan payachasimti: chiqa yupaychäwiruti makatätaxa, wali kusisitaw sarnaqasita, walja bendicionanarakwa katuqäta (Malaquías 3:10).

19. ¿Kunatsa wakisix Bibliat yatiqatanakam yatiyañamaxa?

KUNSA BIBLIAX YATICHI

- Chiqa yupaychäwinxa janiw santónakarusajiwatanakarusayupaychapkiti (Éxodo 20:4, 5; Deuteronomio 18:10-12).
- Diosar jan yupaychir jaqinakana uñstayat fiestanakaxa Diosatakix janiw walikiti (Efesios 5:10).
- Suma arunakampi, sum amuyt'asawacristianonakaxayatiqatanakapatxa yaqhanakaruxqhanañchañapa (Colosenses 4:6).



*Chiqa yupaychäwiruti
makatätaxa, wali kusicitaw
jakasita*

Diosar mayisisaw Jupar jak'achastanxa

¿Kunatsa Diosat mayisiñasa?

¿Diosampi ist'atāñatakixa kun lurañamasa?

¿Kunjamsa Diosax mayisitanakasarux jaysi?

ALAXPACHANAKAT sipansa aka Uraqixa wali jisk'akiwa. Ukhamasti, “alaxpach akapach [uraqi] Lurir” Jehová Diosatakixa, yuruna mä uma ch'aqäkaspara ukhamaw markanakaxa (Salmo 115:15; Isafas 40:15). Ukampisa, “[Jehová] Tatitux art'asirinakapan jak'apankaskiwa, taqpach chuy-mamp jupat art'asirinakan jak'apankiwa. Jupar arkirinakan munataparjamaw phuqhi, arnaqasitanakap ist'i, qhispiyaraki” siw Bibliaxa (Salmo 145:18, 19). Aka arunakaxa kamsañsa munpacha uka tuqit amuyt'ma. Taqi ch'aman Inuqirixa jak'asankiwa, 'taqpach chuymampitix art'asiñanixa' ist'istaniwa. ¡Wali jach'a churäwiwa taqi ch'aman Diosar jak'achasiñaxa!

² Ukhamasti, Jehová Diosampi ist'atāñ munasaxa, munañaparjamawa mayisiñasa. Ukampisa, Bibliana mayisiwi tuqita qillqatäki uk jan yatisaxa, ¿kunjamsa Diosat mayisipxsna? Wali wakisiriw uka tuqit yatiñaxa, kunattix mayisisawa Jehová Diosar jak'achastanxa.

¿KUNATSA JEHOVÁ DIOSARUX MAYISIÑASA?

³ Jehová Diosaw mayisipxita sistuxa ukatwa juparu ma-

1, 2. ¿Kunatsa Diosat mayisiñaxa jach'a churäwjama unjañasaxa, ukatxa Bibliax yatichki uka mayisiwit kunatsa yatxatañax wakisi?

3. Kunatsa Jehová Diosarux mayisiñasa uka tuqit arst'ma.

*"Alaxpach akapach
[uraqi] Lurir" Diosax
mayisitanakas
ist'añwa muni*



yisipxañasaxa. Arupanxa akham siwa: "Jan jumanakax kunats llakisipxamti, taqi kunsax Diosar sapxam oracionana, mayipxam yuspagarapxarakim. Diosax jumanakarux churapxarakitamwa samarañapa, ukasti taqi kuntix jaqix amuyt'kaspas ukat juk'amp jach'awa. Uka samarañasti jumanakan chuymanakamsa, amuyunakamsa imaniwa Cristomp mayakipxatam layku" (Filipenses 4:6, 7). Jisa, taqi kunxaru Munañan jach'a Diosan aruparuxa janipī janiw sisksnatixa.

⁴ ¿Kunatsa Diosatxa mayisiñasarakī? Mayisiskakipuniñā-nixa juk'ampiw Jehová Diosaruxa jak'achasiñāni jupampi sum sarnaqasiñatakixa. Wali munata masinakaxa, janiw llakinkkasaki parlasipkiti, jan ukasti kunapachasa parlasipxapuniwa, kunjamasipkisa ukanak yatiñataki. Amuyt'ana-kapata, llakinakapata, sum parlt'asisaw juk'ampī jak'achasipxarakī. Niya ukhamjamarakiw Jehová Diosampi jiwasa-nakampixa. Aka libron yanapt'apampiwa, yatxatawayxta kunti Bibliax Jehová Diosata yatichki, kunjam Diosasa ukat kuna amtanisa ukxa. Jumax Diosar sum uñt'xtaxa.

4. Jehová Diosarupuniti mayisiñānixa juk'ampiw jupar jak'achasiñāni, ¿kunatsa ukhamaw sasmāx?

Ukhamasti, alaxpachankir Awkimaru mayisita ukhawa chuymamatpacha lup'iwinakama ukat kunjamsa jikxatas-ta ukanak sāta. Ukhamatwa juparux juk'ampi jak'achasita (Santiago 4:8).

¿KUNANAK PHUQAÑASASA?

⁵ ¿Jehová Diosax taqi mayisitanakti ist'pacha? Yatiñata-kixa, Isaías profetan urunakapanxa kamsataynasa kutkata-sir israelitanakarux uk uñxatañäni. Akham sänwa: "Oracio-nanaka walja lurasipkäta ukapachax, janiw nayax ist'apkä-mati. Amparanakamax wilararkamakiwa" sasa (Isaías 1:15). Ukhamasti, janiti Diosatakjama sarnaqkañänixa, jupax ja-niw mayisiwinakasaruxa ist'kistaniti. Ukatwa, Diosampi is-t'atäñatakixa, mä qhawqha mayitanakaru phuqañasawa.

⁶ Mayasti akawa, iyawsäwiniñasawa (Marcos 11:24). "Ja-niw Diosarux jan iyawsañampix kunapachas kusisiyksna-ti, jupar jak'achasiñatakixa maynix iyawsañapawa Diosax utjatapa, ukhamaraki jupar thaqirinakarux bendeciritapa" sasaw Pablox qillqatayna (Hebreos 11:6). Ukampisa, chiq-pach iyawsäwiniñatakixa, janiw Diosax utjiw sañakikiti, ni ist'istaniwa, mayisitanakasarusa jaysistaniwa sañakikaraki-sa. Iyawsäwixa suma luräwinakampiwa uñacht'ayasi. Iyaw-säwinitasaxa sarnaqäwisanwa qhanäñapa (Santiago 2:26).

⁷ Yaqhax akarakiwa: Jehová Diosarux alt'at chuymampi, taqi chuymampi mayisiñasawa. Kunatsa Diosaru alt'a-ta chuymampipuni mayisiñasa uks yatxaraktanwa. Kuna-pachatä presidentempi parlapxi ukhaxa wali respetompiw parlapxi, kunattix yatipxiw marka apnaqiritapa. Chiqasa,

5. Jehová Diosax janiw taqinin mayisiwiparuxa ist'kiti, ¿kunjamatsa uk yattanxa?

6. Diosax mayisiwinakasarux ist'añapatakixa, ¿kunas wakisi, ukat kunjamatsa ukxa uñacht'aysna?

7. 1) ¿Kunatsa Jehová Diosaru respetompi jak'achasiñasaxa? 2) ¿Kun-jamatsa alt'at chuymampi, taqi chuymampi mayisitasxa uñach-t'aysna?

Jehová Diosampi parlañatakixa, juk'amp respetompiwa jak'achasiñasa (Salmo 138:6). Kunattixa, jupaw "Taqi ch'amani Diosaxa" (Génesis 17:1). Kunjamti Diosaru mayiskañäni ukampiwa jaqikitasxa alt'ata chuymampi uñacht'ayañäni. Ukham alt'at chuymañisawa, taqi chuyma Diosarux mayisiñäni, janiw inamay arunak arsusati, ni pachpa arunak kutin kutin arsusasa (Mateo 6:7, 8).

⁸ Yaqhasti akarakiwa: Diosampi ist'ayasiñatakixa mayitanakasarjama sarnaqañasarakiwa. Amuyt'añataki, Jehová Diosarutix "sapürutak manq'añ churanipxita" sasa mayisiñänixa, kuna irnaqäwinsa waliskani ukhaxa irnaqt'askakiñasawa (Mateo 6:11; 2 Tesalonicenses 3:10). Ukhamarakiwa, juchanakar jan puriñataki mayisisaxa, janiw juchar purirjam sarnaqañasäkiti (Colosenses 3:5). Ukampisa Diosar mayisiñataki mayitanaka yatxasaxa, wakisiwa Diosar jak'achasiñxata mä qhawqha jiskt'anakata yatiña.

DIOSAR JAK'ACHASIÑ TUQIT JISK'T'ANAKA

⁹ ¿*Khitirus mayisiñasaxa?* Jesusaxa arkirinakaparuxa akham sasaw mayisiñ yatichäna: 'Alaxpachankir nanakan Awkija' (Mateo 6:9). Ukhamasti Jehová Dios saparukiwa mayisiñasaxa. Ukampisa, Jesucriston sutipxaru mayisiñasawa Diosax muni. ¿Kunatsa? Kunjamti 5 jalan uñjaniwayktanxa, Jehová Diosax Jesusaruw aka Uraqir khitanitayna ju-champit jiwañampit qhispiyañataki (Juan 3:16; Romanos 5:12). Ukhamaraki, Jilir Sacerdotjama ukat Taripirjama utt'ayi (Juan 5:22; Hebreos 6:20). Ukatwa Qillqatanakaxa Jesusan sutipxaru mayisipxam sistuxa. "Nayätwa thakixa, chiqasa, jakañasa. Naya tuqikiw Awkin ukar puriñax utji" sasaw Jesusax sarakina (Juan 14:6). Mayisitanakasa ist'atäñapatakixa, Jehová *Diosarukiwa* mayisiñasa Yuqapan *sutipxaru*.

8. ¿Kunjamsa mayisitanakasarjamax sarnaqsna?

9. ¿Khitirus mayisiñasa, ukat khitin sutipxarusa?

¹⁰ ¿Diosar killpt'atapunit mayisiñasa? Janiwa. Kunaymanitwa Diosarux respetompi mayisna, ukwa Bibliax yatichi. Sañäni, maynix utt'atasa jan ukax qunt'atasa, alt'atasa mayisispawa, killpt'atasa, sayt'atasa mayisirakispawa (1 Reyes 8:22; Nehemías 8:6; Daniel 6:10). Janiw jaqimpi uñjasyañataki mayisiñasäkiti, jan ukasti kunjam chuymampisa mayistan ukaw wali wakisirixa. Chuyma manqhasansa, kawkjansa mayisiskaksnawa, kuna luräwinakansa irnaqäs-kañäni, jan walt'äwisa utjani ukhasa Diosat mayisiskaksnawa. Inasa mayisitasxa jaqinakax jan amuyapchiniti, ukampisa Jehová Diosax ist'askistuwa (Nehemías 2:1-6).

¹¹ ¿Kuna tuqinakatsa Diosat mayisipxsna? Bibliax akham siwa: "Kuntix Diosarux mayiñäni munañaparjama ukxa [Jehová Diosax] ist'istuwa" sasa (1 Juan 5:14). Ukhamasiti munañaparjamaxa kuna tuqitsa mayisiskaksnawa. Sañäni, ¿Diosax llakinakasata yatiñ mupachati? Jisa. Mä wali munat masimpi parlastanxa ukhamwa Diosampi parlañasaxa. 'Chuymanakasxa juparuw jist'arsna', mä arunxa, kunati chuymasanki ukxa jan imt'asaw jupar yatiysna (Salmo 62:8). Ukhamaraki Diosarux mayiraksnawa qullan ajayupan yanapt'äwipa suma luräwinak lurañataki (Lucas 11:13). Ukhamarusa, suma amtäwinak amtañataki yanapsa mayiraksnawa, jan walt'äwinakar saykatañatakisa ch'amsa mayiraksnawa (Santiago 1:5). Juchachastan ukhaxa, Criston luqtasiwipxaru pampachäwi mayisiñasawa (Efesios 1:3, 7). Ukampisa janiw jiwasatakiki mayisiñasäkiti, jan ukasiti yaqhanakatakis mayiñasarakiwa, familiaranakasatakisa cristiano jilat kullanakasatakisa (Hechos 12:5; Colosenses 4:12).

¹² Mayisiwinakasanxa Jehová Diosan amtanakap phuqa-

10. ¿Kunjamsa Diosar mayisna?

11. ¿Kuna tuqinakatsa Diosar mayisna?

12. ¿Alaxpach Awkisan amtanakap phuqasiñapatakixa kunjam mayisiñasasa?

siñapatakiwa mayiñasa, ukaw juk'ampi wakisirixa. Ukhamasti taqi kunatwa jach'añchañasa, ukham wali suma Diosätapatwa taqi chuyma yuspärañasaraki (1 Crónicas 29: 10-13). Mateo 6:9-13 qillqatanwa Jesusax yatichawaykäna uka mayisiwix jikxatasi. Ukansti Diosan sutip jach'añchapxam sasaw yatichäna, mä arunxa, qullanjama uñjatäñapawa uka sutixa. Ukxaruxa munañamampisti apnaqapxita, mä arunxa, Apnaqäwimax jutpan sasarakiw mayisiñ yatichi, ukatxa, alaxpachanjam munañamax aka Uraqi luraspan sarakinwa. Amuyt'añäni, Jesusax mayisiwipanxa nayraqatxa wali wakiskirinakwa arst'äna, ukxaruwa jupatak mayisirakina. Jiwasanakati ukham Diosan amtanakap phuqasiñapataki nayraqat mayisiñänixa, uñacht'ayañäniwa, jan jiwäs sapatak amtasitasa.

¹³ *¿Qhawqha tiemposa Diosat mayisiñasa?* Sapakisa jan ukax yaqhanakamp chikasa, janiw qhawqha tiempüñapaw siskiti Biblianxa. Janira manq'askasin juk'a tiempok mayistan ukhamas walikiwa, jan ukaxa, sapaki Jehová Diosaru chuym jist'arasin wali jaya mayistan ukas walikirakiwa (1 Samuel 1:12, 15). Ukampisa, k'ari chuymän jaqinakaruxa Jesusax juchañchänwa, kunattix jupanakaxa wali jaya mayisiripxänwa jaqinakan uñjatäñataki (Lucas 20:46, 47). Ukham mayisiwixa Jehová Diosatakix janiw walikiti. Taqi chuyma mayisiñawa wali wakisirixa. Ukhamasti kunjamayay uñjaschita kunanak mayisiñaxay wakischini ukarjamaw Diosar mayisitaxa.

¹⁴ *¿Qhawqha kutisa mayisiñasa?* Bibliax akham sistuwa: "Janirak Diosat oracionan mayisiñxa armasipxamti", "jan inakt'as orapxam" ukatxa 'uruy aruma oracionxa lurapxarakim' sasa (Romanos 12:12; 1 Tesalonicenses 5:17;

13. ¿Qhawqha tiemposa Diosat mayisiñasa uka tuqitxa kamsis Qillqatanakaxa?

14. ¿Kamsañsa muni "jan inakt'as orapxam" siski uka arunakaxa, ukat kunatsa wali askipunix jiwasanakatakixa?

1 Timoteo 5:5). Ukax janiw sañ munkiti jurnälpacha, paqarpacha mayisiña. Jan ukasti, sapüru Jehová Diosaru munasiñapat yuspäraña sañ muni, yanapt'apa, chuymacht'ä-wipa, ch'amapa mayiña sañwa munaraki. ¡Ukaxa wali askipuniw jiwasanakatakixa! Qhawqha kutisa, qhawqha tiempasa mayisisksnawa, Jehová Diosatakixa walikiwa. Jiwasanakati wali suma churäwjam mayisiñar uñjañänixa alaxpach Awkisarux kunapachasa jak'achasiskakiñäniwa.

¹⁵ ¿Kunatsa mayisiw tukuyataruxa “amén” sañäpacha? Uka arusti “ukhamäpan” sañ muni. Wali wakisiriw “ukhamäpan” sasa mayisiwinaka tukuyañaxa, sasaw Bibliax yatichi, sapaki mayisiwinsa jan ukax waljanitak mayisiwinsa (1 Crónicas 16:36; Salmo 41:13). Kunapachati sapak mayisin “ukhamäpan” sasa tukuyxta ukapachaxa, chuymatpach arunakampi satamwa uñacht'aytaxa. Kunapachatix tantachäwinakan “ukhamäpan” sas tukt'ayxtanxa (jisk'ataksa jan ukax jach'atsa), ukampixa, ukhamaw sataswa uñacht'ayaraktanxa (1 Corintios 14:16).

¿KUNJAMSA DIOSAX MAYISITANAKASARUX JAYSI?

¹⁶ ¿Jehová Diosax chiqpachapuniti mayisitanakasaruw jayspacha? Jisa. Jiwasarusa, millón millón jaqinakarusa 'mayisitanak Ist'irixa' ist'istaniwa sas atinisiñasawa (Salmo 65:2). Ukatxa kunayman tuqinakatwa jaysistaspa.

¹⁷ Sañäni, Jehová Diosaxa angelanakapampiwa yanapt'ayistaspa, ukatxa jupar yupaychiri jaqinakampiwa yanapt'ayarakistaspa, ukhamanakatwa mayisitanakasaruw jaysaspa (Hebreos 1:13, 14). Walja jaqinakawa Bibliat yatxatañatakixa Diosat mayisipxatayna, uka qhipatxa chiqapuniw Jehová Diosan mä yupaychiripax yatiyir saratayna. Ukasti

15. Tantachäwinakansa sapakisa, ¿kunatsa mayisiw tukuyasax “ukhamäpan” sañasaxa?

16. ¿Diosat mayistan ukhaxa kunatsa atinissna?


17. Diosaxa angelanakapampiwa yanapt'ayistaspa, ukhamaraki jupar yupaychiri jaqinakampiwan yanapt'ayistaspa, ¿kunatsa ukham sisna?

uñacht'ayiwa kunjamsa angelanakax p'iq't'asipki Diosan Apnaqäwipata yatiyañatakixa (Apocalipsis 14:6). Maysa tuqitxa, kunapachatix jan walt'äwinkkañäni ukapachaxa, mayni jilatasaru jan ukax kullakasaru chuyma unxtayasa-wa yanapt'ayistaspa ukhamatwa Jehová Diosax mayisitasarux jaysaspa (Proverbios 12:25; Santiago 2:16).

¹⁸ Jehová Diosax qullan ajayupampi, Bibliankir Arupampiw jaysistaspa mayisitanakasaruxa. Kunapachatĩ kuna jan

18. ¿Kunjamatsa Jehová Diosaxa qullan ajayupampi Qillqatanakapampixa yupaychirinakapan mayisitanakaparux ist'aspa?

Kawkinkaskañänisa, Diosax mayisitanakasaruxa ist'iwa



*Jehová Diosax mä jilatasarusa
kullakasarusa chuymapa
unxtayasawa yanapt'ayistaspa
ukhamatwa Diosax
mayisitasarux jaysaspa*

walt'äwinkkasın mayisi-
ñäni ukapachaxa, jupaw
qullan ajayupampi yana-
pistaspa uka jan walt'ä-
wit mistuñatakixa, ukha-
marakiw ch'amañchis-
taspaxa (2 Corintios 4:7).
Ukatxa, kunapachatı su-
ma amtanakar puriñatakis mayisiñäni ukapachaxa, jupax
Qullan Qillqatanakapampirakiwa jaysistaspa. Inas Bibliata
sapak yatxatasaxa yanapt'asiri qillqatanaksa jikxatsna, jan
ukaxa, aka librijama qillqatanaka liyisasa wali wakisir yati-
chäwinak jikxatsna. Ukhamarusa, amtayarakistaspawa Bi-
blian qillqat suma arunakapa, tantachäwinakana jan ukax
taman irpir chuymaninakawa jiwasat llakisa iwxt'asin am-
tayistaspa (Gálatas 6:1).

¹⁹ Mayisitanakasarux Jehová Diosaxa awisax janis jank'a-
ki jaysankistaspa ukhamwa amuysna, ukampisa, ¿janipu-
nit jaysankistaspa? Jaysanistaniwa. Amtañäni, Jehová Dio-
sax mayisitanakasaruxa jaysistaniwa amtaparjama, ukha-
maraki kunapachatı jiwasatakix askikani ukapachaw
jaysistani. Kunanaksa muntan ukxa Jehová Diosax sum
yati, ukhamarusa, jiwasat juk'ampi sumanak churañwa ya-
tiraki. Awispax suyaskiwa 'mayisipkakiñasa', 'thaqhasipka-
kiñasa' 'liqt'asipkakiñasa' (Lucas 11:5-10). Ukhama lurañä-

19. Mayisitanakasarux Jehová Diosaxa awispax janis jank'aki jaysan-
kaspa ukham amuyasaxa, ¿kun amtañas wakisipa?





ni ukhaxa, taqi chuyma mayisitaswa ukat iyawsäwisaxa chiqapätapwa uñacht'ayañäni. Jehová Diosax jaysistaspawa, ukampisa jiwasaw jan amuyksnati. Sañäni, jan walt'äwin uñjasisaxa Diosat mayisiñäni, ¿kunjamsa jaysistani? Uka jan walt'äwiru chhaqtayañat sipansa inas saykatañata-kix ch'am churistaspa, ukhamatwa jaysistani (Filipenses 4:13).

²⁰ Uraqi, alaxpacha, taqi kuna Inuqirirux walpunwa yuspärtanxa, kunattix mayitanakaparjam Juparu mayistan ukhaxa ist'istuwa (Salmo 145:18). Ukhamasti Diosata mayisiñ suma churäwi katuqasaxa mayisipxapuniñäni. Ukham lurañäni ukhaxa, 'mayisitanakar Ist'iri' Jehová Diosarux sapürutjamwa juk'amp jak'achasipxarakiñäni.

20. ¿Kunatsa Diosat mayisiñ suma churäwi katuqasaxa mayisipxapuniñasaxa?

KUNSA BIBLIAX YATICHÍ

- Diosarutí mayisipuniñänixa, juk'ampwa jupar jak'achasiñäni (Santiago 4:8).
- Diosampi ist'atäñatakixa, iyawsäwimpi, alt'at chuymampi ukat taqi chuymampiw Diosar mayisiñasa (Marcos 11:24).
- Jehová Diosarukiw mayisiñasa Yuqapan sutipxaru (Mateo 6:9; Juan 14:6).
- 'Mayisitanakar Ist'iri' Jehová Diosaxa, mayisiwinakasxa jaysistuwa angelanakampi, qullan ajayupampi, Qullan Arupampi, yupaychir jaqinakampi yanapt'ayasa (Salmo 65:2).

Bautisasiña ukat Diosampi sarnaqaña

- ¿Kunjamsa cristianonakax bautisasipxi?
¿Kuna mayitanaksa bautisasiñatakix jumax
phuqañama?
¿Kunjamsa maynix Diosar katuyasispa?
¿Kunatsa bautisasiñ munañasaxa?

“AKAXAY umaxa. ¿Janit nayax bautisatäkiristxa?”, sasaw Etiopía markankiri, gobiernon mä irnaqirix nayra patak maranakanxa satayna. Felipe sat mä cristianowa, Jesusaw Mesiasax sasa qillqatanakampi uka jaqirux yatichatayna.

-
1. ¿Kunatsa Etiopía markana, gobiernon mä irnaqirixa bautisaxsirista satay-naxa?



Chuymaru purt'kirpunwa uka jaqirux qhanañchatayna, ukatwa bautisasxä sataynaxa (Hechos 8:26-36).

² Jumatix Jehová Diosan Qhanañchiripampi akhakam aka librota sum yatiqstaxa, inasa akham jiskt'asiraksta: "¿Janit nayax bautisatäkiristxa?" sasa. Jaqinakaxa wiñayaw kusipachan jakasipxani siw Bibliaxa, ukxa yatxarakatawa (Apocalipsis 21:3, 4). Jiwatanakan jaktaniñapatsa ukat jichhax kunjamäsipkisa ukanakatsa yatxarakatawa (Eclesiastés 9:5; Juan 5:28, 29). Jehová Diosan Qhanañchirinakapamp chikaxa niyawa mä qhawqha tiempo tantachasxarakpachätaxa, ukat chiqa yupaychirinakätapsa amuyxarakpachätawa (Juan 13:35). Ukatxa, inasa Jehová Diosampi suma sarnaqañ qalltxaraksta, ukawa taqi kunat sipansa wali askixa.

³ ¿Kunjamatsa Diosar yupaychañ munatamxa uñacht'ayasma? Jesusax akham sasaw arkirinakaparux säna: "Taqi akapachankir jaqinakar yatiyir sarapxam, nayar arkir tuku-yapxam; *bautisapxam*" sasa (Mateo 28:19). Jesusax bautisasisawa mä uñacht'äwi jaytawayistu. Janiwa umampi aliq ch'allt'ataki bautisaskänti, janirakiwa mä juk'a umampi p'iqit warxatapkänti (Mateo 3:16). *Bautisasiñ* aruxa griego arutwa juti, ukax "umar chhaqtayañ" sañ muni. Ukhamasti, kunapachatä cristianüñatak bautisasipxi ukhaxa umaru q'al chhaqantayatäpxiwa.

⁴ Jehová Diosampi sarnaqañ munirinakaxa bautisasipxanapawa. Kunapachatä maynix bautisasxi ukhaxa, taqini-na uñjkatawa Diosar yupaychañ munatapxa uñacht'ayi, ukatxa Diosan munañapa kusion luratapsa uñacht'ayarakiwa (Salmo 40:7, 8). Ukampisa, bautisasiñatakix mayitanak phuqañawa.

2. ¿Kunatsa bautisasiñ tuqit sum amuyt'asiñamaxa?

3. 1) ¿Jesusax kamsataynasa arkirinakaparuxa? 2) ¿Kunjamsa cristianonakax bautisasipxi?

4. ¿Bautisasxi ukhaxa kunanaksa maynix uñacht'ayi?

UÑT'AÑAMPI IYAWSÄWIMPIW MUNASI

⁵ Nayrîr mayiwxaxa phuqxtawa. ¿Kunjamsa? Jehová Diosampiru Jesucristompiru *uñt'asawa* phuqxtaxa, ukxa Bibliata yatichayasisawa yatiqtaxa (Juan 17:3). Ukampisa, juk'ampi yatiqaskakismawa. 'Diosaru juk'ampi sum uñt'añamwa' cristianonakaxa munapxi (Colosenses 1:10). Ukatakixa, Jehová Diosan Qhanañchirinakapan tantachäwinakaparu sarasawa juk'ampi yatiqäta. Ukhamaxa uka tantachäwinakaruxa jan jaytasa sarañamapuniwa (Hebreos 10:24, 25). Ukhamatwa Diosarux juk'amp sum uñt'äta.

⁶ Chiqasa, bautisasiñatakix janiw Bibliatxa taqpach yatiñäkiti. Ak amtma, Etiopía markankir jaqixa Bibliat *mä ju-k'akwa* yatina, ukampis Qillqatanaka sum yatxatañatakixa yanapt'ayasînwa (Hechos 8:30, 31). Ukhamarakiwa, yatiqañax jumatakix utjaskakiwa. Chiqasa, Diosat yatiqañax janiw tukuskaspati (Eclesiastés 3:11). Ukampisa, bautisasiñatakixa Biblian qallta yatichäwinakap sum yatiqañamawa, ukat uka yatichäwinakaru iyawsañamarakiwa (Hebreos 5:12). Kunjamäsipkis jiwatanakaxa, kunatsa Diosan sutipasa Apnaqäwipasa wali wakiskirix ukanaksa yatiñamarakiwa.

⁷ Ukampisa, janiwa yatiñäkikiti, "janiw Diosarux jan iyawsañampix kunapachas kusisiyksenati" (Hebreos 11:6). Nayra Corinto markankiri yaqhip jaqinakaxa, cristianonakana yatichäwip "ist'asinxa iyawsapxäna, ukat bautisasipxarakin[w]a" siw Bibliaxa (Hechos 18:8). Jumax ukhamwa lurarakisma. Bibliat yatiqasaxa, Bibliax Diosan amuyt'ayata Arupätapwa *iyawsañama*. Diosan amtanakapaxa phuqasipuniniwa ukatxa Jesusan jiwatap laykux qhispirakiñaniwa, ukanakaru iyawsäwiniñamarakiwa (Josué 23:14; Hechos 4:12; 2 Timoteo 3:16, 17).

5. 1) ¿Kawkîrisa bautisasiñataki nayrîr mayitaxa? 2) ¿Kunatsa cristiano tantachäwinakaru sarañaxa wakisi?

6. ¿Bibliat qhawqha yatiñamasa bautisasiñatakixa?

7. Bibliat yatiqasaxa, ¿kunaniñamasa?

BIBLIAN CHIQA YATICHÄWINAKAPAT YATIYMA

⁸ Juk'amp iyawsäwinixätaxa, janiw yatiqatanakamxa im-t'añ munkätati, jan ukasti yatiyätawa (Jeremías 20:9). Diosatsa ukhamaraki amtanakapatsa taqi chuymawa yaqhana-karu qhananchäta (2 Corintios 4:13).

⁹ Qalltañatakixa, familiaranakamaru ukat uñt'atanaka-marüwa suma arunakampi Biblian chiqa yatichäwinakap-xa qhanañchasma, ukat jumamp chika irnaqirinakarusä, utam jak'ankirinakarusä qhanañcharakismawa. Tiempom-pixa, inasa Jehová Diosan Qhanañchirinakamp chika utat uta yatiyir sarañ munchita. Ukhamäni ukhaxa, Bibliat yati-chirimaruwa sañama. Jupati yatiyir sarasmaw sätam ukha-xa, tama taypin pä irpir chuymäninakampi parlt'apxaña-matakiwa arxayani.

¹⁰ Ukhamatwa juk'ampi sum uñt'äta irpir chuymän cristenonakaruxa, Diosan tamap awatirinakaruxa (Hechos 20:28; 1 Pedro 5:2, 3). Biblian qallta yatichäwinakapxa yatxtati, uka yatichäwinakaru iyawsäwinixtati, ukwa jupana-kax amuyapxani, Diosan yatichäwinakaparjamati sar-naqaskta, ukat chiqapuniti Jehová Diosan Qhanañchiri-päñ munta ukwa amuyapxarakini. Uka mayitanaka phu-qäta ukhaxa: walikiwa, suma yatiyäwinakata jan bautisata yatiyirixtawa sapxätamwa, ukatxa suma yatiyäwinakxa ta-qiniruw yatiyxasma.

¹¹ Jan ukhamäkanixa, jan wali luräwinakxa apanukus-kakiñapawa sapxaspawa irpir chuymäninakaxa. Ukatakixa, inas jamasata lurkäna uka jan walinak apanukxañapächis-pa. Ukhamaxa, janir bautisaskasin yatiyir mistuñatakixa,

8. ¿Kunasa yatiqatanakamatxa yaqhanakaru yatiyañ yanapt'ätamxa? 9, 10. 1) ¿Khitinakarusa Bibliat yatiyañ qalltasmaxa? 2) ¿Kun luraña-masa Jehová Diosan Qhanañchirinakapamp chika utat uta yatiyir sarañamatakixa?

11. ¿Janira taqi jaqinakaru yatiyir sarasaxa kuna jan walinaksa yaqhi-panakaxa apanukupxaña?

jan wali sarnaqäwinakxa apanukxañamawa, akir jan wali luräwinakjama: q'añu lurañanaka, machantasiñanaka ukat jan wali qullanakampi qulljasiñanaka (1 Corintios 6:9, 10; Gálatas 5:19-21).

ARREPENTISIÑAMPI JAN WALINAK APANUKUÑAMPI

¹² Bautisasiñatakixa, aka mayitanakampi phuqañamara-kiwa. Apóstol Pedroxa akham sänwa: “Arrepientsipxam” ukat “jan wali lurañanakxa apanukupxam” sasa (Hechos 3:19). Kunapachatí maynix chiqapuni arrepientsiki ukhaxa, wal llakisi jucha luratapatxa. Ukatxa, janiwa q'añu lurir jaqinakaki *arrepientsipxañapäkiti*, jan ukasti waljam sarnaqasipki ukanakasa arrepientsipxañapawa. ¿Kunatsa? Kunattixa taqiniwa juchachasirítanxa, Diosampi juchanaka pampachayasiñasawa (Romanos 3:23; 5:12). Janira Bibliata yatiqkasaxa, jumaxa janiw yat kayätati kawkirisa Diosan munañapaxa. Ukhamaxa, Diosan munañapa jan yatisaxa janiwa Diosan munañaparjam jumax sarnaq kayätati, ¿janich ukhamäkixa? Ukhamaxa, arrepientsiñasawa.

¹³ Arrepientsitatxa *jan wali luräwinak apanukuñasarakiwa*. Kunapachatí jumaxa uka jan wali luräwinak apanukx-ta ukhaxa, jan wali thakimatsa kutt'ankasma ukhamawa. Mä arunxa, uka jan walinak luratamatxa janiwa aliqaki llakisktati, jan ukasti nayra sarnaqäwimxa apanukxtawa. Ukat aksaruxa kunatí askiki uka lurañwa amtañamaxa. Maynixa janira bautisaskasawa arrepientsiñapaxa ukatxa jan wali luräwinaksa apanukuñaparakiwa.

DIOSAR KATUYASIÑA

¹⁴ Janira bautisaskasaxa Jehová Diosar *katuyasxañamawa*, ukarakiw yaqha mayitaxa.

12. ¿Kunatsa arrepientsiñasaxa?

13. ¿Kun sañs muni jan wali luräwinak apanukuñaxa?

14. ¿Kunampsa janira bautisaskasaxa lurañama?

¹⁵ Jehová Diosaruw taqi chuyma mä mayisiwin jak'acha-siñama: Juma saparukipuniwa yupaychañ munsmasasa, ukawa Diosar katuyasiñaxa (Deuteronomio 6:15). Ukatxa, ¿kunatsa maynix Diosaru ukham katuyasiñ munaspa? Uk amuyt'añataki akham sañäni, mä waynax mä tawaquru uñt'añ munsmasasa. Uka tawaquru sum uñt'anixa, kuna kasta tawaqütapsa sumwa yatinixa, ukatxa jupampikiskañ-wa munanixa. Tiempompixa jaqichasxañäni saspawa. Chiqasa, jaqichatäxani ukhaxa kunayman lurañanakawa utjani. Ukampisa uka tawaqur munatap laykuxa jupampiw jaqichasini.

¹⁶ Kunapachatì Jehová Diosaru uñt'xtan ukat munasxaraktan ukhaxa, taqi chuymawa juparu yupaychañ muntanxa, janiwa yupaychäwisaxa ukhakamakiniw sisttanti. Diosan Yuqap Jesucristoru arkañ munirixa, 'jupa pachax armt'asiñapawa' (Marcos 8:34). Kunapachatì munañanakasxa jan ukax amtanakasxa Diosar ist'añataki apanuktan ukhawa jiwaspachax armt'astanxa. Ukhamaxa, janira bautisaskasaxa, Jehová Diosan munañapa lurañwa jakäwiman nayraqat amtañamaxa (1 Pedro 4:2).

JAN AXSARAMTI

¹⁷ Yaqhipanakaxa Jehová Diosaru katuyasiñxa axsaraya-sipxiwa. Diosar katuyat cristianjamaxa juparu cuenta churañäspawa sasaw axsarapxi. Inas akham amuyapxchi, pantjasiristwa, Diosar inamayakiw jak'achasirista, ukhamaki sarnaqasiskä sasa.

¹⁸ Jehová Diosaru munasiñamaxa juk'ampi jilxattani ukhaxa, juparu katuyasxañwa munätaxa, ukatxa ukarjam sarnaqañatakisa wal ch'amachasirakita (Eclesiastés 5:4). Diosar katuyasxasaxa, Jehová Diosatakjam "sarnaqañwa,

15, 16. ¿Diosar katuyasiñax kamsaños muni, ukat kunasa ukaru nuk-t'istani?

17. ¿Kunatsa yaqhipanakaxa Diosar jan katuyasipki?

18. ¿Kunas Diosar katuyasiñamataki nuk-t'iristamxa?



*Diosan Arupata sum
yatiqañamawa
bautisasiñatakixa*

*Yatiqatanakamata
yatiyañatakiw iyawsäwimax
yanapt'ätamxa*

ukhamarak kunatix jupata-
kix askiki ukanak lurañwa”
munätaxa (Colosenses 1:10).

Diosar munasitaxa, Diosan
munañap phuqañax janiw jumatakix ch'amäkaniti. Ukat-
xa apóstol Juanan akir arunakaparuxa ukhamäskapuniw
sätawa, jupaxa akham sänwa: “Diosar munañaxa manda-
mientonakar phuqhañawa; mandamientonakapasti janira-
kiw jan phuqhañjamäkiti” sasa (1 Juan 5:3).

¹⁹ Jehová Diosax jupar katuyasirinakaruxa janiw jan ju-
chanipxañap maykiti. Jupaw sum uñt'istu, kunti jan lu-
rirjamäktan ukxa janipuniw wayt'kistuti (Salmo 103:14).
Diosaw jumampiskani, jupaxa sum sarnaqasiñamwa mu-
ni (Isafas 41:10). Jan payachasimti, Jehová Diosaruti taqi

19. ¿Kunatsa Diosar katuyasiñxa jan axsarañamäkixa?

chuyma atinisita ukhaxa 'chiqa thakinwa irpasitamxa' (Proverbios 3:5, 6).

DIOSAR KATUYASITAMXA BAUTISASISA UÑACHT'AYMA

²⁰ Kunti yatiqxtan uka tuqit wal amuyt'asisaxa inas sapa-ki Jehová Diosaru mayisisa katuyasiñ amtchita. Ukampisa, chiqpachapuni Diosar munasirinakax aka mä mayiwimp-wa phuqapxañapa: 'lakampi arsupxañapaw qhispiyataña-takixa' (Romanos 10:10). ¿Kunjamsa ukax luraña?

20. Jehová Diosar katuyasxasaxa, ¿kunatsa uk jan imxasiñamäki?

*¿Diosat mayisxtati
Juparu
katuyasxañatakixa?*

*Bautisaskta ukhaxa
"jiwkasma" ukhamawa,
mä arunxa nayra
sarnaqawimwa
apanukxtaxa, ukat Diosan
munañapa lurañatakiw
jakxaraktaxa*



²¹ Tama taypin irpir chuymaninakat sarayiriruwa, bautisasiñ muntxa sas säta. Jupaw mayni irpir chuymaninakaru arxayani, jumamp chika, Biblian qallta yatichäwinakata jiskt'anak uñakipapxañamataki. Jupanakati bautisasiñataki mayitanak phuqtaw sapxätam ukhaxa, jutir jach'a tanta-chäwinwa bautisasita sapxarakitamwa.* Bautisasipxi ukhaxa, mä arst'äwiw utji, ukanxa kun sañs muni bautisasiñaxa uka tuqitwa qhanañchasi. Uka arst'äwi tukuyxaruxa, arst'irixa pä jiskt'anakwa bautisasirinakaruxa jiskt'i, ukat bautisasirinakaxa jach'atwa arsupxi. Ukhamatwa iyawsäwinitasxa 'lakampi arsusa' uñacht'aytanxa.

²² Bautisasxäta ukhawa yaqhanakaxa Diosar katuyasxatamxa yatxapxani, ukatxa Jehová Diosan Qhanañchiripäxätawa. Bautisasirinakaruxa q'alwa umaru chhaqantayapxi, ukhamatwa Diosaru katuyasitanakapxa uñacht'ayapxi.

BAUTISASITAMAX KUNS UÑACHT'AYI

²³ Arkirinakajaxa 'Awkina, Yuqana, qullan ajayumpina sutiparuwa' bautisasipxani sasaw Jesusax satayna (Mateo 28:19, MT). Ukhamasti, bautisasirinakax Jehová Diosaruw Apnaqirirjam iyawsapxi ukat Jesucriston luräwinakaparusa iyawsapxarakiwa uk sañ muni (Salmo 83:18; Mateo 28:18). Ukatxa, qullan ajayun jan ukax Diosan ch'amapan luratanakapsa iyawsapxarakiwa (Gálatas 5:22, 23; 2 Pedro 1:21).

²⁴ Bautisasiñaxa janiw umar wayuntayasiñakikiti. Jan ukasti wali wakiskir uñacht'äwiwa. Umaru chhaqantkäta ukhaxa "jiwkasma" ukhamawa, mä arunxa, nayra sar-naqäwimsa jan ukax jan wali luräwinakamsa apanukkas-

* Jehová Diosan Qhanañchirinakapaxa sapa marawa walja kuti jach'a tantachäwinak lurapxi, uka tantachäwinakanwa bautisasipxi.

21, 22. ¿Kunjamanakatsa jumaxa iyawsäwimata 'arsusmaxa'?

23. ¿'Awkina, Yuqana, Qullan Ajayumpina sutiparu' bautisasiñax kamsañs muni?

24, 25. 1) ¿Bautisasiñax kamsañ muni? 2) ¿Kuna jiskt'asa jaysañaxa?

ma ukhamawa. Ukat umat waysxapxätamxa Diosan munañaapa lurañatakiwa jakxtaxa uk sañ munaraki. Janiw kuna utt'awirusa, amtarusa, jaqinakarusa jan ukax luräwinakarusa katuyasktati, jan ukasti, pachpa Jehová Diosaruwa katuyasxtaxa, janipuniwa ukxa armañamäkiti. Diosar katuyasitamasa bautisasitamasa Jupampi suma parlasiña-taki jan ukax suma apasiñamataki qalltäwiwa (Salmo 25: 14).

²⁵ Ukampisa, qhispiyasiñatakixa janiw bautisasiñasakiki-ti. Apóstol Pabloxa akham sasawa qillqatayna: “Qhispiyasiñanakamat[akisti], alt'at chuymampi axsarañampirak phuqhaxam” sasa (Filipenses 2:12). Bautisasiñaxa qalltakiwa. Jichhaxa aka mä jiskt'aw utji: ¿kunjamsa Diosampikisksna ukat jupan munasiñapan jakasiskaraksnaxa? Tukuy jaljaw uka tuqitxa qhanañchaski.

KUNSA BIBLIAX YATICHÍ

- Cristianonakaxa janiw umampi ch'allt'asaki bautisasiipkiti jan ukasti umar chhaqantasawa bautisasipxi (Mateo 3:16).
- Bautisasiñatakixa, nayraqatxa sum yatiqañawa ukatxa iyawsäwi uñacht'ayañawa, ukxarusti arrepentisiña, jan wali luräwinak apanukuña ukatxa Diosar katuyasiñawa (Juan 17:3; Hechos 3:19; 18:8).
- Jehová Diosar katuyasiñatakixa maynix jupapach armasiniñapawa, kunjamtí Jesusan nayriri arkirinakapax lurapkatayna ukhama (Marcos 8:34).
- Bautisaskta ukhaxa “jiwkasma” ukhamawa, mä arunxa nayra sarnaqäwimwa apanuktaxa, ukat aksaruxa Diosan munañaapa lurañatakiwa jakxtaxa (1 Pedro 4:2).

Diosan munasiñapan jakasiñäni

¿Diosar munasiñax kamsañs muni?

¿Kunjamsa Diosan munasiñapan jakassna?

¿Kuns katuqapxani Jehová Diosan munasiñapan jakasirinakaxa?

*¿Aka jan wali
urunakanxa
Jehová Diosaruti
imantasiña?*

SAÑÄNI, mä uruxa utat wali jay sarasma, ukat qinayanakax wal apthaptaniswa. Akatjamat wal alaxpachat llijullijux llij llijtaniswa, q'ixu q'ixus ukhamaraki, ukatxa walpun jallux purintaspaw. Ukhaxa jank'akiw kuna imantasiñsa thaqtasma. Ukata thaki jak'ana imantasiñjam mä jisk'a uta uñjasmaw, laqakiw uka utaru t'ijkatasmaw. ¡Walikxay aka utax utjchixa!, sasmaw.

² Jichhürunakanxa jan wali urunakanwa jakastanxa, chijir puriñ urunakanwa jakastanxa, akapachax jan walit juk'amp jan wali-ruw saraski. Ukampis mä suma imantasiñaw utji, ukasti wiñay t'aqhisuyir jan walinakatxa jark'aqistaspaw. ¿Kawkins ukham imantasiñax utjpacha? Bibliax Jehová Diosat akham siwa: 'Jumätaw imantasiñajaxa, jark'aqasiñajasa, Diosajay, jumaruw taqpach chuymamp alkatsma' sasa (Salmo 91:2).

³ Inuqiri, taqi kunxaru Munañani jach'a Jehová Diosaw imantasiñasäspaxa. ¡Wali jach'a bendicionaw ukaxa! Khiti jan walt'ayirit

1, 2. ¿Kawkins chiqpach imantasiñax utjaspa?

3. ¿Kunjamsa Jehová Diosar imantassna?

sipansa, kuna jan walt'ayirit sipansa jupax wali ch'amaniwa. Usuchjapkchistanisa, Diosax waliptayistaniwa. ¿Kunjamsa Jehovah Diosar imantassna? Taqi chuyma juparu alkatañasawa. Ukat Bibliax akham sistuwa: "Diosan munasiñapan jakapxam" sasa (Judas 21). Ukhamawa, alaxpachankir Awkisan munasiñapan jakasiñasawa ukat mayachatañasawa. Ukhamäni ukhaxa, Jupawa chiqpacha imantasiñasänixa. Ukampisa, ¿kunjamsa Inuqirisampi munasisa sarnaqsna?

DIOSAN MUNASIÑAPATA LUP'ISAXA JUPARUX MUNASIRAKMA

⁴ Kunayman tuqitwa Jehovah Diosax munasiñap uñach-t'ayistu. Uka tuqita amtañäni, ukanakax Diosan munasiñapan jakasiñwa yanapistani. Biblian kuna yatichäwinakapti aka libron yatiqtaxa ukanakat mä qhawqha amtañäni. Sañäni, kuisita jakasiñatakixa, mä suma Uraqwa Inuqirisax churistu, ukanxa manq'añanakasa umasa waliwa, ukatxa kunaymaninakwa Uraqix churistu, kunayman animalanakaw utji, suma ch'uxña lugaranakas utjarakiwa. Ukatxa, Bibliax Diosan churäwiparakiwa, ukanwa kuna sutinisa, kunjam Diosasa ukanakxa qhanañchistu. Diosax aka Uraqiruw Yuqapxa khitanitayna ukatxa jiwasanak laykuw t'aqhisiwayi ukat jiwawayi, sasaw Bibliax qhanañchi (Juan 3:16). Ukhamatwa mä suma waxt'a churawayistu, uka waxt'a utjipanwa jutir urunakataki mä suma suyt'äwix utjistu.

⁵ Uka suma suyt'äwi utjañapatakixa, Jehovah Diosaw alaxpachan mä Apnaqäwi utt'ayarak, ukax Criston Apnaqäwipa satawa. Uka Apnaqäwix niyaw taqi t'aqhisiñanak chhaqtayani ukatsti Uraqxa kusipachaptayarakiniwa. ¡Kunja sumakikani! ¡Ukhaw wali kuisita jakasxañänixa ukat wiñayatakiw suman jakasxarakiñäni! (Salmo 37:29.) Ukampisa, uka uru suyañkamaxa, Diosan iwxanakapaw sum jakañ yanapt'arakistani. Jehovah Diosatxa yaqha suma churäwi

4, 5. ¿Diosan munasiñapatxa kawkirinakasa mä qhawqha churäwinakapaxa?



¿Kunsa Bibliax chiqpachapuni yatichi?

katuqaraktanxa, ukasti jupar mayisiñawa, ukhamatwa jupampix parlastanxa. Uka churäwinakampiw Diosax munasiñapxa jumarus yaqhanakarus uñacht'ayi.

⁶ Jichhaxa, mä wakiskir jisk-t'a jiskt'asiñamawa: "¿Diosax wal munasitu, jichhax kun lurañajäpachasa?" sasa. Inas yaqhipanakax "Juparux munasiñasarakiwa" sapxchispa. ¿Jumax ukhamti amuyarakta? Aki-riw jilir kamachixa sasaw Jesusax satayna: "[Jehová] Tatit Diosamaruw munäta taqi chuymamampi, taqi almamampi, taqi amuyumampiraki" sasa (Mateo 22:37). Jisa, Jehová Diosaruxa wal munasiñamawa. Ukampisa, Diosaru taqi chuymampi, taqi almampi, taqi amuyumpi munasiñataki-xa, *¿uñt'añakit wakisispa?*

⁷ Diosar munasiñaxa janiw ukham uñt'añakikiti siw Bibliaxa. Chiqasa, ukham uñt'añax waliskiwa, ukampisa ukax Diosar chiqa munasiñan qalltapakiwa. Amuyt'añataki: mä manzana munasma ukhaxa, ¿jathaki churapxiristamsti waliw sasmati? Janiwa. Chiqasa uka jathax askiwa manzana utjañapatixa, ukampis jumax achupwa muntaxa. Kunjamti jathax jiltasin achuqkixa, ukhamañaparakiw Jehová Diosar *uñt'añaxa*. Bibliax akham yatichi: "Diosar muna[si]ñaxa mandamientonakar phuqhañawa; mandamientonakapasti janirakiw jan phuqhañjamäkiti" sasa (1 Juan 5:3). Ukhama-xa, Diosar chiqpach munasiñaxa suma achunakanñapawa, ukasti sarnaqäwisaxa qhanañapawa (Mateo 7:16-20).

⁸ Diosan kamachinakap ist'ktan ukat yatichäwinakapar-jam sarnaqktan ukhawa Diosar munasitasxa uñacht'aytan-xa. Ukax janiw ch'amäkiti, kamachinakapax janiw jan phu-

6. ¿Diosan munasitaxa kuna lurañamas wakisispa?

7. Diosar munasiñatakixa, ¿uñt'añakit wakisispa?

8, 9. ¿Kunjamatsa Diosar munasitasxa uñacht'aysna, ukat kunjamsa jiwasanakatak lurki ukanakat wal yuspäratasxa uñacht'ayaraknsa?

qañjamäkiti. Jan ukasti, kusiſita sum jakasiñasatak qillqatawa (Isaías 48:17, 18). Jehovah Diosampi irpayastan ukhaxa, kunti alaxpachankir Awkisaxa jiwasanakatak lurki ukat wali yuspärataswa uñacht'aytanxa. Ukampisa juk'anikiw Diosarux yuspärapxi. Jesusax aka Uraqinkkäna ukhaxa yaqhipanakax jan yuspärasiripxänwa, jiwasax janiw ukhamañasäkiti. Mä uruxa leprampi usuntat tunka jaqinakaruw Jesusax qullatayna, ukatxa *maynikiw* Jesusar yuspärañatakix kutt'atayna (Lucas 17:12-17). Uka yuspärasir jaqjamañasawa, llätunkanix janiw yuspärapkänti, janiw jupanakjamañasäkiti.

⁹ Ukhamaxa, ¿Jehová Diosan kuna kamachinakapsa ist'añasaxa? Mä qhawqha kamachinakxa aka libronwa yatiqtanxa. Ukanak amtañäni, Diosan kamachinakaparutí ist'añäni-xa, Jupar munasiñapan jakasiñaxa janiw ch'amäkaniti.

JUK'AMPI JEHOVÁ DIOSARU JAK'ACHASIÑÄNI

¹⁰ Jehovah Diosar uñt'añax wali wakiskiriwa jupar juk'ampi jak'achasiñatakixa. Jupar uñt'añax janiw

10. ¿Kunatsa wali wakisirixa Jehovah Diosaru uñt'as-kakiñaxa?

***Jehová Diosar munasiñax ninamp sasiwa:
jan thayarañapatakix yatiqaskakiñasawa***



tukusiñapäkiti. Amuyt'añataki: juyphipachansa mä aru-max utat jaya pampan jikxatasisma, ukatxa junt'urt'asiñatakixa ninwa phichhasisma. Ninax juk'at juk'at jiwarxaspa ukhaxa, ¿ukhamakiti uñch'ukisma? Janiwa. Ninax nakhas-kakiñapatakixa phäñxa apxataskakiñamawa, jan ukax thayax jiwayiristamwa. "Diosar uñt'añaxa" phäñamp sisiwa, kunjamt'i phäñaxa nin nakhaykixa, ukhamarakwa "Diosar uñt'añaxa" jupar munasiyistu (Proverbios 2:1-5).

¹¹ Jesusan arkirinakapaxa, Jehová Diosarus Aruparus munasipxapunispa uk Jesusax munäna. Jiwatat jaktasinxa, Hebreo Qillqatanakatwa, jupan phuqasiri mä qhawqha profecianakat pä arkirinakaparuxa Jesusax qhanañchäna. ¿Kunjamt'ayänsa arkirinakaparuxa? Mä juk'ampiruxa akham sapxänwa: "¿Janit qhanpacha chuymanakasax nakkistänxa thak jiwasamp chik jutaskäna, ukhamarak Qillqatanakat amuyt'ayaskistäna ukkhaxa?" sasa (Lucas 24:32).

¹² Kunt'i Bibliax chiqpachapuni yatichi uk yatiqkasaxa, ¿janit juman chuymamaxa ukham kusiisita ukat Diosar wali munasisa jikxataskarakina? Ukhamäpachawa. Waljaniw ukham kusisipxiri. Jichhaxa munasiñ jiltayañaxa ch'amäspawa, thayaraspawa. Aka qhipa urunakanxa "waljanin munasiñapaw thayarani" sataynawa Jesusaxa, janiwa jiwasaxa ukhamäñ munktanti (Mateo 24:12, MT). ¿Kunjamatsa Jehová Diosaru munasiñamasa ukat Biblian chiqa yatichäwinakaparu munasiñamasa jan thayarkaspa?

¹³ Jehová Diosaru ukat Jesucristompiru juk'ampi uñt'askakiñamawa (Juan 17:3). Kunt'i Diosan Arupan liyt'kta uka tuqitxa wali lup'iñamawa, ukatxa akham jiskt'asiñamawa: "¿Akaxa kunsa Jehová Diosxata yatichitu? ¿Diosaru taqi chuymampi, taqi almampi, taqi amuyumpi munasiñajaru-ti yanappachitu?" sasa (1 Timoteo 4:15). Ukham lup'itaxa, Jehová Diosar munasiñamaxa janipuniw thayarkaniti.

11. ¿Jesusan yatichäwinakapaxa kunjamt'ayänsa arkirinakaparuxa?

12, 13. 1) ¿Diosar munasiñapasa Bibliar munasiñapasa jila part jaqinakan kunjamäskisa? 2) ¿Kunjamatsa munasiñasaxa jan thayarkaspa?

¹⁴ Jehová Diosar munasiñasa jan thayarañapatakixa, Diosar mayisiñasapuniwa (1 Tesalonicenses 5:17). Kunjamti 17 jaljan yatiqktanxa mayisiñaxa Diosan mä jach'a churäwipawa. Kunapachatä munat masinakasampi taqi chuyma parlt'asktan ukhaxa, jupanakarux juk'ampwa jak'achastanxa. Ukhamarakiwa, Jehová Diosar mayisipuniñänixa juparu munasiñasax janiw thayarkaniti. Janiw inamay arunakampi mayisiñasäkiti; janiw kutin kutin pachpa arunakaki jan amuyt'asisa sañasäkarakiti. Kunjamti mä wawax awkiparu parlxaykixa, ukhamwa Jehová Diosarux arxayañasarakixa. Wali respetompi, chuyma jupatak jist'arasawa taqi chuyma juparu mayisiñasaxa (Salmo 62:8). Ukhamawa, Diosar yupaychañatakixa wali wakisiriwa Bibliata sapaki yatiqaña ukat taqi chuyma mayisiñasarakixi. Ukhamatwa Diosan munasiñapan jakasiñax jan ch'amäkaniti.

DIOSAR YUPAYCHAÑAXA WAL KUSISIYISTU

¹⁵ Bibliat yatiqasasa, Diosar mayisisasa Juparuw yupaychanxa, ukampisa sapakiw uk lurtanxa. Yaqhanakamp chikäsktan ukhaxa kun lurañasasa uka tuqita jichhax parlt'arakinñäni: ukhax iyawsäwisat yaqhanakaru yatiañawa. ¿Biblian yatichäwinakapat parliñtati? Ukax Jehová Diosan jach'a churäwipawa, jupaw uka lurañxa munasiñapata churistu (Lucas 1:74). Kunapachatä Jehová Diosat yatiqatanakasax parltan ukhaxa, kunti chiqä cristianonakjamax mä luraña katuqktanxa uk lurasktanxa: ukaxa Diosan Apnaqäwipata suma yatiañawinaka yatiañawa (Mateo 24:14; 28:19, 20).


¹⁶ Pablotañax yatiañax wali askinwa, ukatwa Diosan jach'a churäwipaw sänxa (2 Corintios 4:7). Jehová Diosampita amtanakapampita yatiañaxa wali askiwa, janipuniw ukham yaqha irnaqañax utjkaspati. Mä tuqitxa suma Uywiru luqtañawa, mayasa tuqitsti, wali aski suma churäwinaka

14. ¿Jehová Diosar munasiñasaxa jan thayarañapatakixa kunatsa jupar mayisiñaxa wali wakisiripunixa?

15, 16. Diosan Apnaqäwipata jaqinakaru yatiañaxa, ¿kunatsa Diosan jach'a churäwipjam uñjañasaxa?

katuqäta. Yatiasinxä, chiqä chuymani jaqinakaruwa, alax-pachankir Awkisaru jak'achasiña, ukat wiñay jakañaru ir-pir thakiru sarxatañwa yanapt'tanxa. ¿Kuna yaqha lurañas ukham kusisiyistaspa? Ukampisa, Jehová Diosampita Aru-pampita yatiytan ukhaxa, iyawsäwisampi Diosar munasi-

*Jehová Diosaxa kusiona
'chiqpach jakasiñamwa' muni.
¿Jumax ukankätati?*



ñasampiwa jilxattaskixa. Ukat uka luratanakasax wali askiw Diosatakixa (Hebreos 6:10). Ukhamti lurañanixa Diosan munasiñapan jakasiñwa yanapistani (1 Corintios 15:58).

¹⁷ Diosan Apnaqäwipatxa jank'akiw jaqinakar yatipayxa-ñasa, janipuniw uk armañasäkiti. Bibliax siwa: Jehová "Tatitun arunakap parlam; wakiski ukkhasa, jan wakiski ukkhas parlapunim" sasa (2 Timoteo 4:2). ¿Kunatsa jank'aki yatipxañapa? Diosan Arupax akham siwa: "Jak'ankiwa [Jehová] Tatitun khä jach'a urupaxa. ¡Jak'ankiwa uka urux, jank'akiw purinirakini!" sasa, ukatwa jank'aki yatipxañapaxa (Sofonías 1:14). Ukhamawa, Diosax akapach t'unjkani uka uruxa wali jak'ankxiwa. ¡Jaqinakax yatipxañapawa! Jichhaw Jehová Diosar jach'a Apnaqirirjama ist'apxañapaxa, kunatix uka urux 'horasaparuw' purinini (Habacuc 2:3).

¹⁸ Chiqä cristianonakamp chika taqinin uñjkatawa Jehová Diosarux yupaychañasa ukwa jupax muni. Ukatwa Arupaxa akham sixa: "Uñjasipxarakiñani purapata, wiytasiñasataki munasiñaru aski luräwinakampiru; tantachasiwisxa jan jaytanukusa, kamisati yaqhipanakax ukaru yatitäpxi, ukat sipana purapat ch'amañcht'asisa, ukat juk'ampi, khä uru jak'achasisinkiri uñjasina" (Hebreos 10:24, 25, MT). Kunapachatı tantachäwinakaru cristiano jilat kullakanakampi tantachasiri sarktan ukhawa alaxpachankiri wali munat Awkisaru yupaychtanxa, ukax wali askiwa. Ukatxa jiwaskamasa purapatwa waytt'astanxa chuymacht'asiraktansa.

¹⁹ Jehová Diosan luqtirinakampampi tantachastan ukhaxa, jilat kullakanakampiw taman sum uñt'astanxa. Janiw pantjasitanakapa thaqhañasäkiti jan ukasti suma luräwinakapa uñjañasawa, kunjamtı Jehová Diosax uñjki ukhama. Janiw aski jaqiktanti. Amtapunıtawa: taqiniw pantjasirıtanxa,

17. ¿Kunatsa Diosan Apnaqäwipatxa jaqinakaxa jank'aki yatipxañapa?

18. ¿Kunatsa Jehová Diosaru taqinin uñjkata chiqä cristianonakamp chika yupaychañasaxa?

19. ¿Kun lurañasasa cristiano tamanxa jilat kullakanakampi munasiñatakixa?

ukat janiw ajay tuqitxa taqinis mayaki jiltktanti (Colosenses 3:13). Jehová Diosaru taqi chuyma munasirinakampiw chikachasita, ukhamatwa ajay tuqit jiltatamxa amuyasita. Tamán jilat kullakanakamp chika Diosaru yupaychätaxa, Diosan munasiñapan jakasiñax janiw jumatakix ch'amäkani-ti. Jehová Diosaru yupaychirinakaxa jan ukax munasiñapan jakasirinakaxa kunsa katuqapxani, uk jichhax uñjañäni.

“CHIQPACH JAKAÑÄKI” UK KATUQAÑATAKI CH'AMACHASIÑAMAWA

²⁰ Jehová Diosaru taqi chuyma yupaychirinakaxa jakäw katuqapxani, ¿kuna kasta jakäwsa katuqapxani? Chiqasa, jila partix jakasktanwa sapxaspawa, manq'asktanwa, samaqisktanwa ukat umt'asktanwa sasa. Wali kusisitäktan ukhasa akham saksnawa: “¡Akapi jakañaxa!” sasa. Ukampisa, janiw khitisa *chiqpach jakañäki* uk jakkiti siw Bibliaxa.

²¹ Bibliax taqinirus siwa: ‘Wiñay jakaña katuqapxañamataki’ ch'amachasipxam sasa, jan ukax kunjamtí, *Machaka Testamento* Bibliax siskixa: ‘Chiqpach jakañäki uka katthapipxañamataki’ ch'amachasipxam sasa (1 Timoteo 6:19). ‘Chiqpach jakaña’ siski uka aruxa, kunjamtí jutir urunakan jakaskañänixa uk sañ muni. Kunapachatí jan juchanixañäni ukhawa ukham jakasxañäni, kunjamtí Diosax qallta amtapan munkäna ukhama. Kunürutí kusipach uraqinkxanñänixa janiw usuntxañäniti, suman jakasxañäni, wali kusisitaw sarnaqasiñäni, ukhaw ‘chiqpach jakasxañänixa’ mä arunxa wiñayaw jakasxañäni (1 Timoteo 6:12). Chiqasa, suma jutir urunakäniwa, ¿ukax kunjamas jumatakixa?

²² ¿Kunjamsa maynix ‘chiqpach jakañäki’ uk katuqaspa? Apóstol Pabloxa janíra aka arunak arskasaxa, cristianonakarux akham sänwa: ‘Aski lurapxam, suma luräwinakata qamiripxam’ sasa (1 Timoteo 6:18, *MT*). Ukhamax Bibliat

20, 21. ¿Kunas ‘chiqpach jakañaxa’, ukat kunatsa katuqañax wali sumänixa?

22. ¿Kunjamsa jumaxa ‘chiqpach jakañäki’ uk katuqasma?

yatiqatasarjam sarnaqañasawa. Ukampisa, ¿suma luräwina-kampiwa ‘chiqpach jakaña’ *katuqsna* sañti Pablox mun-pachäna? Janiwa. ‘Diosaw ina ch’usat qhispiyasistu’ ukat-wa uka suma suyt’äwinitanxa, mä arunxa Diosan khuyapa-yasiñapawa (Romanos 5:15). Ukatxa, Jehová Diosax wal uka bendición churañ muni taqi chuyma yupaychirinakaparuxa. Jupax kuisita, sumana ‘chiqpach jakasiñamwa’ muni. Ukhamwa jakasipxani Diosan munasiñapan jakasirinakaxa.

²³ “¿Bibliarjamati Diosaru yupaychasktxa?” sasawa sapa maynix jiskt’asiñasa. Sapürutjamtx ukhamaw sañaru tira-ñänixa, walik lurasktanxa. Jehová Diosawa imantasiñasa-xa janiw ukat payachasiñasäkiti. Aka ñanqhapachan jan wali qhipa urunakapanxa, Diosaw markaparux arxataskani. Ukat mä machaq suma uraq churistani, ukax wali jak’ank-xiwa. ¡Kunja sumakikani! ¡Aka qhipa urunakan sum am-tatasatxa wal kusisiñäni! Jichhatí suma amtanaka amtäta-xa, wiñay wiñayatakiw ‘chiqpach jakañäki ukxa katuqäta’, ukham jakasiñaswa Jehová Diosax nayratpach munäna.

23. ¿Kunatsa wali askixa Diosan munasiñapan jakasiñaxa?

KUNSA BIBLIAX YATICHÍ

- Diosan kamachinakaparu ist’asa ukat yatichä-winakaparjam sarnaqasawa Diosar chiqpach munasiñas uñacht’aytanxa (1 Juan 5:3).
- Diosan Arupata yatiqañasawa ukat taqi chuyma mayisiñasawa Diosan munasiñapan jakasiñatakixa, ukhamaraki yaqhanakarusan jupxata yatichañasarakiwa ukatxa tantachäwina-kan Diosaru yupaychañasarakiwa (Mateo 24:14; 28:19, 20; Juan 17:3; 1 Tesalonicenses 5:17; Hebreos 10:24, 25).
- Diosan munasiñapan jakasirinakax wiñay jakañ-wa katuqapxani (1 Timoteo 6:12, 19; Judas 21).

JUK'AMPI YATXATAÑATAKI

P'IQIÑCHA

JANA

Diosan sutipaxa kun sañs munpacha ukat kunatsa aytasiñasapuni	195
Daniel profetaxa Mesiasan jutañapat qillqatayna	197
Jesucristo: jutaniw sat Mesías	199
Awkita, Yuqata, qullan ajayumpita chiqa yatichäwi	201
¿Cristianonakax cruz apnaqapxañapati?	204
Santa Cena: Diosar jach'añchir amtäwi	206
"Alma", "ajayu": ¿uka arunakaxa kamsañpuns munpacha? . .	208
Seol, Hades arunakaxa, ¿kun sañs muni?	212
¿Kunas Taripäw Uruxa?	213
Bibliankir profecianakanxa 1914 maraxa wakisiriwa	215
¿Khitisa Miguel sat arcangelaxa?	218
¿Kunas "Jach'a Babiloniaxa"?	219
¿Diciembre phaxsinti Jesusax yurpachäna?	221
¿Fiestanaka amtañasäspati?	222

Diosan sutipaxa kun sañs munpacha ukat kunatsa aytasiñasapuni

MIRÄ amp suma Salmo 83:18 Bibliaman thaqtma. ¿Kamsis ukanxa? *Traducción del Nuevo Mundo de las Santas Escrituras* Biblianxa siwa: “Jaquinakan yatipxañapataki, jumax Jehová sutinītama, juma sapakiw uraqpachxaru taqi Munañanītaxa” sasa. Yaqha Biblianakanxa niya ukhamjamarakiw jaqukipapxi. Ukampis walja Biblianakatwa *Jehová* sutxa apsupxi, aymar Biblianakansa ukhamarakiwa, uka lantix akham sutinchanakwa uchapxi, “Dios” jan ukax “Tatitu” sasa. Ukhamaxa, ¿kuna sutis ukawjan uñstañapa? ¿*Jehová* sutiti jan ukax mä sutinchacha?

Mä sutiw ukanxa qillqata. Hebreo arut nayra qillqatansa, ukat Biblian jila part jis-k’a t’aqanakapansa mä sutiw uñsti, ukham yaqha sutix janipuniw utjkaspati. Akham hebreo qillqanakampi qillqatänwa יהוה (YHWH). Español arunxa akhamawa: *Jehová* jan ukax *Yavé*. ¿Uka sutix mä chiqanak-ti Biblianx uñstpacha? Janiwa, hebreo aru-ta nayra qillqatanakanxa niya paqallqu waranqa kutiw uñsti.

יהוה

*Hebreo aruta
qillqata Diosan
sutipa*

¿Kunjamsa Diosan sutipax uñjañasa? Jesucristox yatichaway-kistu uka mayisiwit amuyt’añäni. Akham sasaw qallti: “Alaxpachankir nanakan Awkixa, sutimax jach’añchatäpan” sasa (Mateo 6:9). Mä qhawqha tiempotxa, Jesusaxa akham sasaw Diosarux achikasina: “Awkiy, sutimax jach’añchatäpan” sasa. Ukatxa Inuqirixa alaxpachatpachwa jaysanitayna: “Nayax jach’añchawayxtwa, wasitampis jach’añchaskakiwa” sasa (Juan 12:28). Ukhamaxa, Diosan sutipax wali jach’apuniwa. Ukampisa, ¿kunatsa yaqhip Biblia jaqukipirinakax Diosan sutipa apsusax sutinchanakak uchapxi?

Inas pä amuyumpi ukham lurapxchi. Mayirix akäspawa, Diosan sutipxa janiw arsuñasakiti, kunattix janiw yatktanti kunjamsa arsusina sapxiw yaqhipanakaxa. Bibliax qillqaskän ukhaxa, nayra hebreo arunxa janiw akiri a, e, i, o, u qillqanakax utjkänti. Ukhamaxa jichhüranakanxa janiw khitis siskaspati

kunjamsa uka urunakanxa arsusina YHWH qillqanakaxa. Ukhamasti, ¿Diosan sutip janit arsañani? Amuyañataki, Bibliax qillqaskän uka urunakanxa Jesusan sutipax inas akham arsuschina: Yeshúa jan ukax Yehoshúa; ukampis janiw khitis ukhamapuniw siskaspati. Uraqpachanxa *Jesusan* sutipax sapaqat arurjama kunaymanit arsutawa. Nayrax uka sutix kunjamsa arsusina ukxa janiw yatktanti, ukampisa, Jesusan sutipxa jan payachasisaw aytastanxa. Ukhamarakiwa, jumatix yaqha anqa markaru sarasmaxa, yaqha arunakanxa sutimax mayjaw arsusispa. Ukhamaxa, Diosan sutipax kunjamxay nayrax arsuschina ukxa janiw yatktanti, ukampisa arsuskañasakipuniwa.

Payir amuyux akarakispawa, judionakan nayra amtaparjamaw yaqhipanakax Bibliatxa Diosan sutip apsupxi. Diosan sutipax janipuniw arsusiñapäkiti sapxiwa. Judionakax akir kama-chi jan sum amuyt'asaw ukham sapxiritayna: "Janiwa Tatitu [Jehová] Diosaman sutipxa inamayataki aytasitati, jupasti inamay sutip aytasirirux castigakipuniniwa" sasa (Éxodo 20:7).

Chiqäskapuniwa, aka kamachixa janiw Diosan sutipxa jan walitaki aytasitati siwa. Ukampisa, ¿janipunit respetompis aytasiñakaspa? Janiw ukham siskiti. Israelitanakaru Diosax Leyinak churatayna uka kamachinakaru taqi chuyma ist'iri jaqinakänwa hebreo aruta ("Antiguo Testamento") Biblia qillqirinakaxa. Jupanakaxa, ¿kuns kamachapxäna Diosan sutipampixa? Aytasipxapuninwa. Amuyañataki, Diosan sutipaxa walja salmonakan qillqatawa, uka salmonakxa walja jaqinakawa Diosaru yu-paychasax jach'at q'uchupxiritayna. Ukampisa, sutijat art'asipxapunim sasaw Jehová Diosaxa yupaychirinakaparux säna (Joel 2:32; Hechos 2:21). Ukhamasti, cristianonakaxa jan payachasisawa Diosan sutipxa wali respetompi aytasipxi, kunjamtí Jesusax art'askatayna ukhama (Juan 17:26).

Diosan sutip lanti sutinchanaka uchasaxa, Biblia jaqukipirinakax jan walpun lurapxi. Diosax wali jayankkaspa, janis utj-kaspa ukham jaqinakar amuyayapxi. Ukampis Bibliaxa, Jehová Diosampi 'sum parlasipxam' sistuwa (Salmo 25:14). Mä munat masimat amuyt'asma. Jan sutipa yatisasti, ¿jupax wali munat masijaw sasmati? Niya ukhamjamarakiwa. ¿Kunjamrak Diosampix sum parlassnasti Jehová sutiniñap jan yatkasinxaxa? Ukat

Diosan sutip jan aytasir jaqinakaxa, janiw yatipkiti kun sañs muni uka jach'a sutixa. ¿Kun sañs munpacha uka sutixa?

Moisés luqtiriparuxa ukwa Diosax qhanañchatayna. Moisesax Diosan sutip jiskt'käna ukhaxa, Jehová Diosax akham sänwa: “Kunañtix nayax munkäxa ukaruw nayax tuküxa” sasa (Éxodo 3:14, NM). Rotherham Bibliax sarakiwa: “Kuntix nayax munktxa ukaruw nayax tuküxa”. Ukhamaxa, amtanakapa phuqañataki kunaxay wakischispa ukaruw Jehová Diosax tukuspa.

Kunañti jumax munasma ukar tukusma ukhaxa, ¿kuns lurasma munat masinakam laykuxa? Mä munat masimatix wal usuntaspaxa, ¿janit mä suma qullirir tukusax qullt'kasma? Mayniti jan qullqin uñjasispaxa, ¿janit mä qamirir tukusax yanapt'kasma? Jisa. Ukampisa, janiw jumas nayas ukham taqi kunar tuksnati, jaqikitanwa. Jehová Diosax *taqi* kunatix wakiskaspa ukaruw tukuspa munañap phuqañatakixa, ukxa Biblianwa juk'at juk'at yatiqäta. Munasitanakaparux ch'amapamp yanapt'añ munapuniwa (2 Crónicas 16:9). Diosan sutip jan yatirinakaxa, Jehová Diosarusa, suma jach'a sutipsa janiw uñt'apkiti.

Ukhamaxa, Diosan sutipaxa Biblian uñstañapapuniwa. Kunapachati *Jehová* Diosan sutipax kun sañs munpacha uk yatxatxtan ukat yupaychañataki jan axsarasa sutip aytastan ukhaxa alaxpachankiri Awkisarux juk'ampwa jak'achastanxa.*

* Diosan sutipax kamsañs munpacha, kunatsa yupaychäwin aytasiñasa, uk juk'amp yatxatañatakixa Jehová Diosan Qhanañchirinakapan español aruta lurat akir folleto uñxatäta: *El nombre divino que durará para siempre*.


Daniel profetaxa Mesiasan jutañapat qillqatayna

DANIEL profetax 500 maranak janir Jesusax yurkäna ukapachaw jakasina. Ukampis kunjamatxa yatisispa kunapachas utt'ayasiñapäna Mesiasjama jan ukax Cristjam Jesusaruxa, ukwa Jehová Diosax qhanañchatayna. Daniel profetarux akham sänwa: “Jichhax akwa yatiñama, amuyt'añamaraki: Kunapachatix Jerusalén markax wasitata uñstayañataki sayt'ayañataki

arsutäni, [Jehová] Tatitur luqtatäki uka jach'a jilirin [jan ukax Mesiasan] puriniñapkama, paqallqu semananakaw pasaskaña-pa, suxta tunka payani semananka[mpiraki]" (Daniel 9:25).

Uñjañäni, kunjamats yatsna Mesiasan uñstäwipatxa. Nayraqatxa Mesiasan puriniñapatakixa kunapachats uka semanana-kax jakhusiñ qalltasiñapäna uk yatiñasawa. Profeciaxa, "Jerusalén markax wasitata uñstayañataki sayt'ayañataki arsutäni" ukhaw qalltän siwa. ¿Ukax kunapachas arsusina? Jerusalén wasitata uñstayañataki sayt'ayañataki aruxa, Artajerjes reyix 'pä tunka maranak markar apnaqkäna' ukhaw arsusina sarakiw

"PAQALLQ TUNKA SEMANANAKA"



Nehemiasaxa (Nehemías 2:1, 5-8). Nayra sarnaqäwít qillqirina-kaxa, 475 nayrír pachaw (n.p.) Artajerjesax apnaqañ qalltän sapxarakiwa. Ukhamax Artajerjes reyn pä tunka maranak mar-kar apnaqatapasti 455 n.p. mararuw wakt'i. Ukhamaxa, Mesías tuqit qillqatanakaxa 455 n.p. maratwa phuqasiñ qalltäna.

Uka marata Mesiasan puriniñapkamaxa qhawqha mara-sa pasañapäna ukwa Daniel profetax yatiyäna. Uka profeci-ax siwa, "paqallqu semananakaw pasaskañapa, suxta tunka pa-yani semanana[mpirakiwa]" sasa, ukhamasti 69 semanana-känwa. ¿Ukax qhawqha tiempüñapänsa? Janiw 7 urunakani semananakäkanti jan ukasti sapa semanax 7 maranakaninwa, ukhamwa yaqha Biblianakaxa saraki. Ukxa nayra judionakaxa sum yatipxäna. Amuyañataki, sapa paqallq maratwa jupana-kax mä mara samarapxiritayna (Éxodo 23:10, 11). Ukhamaxa, 69 semananak tuqit parli-ir profeci-axa, 7 maranakani 69 sema-nanak sañ muni, ukhamasti taqpachaxa 483 maranakawa.

Jichhax jakhsuñäni. 455 n.p. maratxa 483 maranak jakhu-qañasawa, ukhamax 29 jichha pach (j.p.) mararuw purtanxa, ukhaw Jesusax bautisasäna, ukhamatwa Mesiasar tuküna (Lu-cas 3:1, 2, 21, 22). * ¿Aka profeci-ax sumxay phuqasixa?

* Nayrír pachat parlasinxä, 455 marat 1 marakamaxa, 454 maranakaw utji. Ukatxa, 1 n.p. marata, 1 j.p. marakamax mä marakiw utji. Ukatsti 1 j.p. marat 29 j.p. marakamaxa, 28 maranakarakiwa. Ukhamasti taqpachax 483 maranakawa. Jesusarux 33 j.p. maranwa 'jiwayapxäna', ukax profeci-anxa 70 semanänwa (Daniel 9:24, 26). Juk'amp yatiñatakixa, uñxatasmaw es-pañol aruta akir qillqatanaka: *Prestemos atención a las profecías de Daniel*, 11 jaljapa, *Perspicacia para comprender las Escrituras*, vol. 2, 1014-1017 ja-nakama. Aka libronakax Jehová Diosan Qhanañchirinakapankiwa.

Jesucristo: jutaniw sat Mesías

JEHOVÁ DIOSAX profetanakarux yatiyataynawa jach'a jili-ri, Qhispiyiri Mesiasxata. Jupax khitipachas uk yatiñax janiw ch'amäkiti, profetanakax yuriwipatsa irnaqäwipatsa jiwäwi-patsa yatiyxapxataynawa. Muspharkañapuniwa, taqi uka pro-fecianakaxa Jesucristonwa phuqasitayna, kunjamtí arsuskäna

MESÍAS TUQIT PROFECIANAKA

LURÄWINAKA	PROFECÍA	PHUQASÍWI
Judá familiatawa	Génesis 49:10	Lucas 3:23-33
Mä virgen tawaqutwa yuritayna	Isaías 7:14	Mateo 1:18-25
David reyn familiapat juti	Isaías 9:7	Mateo 1:1, 6-17
Jehová Diosaxa, Wawajaw siwa	Salmo 2:7	Mateo 3:17
Juparux janiw iyawsapkänti	Isaías 53:1	Juan 12:37, 38
Mä asnur lat'xatataw Jerusalenar manti	Zacarías 9:9	Mateo 21:1-9
Mä munat masipaw aljanti	Salmo 41:9	Juan 13:18, 21-30
Kimsa tunk qullqiruw aljantapxi	Zacarías 11:12	Mateo 26:14-16
Juchanchirinakaparux janiw kutkatkänti	Isaías 53:7	Mateo 27:11-14
Isipsa surtiyasipxänwa	Salmo 22:18	Mateo 27:35
Ch'akkatatäkipansa sawkasipxänwa	Salmo 22:7, 8	Mateo 27:39-43
Janiw mä ch'akhapsa p'akjapkänti	Salmo 34:20	Juan 19:33, 36
Qamirinakampi chik imatäxänwa	Isaías 53:9	Mateo 27:57-60
Janir ñusantkipanwa jaktanxatayna	Salmo 16:10	Hechos 2:24, 27
Diosax kupixaparuw utt'ayi	Salmo 110:1	Hechos 7:56

ukhamapuniw phuqasitayna. Kunjamsa yuritayna, kunjamsa wawäkasina sarnaqatayna uka tuqit profecianak uñjañäni.

Profeta Isaíasaxa, David chachan familiapatwa Mesiasax jutani sasaw satayna (Isaías 9:7). Ukhamaskapuniñwa: Jesusax rey Davidan familiapatwa jutäna (Mateo 1:1, 6-17).

Miqueas sata, Diosan profetapaxa, “Belén Efrata” markanwa yurini ukat apnaqirirakiniwa sasaw satayna (Miqueas 5:2). Ku-

napachati Jesusax aka Uraqiru jutkāna ukhaxa, Israelanxa pä Belén markanakaw utjäna. Mayniristi alay tuqinkänwa Nazaret jak'ana, maynisti, aynach tuqinkarakinwa, Jerusalén jak'ana. Jerusalén jak'ankkāna uka Belén markaxa nayrax Efrata satänwa. Uka markanwa Jesusax yuritayna, ukhamatwa uka profeciax phuqasitayna (Mateo 2:1).

Yaqha profeciax akham sänwa, “Egiptot” mistuñapatakixa Diosaw Yuqaparux jawsani sasa. Ukax phuqasitaynawa, Jesusaxa wawākasin Egiptoru apatänwa, ukat mä qhawqha tiempotxa, kunapachati Herodes reyix jiwxatayna ukhawa, markaparu kutt'xäna. Ukhamwa uka profeciax phuqasitayna (Oseas 11:1; Mateo 2:15).

200 jananxa, “Profecía” sat p'iqinchaw utji, uka Bibliankir jisk'a t'aqanakanxa uñacht'ayistuwa kunjamsa Mesías tuqitxa profecianakaxa arsusina. Uka qillqatanaka uñxatasaxa, “Phuqasiwi” sata p'iqinchäwin jisk'a t'aqanakapwa uñxatarakita. Ukhamatwa, yatita Diosan Arupaxa chiqäta.

Aka jisk'a t'aqanaka uñakipkasaxa janiw armt'asitati, uka profecianakax qillqaskäna uka marata Jesusan yuriñapkamaxa walja maranakäxänwa. Jesusax sataynawa: “Phuqhasiñapänwa taqi kunatix naya tuqitx qillqatäki Moisesan leyipana, profetanakan libronakapana, ukhamarak Salmonakansa ukanakaxa” sasa (Lucas 24:44). Kunjamti Bibliaman uñjktaxa, taqi uka profecianakaxa phuqasipuniwa.

Awkita, Yuqata, qullan ajayumpita chiqa yatichäwi

TRINIDAD sata yatichäwiru iyawsirinakaxa, Awkisa, Yuqasa, Qullan Ajayusa, mayakipxaspasa ukat kipkakipxaspasa, wiñayatpachasa utjasipxaspa, kimpachasa taqi kunsä lurapxaspa ukham sasaw sapxi. Ukatwa, Trinidad yatichirinakaxa akham sapxi: Dios Awki, Dios Yuqa, Dios Qullan Ajayu sasa, kimpachanisti mä Diosakikaspas ukhama.

Uka yatichäwiru walja iyawsirinakaxa janiw uka tuqit sum qhanañchañjamäkit sapxiwa. Biblian ukham yatichpach sapxarakiwa. Ukampisa, Diosan Arupanxa janipuniwa *Trinidad* arux mä kutis uñstkiti. ¿Biblianxa Trinidad tuqit yatichiri mä jisk'a t'aqasa utjpachati? Ukatakixa, Trinidad yatichañataki ay-tasit mä jisk'a t'aqa uññañäni.

“ARUSTI DIOSÄNWA”

Juan 1:1 siwa: “Kunapachatix taqi kuna qalltkäna ukkhaxa, Arux utjapuninwa; khä Arusti Diosampinwa, uka Arusti Diosänwa.” sasa. Ukat 14 jisk'a t'aqanxa, apóstol Juanax “uka Arusti” Jesusaw sasaw sum qhanañchi (Juan 1:14). Ukhamasti, niyakixaya uka jisk'a t'aqanxa “uka Arusti Diosänwa” sis-chixa, ukatwa yaqhip Biblia liyt'irinakaxa, Awkisa Yuqasa mä Diosakikaspasa ukham amuyapxi.

Yatiñasarakiwa, uka qillqatanakasti griego arutwa nayraqat-xa qillqasäna, ukat qhiparuw yaqha arunakarux jaqukipasiski. Yaqhip yatxatata Biblia jaqukipirinakaxa “uka Arusti Diosänwa” sasaw ukäwjarux uchapxi, ukampisa yaqhipanakax mayjwa ukawjar uchapxi. ¿Kunatsa? Bibliax qillqaskän uka griego arut yatxatasaw yaqha arunakampi jaqukipapxi, ukatwa ukawjarux akham uchapxi: “Amtax [jan ukax Arux] mä diosänawa”, ukat “uka Arusti diosänwa” sasa (*Juan. Texto y Comentario*, de J. Mateos y J. Barreto, lectura alternativa; *Cuarto Evangelio. Cartas de Juan*, de J. J. Bartolomé). Aka qillqatanak uñxatasaxa, uka Arux janiw Dios pachpäkäpuniti.* Jan ukasti, uka jisk'a t'aqanxa uñachayistuwa, Jehová Diosan wawanakap taypinxa uka Arux jilirítapa, ukatwa “dios” sataxa. Akanxa “dios” arux jisk'a “d” qillqampi qillqatawa, ukax “ch'amani” sañ muni.

JUK'AMPI YATXATASKAKIÑÄNI

Bibliax qillqaskäna uka griego arxa janiw taqinis yatktanti. Ukhamasti, ¿kuntí apóstol Juanax sañ munkäna ukxa kunjamatarak yatsnasti? Uk amuyt'añäni, mä yatichirix yatiqirina-

* Juan 1:1 jisk'a t'aqat juk'amp yatxatañatakixa, Jehová Diosan Qhanañchirinakapan lurata akir revista uñxatt'äta, *La Atalaya* del 1 de noviembre de 2008, 24-25 jananaka.

kaparu sum yatichaspa. Ukatsti mä juk'arux yatiqirinakaxa uka yatiqatatxa may may amuyxapxaspa. ¿Kuns kamachapxañapa? Juk'ampi yatxatañatakix yatichiriruw jiskt'asipxañapa. Ukhamatwa sum yatxatapxaspa kunti yatichirix siskän ukxa. Ukhamarakiwa, Juan 1:1 jisk'a t'aqat sum yatxatañatakix apóstol Juanan libropwa uñxatañasa. Juk'ampi yatxatañatakixa, uka libron Jesusxat yatichäwinakapa thaqtañäni. Uk uñxatasawa yatñäni kunsapóstol Juanax sañ munäna.

Kunsa apóstol Juanax qillqatayna Juan 1:18 uk uñjarakiñäni: "Janiw kunapachas [Taqi ch'amani] Diosarux khitis uñjkiti" sänwa. Ukampisa, Diosan Yuqapa, Jesusarux jaqinakax uñjapxänwa, apóstol Juanax siwa: "Khä [Jesús] Arusti janchiruw tuku, jiwasanak taypinwa jakarakina. Jiwasanakax uñjtanwa jach'a kankañapa" sasa (Juan 1:14). Ukhamasti, ¿kunjamaraki Diosan Yuqapaxa taqi ch'amani Dios taypinkiw sisnasti? Uxarux Juanax "uka Arusti Diosampinwa" sasaw qhanañchi. ¿Kunjamarak maynix jupäskaspa ukat jupampiskarakispasti? Uxkarusti, alaxpachankiri Awkita Jesusax yaqhätapwa Juan 17:3 sum qhanañchistu, Jesusax awkiparuxa 'sapa chiqpach Dios' sasaw säna. Juanax qillqatap niya tukuykasaxa akham sänwa: "Ukampis akanakax qillqatawa Jesusax Cristötap iyaw-sapxañamataki ukhamarak Diosan Yuqapätapsa" sasa (Juan 20:31). Uka qillqatanxa janiw siskiti Jesusax Diosaw sasa, jan ukasti Diosan Yuqapaw siwa. Juan 1:1 ukxa kunjamsa amuyañasa ukwa Juanan taqi qillqatanakapaxa qhanañchistu. "Uka Arusti" jan ukax Jesusasti mä "diosawa", Diosan wawanakap taypinxa jiliriwa, ukampisa janiw taqi ch'aman Diosjamäkiti.

YAQHANAKAMPI YATXATASKAKIÑÄNI

Yatichirxat amuyt'askakiñäni. Yatichiriru ist'kasasa yaqhip yatiqirinakax payachasisipkakispaxa, ¿kuns lurapxañapa? Yaqha yatichiriruw jiskt'asipxaspa. Uka yaqha yatichirixa nayrür yatichirin yatichäwinakaparux ukhamäskapuniw saspaxa, niya taqiniw sum amuyxapxaspa. Ukhamarakiwa, Jesusampi taqi ch'aman Diosampixa janiw kikipäpkiti, apóstol Juanan uka tuqit qhanañchkatasax payachasisikañänixa, yaqha qillqirin arunakap uñxatañasawa. Ukhamax Mateon qillqatanakap

uñxatañäni. Jupax Jesusan arunakapwa akham sas qillqatayna: “[Aka urunakan tukusiñapax] kuna horasäkanitix jan ukax kuna urükanitix ukxa janiw khitix yatkiti, ni alaxpachankir angelanakasa ni Diosan Yuqapasa, jan ukasti Dios Awki sapakiw yati” sasa (Mateo 24:36). ¿Kunjamsa ukax uñachayistu Jesusax jan taqi ch’amani Diosätapxa?

Awkixa juk’ampwa Yuqat sipansa yati sasaw Jesusax satayna. Ukampisa, Jesusati taqi ch’amani Diosäspaxa, Awkipjamwa yati tirakispaxa. Ukhamatwa yattanxa Yuqampi Awkimpixa jan kikipäta. Ukampisa, yaqhipanakaxa inas akham sasipkakchispa: “Jesusax pä jakawinñwa: mayax alaxpachana ukat mayax aka uraqina, ukat aka uraqinkäna ukhawa ukham parlawayi” sasa. Ukax chiqäkaspas ukham sañäni. Jichhasti, ¿qullan ajayux kawkinikiw sisnasa? Qullan ajayuti Awkjama taqi ch’amani Diosäspänxa, ¿kunatsa Jesusaxa Dios awki sapakiw ukx yati saspänxa? Janiw qullan ajayutxa aytaskänti.

Bibliat juk’ampi yatxataskakitaxa yaqha qhanañchir jisk’a t’aqanakwa jikxatäta. Taqi uka yatichäwinakaxa: Awkita, Yuqata, qullan ajayumpita kunatix chiqäki ukanakwa qhanañchätamxa (Salmo 90:2; Hechos 7:55; Colosenses 1:15).

¿Cristianonakax cruz apnaqapxañapati?

MILLÓN millón jaqinakaw cruzarux wal respetapxi, yupaychapxaraki. *Enciclopedia Hispánica* qillqatata siwa, yupaychäwinakanxa cruzax “wali apnaqatapuniwa”. Ukampisa, ¿chiqap cristianonakax cruz apnaqapxañapati?

Nayraqatxa ak yatiñasawa: Jesucristox janiw mä cruzan jiwkänti. “Cruz” sas jaqukipapxi uka arusti griego arunxa *staurós* satawa, ukasti “poste jan ukax sayt’at lawa” sañ muni. Ukampisa, uka griego aruxa, “janipuniw krusjata *pä* law sañ muniki [...] [Machaq Testamento] griego arunxa janipuniw mä chiqansa pä lawat parlkiti” (*The Companion Bible*).

Jesugar ch’akkatapkatayna uka lawatakixa yaqha aruw utji, ukasti *xylon* sataw griego arunxa (Gálatas 3:13).

Kunatsa aliq mä lawaruki jaqinakar jiwayapxiritayna ukwa Hermann Fulda yatxatat chachax akham sas qhanañchatayna: “Taqin uñjkata jiwayañ lugaranakanxa, awisax janiw quqanakax utjirikänti. Ukatwa, aliq mä lawak sayt'ayapxiritayna, uka lawaruw lunthatanakaru amparat warkkatapxiritayna jan ukax ch'akkatapxiritayna, awisax kayumppachata” sasa (*Das Kreuz und die Kreuzigung*).

Ukampisa, Diosan Arupanwa sum qhanañchistu uka tuqitxa. Apóstol Pablox siwa: “Cristox leyin maldicionapatwa qhispiyistu, jupax juchanakas layku maldecitarakīnwa, Qillqatanxa akham siwa: ‘Maldecitāpan taqi khititix mä lawaru warkkatatāki ukaxa’ sasa” (Gálatas 3:13). Pabloxa Deuteronomio 21:22, 23 jisk'a t'aqanakatwa uka arunakxa aytasitayna, ukanxa janiw mä cruzat parlkiti, jan ukasti, mä quqat jan ukax mä lawat parlasi. Lawan jiwirinakaxa ‘maldecitānwa’. Ukatpī, mä cristianoxa janipuniw utaparuxa Cristor ch'akkatat uñnaqanakakxa apkatasīñapākiti.

Uka tiemponakat qillqatanakax utjarakiwa. Jesusan jiwāwipata, kimsa patak maranak saraqatkamaxa, cristianoakax janipuniw yupaychāwipanxa cruz apnaqapxirikataynati. Ukatxa, Constantino sat jach'a apnaqīriwa, khā 300 maranakanxa, saranukut k'ari cristianoakampi chikachasitayna. Ukhatpachwa uka k'ari yupaychāwipanxa cruz apnaqañaru wiytatayna. Kuna amuyumpixay Constantinox uk uñstaychīna, ukampisa, janiw Jesusax cruzan jiwkānti. Chiqasa, cruzaxa Diosar jan yupaychir jaqinakampi uñstayatawa. Catoliconakan mä qillqatapanxa akham siwa: “Cruzax uñstiwa janīra Cristox jutkāna uka nayra sarnaqāwinakansa, ukhamaraki jan Cristor arkir sarnaqāwinakansa” sasa (*New Catholic Encyclopedia*). Cruzax intiru yupaychañatakiwa ukat wachuqañatakiwa jan ukax axtkañ q'añu lurañatakiwa apnaqapxiritayna sasaw yaqhip yatxatatanakaxa sapxaraki.

Ukhamasti, uka tiemponxa, ¿kunatsa “cristianot sirinakaxa” cruzax apnaqapxāna? Amuyatatxa, yupaychāwiparu jan k'aki makatapxāñapatakiwa ukham cruz apnaqañ wiytapxapachāna. Ukampisa, idolonakar yupaychañax janiw walikiti siw Bibliaxa (2 Corintios 6:14-18). Janipuniw kuna kasta uñtani

diosanaksa yupaychañäkiti sarakiwa (Éxodo 20:4, 5; 1 Corintios 10:14). Ukatpï chiqap cristianoja janipuniw yupaychäwipanja cruz apnaqkiti.*

* Cruzat juk'ampi yatxatañatakixa Jehová Diosan Qhanañchirinakapan español aruta lurata akir libro uñxatäta, *Razonamiento a partir de las Escrituras*, 91 janat 95 janakama.

Santa Cena: Diosar jach'añchir amtäwi

CRISTIANONAKAXA Jesucriston jiwäwipa amtapxäta satäpxiwa, ukasti "Santa Cena" satarakiwa (1 Corintios 11:20). Uk amtañaxa, ¿kunatsa wali wakisirixa? ¿Kunapachasa amtasiñapa? Ukatxa, ¿kunjam amtasiñapasa?

33 j.p. maranwa judionakax Pascua amtasipkäna, uka arumaw Jesucristox uka cena utt'ayatayna. Pascua fiestxa maran mä kutikwa amtapxirina, nisän (judionakan calendariopa) phaxsita 14 urunak saraqataru. Judionakaxa uka uru tantiyañatakixa suyapxirinwa panqarir phaxsinakana kunapachatï urumpi arumampixa chik chikaru jaljaski uka uru. Uka uru jak'ankiri wawa phaxsitwa, nisän phaxsix jakhusiñ qalltäna. Pascua uruxa 14 urunak nisän phaxsita saraqataruw wakt'irina, Inti jalantxaru.

Uka arumawa, Jesusax apostolanakapampi Pascua amtapxatayna. Judas Iscariote chacharu khi-tanukxasawa Jesusax Santa Cena utt'ayäna. Judionakan Pascuap lantiwa uka cenax uñstayatäxäna, ukatwa maran mä kuti amtasiñapäna.

Kunanakas lurasitayna, uka tuqitxa Mateow akham sasa qillqatayna: "Jesusax t'ant'a irtasinwa yuspagaräna. Pachjasinsti discipulonakaparurakiw churäna: 'Man-q'apxam; akax nayan jan-chixawa' sasa. Ukxarusti mä copa astaraki. Diosar yuspagarasinsti jupanakaruw churarakï, akham sasa: 'Jumanakasti taqini



aka copat umt'apxarakim. Akasti nayan wilaxarakiwa. Ukasti [machaq] arust'äwiwa, kawkiritix wartatäkani walja jaqinakar juchanakapata qhispiyañataki'" sasa (Mateo 26:26-28).

Chiqapuniw Jesusax t'ant'xa jañchiparu tukuyän ukat vinsa wilaptayäna sasaw yaqhipanakax sapxi. Ukampisa, Jesusan jañchipax janiw kuna kamacht'atäkänsa kunapachatix t'ant'a churkän ukhaxa. Ukhamasti, ¿chiqapuniw apostolanakax Jesusan jañchipsa wilapsa manq'apxän sisnati? Janiwa, ukax jaqir manq'antañamp sasispawa, ukax wali jach'a juchawa, Diosan kamachipa p'akintañawa (Génesis 9:3, 4; Levítico 17:10). Lucas 22:20 jisk'a t'aqansti Jesusax sänwa: "Aka copax machaq arust'äwiwa wilax tuqi, akasti jumanakan askimatakiw wartasi" sasa. ¿Chiqapuniti uka copax 'machaq arust'äwiru' tuküna? Janiwa, mä arust'äwixa mä amtäwiwa, janiw uñjksnati.

Ukhamax t'ant'as vinosa ak amuyañatakiwa: t'ant'axa Criston jan juchani jañchip sañ muni. Jesusax Pascuat jilt'ir jan levaduran t'ant'a irtäna (Éxodo 12:8). Jila partix Biblian levadurax juchampi, jan wali luräwinakampi sasiwa. Ukhamax Jesusax jan juchan cuerpopwa luqtäna, ukwa t'ant'ax sañ munäna (Mateo 16:11, 12; 1 Corintios 5:6, 7; 1 Pedro 2:22; 1 Juan 2:1, 2).

Vinosti Jesusan wilap sañ muni, ukampiw machaq arust'äwixa utt'ayasina. Jesusaxa "jaqinakar juchanakapata qhispiyañataki[wa]" wilaj wartasixa sasaw satayna. Ukhamipanwa, yaqhip jaqinakaxa Jehová Diosan nayraqatapanxa q'umäpxi, ukhamaraki Diosampis machaq arust'äwirux mantapxi (Hebreos 9:14; 10:16, 17). Uka arust'äwi utjatapatwa 144.000 jaqinakaxa alaxpacharu sarapxi. Ukanxa apnaqirinakäpxaniwa ukat sacerdotenakjam luqtiripxarakiniwa, taqi jaqinakan askipataki (Génesis 22:18; Jeremías 31:31-33; 1 Pedro 2:9; Apocalipsis 5:9, 10; 14:1-3).

¿Khitinakas Criston jiwatapat sapa mara amtaski uka tantachäwinxa t'ant'a manq'apxaspa ukat vinsa umt'apxaspaxa? Kunjamti yatiqktanxa, khitinakatix machaq arust'äwir mantapki, mä arunxa, alaxpacharu sarapkani ukanakakiw t'ant'a manq'apxaspa ukat vinsa umt'apxaspa. Diosan qullan ajayupaw alaxpachan apnaqirinakjam ajllitätapxa jupanakaru sum

qhanañchi (Romanos 8:16). Uka jaqinakaxa Jesusamp chika Apnaqañatakiwa mä arust'awiru mantapxi (Lucas 22:29).

Ukhamasti, ¿khitinakatix kusipach Uraqin jakasipkani ukanakax kuns lurapxi? Kunjamti, Jesusax siskänxa, Santa Cénaruw sarapxi, janis vino umapkchisa t'ant'a manq'apkchisa ukar sarasax respetwa uñacht'ayapxi. Jehová Diosan Qhanañchirinakapax sapa maraw Santa Cena amtapxi, inti jalantxaru, uka jayp'utwa nisán phaxsin 14 urupax qallti. Uraqpachanxa mä qhawqhanikiw alaxpachar saririnakaxa, ukampisa uka amtäwix wali wakisiriw Jesusan taqi arkirinakapatakixa. Jehová Diosampi Jesucristompixa walpunwa munasipxistu, uka tuqita lup'ín urasawa ukapachaxa (Juan 3:16).

“Alma”, “ajayu”: ¿uka arunakaxa kamsañpuns mumpacha?

KUNAPACHATİ *alma*, *ajayu* uka arunak parlir ist'irita ukhaxa, ¿kuns amuyirita? Yaqhipax uka arunak ist'asaxa, kuna jan uñjkañasa jiwax manqhan jakkaspax ukat janis jiwirikaspa ukham amuyapxi. Jiwxtan ukhaxa, uka jan uñjkañaxa cuerpot mistusinxaxa yaqha chiqan jakaskakispasa ukham amuyapxi. Niya taqiniw ukham amuyapxi, ukatwa yaqhipanakax kunapachati Bibliat yatiqapki ukhaxa wal muspharapxi. Ukhamasti, ¿alma, ajayu uka arunakaxa kamsañs Diosan Arupanxa mumpacha?

BIBLIANKIRI “ALMA” ARU

Almata nayraqat parl'tasiñäni. Jumas amtaskpachätawa, Bibliax qillqaskän ukhaxa hebreo aruta, griego aruta qillqatänwa. Biblia qillqirinakaxa, alma tuqit qillqasaxa, *néfesch* hebreo aru uchaxatayna, ukat griego arunsti *psyké* sat aru uchaxarakitayna, uka paypacha arunakasti niya kimsaqallq patak kutiw Biblianx uñsti, ukatxa *Traducción del Nuevo Mundo* sat Bibliansti “alma” sapuniw jaqukipasi. Aymar Biblianxa awisax “alma” sasaw jaqukipapxi, ukatsti “jaqi”, “jumanaka”, “khititi”, “mayni”, “amaya”, “animal”, “wawa”, “jakaña”, “jakäwi” sasarakiw alma lantxa uchaxpi. Ukhamasti, *néfesch* ukat *psyké* arunakax Biblianxa akham sañ muni: 1) jaqinaka, 2) animala-

naka, jan ukax 3) jaqinakan, animalanakan jakäwipa. Uka tuqinakat parliir jisk'a t'aqanak Biblian uñxatañäni.

Jaqinaka. 'Noé chachax arca luraskän ukhaxa', "uka arcans-ti [kimsaqallq *psykjé*] kimsaqallqunikirakiw uma tuqi qhispiyasipxäna" (1 Pedro 3:20). Akawjanxa *psykjé* griego aruxa jaqinakjama jaqukipatawa, uka kimsaqallqunisti Noé, warmipa, kimsa yuqanakapampi, kimsa yuxch'anakapampinwa. Ukatxa, Éxodo 16:16 qillqatanxa, akham kamachiw israelitanakar churasina: "Jumanakasti [maná] apthapisipxätawa qhawqhtix manq'añataki munaphta, qhawqha jaqipktatix [*néfesch*] utanakamanxa ukhamarjama". Mä arunxa, qhawqhanikanti familianxa ukatakjamaw maná t'ant'a apthapipxañapäna. Yaqhip chiqanakanxa *néfesch* ukat *psykjé* arunakaxa, jaqi ukat jaqinaka sas jaqukipatarakiwa akir qillqatanakanjama, Génesis 2:7; 46:18, Josué 11:11 ukat Ezequiel 18:4.

Animalanaka. Bibliax inuqäwita parlasaxa siwa: "Ukxarux Diosax sarakinwa: 'Umanxa taqi casta animalanak [*néfesch*] utjpan, ukhamarak uraqinx altoqata thuqnaqiri jama-ch'inakas utjarakpan' sasa. Diosasti sarakinwa: 'Aka uraqinx taqi casta animalanak [*néfesch*] utjpan: uywañ animalanaka, ukhamaraki pampankir animalanakasa, ukhamaraki uraqinjam qatatnaqtir animalanakasa. Ukatsti ukhampuniw lurasina" (Génesis 1:20, 24). Aka qillqatanakanxa chawllanakarusa, uywanakarusa, pampankir animalanakarusa "almanaka" satawa. Animalanakaxa aka yaqha qillqatanakanxa *néfesch* satara-kiwa, Génesis 9:10, Levítico 11:46 ukat Números 31:28.

Jaqin jakäwipa. Awisanakaxa, *néfesch* ukat *psykjé* arunakaxa jaqin jakäwip sañ munaraki. Jehová Diosan arupanxa siwa: "Ukampis uka usuchjat warmitix jiwxchi ukaxa, pagañapawa jakañatxa [*néfesch*] jakañaraki" sasa (Éxodo 21:23). ¿Maynir jawayasapän ukhaxa kuns pagañapänxa? Mä jakäwitxa mä jakäwi pagasiñaparakiña. Yaqha uñjarakiñäni, kunapachatix Raquel warmixa Benjamín wawapa ususkäna ukhaxa, "jupax jiwirjamäxänwa [*néfesch*]", mä arunxa, Raquela [*néfesch*] jakäwipaxa saraqkaspasa ukhamänwa (Génesis 35:16-19). Ukhamasti, Raquelax janiw jakxänti. Jichhax Jesusan arunakapat amuyt'arakiñäni: "Nayätwa suma awatirixa. Suma awatirix

jakañapwa [*psykjé*], apt'asi ovejanakap laykuxa" (Juan 10:11). Jesusax jaqinak laykuwa *psykjé* jan ukax jakäwip luqtasi-tayna. Taqi uka qillqatanakanxa qhanpachwa uñxattanxa *né-fesch* ukat *psykjé* arunakaxa jaqinakan jakäwip sañ munatap-xa. "Alma" tuqit yaqha uñacht'äwinakaxa akanakarakispawa, 1 Reyes 17:17-23, Mateo 10:39, Juan 15:13 ukat Hechos 20:10.

Bibliat yatxataskakıtaxa, yatiqätawa, janiw mä chiqansa *né-fesch* ukat *psykjé* tuqit parlır arunakax "jan jiwiri" "wiñaya" sañ munkiti, jan ukasti almax jiwiriw sistuwa (Ezequiel 18:4, 20). Kunapachatix Bibliax "amaya" jan ukax jiwat alma siski ukha-xa almax jiwirikiw sañ muni (Levítico 21:11).

¿KUNAS AJAYUXA?

"Ajayutxa" kampsachas Bibliax uk jichhax uñjarakiñäni. Ya-qhipanakatakixa "almäkaspara" ukhamawa. Ukampisa janiw ukhamäkiti. Bibliaxa, "ajayumpi" "almampixa" yaqha yaqhaw siwa. ¿Kuna tuqitsa yaqha yaqhäpacha?

Biblia qillqirinakaxa, "ajayu" tuqit qillqasax hebreo arun-xa *ruáj* sasaw uchapxatayna, griego arunsti *pnéuma* sarakiw uchapxatayna. *Ruáj*, *pnéuma* arunakax "ajayu", "samana", "ch'ama", "jakiri", "chuyma", "jakaña" sas jaqukipataw aymar Biblianxa. Uka arunakax kun sañs muni ukxa Bibliaw qhanañ-chistu. Ukatakix Salmo 104:29 uñjañäni, ukanxa Jehová Diosarux akham siwa: "Samanap [*ruáj*] apaqkta ukapachasti jiw-xapxiwa, laq'aruw tukxapxaraki" sasa. Ukati Santiago 2:26 qillqat uñjarakiñäni, ukanx akham siwa: 'Janchix jan ajayum-pix [*pnéuma*] jiwatawa' sasa. *Ruáj* ukat *pnéuma* arunakax ja-niw aliq samanakikiti, janiw 'alma' sañs munkarakiti, jan ukas-ti cuerpor jakayir ch'ama sañ muni. Jan uka ch'amanixa, mä arunxa, jan ajayunixa cuerpox jiwxaspawa. Ukati Diosax Uma Juiciotxa akham sänwa: "Mä jach'a jallu apayani, ukasti taqi aka uraqpachwa chhaqtayani, ukhamarak aka uraqinx taqi kunatix jakki [*ruáj*] ukxa q'alwa t'unjarakini" sasa (Génesis 6:17; 7:15, 22). Ukhamax "ajayux" cuerpor jakayir jan uñjkañ ch'amawa, ukampiw animalanakasa jiwasanakas jaktanxa.

Ajayuxa janiw almäkiti. Ajayumpipuniwa cuerpox jakixa. Mä radioxa pilamp lusampipuniwa naktixa, ukhamarakiwa

cuerposaxa. Uka tuqita amuyt'añäni. Kunapachatí radiox pilaniki ukhaxa wali sum tukart'ixa. Jan pilanakaniki ukhas-ti janiw naktañ munxiti. Ukhamarakiwa lusampi naktir jach'a radionakasa. Pilampi, lusampi sasirakiwa ajayuxa: ukaw jaka-yistu. Ajayux janiw kusiskaspasa ni llakiskaspasa, janirakiw kuns amuykarakispasa. Ukhamasti Ajayuxa janiw mä jaqjamä-ki. Ukampisa, cuerponakasax jan uka ajayunixa, mä arunxa, jan uka jakayir ch'amanixa "jiwxapxiwa, laq'aruw tukxapxara-ki", kunjamtí salmonak qillqirixa siskäna ukhama.

Jiwatatsti "laq'äkäna [uka cuerpox] laq'aruw kuttxani, kun-jamäkäntix nayrax ukhama, ajayusti Diosan ukarurakiw kutt'xarakini, khittitix churkäna ukaru" siw Eclesiastés 12:7. Ku-napachatix ajayux jan ukax cuerpor jakayir ch'amax jan cuer-ponkxi ukhaxa, jiwxtanwa, laq'aruw kutt'xtanxa. Ukhamara-kiwa, cuerpor jakayir ch'amax Diosarurakiw kutt'xi (Job 34: 14, 15; Salmo 36:9). Uka ch'amax janiw alaxpacharu makatkiti. Jan ukasti, jiwxtan ukhaxa Jehová Diosakiw yati jaktañassa, jan jaktañassa, ukwa sañ muni. Mä arunxa Diosan amparapanks-nasa ukhamawa. Diosan ch'amapakiwa mayniruxa wasitat jak-tayañatakixa ch'amsa jan ukax ajaysa churaspa.

¡Diosan amxäsita taqi jiwatanakax jaktanipxaniw siski uka arunakaxa walpunwa chuymx qhanartayistu! (Juan 5:28, 29.) Jaktayañ urasax purinini ukhawa Jehová Diosaxa jiwatanaka-takix machaq cuerponak lurani, ukatsti cuerpor jakayir ch'a-mampiwa jiwatanakaruxa jaktayani. ¡Wali kusiskañäniwa!

"Alma" ukat "ajayu" arunakat juk'ampi Bibliat yatxataña-takixa, *¿Qué nos sucede cuando morimos?* sat folletwa uñ-xatäta 32 janat 36 janaka-ma, ukatsti *Razonamiento a partir de las Escrituras* sat li-brompi 136 janat 140 ja-nakamwa uñxatarakita, aka qillqatanakasti Jehová Dio-san Qhanañchirinakapan español arut luratawa.



Seol, Hades arunakaxa, ¿kun sañs muni?

BIBLIAXA hebreo arumpita griego arumpita qillqatänwa, ukansti, paqallqtunka jila kutiw, *sche'óhl* hebreo arumpi ukat *háides* griego arumpix uñsti, ukasti jiwañ tuqitwa parli. Yaqhip Biblianakanxa “sepulcro”, “infierno”, “manqhapacha”, “amay imäwi”, “jiwatanak taypi” ukham jaqukipatawa, ukat niya ukham yaqha arunakampiru jaqukipatarakiwa. Ukampi-sa, yaqha arunakanxa janiw *sche'óhl* hebreo arutakisa, *háides* griego arutakis arux utjkiti. Ukatwa uka arunakaxa *Traducción del Nuevo Mundo* sat Biblianxa, español arut akham sas qillqapxi: “Seol” ukat “Hades”. Jichhasti, ¿kamsañsa uka arunakaxa munpacha? Biblian kamspachasa uk uñjañäni.

Eclesiastés 9:10 siwa: “Jumax sepulcror [*Seol*] sarkätas ukanxa janiw kuna lurañas utjkiti, kuna lup’iñasa, uñt’añasa, janirakiw yatiñaniñasa utjkiti”. ¿Ukhamax Seol arux sapa amay imäwi sañti munpacha? Janiwa. Kunapachatí Bibliax sapa amay imäwit parlki ukhaxa janiw *sche'óhl* ukat *háides* arunakaxa uchkiti jan ukasti yaqha arunakwa uchi (Génesis 23:7-9; Mateo 28:1). Seol arux janirakiw walja jiwatanakaru mä imäwuru allintapxi uk sañ munkiti, mä arunxa familiapachataki wakichat panteonäkaspas ukhama (Génesis 49:30, 31).

Ukhamaxa, kunapachatí Diosana Arupaxa “Seol” jan ukax “Hades” arunakat parlaski ukhaxa, ¿kamsañs munpacha? Mä imäwuru walja jiwatanakaru allintapxi ukat sipansa wali jach’ākaspas ukham sañ muni. Ukatakixa Isaías 5:14 uñxatañäni, ukanxa, Seolax jach’a lugarākaspasa ukhamawa, jiwañasti [*sche'óhl*] “lakapxa ansatati markpacharu [...] manq’antañataki” siwa. Ukhamasti uka “amay imäwixa [*sche'óhl*]” walja jiwatanaksa manq’thapkaspa ukhamawa, janipuniw sisthapkiti, munaskakiwa (Proverbios 30:15, 16). Janiw cementeriojam phuqt’irikiti, jan ukasti ‘janipuniw kunapachas sisthapkiti amay imäwixa [*sche'óhl*]’ (Proverbios 27:20). Ukhamasti, Seol, Hades ukanakaxa janipuniwa phuqt’kaspiti. Janiw mä cementerio sañ munkiti.

Kunapachatî Biblian jaktañxat yatiqtanxa, ukhaw Seol, Hades arunakxa sum amuyxtanxa. Kunapachatî jaktanir jiwatanakat Diosan Arupax pärlki ukhaxa, Seol, Hades ukankapxiw siwa (Job 14:13; Hechos 2:31; Apocalipsis 20:13).^{*} Jehová Diosar yupaychirinakas jan yupaychirinakas ukankapxiw sarakiwa (Génesis 37:35; Salmo 55:15). Ukatwa 'ñanqha jaqinakasa, aski jaqinakasa' jaktanipxani sixa (Hechos 24:15).

^{*} Jan jaktanir jiwatanakaxa janiw Seol jan ukax Hades ukankapkiti siw Bibliaxa, jan ukasti Gehena ukankapxiw siwa (Aymar Biblianxa '*infierno*' sas jaqukipatawa, Mateo 5:30; 10:28; 23:33).

¿Kunas Taripäw Uruxa?

¿TARIPÄW Uruxa jan ukax Juicio Urux kunjamaniw sasmasa? Millón millón almanakaw Diosan nayraqatapanxa sapa mayni taripatäpxani sasaw yaqhipanakax sapxi. Taripatäsínxa, mayninakaxa alaxpach qhapaq marka katuqapxani, ukat yaqhanakasti infiernon wiñay wiñay t'aqhisiyatäpxaniw sapxarakiwa. Ukampisa, uka Taripañ Uruxa janiw ukhamäkanit siw Biblianxa, janiw khatatiñ urunakäkaniti jan ukasti kusiñ urunakäniwa, taqi kunas machaqaptayatäniwa.

Apocalipsis 20:11, 12 jisk'a t'aqanakanwa uka Taripañ Urutxa apóstol Juanax akham sasa qhanañchi: "Ukatsti mä jach'a janq'u trono uñjarakta, ukhamarak ukan qunt'atäkäna uksa. Jupa nayraqatansti alaxpachas akapachas tukusxänwa, janirakiw kuna chiqas jupanakataki utjixänti. Jiwatanakarus-ti jisk'arus jach'arus jupan nayraqatapan sayt'ata uñjta. Libronakasti jist'aratänwa, ukhamarak yaqha librosa. Uka librosti jakañ libro satawa. Jiwatanakasti luräwinakaparjam uñjatäpxänwa, kunjämti uka libronakan qillqatakänsa ukhamaru". ¿Khitisi uka trononkiri Taripirixa?

Jehová Diosaw jaqinakan jach'a Taripiripaxa. Ukampis yaqhampi taripayani siwa. Hechos 17:31 qillqatanxa Pablox siwa: "Diosasti mä uru wakichi, uküruw chiqa kankañampi akapacharux taripani kawkir jaqtix jupax ajlliski uka tuqi"

sasa. Uka Taripirix jaktanit Jesusawa (Juan 5:22). Ukampisa, ¿kunapachas Taripaw Urux qalltani, qhawqha tiempünisa?

Satanasan ñanqhachapapar tukjir Armagedón sata ch'ax-wäwi pasatatwa Taripañ Urux qalltani siw Apocalipsis li-broxa (Apocalipsis 16:14, 16; 19:19-20:3).^{*} Armagedón pasatatsti, Supayas saxranakapasa manqhach ch'amakaru jan ukax mik'ayaru waranqa maranak jist'antatäniwa. Ukañkamasti, 144.000 alaxpachar saririnakawa jaqinakaru taripapxani ukatsti "Cristompiw waranqa mara" apnaqapxani (Apocalipsis 14:1-3; 20:1-4; Romanos 8:17). Kunjamti yatiqktanxa, Taripañ Uruxa janiw mä urukikiti, jan ukasti waranqa maranakäniwa, janiw mä urunaki jank'aki taripaskaniti.

Uka waranqa maranakanxa, Jesucristow 'jiwatanakarusaja-kirinakarusaja taripani' (2 Timoteo 4:1). 'Jakirinaka' siski uka arux Armagedón pasakipir "walja jaqinaka" sañ muni (Apocalipsis 7:9-17). Apóstol Juanax "jiwatanakarusti [...] jupan nayraqatapan sayt'ata uñjta" sarakinwa. Kunjamti Jesusax siskänxa, jiwatanakax jaktayatäpxaniwa (Juan 5:28, 29; Hechos 24:15). ¿Kuna luratanakapxarus uka jaqinakax taripatäpxani?

Apóstol Juanan uñjäwipanxa "libronakasti jist'aratänwa" ukat "jiwatanakasti luräwinakaparjam uñjatäpxänwa, kunjamti uka libronakan qillqatakänsa ukhamaru". ¿Uka libronakanxa jaqinakan nayra luräwinakapati qillqatäpacha? Janiwa. Janiw nayra juchanakaparjama, mä arunxa, jan jiwkasin juchanakarjam taripatäpkaniti. ¿Kunats ukhamaniw sistanxa? "Khititix jiwki ukax juchatxa jithiqtatäxiwa" siw Bibliaxa (Romanos 6:7). Jaktanirinakan juchanakapaxa chhaqtayatäxaniwa. Ukhamasti, uka libronakanxa Diosan machaq yati-chäwinakapaniniwa. Wiñay jakañatakixa, jaktanirinakasa, Armagedón pasirinakasa Diosan uka kamachinakarjama sarnaqapxañapawa. Uka waranqa maranakanwa Jehová Diosax yaqha machaq kamachinakamp uñstayani. Ukhamatwa, sapa maynix uka *Taripañ Urun* sarnaqataparjam uñjatäni.

^{*} Armagedón tuqit juk'ampi yatxatañatakixa *Perspicacia para comprender las Escrituras*, vol. 1, 680, 681, 1086, 1087, jananakwa uñxatäta, ukatsiti *Adoremos al único Dios verdadero*, sat libron 20 jaljap uñxatäta, uka pä libronakasti Jehová Diosan Qhanañchirinakapan español aruta luratawa.

Taripañ Urunxa, millón millón jaqinakawa ukhaki Diosan munañapatxa yatiqañ qalltasipkani, ukat ukhamarjamaw sarnaqapxarakini. Ukatakixa, waljaniruw taqi chiqan yatichasini. Ukhamasti, “jaqinakax yatiqapxaniwa kunatix chiqapäki ukxa” (Isaías 26:9). Ukampisa, janiw taqinixa Diosan munañapxa lurañ munapkaniti. Isaías 26:10 siwa: “Ñanqha jaqinakat khuyapayaskäta ukasa, jupanakax janipuniw chiqapänxa yatiqapkaniti; aski jaqinakan uraqinakapansti sinti qhurunakarakiw tukupxi, janirakiw [Jehová] Tatitun jach’a kankañapsa yäqapkiti” sasa. Uka ñanqha jaqinakaxa jan mayampitakiw tukjatäpxani uka Taripäw Urunxa (Isaías 65:20).

Kunapachati Taripañ Urux tukusxani ukhaxa, jakaskir jaqinakax kunatix chiqa jakäwiki ukan jakasxapxani, jan juchan chiqa jaqinakjama. Ukhamasti, Taripañ Urunwa chiqap jaqinakäxanäni, kunjamäpkäntix Adanasa Evasa janir juchachasisax ukhama (1 Corintios 15:24-28). Ukatsti mä qhip qhipa yant’aw utjani. Ukatakisti, Supayaw antutatäni jaqinakaru mä kutimpi yant’añapataki (Apocalipsis 20:3, 7-10). Supayar jan ist’irinakaxa aka profecian suma phuqasiwipwa uñjapxani: “Aski jaqinakax uraq katuqapxani, wiñayatakiw ukan jakapxarakini” (Salmo 37:29). Jisa, ¡Taripañ Uruxa chiqa chuyman jaqinakatakixa mä suma jach’a bendicionapuniwi!

Bibliankir profecianakanxa 1914 maraxa wakisiriwa

JANIR 1914 maräkipanwa, Bibliat yatiqirinakaxa, uka maranxa kunayman jach’a luräwinakaw pasani sasaw yatiyapxatayna. ¿Kunas pasañapäna? ¿Kunanakasa 1914 marax wali wakisiritap uñachayistu?

Lucas 21:24 uñxatañäni, Jesusax siwa: “Yaqha markat jutirinakaw Jerusalén markxa taksupxani, kunapachkamati uk lurañatakix tiempox churatäki uka horaskama” sasa. Jerusalem Judá markan capitalapänwa. Ukanwa David reyín wawanakapax apnaqapxiritayna (Salmo 48:1, 2). Uka apnaqirinakaxa janiw yaqha markanak apnaqirinakjamäpkänti, Jehová

“Tatituna tronopana” qunt’atäpxänwa, mä arunxa Diosan utt’ayat apnaqirinakapxänwa (1 Crónicas 29:23). Ukhamasti, Jerusalenax Jehová Diosan apnaqäwipäkaspas ukhamänwa.

Ukhamasti, ¿kunapachas markanakax Diosan Apnaqäwipar takisipxapachänxa? ¿Kunjamsa? 607 nayrür pacha (n.p.) maranwa, kunapachatix babiloniankirinakaxa Jerusalén markar tukjapkäna ukhawa Diosan Apnaqäwipxa taksupxatayna. Uka maratxa David reyin wawanakapaxa janiw Jehová “Tatituna tronopana” jan ukax apu qunuñan qunt’asxapxänti (2 Reyes 25:1-26). ¿Wiñayatakiti Jerusalén markarux “taksupxani”? Janiwa, kunattix Gabriel sat angelaxa Jehová “Tatituw juparux [Jesusarux] reyt utt’ayani nayra Davidarjama” sataynawa (Lucas 1:32, 33). Ukhamaxa Jerusalén markaxa janiw ‘taksutañapäxänti’, Jesusaw Apnaqirit utt’ayatäñapäna.

¿Kunapachas ukax pasäna? Yaqha markankirinakaw (jan judiöpkis ukanakaw) mä qhawqha tiempo apnaqapxani sa-

“PAQALLQ MARANAKA”

2.520 maranaka

606 maranakamp 3 phaxsimpi

607 n.p. octubre phaxsita, 1 n.p.
maran 31 uru diciembre phaxsikama

1913 maranakamp 9 phaxsimpi

1 j.p. enero 1 uruta, 1914 marana
octubre phaxsikama

607

◀ n.p. j.p. ▶

1914

*“Yaqha markat
jutirinakaw Jerusalén
markxa taksupxani”*

*Jehová “Tatituw juparux
[Jesusarux] reyt utt’ayani
nayra Davidarjama”*



taynaw Jesusaxa. ¿Qhawqha tiempüñapänsa? Uka tuqitxa Daniel libro pusi jaljanwa sum qhanañchasi. Nabucodonosor sat Babilonia apnaqiriw mä profecía samkasitayna, uka tuqitwa ukanx parlaski. Mä jach'a quqwa khuchuqapxäna, ukat uka troncopatxa mä jisk'akwa jaytapxäna, jan jiltañapataki-xa hierrompi cobrempiwa ñach'apapxäna, ukhamwa samkapanxa uñjatayna. Ukatsti mä angelawa akham sarakina: ukasti "paqallqu maranakarakipan" sasa (Daniel 4:10-16).

Biblianxa yaqhipäwjanakanxa quqanakar uñtayataw apnaqäwinakaxa (Ezequiel 17:22-24; 31:2-5). Jerusalén markankiri apnaqirinakax Jehová Diosan utt'ayatänwa. Ukhamasti, Diosan Apnaqäwipas khuchuatäkaspa ukham sañ muni uka liwinuqat jach'a quqaxa. Ukatxa, Jerusalén markxa 'paqallqu maranakaw' "taksupxani" sarakitaynawa. Uka maranakax janiw 12 phaxsinakani aliq maranakäkanti jan ukasti profecía maranakänwa. Ukhamasti, ¿qhawqha tiemposa pasañapäna?

'Kimsa mara chikanixa' 'waranqa pä pataka suxta tunka urunakaniw' siw Apocalipsis 12:6, 14 jisk'a t'aqanakanxa. Ukhamax "paqallq maranakaxa" mä ukhat mä ukhampiñapawa, mä arunxa 2.520 urunakäñapawa. Jichhasti, Jerusalén t'unjapkän ukat aksarux janiw 2.520 urunakak Jerusalenarux takisipkänti. Ukhamasti uka profeciäxa, janiw juk'a tiempónaki phuqasiñapäkanti. Números 14:34 ukat Ezequiel 4:6 qillqatanak uñxatañäni, ukanxa akham siwa: "Sapa urusti mä mara[w]" sasa, ukhamax profecía "paqallq maranakaxa" 2,520 *maranak* sañ muni.

607 n.p. octubre phaxsina, kunapachatí babilonionakax Jerusalén t'unjapkäna, ukat David reyin wawanakaparus tro-not apaqapxäna, ukhawa 2.520 maranakax jakhusiñ qalltäna, ukasti 1914 marakamarakiwa. Ukhaw markanakar "churatäki" uka "tiempox" tukusxäna. Ukharakiwa Diosax Jesusar Apnaqirit alaxpachan utt'ayäna (Salmo 2:1-6; Daniel 7:13, 14).*

* 607 n.p. octubre phaxsit 1.914 marakamaxa 2.520 maranakawa pasawayi. Jerusalén markaxa 607 n.p. maranwa t'unjat uñjasina, uka tuqita juk'ampi yatxatañatakixa *Perspicacia para comprender las Escrituras*, sat jach'a libro 584 janat 603 janakama "Cronología" sat uñxatäta, uka librosti Jehová Diosan Qhanañchirinakapan español arut luratawa.

Alaxpachankir Apnaqirjam ‘kutt’anī’ ukhasti ch’axwāwina-kaw utjani, ukat awtjayasiñanakampi, uraq khathatinakampi, wali jach’a usunakampiw utjani sasaw Jesusax satayna (Mateo 24:3-8; Lucas 21:11). Ukaxa phuqasiskapuniwa. Ukanakax ya-tiyistuwa Diosan Apnaqāwipaxa 1914 maranpuni alaxpachan utt’asitapa, ukatsti aka ñanqha pachan tukusiñapataki ‘qhipa urunakaxa’ uka maranwa qalltarakina (2 Timoteo 3:1-5).

¿Khitisa Miguel sat arcangelaxa?

BIBLIANXA mä qhawqha chiqanakwa Miguel sata angelaru-xa aytasi. Uka qillqatanakanxa uka angelax kuns luraskapu-niwa. Daniel libronxa, ñanqha angelanakampiw nuwasiski; Judas qillqatanxa Supayampiw jiskhisiski, ukat Apocalipsis libronsti Supayampi ukat saxranakampiw nuwasiskaraki. Ukhamasti, Jehová Diosaruxa arxatapuniwa, ukatsti Diosan uñisirinakaparuxa saykatapuniwa. Sutipaxa, “¿Khitisa Dios-jamaxa?” sañ muni, ukhamatwa Miguelaxa sutiparjama sar-naqi. Jichhasti, ¿khitirakipacha Miguelasti?

Janira uk yatxatkasaxa ak amuyt’añäni: yaqhipanakaxa pä sutinipxiwa. Jacob chachaxa Israel satarakinwa, ukat após-tol Pedroxa Simón sutimpi uñt’atarakinwa (Génesis 49:1, 2; Mateo 10:2). Ukhamarakiwa, Miguel sutixa Jesucriston yaqha sutipaw siw Bibliaxa, janira aka Uraqiru jutkāna ukhawa uka sutimpi uñt’atānxa, ukat alaxpacharu sarxāna ukat aksaru-wa ukham sutimpi uñt’atarakixa. Kunatsa ukhamaw sistan-xa, ukatakixa Bibliata juk’ampi yatxatañäni.

Arcángel. Miguelax “arcángel pachpa[w]” siwa Diosan Aru-panxa (Judas 9). Aka arux “jilír ángel” sañ muni. Ukhamas-ti, Miguelax *mä* arcángel satawa, jupa sapakiwa arcangelaxa. Ukatsti Biblianxa janipuniw “arcangelanak” siskiti jan ukas-ti “arcángel” sakiwa, mayakikaspas ukhama. Ukatxa, Jesusas uka arcangelākaspas ukham siwa 1 Tesalonicenses 4:16, ukat-xa kunsa jaktanit Jesusax lurani uka tuqitwa ukanxa akham saski: “[Jesucristo] Tatit pachpawa alaxpachat saraqanini taqi

munañan arupampi, [mä arunxa] arcangelan arupampi” sasa (*Jesucristo Tatitusan Machak Testamentopa*, 1974). Aka jisk’a t’aqanxa Jesusawa arcángel arupampi saraqani siwa. Ukhamasti, akanxa qhan amuyt’ayistu, Jesusawa arcangelaxa.

P’iqiñchiri. ‘Arcángel Miguelasti angelanakapampi sayt’asi-sinxá, Dragonampi angelanakapampiwa nuwasina’ siw Bibliaxa (Apocalipsis 12:7). Ukhamasti uka Miguelaxa chiqap angelanakar p’iqiñchiriwa. Apocalipsis libronxa Jesusax chiqap angelanakaru p’iqiñchirjam aytasitarakiwa (Apocalipsis 19:14-16). Ukat apóstol Pabloxa qhanpunwa akham säna “Tatitu Jesusax [...] alaxpachat nina taypina ch’amani angelanakapampi” jutani, sasa (2 Tesalonicenses 1:7). Ukhamasti Bibliaxa, “Miguelasti angelanakapampi” siwa, ukatxa Jesusax “ch’amani angelanakapampi” sarakiwa (Mateo 13:41; 16:27; 24:31; 1 Pedro 3:22). Diosan Arupanxa janipuniwa chiqap angelanakax pä tamäkaspasa ukham parlkiti, mayaxa Jesusampi p’iqiñchatäkaspasa ukat mayniraki Miguelan p’iqiñchatäkaspasa ukhama. Ukhamasti, Miguel arcangelaxa alaxpachana apnaqirita utt’ayata Jesucristowa.*

* Miguel sutixa, Diosan Yuqapan yaqha sutipawa, uka tuqita juk’ampi yatxatañatakixa *Perspicacia para comprender las Escrituras*, vol. 2 jach’a librotwa, 386 janat 387 janakam uñxatäta, ukasti Jehová Diosan Qhanañchirinakapan español aruta luratawa.

¿Kunas “Jach’a Babiloniaya”?

APOCALIPSIS libroxa walja uñacht’äwinakatwa parli (Apocalipsis 1:1). Mä q’añu lurir warmitwa parli, paraparusti “Jach’a Babilonia” sas qillqaxatatawa siwa. Ukatxa ‘akapacha markanaxaru, ukhamarak taqi casta parlani markanaxaru’ qunxatataw sarakiwa (Apocalipsis 17:1, 5, 15). Janiw mä chiqpach warmix ukham lurkaspati, ukhamasti Jach’a Babiloniaya mä uñacht’äwiwa. ¿Ukhamax kun sañs munpacha?

Apocalipsis 17:18 qillqatanxa “kawköri markati aka uraqina taqi reynakaru apnaqkis uka markawa” sasaw qhanañchi.

“Marka” aruxa amuyt’ayistuwa jaqinakani mä utt’ayat markäta. Ukatxa, uka ‘markaxa aka uraqina taqi reyinakaruw apnaqi’. Ukhamasti, Jach’a Babiloniaxa Uraqpachxaru mä jach’a apnaqäwiwa. Ukampisa, ¿kuna kasta apnaqiripachasa? Yupaychäwinak tuqit apnaqiriwa. Kunatsa ukhamaw sistansa, ukatakixa Apocalipsis librota mä qhawqha jisk’a t’aqana-ka uñxatañäni.

Jach’a apnaqäwinakaxa: política tuqita, alakipanak tuqita jan ukax yupaychäw tuqitäspawa. Jach’a Babiloniaw janiw política tuqitäkaspata, kunattixa, “akapachankir reyinakasti”, ‘jupampiw juch lurapxi’ siw Diosan Arupanxa. Jach’a Babiloniaw akapachankir apnaqirinakampiw jucha luri siski ukaxa, amtanakapsa mayacht’asipkaspa ukham sañ muni. Ukatwa ‘q’añu warmi’ sataxa (Apocalipsis 17:1, 2; Santiago 4:4).

Kunapachatí uka warmixa tukjatäkani ukhaxa “khitinakatix uka markampi alakipa lurapkäna”, ukanakaxa jakhusipxarakiniw jan ukax jachapxaniw siw Bibliaxa. Ukhamasti, Jach’a Babiloniaw janiw alakipa lurañ tuqit mä jach’a apnaqäwikiti. Ukatsti, akapachankir apnaqirinakasa, alakipirinakasa ‘jayatakwa’ uñch’ukipxani siw Bibliaxa (Apocalipsis 18: 3, 9, 10, 15-17). Ukhamaxa Jach’a Babiloniaw janiw akapacha político apnaqirikisa ni alakipa luririkisa, jan ukasti yupaychäwi tuqit mä jach’a apnaqäwiwa.

Yupaychäw tuqita jach’a apnaqirítapxa janiw ukhamatak yatktanti, jan ukasti, qhanpunwa akham sarakixa: ‘Taqi marakanakarusti layqasitanakampirakiw sallqji’ sasa (Apocalipsis 18:23). Taqi layqasiñanakaxa k’ari yupaychäwinakata, saxranakatwa juti. Ukatwa Bibliaxa uka Jach’a Babiloniaruxa akham sas sutichi: “Supayanakan utjäwipa” sasa (Apocalipsis 18:2; Deuteronomio 18:10-12). Ukatsti, uka jach’a apnaqäwixa chiqa yupaychäwiruxa uñisiwa, “Diosat parlorinakaruw” wal arknaqaraki (Apocalipsis 18:24). Walpunwa chiqa yupaychäwiruxa uñisi, “Jesucristot qhanañchirinaka[ruxa]” awisax jwayiwa (Apocalipsis 17:6). Ukhamaxa, Jach’a Babiloniaw, Jehová Diosar kutkatasiri uraqpachan apnaqri taqi k’ari yupaychäwinakawa.


¿Diciembre phaxsinti Jesusax yurpachäna?

KUNAPACHASA Jesusax yuritayna uka tuqitxa janiw Bibliax sum qhanañchkiti. Ukampisa diciembre phaxsina janiw yurkataynati sañatakixa, Bibliaw sum amuyt'ayistu.

Jesusax yurkäna uka Belén markanxa, ¿kunjam tiempo-sa diciembre phaxsixa? Judionakan calendariopanxa kislev sat phaxsiw utji, jiwasanakatakixa noviembre ukat diciembre phaxsinakaspawa, ukapachasti wali thayawa ukhamaraki jallusa wal purinti uksa tuqinakanxa. Ukatsti tebet phaxsiw utjaraki, ukasti jiwasanakatakix diciembre ukat enero phaxsinakarakispawa, ukapachasti sinti thayapuniwa ukat awisax patanakanxa qhunuw qhununti uksa tuqinakanxa. Bibliax kamsis uk uñjañäni.

Kislev phaxsixa wali thayänwa ukhamaraki jallus wal-rak purintäna sasaw Biblia qillqiri Esdrasax qhanañchi. “Llä-tunka [kislev] phaxsita pä tunka urunaka saraqataru[xa]”

*Jesusax yurkatayna ukapachaxa, uwij
awatirinakaxa pampanwa arumanakax
uwijanapak uñjasipkäna*



Jerusalén markaruw waljani tantachasipxatayna ukat jupana-kasti wali 'khathatt'apxäna jallun purintatap layku'. Ukatxa, uka jaqinakax uka tiempotxa akham sapxänwa siw Esdrasaxa: "Ukhamarus jallux puriskarakiwa; ukhamarus janirakiwa callerux qhiparapkiristi" sasa (Esdras 10:9, 13; Jeremías 36:22). Ukhamasti, amuyatatxa diciembre phaxsi jak'achasinxipan-xa, awatirinakaxa uwijanakap anthapisxapxpachänwa, aru-manakaxa jan anqankapxapataki.

Ukampisa, Jesusax yurkatayna uka arumaxa uwij awatiri-nakax pampanakanwa uwijanakap uñjasipkäna siw Bibliaxa. Ukhamawa, qillqiri Lucasax sarakiwa: "Belén jak'ansti awatirina-kaw utjäna, jupanakasti pampan arumax ovejanakap uñ-jasipkäna" sasa (Lucas 2:8-12). Janiw urukix awatipkänti, jan ukasti pampan *jakasipxirina*. Uwijanakapax pampankänwa *arumanakaxa*. Diciembre phaxsix wali thayächinxaya ukha-maraki jallux walxay purintarakchinxä, ¿ukhamasti aruma-nakax diciembre phaxsinxa pampankapxaspänti awatirina-kaxa? Janiwa. Ukatwa, kunapachati Jesusax yuritayna ukapa-chax janiw diciembre phaxsinkkänti, yuriwipax kunjäm tiemponkänsa ukwa ukax sum qhanañchi.*

Diosan Arupaxa qhanwa sixa Jesusax kuna urusa jiwatayna uka tuqitxa, ukampisa yuriw urupatxa janiw sum qhanañch-ki. Ukasti Salomón reyín arunakapwa amtayistu: "Naciña uruta sipansa, jiwaña uruwa juk'amp askixa" (Eclesiastés 7:1). Kunatsa Biblianxa Jesusan yuriw urupat jan qillqatäki, ukam-pisa sarnaqäwipampita jiwäwipampita walja qillqatanakaw utjaraki, ukwa uka qillqatax qhanañchistu.

* Juk'ampi yatxatañatakixa, *Razonamiento a partir de las Escrituras* sat qillqatwa uñxatarakisma, 111 janat 114 janakama, ukasti Jehová Diosan Qhanañchirinakapan español aruta qillqatawa.

¿Fiestanaka amtañasäspati?

JANIW Bibliaxa yupaychäwinakan fiestanakapxa uñstaykiti, janirakiw yaqha ukham fiestanakaxa akapachan amtaski

ukanaksa uñstaykarakiti. Ukhamasti, ¿kunjamatsa uka fiestanakaxa utji? Biblioteca jan ukax libronak mayt'ir utanaka markaman utjchixa, ukanwa uñxatäta kawkitsa markaman fiestanakapaxa uñstani ukanakxa. Mä qhawqhanak uñjañäni.

Semana Santa. Jesusan jiwäwipwa ukat jaktäwipwa ukapachax amtasi sapxiwa, ukampisa Diosar jan yupaychir luräwinakwa lurapxi, sañäni, santanak kallnaqapxi. *Las Grandes Religiones Ilustradas* sat qillqataxa, uka tuqitxa akham qhanañichi, janir Cristox Uraqir jutkäna ukhawa, Babilonia markankirinakaxa “uñnaqanakaru wali askichsupxäna [...]. Wali jila valoran isinakampiwa isthapiyapxäna, kunkarusa collaranakampiw warkuntapxäna, pulseranakampi anillona-kampiwa amparanakaparuxa uchapxäna; suma luratäwjana-karuwa utt'ayapxäna ukat kallnaqapxäna” siwa.

Machaq Mara. Machaq Marxa sapa markanwa mayj mayja amtapxi. Kunjamatsa uñstäna uka tuqitxa akham siwa mä qillqataxa: “Julio César Roma markan jach'a apnaqiriwa enero phaxsit mä uru saraqataruxa Machaq Mara uñstayatayna khä 46 nayrür pacha marana. Roma markachirinakasti punkunakana ukat qalltanakana Jano diosaparuwa uka urux uruyapxiritayna. Enero phaxsixa [*Januarius* satarakiw latín arunxa] Jano sutwa katuqäna, ukasti pä ajanuninwa: mä tuqixa nayraqataruw uñch'ukina, maysa tuqisti qhipa tuqirakwa uñch'ukirakina” (*The World Book Encyclopedia*). Ukhamasti, Machaq Mara uruyañasti Diosar jan yupaychir jaqinakan costumbrenakaparjama uñstayatawa.

Yaqha fiestanaka. Janiwa taqpach fiestanakat parlksnati. Ukampisa, mä jaqir jach'añchasa jan ukax kuna institucionaru jach'añchasa fiestachañaxa Jehová Diosatakixa janipuniw walikiti (Jeremías 17:5-7; Hechos 10:25, 26). Ukhamarusa, yupaychäwin mä fiestapaxa walispawa jan ukax janiw walikaspati sañatakixa wakisiwa kunjam uñstayatasa uk yatiña (Isaías 52:11; Apocalipsis 18:4). Kuntix 16 jaljan uñjaniwaytanxa, Biblian uka yatichäwinakapawa yanapt'ätamxa kamsis Diosaxa fiestanakaru sarañatxa.

¿Juk'amp yatjjatañ munasmati?

Jehová Diosan Qhanañchirinakaparuw **www.jw.org/ay**
sat cheqar qellqasma.



Jan kun mayisakiw Bibliat yatichapjjerisma.

